

10-5
10-10-12

6


7-b

36



6-7-8-36

~~9-1-2-3-4-5-6-7-8-9~~



IACOBI LO

DOICI STRE

BAEI RHE-
MENSIS

DE

Electione, & Oratoria collo-
catione uerborum,
libri duo,

AD

IOAN. VENATOREM
CARDINALEM.

ex libris

*F. Angeli
pro Bebl.*

VIRTUTE DVCE,




COMITE FORTVNA.

S. M. S. Minerva

LVGDVNI APVD SEB.
GRYPHIVM,

1541.





IACOBI LO

DOICI STREBAEI RHE
 mensis de Electione, & Oratoria colloca-
 tione uerborum, libri duo, ad Ioan-
 nem Venatorem Cardi-
 nalem.

PRAEFATIO.



RANT in manibus nostris, san-
 ctissime Cardinalis, Commentaria
 quaedam in Rhetorica Ciceronis
 ad Q. Fratrem, quum tuo impe-
 rio Lutetiam Parisicorum relinque-
 re, Condetum demum tuam petere
 iussi sumus. Quum procul ab urbe
 propinquos tuos Oratorias artes Philosophiamq; doce-
 remus, nec satis multa librorum copia ad operis incepti
 confectiōē suppeteret, commentarijs intermissis, ne nihil
 ageremus interea, hunc libellū de delectu & oratoria col-
 locatione uerborum, succisiuis horis effecimus. Hanc au-
 tem materiam potissimum legimus è multis, quòd in arte
 dicendi iam proposita nobis ad illustrandum, nihil esse
 uidebamus utilius hominibus nostris, quàm rationes &
 uirtutes eloquendi. Illud unum pulcherrimū, & summo-
 pere petendum, studiosis artium bonarum deesse maxi-
 mē, & iam multis aetatibus defuisse. Quid enim aliud nō
 in orandi facultate modò, sed etiam in alijs artibus desic-
 cratur? Floret Gallia scientia rerum maximarum. Qui
 poetarum uersus dilucidè exponant, qui pulchrè narrent
 historias, qui differant acutè, qui ad naturæ causas pe-

netrent subtiliter, qui tutò medeantur corporibus, qui mathematicas demonstrationes sciant, qui bene tradant præcepta morum, qui respondeât de iure ciuili atq; pontificio, & causas agant, qui diuina oracula doctè, sanctè, pieq; interpretètur, non modò singulis Franciæ populis, sed etiam magnis in ciuitatibus propè innumerabiles inuenias. Qui uerò purè, usitatè, propriè, ornatè eloquantur, admodum paucos. Sic in omnes disciplinas inuasit fœda ac spurca barbaries, sic egit in præceptis linguæ Romanæ puritatem & ordinem, ut uix millesimus quisque eorum qui inter doctos haberi uolunt, rectè, dilucidè, compositè dicat. Nam & ex ijs paucis qui emendatè loquuntur, altera pars adeò affectat insolens & obscurum genus, adeò impropria & inusitata uerba permiscet, ut quid agat uerbis, quid sibi uelit, non intelligant eruditi. Vitium grande quidem tam commune gentium bonum, sermonem tam latè patentem, linguam tot rerum naturæ, tot scientiarum interpretem, miseris modis uiolauisse. Sed hoc malū temporis, non huius ætatis omnino fuit. Quamobrem neminem arguo qui se tueatur illa consuetudine aut potius abusu loquendi. nec illos docere uolo, quos uel senes, uel alijs rebus occupatos discere Latinè seruum est. Nec istud quidem si facere uelim, satis commodè possim. Sed ut renascentibus literis bonis, iuuentus etiam nobis monentibus assuescat optimo sermoni, cuiusmodi uerba legat, qua ratione stylum formet, qua arte materiam uerbi fiat oratione, quos ex omnibus imitetur, perspicuè (ni fallor) ac breuiter ostendi. Verborum differētias omneis, quas neq; Cicero, neq; Quintilianus, neque posteriorum quisquam apertè distinxerat, in ordines suos digessi: quodq; ad docendū plurimum confert, usus sum frequen-
tibus

tibus exemplis. De natura & coagmētatione syllabarum disputavi copiose, & (uerè dicam) multo copiosius, quàm eorum qui uulgo leguntur, rhetorum quisquam. De numerosa concinnitate, de pedibus rhythmicis, de modis aptæ dictionis, de generibus eloquendi egi equidem, si nō grauius aut uerius (nec enim mihi quicquam arrogo) explicatius tamen & apertè magis: id quod facîle iudicabunt ij qui nostra etiam legere ipsi, uel suis praelegere uolent. Hoc quicquid est elucubrationis, an amplissimo tuo nomini cōsecrarem, diu multūq; dubius apud me cogitavi. Dissuadebāt rationes ualidae multae, & in illis tres maximè: dignitatis tuæ suspicienda maiestas, extrema tenuitas nostri libelli, deinde ea quæ uix te respirare sinunt occupationes. Quid hoc erit, dicebam, ad uirum primaria nobilitate conspicuum, persugium diuitum & egenorum, amīcissimum primoribus, intimum Christianissimo regi, charum ciuibus atq; peregrinis, clarum praefectura Lexouiae ciuitatis, plurium sodalitatū praefectum, pontificem longæuum, summè uerendum Cardinalem, hominem uigilantia, pietate, innocentia, liberalitate, uirtute praestabilem, quid erit hoc ad uirum tantum? At etiā parua recipit ille uir summa praeditus humanitate. Quo pacto? cui non est otium non dico legendi, aut tenendi, aut saltem audiendi quid sit, sed ne recipiendi quidem. adeo magna multaq; laboriosum principem distrahunt huc illuc negocia. In singulos dies precibus & sacris operam dare, Regi non deesse, sexcentas audire postulationes, legere multas literas, scribere non paucas, regere rem familiarem, tam magnam sustinere domum, excipere uiros honestos, tractare notos & ignotos, opem ferre amicis, res pauperum & inopum curare, iter subinde

facere, plus decem magistratus administrare, in singulis obire officia diuersa. hæc omnia pauca ne tibi negocia uidentur, nisi rebus tuis premas aliunde nimis ac nimis oneratum? Hæc mihi ueniebant in mētem amplissime Cardinalis, & aliquid tibi offerre cupientem remorabantur. Sedenim hic liber domi tuæ natus erat. Condeti uenerat in lucem, paulum suscitatus amœnitate loci, quo tibi perpetua maceries præter castellum & irriguam fossam, nec procul duas ædes elegāteis, ambit syluam molli colle circuncinctam. In media uelle prata peramœna, duobus piscu-
lentis fluminibus intercepta, ducentis & pluribus depasta ceruis: cui loco celebrata carminibus Tempe comparari non ægrè ferant. Illic igitur satus apud te, tuus quodammodo factus erat. Quòd si fortè ad alium, non ad te migrasset, iure uideretur esse fugitiuus. Et cui potius studiorum fructum mitterem, quàm ei qui propter studia literarum me legit, in suos recepit, humanissimè tractauit, mercede sustinuit, spe fortunæ melioris erexit? Si tui omnes, apud quos ago, in unum te coniiciunt oculos ac mentes, & omnium rerum suarum faciunt te potentem, non & idem me facere oportet? At res oblata nihil est ad illam dignitatem. Certè. At eiusmodi munuscula ex officina Musarum petita, nunquam aspernati sunt honestissimi uiri etiam illiterati, non eximij principes, non reges, non imperatores, nō summi pontifices, non dii deæq; immortales. An illud est paruū & tenue, quod à deo profectum, homini concessum, perficit ne omnia consumat tempus edax? An uile precium literarū, quod unum memoriam ueterum seruat, & omnes omnium res & artes continet? Verū esto paruum siquid est meum: non illud ego tuæ maiestati comparo, sed tuo destinatum patrocini-
nio

nio committo. Non id augebit tuas curas nimium multas.
Nec enim sum usqueadeo rerum inscius, ut quæ documēta
iuuenibus in unum coegi, petam ut cognoscantur à te,
uel legātur. Non id quidem peto: sed illa tibi trado quasi
in clientelam, aut certè in adoptionem, ut splendore
sancti nominis illustrata, suis lectoribus ampliora uideā=
tur. Nihil est cur pœniteat uos Ecclesiæ Christianæ prin=
cipes huiusmodi adoptasse filios, qui post hæc uos
et scientiæ et uirtutis amatores fuisse te=
steniur. Sed iam tuis auspicijs nostram
de electione et oratoria colloca=
tione uerborum senten=
tiam explicem=
mus.

LIBRI PRIMI

CAPITA.

Cur pauci uerba deligere & contexere sciant. caput 1.

10.

Quanti sit oratio lectis uerbis & ordine digestis constituta. cap. 2. 12.

Qui fugiendi magistri. cap. 3. 18.

Qui fugiendi scriptores elegantiarum. cap. 4. 24.

Qui magistri, quique scriptores deligendi. cap. 5. 28.

Utri priores legendi, poetæ, an oratores. cap. 6. 31.

Sæpe diligenterque scribendum. cap. 7. 36.

Rudimenta componendi. cap. 8. 38.

Quæ pars Rhetoricæ prima discenda, quæ partitio uerborum, quæque ex illis aut legenda, aut repudianda. cap. 9. 48.

De uerbis sordidis. cap. 10. 55.

De uerbis inusitatis. cap. 11. 55.

De uerbis barbaris. cap. 12. 59.

De uerbis agrestibus. cap. 13. 61.

De uerbis humilibus. cap. 14. 65.

De uerbis sublimibus. cap. 15. 69.

De grauibz uerbis, & lenibus. cap. 16. 74.

De proprijs & assumptis, & quæ aliena dicuntur. cap. 17. 81.

81.

De uerbis ueteribus, & nouis. cap. 18. 88.

De uerbis sonantibus, & exilibus. cap. 19. 93.

De uerbis grandibus, & paruis. cap. 20. 104.

De uerbis uolubilibus, & tardis. cap. 21. 106.

De uerbis lenibus, & asperis. cap. 22. 110.

De uerbis integris, & corruptis. cap. 23. 114.

Præfatio

LIBRI SECVNDI

CAPITA.

Præfatio libri secundi.	117
Oratio alia soluta, alia uincta. cap. 1.	121
De oratione uincta, & ordine uerborum. cap. 2.	129
De uocaliũ concursione in coagmentatione. cap. 3.	134
De coagmentatione consonantiũ literarum. cap. 4.	143
De coagmentatione uocalium & consonantiũ. cap. 5.	161
Quæ figuræ coagmentationi subseruiant. cap. 6.	163
De concinnitate numerosa, & similiter desinentibus. ca- put. 7.	165
Vt sit oratio numerosa ex similiter cadētibus. ca. 8.	170
De paribus membris, & eorum numero. cap. 9.	173
Quæ sint contraria numerosa. cap. 10.	175
Quid numerus à concinnitate numerosa & à metro dif- ferat. cap. 11.	178
Qui pedes oratiōis, & qd à numero differāt. ca. 12.	182
Qui sit ordo pedum in extruendo numero. cap. 13.	184
Quæ uitiosa numeri textura. cap. 14.	200
Quæ de numero quæri expediat. cap. 15.	204
De ambitu. cap. 16.	209
Tria genera eloquendi, qui characteres dicuntur. ca- put 17.	216
De humili stylo. cap. 18.	219
De elocutione tenui. cap. 19.	225
De media figura. cap. 20.	232
De summo genere dicendi. cap. 21.	243
Quæ genera locis, temporibus, artibus, ingenijs, condi- tionibus mutata sint. cap. 22.	253

Cur pauci uerba deligere, & contextere sciant.

CAP. I.



V V M multa iuuentus hoc tempore Rhetorum præceptis, & Oratoria institutione formetur, multiq; homines ingenio summo stylû dicendi magistrum, & nunc in primis orandi partibus expetendum, diligenter exerceant: quærendum mihi uideatur, cur paucis admodum sit electio uerborû, rectaq; componendi ratio. Tres præcipuè causas reperio, cur tam paucis ea res faustè feliciterq; succedat. Vnam statuo inscientiam & audaciam eorum, quorum docendi munus est: alteram, discentium prauum in imitando studium: aliam, artis eius qua uerba deliguntur & collocantur, ignorantiam. Nam quum sine duce magistro nemo eloquendi uias rationesq; tenere possit, molientibus iter primus est error, quanuis arrogans, tamen incertus ignarusq; uiarum magister, qui relictis ultro ueterum oratorum uestigijs, regionum ignaros per anfractus & ambages atque salubras orationis reuocante natura trahit, recta declinat, praua temerè persequitur. Si quibus autem reperitur dux optimus, quales etsi paucos, tamè & fuisse & esse certum est, ex compluribus tamen uix unus aut alter rectà peruenit ad summam. Ductorem sequi piget, sua quisque trahitur uoluptate. Digrediuntur alij ad amœnitates orationis eius quam floridam & suauem esse falsò opinantur. Apuleios, & Baptistas Pios, quàm Casares atque Cicrones affectari & colere malunt. Alij nullo certo fine, nullaq; meta proposita, quò pes ducit, etiam per inuia ac deserta rapiuntur: & sine modo passim aberrare, hinc & illinc

uoculas

uoculas & inusitatas loquendi formulas excipere satius esse ducunt, quàm affluentem omnium rerum uerborumq; copiã de medio sumere. Alij poëtarũ more, quibus grandius aliquid & sonantius arridet, nitütur uelut in præruptas rupes, & in arduos montes: & quasi sublimes facti, tragicum nescio quid & cõfragosum personant. Hæc & similia uitia non semper eorum sunt qui docent, sed eorũ quoque qui ueræ disciplinæ impatientes, effrenata libidine ferüur. Non desunt autẽ, nec defuerunt unquam magistri & discipuli probi, qui ad optima contenderent: sed nemo adhuc satus familiaris fuit, qui compendiũ querentibus, digitum ad fontes intenderet. Quancquam enim Cicero multa, Quintilianus haud pauca de collocatione uerborum scripta reliquerunt, eò tamen uterque prouectus est, quò non faciliẽ debiliores, si nemo porrigat manum, peruenire possint. Est enim (ut ait Cicero) locus late patens de natura usq; uerborum. De quo neuter ample & copiosẽ disputat. Res est obscura cõpositio, si nõ illustratur exemplis. Alter autem idonea apud Latinos nõ reperit, alter Ciceroniana sæpe fugit ut molesta. Si quid in hac re possumus (minimum autem, uel nihil est quod possumus) at si quid possumus, studiosis orationum consultum uolumus. Illos amatores sui tam superbè gloriosos, quandoquidem id maxime uolunt, labi, errare, falli, sinamus. Non audient hos monitus, nec ista præcepta suspicient, qui Apuleium per florida secuti, deseruere Ciceronem. Legant putidos flores. Habeant congestam insolentium uerborum supellectilem. Notatos teneant communes locos. Circunferant enchiridia quedam, unde magnam uim locutionum promant. Nos ueterum prudẽtia, consilio, autoritate nitamur, qui cõsent eos stultos & insanos

sanos fuisse, qui literis mandarunt cogitationes suas, nullam facultatem orationis habuerunt.

Quanti sit oratio lectis uerbis & ordine digestis constituta.

CAP. II.

DE grauitate sententiarum, de figuris & schematis ingenti uoluminum magnitudine comprehensis, in praesentia non ago. Nunc hoc propono, quod est huius instituti, bonitate uerborum, & eorum digesta compositione nihil esse in oratione laudabilius, nihil in quo magis neruos omnes intēdere debeamus. Ab hac uirtute, eloquentia, non ab inuentione aut à rerū dispositione nomen accepit. Eloquentia ab elocutione dicta est, & ab eadem orator, & oratio: quæ non aliud est, quam oratoris elocutio. Nec is cui dicēdi facultas inesset, aut inuentor, aut dispositor, sed eloquēs appellatus est, propterea quod inuentio & dispositio multorum communis, non tam artis esse, quam prudentiæ cuiusdam uidetur. Elocutio oratoris est propria, & arte obseruationeq; ferè tota constat: res adeo rara, adeoq; difficilis, ut M. Antonius in libello quodam scripserit, disertos se uidisse multos, eloquentem omnino neminem. Optimū dicēdi genus aut nullis adhuc, aut perpaucis contigisse argumēto est, quod in arte collocādi Brutus et Caluus ausi sunt reprehēdere Cicronē, cuius dictionem nemini mortalium imitabilem hodie complures existimant. Sed illud perfectum summūq; , si supra nos est, nihil quidem ad nos. Quod possumus, id assequamur, & elocutionem quauis tenuem & minutam, modò probam rectamq; , præclarum quiddam esse profiteamur. Compositionē (Quintiliani uerbis utar) eruditissimo cuique persuasum est ualere quamplurimum, non
ad de-

ad delectationem modò, sed ad motum quoque animo-
rum: Primum, quia nihil intrare potest in affectum, quod
in aure uelut quodam uestibulo statim offendit. Deinde
quòd natura ducimur ad modos. Neque enim aliter eue-
niret, ut illi quoque organorum soni, quanquam uerba
non exprimunt, in alios tamen atque alios motus duce-
rent auditorem. Quòd si numeris & modis inest quedam
tacita uis, in oratione est uehementissima. Quantumq; in-
terest, sensus idem quibus uerbis effertur, tantum uerba
eadem qua cõpositione uel in exitu iungantur, uel in fine
claudantur. Hactenus Fabius. Cicero in Bruto: Nec res
ulla plus apud animos hominum, quàm ordo & ornatus
orationis ualet. Idem in Oratore: Quauis suaues gra-
uesq; sententiæ, tamen si inconditis uerbis effertur, offen-
dent aures, quarum est iudicium superbissimum. Mutila,
hiulca, redundantia, confragosa, quæ intersistunt, quæ ma-
lè connectuntur, quæ claudicant, quæ dissenteanea sunt,
aurium sensum molestè feriunt, animum offendunt, uim
orationis interturbant, nec quenquam diu retinere pos-
sunt, nisi fortè Midas illos, & asinos ad lyrā, qui se quæ-
rere sententiæ, uerba modulata repudiare gloriantur. In-
genia liberaliter instituta, quæ naturæ bona non corru-
pta, sed aucta uoluerunt, specie orationis & decore capi-
untur, modulandi iucunditate recreantur, & illā qua ser-
mones hominum, qua libri commendantur, qua suauis est
eloquentia, non aspernantur uoluptatem. In compositio-
ne uerborum, ut in muro lapidum, decor est, & pulchri-
tudo, qua non aliter oblectantur aures, atque figuris opti-
mis oculi. Placet elegantia uerborum bene digestorum,
sicut partium corporis inter se competentium. Quumq;
perinde atque flumen alueo prono, compositè fluit ora-
tio,

tio, demulcet audiētem, & sine ullo tædio quasi iucundo nauigio per sentētiarum fluuium perducit ad finē. Aptaueris pedes eius, aptè decenterq; sicuti bellator equus in curriculo feretur. Composueris numeros, ut certator in palestra, sic pulchrè fortiterq; pugnabit. Modulatus fueris ambitus & conclusiones, symphonicorum modos omni suauitate superabit. Quis (inquit Cicero) cantus, moderatæ orationis pronuntiatione dulcior inueniri potest? Quod carmen artificiosa uerborum conclusione aptius? Quis actor in imitanda, quàm orator in suscipienda ueritate iucundior? Quòd si quis adeò seuerus & immanis est, ut nulla uoluptate capiatur, poterit ne contemnere dicendi perspicuitatē? Nihili faciet uires & impetus orationis? Oratio quanto compositior, tanto perspicua magis atque dilucida. Nam quemadmodum sensum confundit indigesta uerborum perturbatio, quod hyperbaton uocatur, ita claritatem fert ordine composita collocatio. Cur Cicero tam facilis intellectu uidetur, etiam quando sublimis est? Scit nimirum quo quodq; loco uerbum statuendum sit. Cuique suum assignat ordinem. Cur pleraque indoctissimorum sententiæ non capiuntur animo? Omnis eorum dictio contorta est. Si igitur summa uirtus orationis est claritas, & ea uehementer collocatione splēdescit, ad summas orandi uirtutes accedat proximè collocatio, necesse est. Eadē uires addit orationi. Ut enim amētis hasta, & neruis sagitta, sic cōpositione sententiæ concitatur. Quòd autē sunt uaria dicendi genera, nunc celeritate dicendi rapiuntur animi, nunc tarditate torpescunt, nunc grauitate componuntur, nunc leuitate uanescūt, aut leti sunt, aut tristes, aut quieti, pro orationis habitu, formaq; dicendi. Itaque damnandi sunt qui
horridum

horridum & incultum sermonem, quàm cultū nitidumq̃;
magis uirilem esse contēdunt. Ex quibus alij de industria
nolunt id quod non pessime (si uolunt) facere possunt: alij
neque possunt, neque uolunt. Non posse se negant, nolle
gloriantur. Iudicio falluntur illi, hi laborant ignorantia.
Neutri mea sententia probandi, qui pulcherrimam elo-
quentiæ uirtutem in sermone Romano aut negligunt aut
uituperant, quam in communi lingua, & in sermone po-
pulari tantopere concupiscunt. Si pulchrum laudabileq̃;
est cōponere linguam Gallicam, aliam uē quæ non ita uer-
borum mutatione gaudet, cur turpe & fœdum est Latinā
tanto meliorem, quanto communiorem, in ordinem aptū
digerere, qui sine transpositione uocū nullam penitus ha-
bet uenustatem? Quærenda suauitas oratori. Neque
enim refert (inquit Cicero) uidere quid dicendum sit,
nisi id queas solutè & suauiter dicere. In artificiosa con-
structione non modò iucunditas, perspicuitas, & uis ma-
ior est, quæ omnia per se maxima sunt, sed etiam stupor
& admiratio, quæ dicentem nō hominē uideri, sed deum
quēdam inter homines efficit. de quo Cicero tertio libro
de Oratore, Nemo, inquit, unquam est oratorem, quòd la-
tinè loqueretur, admiratus. Si est aliter, irrident: neq̃; cum
oratorem tantummodo, sed hominem nō putāt. Nemo ex-
tulit eum uerbis, qui ita dixisset, ut qui adessent, intelli-
gent quid diceret, sed contempsit eum qui minus id facere
potuisset. In quo igitur homines exhorrescunt? quem stu-
pefacti dicentem intuentur? in quo exclamant? quē deum
(ut ita dicam) inter homines putant? Qui distinctè, qui
explicitè, qui abundāter, qui illuminatè & rebus & uer-
bis dicunt, & in ipsa oratione quasi quendam numerū
uersumq̃; conficiunt, id est quod dico ornatè, qui idem
ita mo=

ita moderantur, ut rerum, ut personarum dignitates serunt, ij sunt in eo genere laudis, quod ego aptum & congruens nominem. Qui ita dicerent, eos negavit adhuc se uidisse Antonius, & ijs hoc nomen dixit eloquentiae solis esse tribuendum. Eam uult instrui collocatione, quae quasi quendam numerum uersumque conficiat. Non amat scopas dissolutas, et inordinatum dicendi genus, quod ut arte, sic et omni decore caret. Artem semper comitatur decor. Ars inuenit in arboribus quincuncem, in uitibus limites, et paria intervalles, in oleribus areas, in urbibus insularum descriptiones, in aedibus cellas, et instrumenta seposita, in ciuibus ordines, in exercitibus instructiones, in disciplinis generum formarumque serie, in poemate contextum, in rebus oratoris dispositionem, in uerbis collocationem, quae speciosa ueluti quadratum corpus, & robusta sicut acies esset: quam qui despicit, quodammodo ordines caelorum, siderum, errantium, elementorum, corporum, & artificialium omnium quae naturam proxime imitantur, temere & stulte despicit. Vbi sunt tot philosophorum libri, quorum nullus non sententiosus erat? Vbi tot opera poetarum generis heroici? Vbi tam multa ceterorum? Vbi annales & historiae? Vbi tot disertorum orationes? Vbi infinitae doctorum conscriptiones? Vbi sexcenta proximis seculis magno sudore conscripta, editaque uolumina? Vbi prudentium quidem, sed inculte loquentium, id est infantium uigiliae & labores? Fuerunt, inquires. Cur etiam non sunt? Rogas? Non placuit indigestum chaos, non insulsae ueterum glandes, non horridae caesae, non indota barbaries, non agrestia tegumenta, non in montibus & syluis ferina uita, non quicquid arte expoliri, & in melius aptari formarique posset. Ornamus prophanas aedes auro et argento: hortos, agros, praedia decoramus. Imponimus eis

quis

quis phaleras. Corpora nostra splendide uestimus, mensas magnifice apparamus. Theatra ad uoluptatem construimus, sacras aedes uasis aureis, gemis, stragula ueste, signis, tabulis, et id genus ornamentis facimus augustiores: Cur sermonem, quo nihil homini melius datum est, excolere non licet? Quid Liuius adiecit antiquis annalium scriptoribus? Quid Vergilius poetis? Quid Columella rei rusticæ autoribus? Quid æquales plurimi, quid recēiores noui pepererūt? Exterserunt illam ueterū rubiginem, et res eorum nitore uerborum splendidas effecerunt. Quemadmodum uiro magnifica uestis, et ornata domus nonnullam affert dignitatem, ita quoque uerborum splendor et ordo quadam maiestate donat orationem. Si conditor illerum deus immortalis, non omnia uarietate et pulchritudine exornauit, illius exemplo contemnamus ornatum. Si rebus in omnibus coniunxit utilitati decorem, cur illum summum opificem, summæ ubiq; pulchritudinis effectorem ueremur imitari? Incidimus tamen in stultissimū barbarorum genus, qui laudant equi bouisq; speciem, qui probant hominis bonam formam, qui stupidi contemplantur ornamenta regum, qui tollunt ad cælum splendidum conuiuium, qui lauta suppellectile capiuntur, qui (ut breuiter finiam) nihil non pulchrū magnifaciunt, nisi quod circumdatum est orationi. Quid est causæ cur illud unū probare non possant? Quod habere debent et non habent, ne turpe sit quod non habent, hoc iniuria uituperant. Alijs ingenium, alijs defuit labor. Stylus est magni laboris (quē pleriq; fugimus) sed optimus et præstantissimus dicendi effector ac magister. Vt quod res uelit, eloquar: ingenio, studio, arte, exercitatione, imitatione opus est. Hoc maxime docetur, (inquit Fabius) hoc nullus nisi arte assequi

potest, huc studium adhibendum, hoc exercitatio petit, hoc imitatio, hic omnis ætas consumitur, hoc maximè orator oratore præstantior, hoc generà ipsa dicendi alijs alia potiora. Sed si in tenui labore honesto non parua est gloria, in hoc certè omnium honestissimo debet esse uel maxima. Hanc quisquis adipisci uolet (omnes autem uelle debent) optatio statim præceptore, si licebit, utetur: alioqui natiuum illum ingenij candorem sædisimo loquendi colore uitiabit, & aurium iudicium illiberali sono, & sermonum prauitate corrumpet.

Qui fugiendi magistri.

CAP. III.

QUum innumerabiles in omni gente magistri lingua pueritiæ informare uelint, paucissimi de rebus propriè, ornatè, compositè differere possunt. Hæc tamen uirtus in grammatico si non est, officium explere suum non potest. Id Quintilianus de re grammaticorum loquens affirmat, his uerbis, Eloquentia quoque non mediocri est opus, ut de unaquaque earum quas demonstrauimus rerum, doceat propriè & copiosè. Nunc irrumpunt αὐτοδιδασκῶται, genus hominum temerarium, confidens, & audax. Nullam uel mediocriter sciunt, & omnè profitentur artem. Omnia peruadunt, omnia suis prælegunt. Omnia inculcant. Omnia dictant. Omnia contaminant. Prima rudimèta, syntaxim uerborum, Officia, Paradoxa, libros de Inuentione, de Senectute, Quæstiones Tusculanas, poëtas, historicos, oratores, philosophos, uno eodèq; die sine modo, sine lege, sine ratione, obtrudunt infantie balbutienti, & circa elementa prima hæsitanti. Ut omit-
tam cætera, nullum habent uerborum delectum, nullam artificiosam collocationem, nullū certum dicendi genus.

Omnia

Omnia locis omnibus promiscuè & confusè, non sine sui iactatione, garriunt: nec tam humana uoce loqui, quàm inter cornices ineptè cornicari uidentur. Volubilis illa garrulitas, & incondita linguæ profusio, per nulle species rerum non aliter quàm somniantis animus momento rapitur: non insistit, non imprinuit uestigium, non habet quod certò loquatur, etiam si nihil non uult loqui. Quòd si quando loquacitati finem imposuit, nec ipse qui talia profudit, nec audientium quisquam scire potest quidnam sibi uelit. Virtus est orationis (si dijs placet) nulla in re commorari, huc & illuc disilire, omnia commiscere: sic agere, ut tuam nemo capiat mentem: onerare auditorem putidis uerbis, & inamœna locutione, & contorto genere dicendi aures animumq; contundere. Quid hinc iudicij referet auditor? quid disciplinæ liberalioris? quid sententiarum? quid uerborum? quid puri rectiq; sermonis? quid potissimum sequetur? Pendebit ab ore, non dico loquentis, sed insaniētis. Alieno se iudicio committet, atq; in diuersa rapietur, uti puluis qui uenti procella corripitur: & ut os nutricis infans, sic ille magistri linguam exprimere conabitur. Materia scribendi proposita, præceptorem imitatus euagabitur. uerba noua cum obsoletis, grādia cum paruis, dura cum mollibus, Latina cum barbaris miscens, nullum eorum aptè & ordine collocabit. Laudabit hæc ignarus ueri magister. exprimet illum tan- de discipulus infelix, & ex officina mala prodibit haud bonus. Et quoniam quæ praua sunt, hærent tenacius, nūquam poterit elui impura foedaq; linguæ prolunics. Nā Quo semel est imbuta recens, seruabit odorem

Testa diu-


Et uera nimis est Quintiliani sētētia, Frāgas citius quàm

corrigas quæ in prauum induruerunt. Quàm multos fle-
 etere uolui? quàm mu'tos aliter instituere? quã uani fue-
 re mei labores? Ingenij uis illa naturalis penè mortua, nō
 ita restitui poterat, ut aliquid rectū & æquale & naturæ
 simile gignerent. Arte quadam, ut uerius dicam, nebula
 fumoq; nitebantur, & quasi per aërem uagi, & multa
 quæretes, nihil omnino reperiebant nisi inane quiddā, à
 naturæ firmitate nimis alienū. Absit igitur hæc pestis ab
 eo qui suas aures modulatione erudire, uerborū discrimi-
 na discernere, suo quæque ordine collocare uelit. Absit
 hoc monstrū horrendū, informe, ingens, cui lumen adem-
 ptum. Sed permulti sunt id genus Cyclopes. cōtrā pauci
 reperiuntur qui encyclopædiam absoluerunt. Est aliud
 hominum genus minus arrogans ac insolens, æquè tamen
 incultum & indoctum. Ex autoribus, qui potissimum le-
 gendi sint quoniam iudicare non possunt, & conscij ui-
 rium suarum, principes linguæ Latine interpretādi cau-
 sa aggredi non audent, optima quæque tanquā sacra Ce-
 reris diu nō ineunt. Vilia quædā poëmata, & insulsos dia-
 logos, & leues epistolas, & apologos, & fabulas inuti-
 les, & leuiculos autores, quos impropria paraphrasi gra-
 uiter onerent, legunt. Singulis uerbis, nunc singula, nunc
 bina, nūc terna quaterna uē reddunt: & spinosa uerborū
 copia locos omneis & paginas implent: tumq; præclare
 doctoris officiū obire se putant, quum terq; quaterq; re-
 petendo cantitant, Est id est existit. Quē pro &. Quoq;
 id est etiam. At, id est sed. Enim pro quia. Docemus, hoc
 est instruimus, ostendimus, monstramus. Scribo, id est, de-
 scribo, compono. Phagi, illius arboris. Hibisco, illa herba.
 Cātharus, illud uas. Sagitta, id est pharetra. Carbasus, in-
 dusium delicatum. Timet, hoc est metuit, pauet, horrescit,
 formidat,

formidat, ueretur. Præclara sanè uerborum copia, pulchra loquedi proprietates, bellum pueritiæ formandæ principium. Quid agis? Soli demēs lumen inferis, tenebras non aufers: Dilucidi & obscuri nullum statuis discrimen. Verborum proprietatem & suauitatē, qua nihil in oratione gratius est, sic abijcis, ut si aliena summoueas, tua non intelligantur, & incredibiliter exhorrescant. Quid? Mirabere istorum stultitiā. Ne sit obscurior illa (quam diximus) interpretatio ridicula, puerū iubent adscribere putidam quandam paraphrasim, quam sententiam uocant, & eam diligenter ediscere. Hinc accidit in autoribus primæ dignitatis (quos isti aliquādo tandem suscipiūt) ut ea uerba quæ maximè cuiusq; rei propria, quæq; sunt ornatissima atq; optima puer relinquat, minus idoneis uti cōsuescat. Quæ, malum, est hæc insania? ut contortam barbariem, quam rectam loquendi rationem memoriæ tradi, in imitationem usumq; trahi malis? In ediscendis optimi cuiusque scriptis, audita modorum suauitate formaret aures, uerbis abundaret uel optimis, & tandem animi impetu ferente, eadem propè contexendi ratione uteretur. Nunc tecum derudere miser assuescit. Totus scatet malis uerbis. Præpostera compositione deprauat orationem. Quod autem materiæ genus proponis ad scribendum? quæ tibi exercendi ratio est? Ponis aliquid ociosum, neque inuentione acutum, neq; sententijs utile, neq; partibus inter se coherentibus elegans & consentaneum. Ex colluuiæ glossæmatum tuorum, & annotationū sterquilinio, spurca quædam uerba diligenter eximunt pueri, quibus non re præscriptam, sed aliud nescio quid finitimum complectuntur, Hæc male consuta proferunt. Admoues aurem, tua agnoscis, egregios imitatores exoscularis. Nam parenti simia

b 3

pulcher



pulcherrima est. Si quis est aut barbarissimus, aut solæcis-
mus occultior, aut uox horridior, aut uitium in consecu-
tione, aut perturbatus ordo, nō animaduertis, propterea
quod audis aptum tuis auribus, quamuis inemendatum,
durum, & inamabile dicendi genus. Sed dimittamus istos,
ne forte laceßiti grauiter excandescant. Cauendum est
enim ne quam ferant opem Guido Iuuenalis, aut alius
eodē modo facilis ac obuius interpres. Hoc præsidio freti
se parant ad certamen, & de imperio summaq; rerū con-
tendūt. Quid alios referam multos, qui stimulant iuuen-
cos, terram non arant?

ὡς μοι δοκέτωτα, πολλοὶ δὲ τε ἡὺς ἀπορῆτες.

Alij totum diem uociferantur in ludo. Iuuentutem ob-
ruunt multitudine uerborum impurissimorum, nec illam
disputationibus agitant, nec exercitationibus roborant,
nec excitant languentem, nec petulantem coercēt im-
perio, & magisterij dignitate. Alunt improbum quod-
dam hominum genus, quod ignorans suas uires, omnia se
posse credit, omnia præ se contemnit ac despicit. Vt tyro
ferox ueteranos aspernatus, multa & egregia de se polli-
cetur: collata manu, & impressione facta, stare loco nescit,
cedit, fugæ se mandat, & tum demum imbecillitatis suæ
certior factus, non reuertitur in prælium: sic & isti ani-
morum pleni, eruditos & exercitados fastidiunt. nihil sibi
non arrogant insolentes. ubi in certamen literarum pu-
gnamq; uentum est, haud magno momento superati dese-
runt, & detestati literas & magistrū, & doctis omnibus
infernfi, ad aliud uitæ genus confugiunt. Sunt qui sedulo
materias à suis exigunt hora præstituta. Redditas perle-
gunt ipsi: sed quoniā arbitrātur hoc unum suum munus
esse, expurgare uitium barbarismi atq; solæcismi, non pro-
grediuntur

grediuntur ultrà. Puerum non admonēt eorum quæ du-
 rè & horridè, quæ inusitatè, quæ contortè, quæ obscurè,
 quæ exiliter, quæ affectatè tamidèq; dicta sunt. Pro sermo-
 ne Latino & emēdato uasta & agresli lingua abutūtur,
 nec inter Latinos iure numerari, nec inter doctos haberi,
 nec munera præceptoris obire possunt. Iam quotus quis-
 que nouit uersum arte modulari? aut orationē uerbis &
 proprijs et usitatis atq; cōpositis exprimere? Expectamus
 aquam è pumice? Qui rudes illi docebūt ceteros id quod
 ipsi non modò non facere, sed ne intelligere quidem pos-
 sunt? Quonam pacto iusti erunt existimatores eorum
 quæ candida atra'ne sint, cæci: bona an mala, improbi:
 culta an inculta, impoliti non uident? Qua formabūt arte
 iuuentutem? Quibus ornamentis excolent? Ex eiusmodi
 officina mirum ni prodeat incultus informisq; discipulus.
 Hic (inquiunt) præstantior est puer, multo plura scripsit.
 uictus ille, edidit enim pauciora. Huius omnia uerba trita
 sunt, illius inusitatiora, & eo nomine meliora. Habes ho-
 minum iudicium. Non scripti genere, sed quantitate: non
 proprietate, sed insolentia censent orationem. Multos
 alio quodam morbi genere uitiosos numerare possum,
 quorum contagionem fugere debet is qui studio com-
 ponendi, & orationis collocatæ gloria ducitur. Mul-
 tos ipse cognoui, qui omnē orationis elegantiam esse sta-
 tuebant in adagijs, apophthegmatis, uerbis antiquatis,
 nouis quibusdam nitelis, & ridiculis ornamentis: ut si cō-
 fectores stragulæ uestis pauca effingant in ea signa, uni-
 uersum contextum negligāt: ut si olitor treis quatuor'ue
 stirpes herbarum specie lucidas, fructu inutiles colat, reli-
 quas terræ partes incultas esse patiatur. Illos omneis fugi-
 endos esse sciet qui hæc uerba Ciceronis audierit: Magni

interest quos quisq; audiat cottidie domi, quibuscum loquatur à puero, quemadmodū patres, pædagogi, matres etiā loquātur. Legimus epistolas Corneliæ matris Græchorum. apparet filios nō tam in gremio educatos, quā in sermone matris. Auditus est nobis Læliæ C. filie sermo. Ergo illam patris elegantia tinctā uidimus, & filias eius Mutias ambas, quarum sermo mihi fuit notus: & neptes Licinias, quas nos quidem ambas, hanc uerò Scipionis etiam tu Brute credo aliquando audisti loquentem.

Qui fugiendi scriptores elegantiarum.

CAP. II II.

Non desuerūt & qui memoriæ literarum componendi leges, & collocandi præcepta mandarent. In illis principatum obtinuit Augustinus ille Datus, & quidam Petrus Niger, ornamentis orationis (ut sibi uidebatur) admodum candidus. Horum uenustatem nitoremque posteriores uehementer admirati, scripserunt alij progymnasmata, alij enchiridia, alij loquendi formulas, alij inelegantes elegantias, alij quasdam suas obseruationes, quas tum teneræ ætati, tum mediocriter eruditis perutiles esse rebantur. Finis erat eiusmodi scriptio-
num, ut qui uenustus & elegans ueluti gratijs afflatus esse uellet, hæc uerba, nullus, nemo, nihil, nunquam, nusquam, neutiquam, nequaquam, in clausula collocaret : ut uerbo sæpius quā nomīne aut participio clauderet orationem: ut geminaret copulandi coniunctionē: ut in exitu uoce trium quatuorue syllabarum sustineret ambitum: ut obliquum casum statueret initio, ut pronomīnibus, qui, quæ, quod, ea quæ natura præponi debeant, arte post-
poneret : ut in eius ordine rei nomen duarum syllabarum antecederet

antecederet, adiectio sequeretur, si modò totidem pluribus uel constaret syllabis: ut, pater meus, frater optimus. Deniq; ut si idem uel epistolam uel orationem scribere et exornare uellet, insignibus formulis quasi aureis emblematibus uteretur. Adiciebant pauca uerba rara cuiusdã pulchritudinis, quibus tanquam gemmis distinguere et illustrare opus. In hisce rebus, et paucis generis eiusdẽ, omnem omnium oratorum elegantiam positam esse existimabant. Quo quid ineptius, magisq; ridiculum esse potest? In oratione nulla uerbo propria sedes est, nullus certus et immutabilis locus, nullus unquam fuit sic destinatus ordo, ut eius mutatio deformis et inelegans esset. Loca uerborum communia sunt: nec in extrema clausula magis quàm in principio, nec initio potius quàm in oratione media ponuntur. Neminem unquam uidi pulchriorem, compositè dixeris. Pulchriorem uidi unquam neminem, incompositè. Inter oratores neminem summum perfectumq; reperies, rectè dicitur. Inter oratores summum perfectumq; reperies neminem, prauè et affectatè. Vbi igitur aptè collocaueris hoc uerbi neminem? Semper ne in extrema sententia? nequaquam. Cur ita? non id ubique patietur ratio componendi. quamobrem? Obseruantur in clausula, id est in oratiõe postrema, duo tres uel pedes, qui compositè et decenter incedant, et suauiter cadant in aurem. Si dactylus hic, neminem, in conclusione ponatur, nisi pes unus et alter molliter antecedit, offendet aurem, et illius eum loci quodammodo poenitebit. Quum dico, Ferendum grauius in hominibus sapientem inueniri neminem, non leduntur aures, quia coagmentatio cohaeret, et sine uersu molliter ad finem currunt pedes. Quum dico, Prendere auidè cupiunt neminem, nulla uoluptate sensus

oblectatur, propterea quòd sic exiliunt & attolluntur anapesti, ut non inclinètur ad dactyli positionem. Ad hoc compositio iuncturaq; hiat, & asperè duo postrema uerba concurrunt. Mutandus est igitur ordo uerborum, & auribus cruditis instruendi ratio cõmittenda. Quid si reiecta in extremũ particula quæ primas habere cupiebat, transuorsum trudentur omnia? ut, Mihi placui minus nunquã. Rectius ne Crassus istuc, Nunquam mihi minus placui? Quemadmodum in extruccionẽ murorum uident oculi quo loco quodq; saxum rude melius aptetur, sic & in oratione digerenda iudicant aures qui cuique uerborum sit assignandus ordo. Quid igitur opus est quasi de certo loco præcipere? Quid incerta pro certis habentur? Pro significatione, figura, coagmentatione, numero, loca singulis assignantur. Nec si uerbum propriè dictum sepe claudit eam quam perficit orationem, idcirco dixero, Patrem amaui. reclamationem enim aurium iudicium. Amaui patrem, uel natura monente dicendum esse indicabo. Qui uerba de loco in locum transfert ornandi gratia, nõ enumerat eorum syllabas, ut inde sciat utrum anteponendum sit, epitheton ne, an rei nomen, sed iunctura & interuallo pedum, loca metitur: prima media ultima quò inter se consentiant, attemperat. Iam quid iuuabunt locutiones ex enchiridio, si imparibus assuentur? Ut erit æquabilis, siquẽ similis oratio, si duæ tres uel ab optimo scriptore sententiæ longè cæteris emineant, & quàm sint humiles reliquæ, sua amplitudine demonstrant? Cur à casu obliquo pulchrius quàm à recto ducimus initium? Quis unquam ueterum tulit has leges? Multa de rhetorica tradidit Aristoteles, multa Theodectes, multa Theophrastus, Heraclides magoras haud pauca, plurima Cicero, nõ pauciora multo Quin

to Quintilianus: quid? horum nemo uidit quod Dathus? quod Niger? quod Progymnastes? quod formularij, & eiusmodi inuestigatores elegantiarum? Nesciebāt credo, & tam suaues delicias nunquam gustauerant. Cur isti igitur admirantur eorum dicta? cur habent pro lege formulāq; loquendi, quicquid notatum scriptumq; reliquerunt? Quo pacto ex illis eruunt exempla, quibus sua praecepta confirmare conantur? Sciebant, inquiunt, sed tam parua scribere grauebatur. Ita ne uero? Diligēter omnia persequerentur oratoris ornamenta, & uobis tam suaues tamq; molles orandi uoluptates praeferbant? Non ita est. Nullum eorum qui libellos istos ediderunt, artes oratorias aut intellexisse, aut saltem legisse contendo. Si fortē legissent, nunquam certē quidem commisissent, ut hoc nouum & insolens & inauditum legum genus conderent. At praeclare nonnulla scripserunt. Quis negare potest? Nullus est tam malus liber, in quo non sit aliquid boni: sed magno constitit quicquid illud fuit. Innumerabiles tum pueros, tum uiros bene collocandae dictionis percipidos, nomine facilitatis & nitoris illuserunt. Passim legebantur, uulgò circumferebantur, in scribendis epistolis & conficiendis orationibus leges eorum haud aliter obseruabantur, quā mysteria, atq; caeremoniae deorū. Alebant inanem spem: unam aut alteram ad ornandum particulam, non integram uestem induebant: tandem suos cultores partim nudos, partim ridiculē uestitos ad hominum doctorum ludibria mittebant. Quum uita celeri cursu fugiat, & studiorum tempus admodum breue sit, in tanta librorum optimorum copia cur malumus in pessimis quibusdam quā in optimis bonas horas collocare? Quaremus alios dicēdi magistros, qui planē sciant qua ratione
pro

pro tempore, loco, & personis, acies uerborum sit instruenda. Ne de pauca supellectile, sed de uniuerſa diſpoſitione uerborum dimicemus. Quæ maiores agit prædas, illa iucundior eſt uictoria.

Qui magiſtri, quique ſcriptores deligendi.

CAP. V.

Q Vos ludi magiſtros, & quæ præcepta uitaret homo ſtudioſus elocutionis, breuiter attigimus. Nunc quem poſſimum doctorem & dicendi magiſtrum ſequatur, ut quò maximè uelit, eò breui compendio uiarum perueniat, ſi placet, explicemus. Non erit alienum ab inſtituto, quærere ducem, ſine quo ad propoſitum finem rectè uenire non poſſit. Non agam de uirtute præceptoris, quæ in primis eſt à diſcentibus expetenda, propterea quòd pueri ut eius artes, ſic & mores, & malos quàm bonos ſæpius imitantur. Nihil dicam de cognitione & ſcientia rerum maximarum, quam ſi non habet, docet alios indoctus, & quod dementis eſt, uerba ſine re profundit. Quàm ſeueram debeat habere diſciplinam, quàm ſanctam, quàm uirilem, quàm aſiduam, non eſt hic diſputandi locus. Hoc ad rem pertinet, quo ſit ingenio, quaque natura præditus. Nam quemadmodum poëta, ſic (mea ſententia) quodammodo naſcuntur oratores. Nec enim poëta, ſi naturæ parentis igniculi deſint, alta & ardua excogitare, delectum uerborum habere, numeros aptare queant. Nec oratores aduerſante Genio mira quædam inuenire, propriè, copioſè, uenuſtè, floridè diſſerere poſſint. Eſt in oratione, ſicut in uerſu, numerus, & obſcura modulatio, quam teretes & rotundæ ſentiunt aures. Quædam uerba ſic amica ſunt, & penè germana, ut

na, ut inter se concordia summa copulentur, quædam (ut ita dicam) inimica atque dissona: quæ si coniunxeris, perpetuò rixabuntur, & asperè ferient illam sentiendi fæcultatem. Quis hac de re iudicabit? Auris. An omnis? Haud quaquam uerò. Quæ sic, & quæ non? Sensus ille, sicut omnia, adiuuatur arte & exercitatione. Fateor, Alioquin ista non traderem: sed nisi uis illa naturalis, acuta, sagax, acris habilisq; sit, nisi sonorum differentias & modorum sponte sua dijudicet, nisi in ambitu, & partibus illius, temperata, curta, redundantia, in uerbis aut singulis aut compositis lenia, aspera, mollia, dura sentiat: ars & usus, res duæ maximæ, non efficient ut instructa uenustaq; sit oratio. Noui plurimos studio & amore litterarum eximio, qui cognitis atque perspectis rhetoricæ præceptis summa cum diligentia multa scripserunt, nec secus ac poëtæ solent, in collocanda dictione, & quærenda uenustate diu multumq; laborarunt: sed enim conatus infelices fuerunt, & malè propitiæ Musæ. Non suberat uera uis & indoles, non fluebat illa uena atque natiua fecunditas, nec sensum natura duriores mouebat aspera sonorum concursio. Itaque succumbebat ars & animus silente consilio naturæ, nec ullum percipiebat dignum suo labore fructum. Sic erat, ut colendi peritus agricola, qui sterile solum omni arte & industria subiigit, eoq; coniicit semen: hinc fortè nascetur aliquid quod tandem metat: sed raræ & graciles aristæ fallunt hominum boumq; sudores. Non omnis fert omnia tellus, inquit poëta. Nec ars sola potest, quod ipsa concurrente natura. Quid? quòd sub uno eodemq; præceptore uideas pucros eadem informari disciplina, & intendi pari diligentia, qui tamen in oratione exædificanda non sunt
inter

inter se pares? Quid est caussæ? quid? Illorum paria non sunt ingenia. Quum sit una rhetorica, totidem ferè sunt genera dicendi, quot oratores: nec unquam duo per omnia consimiles reperti. Hanc formarum uarietatem non aliter in ordine, quàm in hominum ore natura fecit. Quòd si quis aliò quàm quo natus est, tendit, Gigantum more naturæ deoq; repugnabit, & suæ stultitiæ tandem premium feret. Labor improbus res arduas expugnat, sed funditus euellere naturæ fundamenta non potest. Verum est illud Horatianum,

Naturam expellas furca: tamen usque recurret.
Sint igitur eloquendi magistro celeres animi motus, & insita prudentia. Insit ubertas, & quædam musica uis ingenij: & innatus uenustatis amor alliciat animū eius ad uerborum suauitatem, ut numerosæ constructionis ordinem persequatur. Sic expetat ornandæ dictionis artem, ut tamen à naturali & illaborato fluxu longè ne recedat. Nam tantò deterior erit, quāto longius à natura ducetur oratio. Non excidit mihi quod autore Quintilianō dixeram, elocutionem omnem arte consistere. Natura sine arte in inueniendo & collocando multum sanè potest, in eloquendo nihil omnino. Sed ars sine natura in his omnibus debilis est. Cui natura modulationis huius indidit amorem, uersatus sit in optimis tum proprietatis tum collocationis autoribus. Teneat quæ de singulis uerbis, de compositis, de coagmentatione, de concinnitate, de numero, de compositione Cicero præcepit. Horum omnium uim rationesq; notas habeat. Ne quid ignoret quod Quintilianus de natura uerborum simplicium, de ornatu, de compositione scripsit. Ab his enim duobus uiris penè res omnis est absoluta, ut hic Græcis autoribus
nihil

hil egeamus. Nec opus erat his præceptionibus nostris, si agere pingui Minerua, & rem obscuram exemplis frustrare uoluissimus. Et quoniam aures hic plurimum possunt, erudierit sensum, primum in carminibus poetarum, Terentij & Vergilij maximè, altero nemo Latino purior uenustiorq; , altero nemo compositior, deinde in oratione non minus propria & Latina, quam instructa atque modulata, qualis est Caesaris atque Ciceronis. Et in Caesare summa proprietas, compositio tenuis quidem, sed perquam suavis. In Cicerone cum proprietate uine eloquendi genus, omnisq; figura dicendi. Hos quatuor, si non ad omnem & inuentionem & elocutionem, tamen ad id quod uolumus, satis esse dicimus. Quanquam non repudiandus est educator, qui uarias, si modò sanas, species apponit: non tamen maiorem quærimus uerborum puritatem, neq; flagitamus delectum exquisitiorem, neque instructiorem petimus collocationem. Horum scripta canauit magister, & crebra pronuntiatione quodammodo nauit suas aures. Hæc proponat pueris ediscenda. Hæc uoce ac uirili prælegat, interpretetur, quid uirtutis debeant, sedulò demonstrat. Quod si facere non possit, non satis idoneum non habeo. Nec diu uirtus aut uitium tebit. Animaduertentē difficile non est iudicare (si modò propius inspicitur) qui ualeat ingenio professor, qui orasim redoleat elegantem, qui sermonem habeat purum, dispositum, & ornatum, qui uitet illud opimum & capitale dictiōis genus, in quo ridetur Asiaticus: qui nec hæret turpiter, nec intersistat, nec læguescat, nec mutila iacet, nec concise, improprie, barbarè loquatur. Est una de multis eius uirtutibus, sermo expeditus, uenustus, & ininterruptus. Assidue cadit in aurem pueri, sensumq; dulci voluptate

uoluptate demulcet. Hinc fit, ut non modò libentius audiatur eloquentem, sed etiam ut sic castiget & informet aures, ut horridam & incultam perferre linguam postea nò possit. Nolo hominem dissolutum, qui subinde pueritiæ uerba faciès, propria impropria, pura impura, Latina Gallica, grandia parua, composita incompressa commisceat. Volo uirum qui excitet animũ, atq; ratione moderetur: ut quæ cogitauerit, uerbis lectis, & subita facultate digestis exprimat. Animi celeritas admirabilis, si curã adhibebit ac diligentiã, in multa se munera partietur, & optima inueniet, & inuenta disponet, & eodem propè tempore collocata uestiet honore uerborum. Volo qui rationem mentis urgeat: cui sit studium & eximius ardor literarũ: qui artium liberalium maiestatem ueritus, non omnia ad quæstum & auaritiã, more multorũ, sed ad bene dicendi laudem, & ad ueræ gloriæ fructum referat. qui pertulerit illum scribendi laborem: quem si non hauserit pueritiæ formator, quĩ de scriptis alienis rectum iudicium feret? Quis omnium de uersu uerè iudicare potest? Poëta. Quis autem de oratione? Orator. Quis est aut orator aut poëta, aut saltem finitimus illis? Qui carmina permulta diligenter condidit, multas epistolas & orationes arte confecit. Exercitatus ille præceptor, & styli minimè rudis, facili negotio scripta discipulis emendabit, improba & ociosa expunget, proba & graua ponet, pro insuauibus dulcia, pro fortuitis lecta, pro confusis composita promptè suggeret. Si quid alumnus inemendatum aut durum locutus erit, expeditè corriget, & molliet immutato genere loquendi: cuius limam sollicitè metuens discipulus, uigilabit, & intendet animum, ne quid proferat nimis squalidum & impolitum: qui haud dubiè securus esset, si arti

artificem imperitū scriptis æquaret, aut uinceret. Meus
disciplinæ princeps, pauca, sed præclara dicat. Com=
retur in locis difficilioribus, ne quantum, sed quàm be=
serat, curet. Cōmissa auditoris fidei, repetat assiduè: ma=
riam scribendi sentētiosam, rectoq; quasi filo ductam, et
imis adumbratam lineis proponat, propositā die statuto
rigat, ne cessatores efficiantur, quorum periculo inutiles
ansmittuntur horæ. Omnia uitia ne uellicet, sed tantum
otabilia, quoniam scriptor tam sæpe reprehensus, animum
espōdet, et infaustum execratur laborem. Ista nequaquā
cribo professoribus artium humanarū, quos docere iam,
non doceri par est, sed prouectis ultra prima rudimenta,
qui uel Romanæ linguæ magistris doctioribus opcrā dare,
uel alios eandem linguam docere uolunt.

Vtri priores legendi, poëtæ, an

oratores.

C A P. V I.

Qui legi maximè debeant, tum magistri, tum scri=
ptores Latini, ut inde uerborū delectus habeatur,
et pulchrè concinnèq; extruatur oratio, paucis exposui=
mus. utri priores legendi, poëtæ, an oratores, breuiter ex=
plicemus. Lēctionem poëtarum priorem ire oportere, ma=
ximæ causse rationesq; confirmant. Nam carmē ornatius
est atq; iucundius, ut res ad uoluptatem comparata. Quòd
numerus eius certus, et eodem modo cōscriptus, artificio=
so et cōposito pede cū uoluptate fertur, primum oblectat
aures mollioris ætatis, deinde in animū procliuius illabitur,
inq; diuturnū tēpus memoriæ se figit. Itaq; cecinit Horat.

Os tenerum pueri balbumq; poëta figurat.

Doctissimi nimirum sunt boni poëtæ, et diuino quodam

c

numinis

numinis afflatu concitati, immortale quiddam ac cœlestē spirant, sententiarum concinnitate mirabiles, lumine uerborum conspicui, modulatione numerorum suauissimi. Optimos quosq; natura sic ad carminum modos effinxit, sic ad argutum genus orationis inclinauit, ut si cum ipsis arte certare uelis, neque dictione lectius quicquam, neque sono temperatum magis, ueque compositione modulati⁹ inuenire possis. Quid enim putamus ingenium summum agitante deo succensum, multis magnisq; artibus eruditum, u'su multo peritum, alta atque longa cogitatione, crebra & seuera castigatione efficere potuisse? Quicquid est graue, sonorum, rotundum, elegans, iucundum, dulce, suaue, gratum, uenustum, adsciuerunt in carmen, heroicum præsertim: lene, exile, asperum, deformē, triste, amarum, insuaue, insulsum, repudiauerunt, nisi si quando fortē de industria duriorum rerum naturam sono orationis imitari, quā leniter & æquabiliter profluere maluerunt. Horum uersus occinet puer, eosq; thesauro memoriæ committet, ornamentum postea sermonibus & scriptis futurum. In his spacia & tempora syllabarum, quæ longæ, quæ breues, quæque sunt ancipites, sine magno labore discet, rem ad eò necessariam, ut si desit, neque numeros orationi inscrivere, neque pedes intelligere, neque uersum moliri, neq; uerba accentu uariare, aut benè proferre possit. Cognoscat illud poëticum μέτρον, & quid ab oratorum rhythmo differat, expendet. Sciet qui sint in uersu pedes, & eosdem poëticos, eosdem oratorios esse: nec re ipsa, sed collocationis ordine differre perspiciet. Animaduertet illud dicendi genus à sermone & à lingua cottidiana distare. Ninium tritum loquendi uiam, luttumq; triuialium deferet, sublimius atque purius iter inibit

inibit. Formabit aurium iudicium. Eximio splendore uerborum illustrabit animum: & ornatu mirabili captus, eadem præcellere magnificentia uolet. Accendet animum, acuet animi iudicium, multa faciliè comprehendet, multa paulatim trahet in usum, & hinc figuram dicendi colorabit. Ergo poëtarum interpretatio præuertat orationem. Nam & grammaticorum officio, non rhetorum commissa est. Imbuatur hoc quasi liquore recens animus, ut semper in oratione iucundum illum retineat saporem, quasi uehementer hæud tangit palatum, sentitur tamen quasi quoddam parcius condimentum. Miror his annis extitisse complures, qui poëtas abijcerent, uni rhetoricæ nauarent operā, quasi eloquentia poëmate non egeret. Longè secus Cicroni uisum est. Legendi, inquit, sunt poëtae. Nā etiam poëtae quæstionem attulerunt, quidnam esset illud quo ipsi differrent ab oratoribus. Numero maximè antea uidebantur & uersu, nunc apud oratores iam ipse numerus increbuit. & paulo post, Quorundam grandis & ornata uox est poëtarum. & in eodem loco, Inter eos simile est iudicium, electioq; uerborum. Sensit idem Theophrastus teste Quintiliano, cuius hæc uerba sunt in decimo libro: Plurimum dicit oratori conferre Theophrastus lectionem poëtarum: multiq; eius iudicium sequuntur, neque immeritò. Nanque ab ijs & in rebus spiritus, & in uerbis sublimitas, & in affectibus motus omnis, & in personis decor petitur. Præcipue que uelut attrita cotidiani actu forensi ingenia, optimè rerum talium blanditia reparantur. Ideo que in hac lectione Cicero requiescendum putat. Plura de poëtis addidissim, si de omnibus illorum bonis, quæ innumerabilia sunt, agere uoluissim: quoniam modò de electione & extruccionem uerbo-

rum mentionem facio, satis multa credo de carmine prælegendo locutus sum.

Sæpe diligenterq; scribendū. CAP. VII.

Materias ad cogitandum scribendumq; subinde proponi oportere, & sententiosas atque consentaneas esse debere iam diximus. Stylus enim optimus est & præstantissimus dicendi effector & magister, inquit orator. Idem, Nulla res tantum ad dicendum proficit, quantum scriptio. Operæpretium est diligenter animadvertere quæ de scribendo Crassus apud Ciceronem differit. Caput autem est, inquit, quod (ut uerè dicam) munimè facimus, est enim magni laboris (quem plerique fugimus) quamplurimum scribere. Stylus optimus & præstantissimus dicendi effector ac magister: neque iniuria. Nam si subitam & fortuitam orationem commentatio & cogitatio facilè uincit, hanc ipsam profectò assidua ac diligens scriptura superabit. Omnes enim siue artis sunt loci, siue ingenij cuiusdam atque prudentiæ, qui modò insunt in ea re de qua scribimus, inquirentibus nobis, omni'que acie ingenij contemplantibus ostendunt se, & occurrunt: omnes'que sententiæ, uerba'que omnia, quæ sunt cuiusque generis, maximeq; illustria, sub acumen styli subeant & succedant necesse est. tum ipsa collocatio cõformatioq; uerborum perficitur in scribendo, non poetico, sed oratorio quodam numero & modo. Hæc sunt quæ clamores & admirationes in bonis oratoribus efficiunt, neque ea quisquam, nisi diu multum'que scriptitarit, etiam si uehementissimè se in his subitis dictionibus exercuerit, consequetur. Et qui à scribendi consuetudine
ad

ad dicendum uenit, hanc affert facultatem, ut etiam subito si dicat, tamen illa quæ dicantur, similia scriptorum esse uideantur: atque etiam si quando in dicendo scriptum attulerit aliquid, quum ab eo discesserit, reliqua similis oratio consequetur. Hæc ille. Si stylus est dicendi magister, si cætera exercitationum genera facile uincit, si locos peragrat omnes, & ex illis sententias optimas excipit, si uerba maxime illustria deligit, & ita collocat & conformat, ut oratorium numerum efficiant, si consequitur admirationes, & dat impetum dicenti: sine dubitatione semper in manibus est habendus, ac omni cura, studio, diligentia excercendus. Nunquam probaui remissum pigrumque auditorum genus, quod multos annos in schola sedens professores subaudit, nihil unquam neque relegit, neque reponit. Aures habent quidem pigri, nec eas satis attentas. ore manuq; in quibus duobus summus est literarum fructus, haud utuntur. Linguae Romanæ studet ut loqui possint: quando emendatè loquentur? Scribere Latine uolunt epistolas, epigrammata, literas, orationes, libellos: quando scribendi facultatem adipiscentur? Quis optimus miles arma non tractauit? Quis idoneus gubernator non tenuit clauum? Quis architectus amussim & regulam non apposuit? Quis arator industrius non coluit agrum? Quid autem disse prodest, si quum docti loquuntur, tacendum tibi sit? si neque tuas cogitationes mandare literis, neq; cottidianæ linguae committere audeas? siq; de tuis studijs non estimationis & gloriæ fructum, sed ignominiam dedecusque percipias? Turpe quidem est atque dedecorosum, in studio literarum te longum tempus absumpsisse, sine frequentii uitio loqui scribereue non posse. Stylus uires ingenij experitur, uagos animi motus continet, mentis aciem ex-

acuit, eorum quæ legeris, quæ audieris, memoriâ excitat, iudiciâ format, illustrat obscura præcepta, linguam expedit & manum, cæq; studiorû custos, cogitationum interpret, mandatorum nuncius, monumentum scientiarû, dulcis in ocio negotioq; comes & monitor. Scribendum igitur quamplurimum: nec fugiendus est labor, qui sicut magnis in rebus est multus, ita quum uincit, non paruum consequitur laudem.

Rudimenta componendi. CAP. VIII.

P Rincipio ne pondcri succumbat debilis & infirmus, per pauca scribantur. Quemadmodû paulatim robur corporis, ita uires animi crescunt. Et ut molle corpus iniquo pondere grauaturn, ad iustam magnitudinem peruenire non potest: sic animus immaturo onere pressus, ad altas cogitationes uix unquam postea erigitur. Libertatem suapte natura cupit, & ægrè uim ac imperium patitur. Quo magis amanda sunt pucro studia literarum, & ultro magna uoluntate capeffenda, ne à doctoribus aut flagris aut minis urgeatur. Proponantur ergo materiæ frequentes potius quàm immodicæ. Artes enim haud aliter in animum instillantur, quàm liquores in angustiora uasa: & ut labor distributus in partes, agentem minus fatigat: sic etiam duæ tres uel breuissimæ scriptiones minus animû lassant, quàm si congerantur in unum laborem. Quod autem præscribitur, aptum consentaneumq; sit: eius membra cohereant inter se, & recto quasi filo ductus omnis sententiarum dirigatur. Contortum illud rerum genus & confusum, non difficultatem modò parit imitanti, sed etiam turbat illum sensum communem, & natium iudiciû, sine quo uana est

na est hæc omnis de scribendo præceptio. Etenim recta
facilius quam praua sequitur artium rudis & ignarus. Mi-
nus aberrat à naturæ prudentia, minus que fatigatur hæc
uia tum recta, tum compendiosa, quam si per ambages, &
salebrosos regionum anfractus circunducatur. Adde quòd
ad dirigendam mentis aciem, & informandum iudicium,
incurua loquendi regula inutilis est. Detorquet in prauum
quod procerum & habile natura procreauit. Naturam
uerò ut ducem optimam sequi debemus. Quia causæ an-
tecedunt, sequuntur effectus, & negocijs gerendis suum
tempus est ordine constitutum, seruemus hanc in dicen-
do collocationem, nisi ratio fortior aliò nos impulerit.
Video quosdam sententias quas pueris aut Latinis uerbis
effereudas, aut copiosius tractandas suggerunt, sic immi-
scere & inturbare, ut ne ipsi quidem quid sibi uelint
omnino satis intelligant. Decet illis aut ingenium, aut di-
ligentia, aut artis cognitio, aut duo ex illis, aut certè uni-
uersa. Hinc indigesta rerum sylua rudibus animis tractan-
da subiicitur, quam ego quidem ineptam & perniciosam
esse existimo. Nolo sensus & continuationes uerborum
longiores, quas & in narratione, & ubicunq; faciles esse
uolumus, eò uitamus, quòd uocum multitudo, & nume-
rosa partium congeries nonnullam parit obscuritatem.
Quantò paucioribus uerbis sensum unum complectimur,
tanto celerius illud animo concipimus. Itaque contracta
& minuta primum, deinde circunducta laudabo. Contra-
cta & minuta dicimus ea quæ à similitudine partium cor-
poris membra nominantur: circunducta autem, periodo
comprehensa. Non erit arduum atque difficile, quum fue-
rit usu firmata scribendi ratio, quæ dissipata sunt atque di-
nursa, colligere, & uno longiore ambitu còcludere. Mol-

lius & pronius hoc erit inchoanti, Voluptas debilitat vires, inimica est uirtutibus, rationem mentis eludit, totum demum corrumpit hominem. hoc igitur monstrum fugere debemus. Membra quinque sunt hic parua ac minuta, qualia rudiores haud magno negotio formare possint. Parua fingant initio, & antè simulacri particulas, quàm totū opus conflare discant. Longius atque uolubilius excurrit periodus, quàm uel incisa, uel membra. Antè igitur breui curriculo firment articulos, quàm Herculano stadio se committant. Quum celeritas ab exercitatione fitur incitatus, sententiam eandem uno impetu percurrant, & concludant in orbem. Est enim quando longa comprehensione curta illa & quasi mutila sustinere debemus: tum multa redigimus in unum corpus, hoc modo, Quum uoluptas debilitet vires, & inimica sit uirtutibus, quumq; rationem mentis eludat, & demum totum corrumpat hominem, hoc letale monstrum fugere debemus. Hanc continuationē si puer aut quiuis rudis initio moliatur, & medio cursu perturbatus hærebit, & oblitus unde profectus sit, & quò tendat iter, trahetur in errorem. Metiatur potius interualla breuiora, ubi principium finemque eodem penè obtutu facile conspiciat. Ad hæc mēbra singula singulis punctis interiectis, singulisque literis gradiusculis distinguenda, ut exploranti tum magistro, tum discipulo clarius appareant, & notas legenti, ubi uocem ponat, sententiamq; perficiat, ostendant. Ignorantia puerilis sepe minutissimis literis utitur, angustissima inter uersiculos spacia relinquit, uerba uerbis nullo interuallo sic alligat, ut singuli uersus singulas tantum uoces habere uideantur: nulla moræ respirationisq; signa figit: nullum ponit clementum maius: perpetuo contextu sine discri-

mine

minc ducit orationem. Qua de causa neque scriptor, neque arbiter scripta perspicere, neque hic aut ille spacijs exclusus iniquis adijcere quicquam, neq; à uersu uersum, neque à uerbis uerba separare potest. Hoc nimirum scribendi genus officit emendationi, mentis oculos hebetat, omnem que muscet & obruit intelligentiam. Parua in re sæpe grande momentum. Quid enim minus operosum est, quàm pingere obtusiore calamo, & literas efficere grandes, ut oculis subijci, faciliè cognosci, legi que possint? Quid facilius est, quàm sulcos & ordines longe diducere, ut si fuerit opus, aliquid interseratur? Quid minoris est operæ, quàm principia ducere à litera magna, exitus autem interpuncta nota quasi termino finire: ut quo loco sistendum sit atque respirandum, nouerit & auctor, & castigat? Quid? quòd distincta & expressa scriptura relegendi iucundior est? Nihil'ne est in isto commodi? Hac uoluptate capti sæpius antedicta recognoscimus, priora posterioribus aptamus, & ad nouum cursum impetum maiorem concitamus. Ne autem præscripta res sit inutilis & ociosa: quanquam apologos & fabulas quidam (quorum est Aphthonius) inter exercitationes enumerant. Nō omnes apologi, nec omnes fabulæ uanæ sunt. sæpe enim continent grauissimam aut ad bene dicendum, aut ad bene uiuendum sententiam, cuiusmodi scribentem deligere oportere existimo. Etenim quum omnis oratio constet rebus & uerbis, & res sint animi instar in corpore: insanit ille, qui uerba sine re, id est, orationem sine animo contexit. de quo Cicero præclare, Cōpositè, inquit, et aptè sine sententijs dicere, insania est: sententiosè autè sine uerborū ordine & modo, infantia. In leuitate rerū quid meditator assequitur præter nugas, & inanem uerborū congeriem?

Nonne satius est grauiora uersare, quæ semel oratiõe tractata, uix excidunt animo, & ad similia repcrienda parant mentem? Si optimis quibusque debemus assuescere (debemus autem) optima est oratio quæ grauitate sententiarum dignitatem, proprietate et ornatu uerborum pulchritudinem consecuta est. Tot sunt historiæ præclaræ, tot exempla rerum gestarum, tot decreta philosophorum, tot adagia, & argute dicta, quæ Græci ἀποφύγματα uocant, tot similitudines & cōparationes acutæ, tot sententiosa carmina poetarum, tam multa nobis suppeditant hominū sermones, tot tamque uarias suggerunt res lectiones cotidianæ: nihilne graue ex tam multis excipere possumus, quod uerbis exprimamus, & uesliamus oratione? Id quidem sicuti facile est, ita honestum & utile, & ad excellentem disciplinam necessarium. Obtinuit autem consuetudo, aut potius abusus, ut tyrones literarum antè uerba de loco in locum traicerent, et illum naturalem ordinem permiscerēt, quàm cur & quomodo illud faciendū esset intelligerent. Improbæ certè quidē et insana ratio cōponendi, quæ naturæ sermonem, etsi interdum durum & incultum, tamen facilem & rectum, & priscis illis scriptoribus amicum despicit: perplexum, implicatum, permixtum, contortum, spinosum, exhorrentem, prodigiosum anteposit. Via publica (ut opinor) semitam ignorantibus tutior est. Certa sunt incertis præstantiora. Vox gestusque naturalis decetior est, quàm flexus arte mala confisus, & dissonans. Nihil omnino tam ridiculum est, quàm quod anxie & sollicitè eam cuius est expertus, imitatur artem. An uerò saltator ignorans numeros, palaestrites inscius cautionum & petitionum, gladiator imperitus armorū, dux rudis ordinum ridetur ut artifex ἀτελής, & simius imitator: non

tor: non ridetur indoctus & ineptus uerborum compositor, qui quæ sit ratio ordinis construendi, nescit, nihilominus more simularum, sine aures, sine mente, sine iudicio, sine arte temperare uult orationem? Quum uerbum de suo loco transtuleris, ubi quæso collocabis? Melius, inquit, alibi sonat. Qui scis? Aurium iudicio opus est, & arte, ut hoc quale sit, certò iudicare possis: nec quod optimè sonat, id semper optimum censetur. Potest illud *ὀψιθέμενον*, & carmen, quod uitium est orationis, efficere. Fieri potest ut aliquid tibi sonorum iucundum quæ sit, alijs omnibus stridulum & odiosum. Cur de conglutinatione syllabarum, quæ iunctura dicitur, præcepta tradita sunt? cur de pedibus, de numeris, de membris, de continuationibus, de imitatione tam multa scripserunt ueteres, si omnia suo loco statuere nosti sine præceptis & arte? Non est ita, sed omnis elocutio arte constat, & usu longo perficitur. Expectemus ergo tempus, utamur consilio discretorum, ne quid inconsultò & temere loco donemus. Nam subeunda ratio collocandi (inquit Fabius Quintilianus) uersandi quæ omni modo numeri: non ut quodam se proferet uerbum, locum occupet. Sonantia exilia, grandia parua, uolubilia tarda, numerosa dissoluta, perfecta mutila, discernat necesse est, qui suum cuique uerbo locum assignat in oratione. Natura primùm sponte nascentes fructus, & tegumenta rudia, & antea natua dedit, deinde ars mitiorem uictum, splendidiorum ornatum, & illustriores domos fecit. Sua quædam rebus est infantia, quæ quanto meliores sunt, tanto lentioribus augetur incrementis. Sunt et orationi sua incunabula. quamobrem alenda primùm est quasi lacte naturæ parentis, donec lautiores apparatus arte sibi instruere possit. Quo
tempore

tempore citra rhetoricas artes puer emendatè magis & Latinè, quàm ornatè loqui contendit, quumq; certam non habet rationem locorum quibus apte uerba constituat, utatur ordine naturali: qui si pulcher est (ut frequenter accidit) ne ab artifice quidem est immutandus. Si quam interdum trahit secum deformitatem, tum securitate compensatur. Hoc tam seuerè tamque religiosè teneri nolo, ut ne unam quidem particulam traducere audeat. Dandum aliquid naturæ, & institutioni primæ, quæ nonnulla feliciter in alia sede, si non certissimo, tamen aliquo iudicio locat. Sed in plurimis seruetur hic ordo, quem summi oratores aliquando seruant: ut in his & in alijs multis Cicero: Obrepisti ad honores errore hominum, commendatione fumosarum imaginum, quarum simile habes nihil præter colorem. Sed quæstiones urgent Milonem quæ sunt habitæ in atrio Libertatis. Interim paululum immutat: ut, Si quis Iudices fortè nunc adsit ignarus legum, iudiciorum, consuetudinis uestræ, miretur profecto, quæ sit tanta atrocitas huiusce causæ, quòd diebus festis, ludis que publicis, omnibus que negotijs forensibus intermissis, unum hoc iudicium exerceatur. Quid quòd poëtæ studiosissimi componendi, sæpe à natura non recedunt?

Fortunate senex, ergo tua rura manebunt.

Alba ligustra cadunt, uaccinia nigra leguntur.

Mens immota manet: lacrymæ uoluuntur inanes.

Regia Solis erat sublimibus alta columnis.

Non pœniteat me compositionis huius, Fortitudo est magnitudo quædam animi in rebus aduersis, quam qui habet, non metuit periculum, non expauescit mortem, non perhorrescit ludibria fortunæ. Hic si quicquam forte mi

te miscebis, & à natura, & ab arte discedes. Natura autem uocandi casum, quoniam uim habet excitandi, primum statuit:

Tityre coge pecus. —

Quia aut nomine aut uocabulo signatur ea res de qua loquimur, sine qua nullum in oratione fundamentum est, nominandi casus uerbo anteponitur, illi uerbum subijcitur ad explendum animi sensum: ut,

Nox erat —

Altera lux aderat —

Nominibus & appellationibus epitheta, uerbis aduerbia, regentibus subiecta coniunguntur: ut in hac oratione: Virtus optima præceptoris, amare sanctè discipulos, & continere bonos honore, malos seueritate disciplinæ. In his est ordo naturalis, de quo in præsentia mentionem facimus, & quem ab imperitò scribendi tantisper obseruari uolumus, donec rationes & præcepta collocandi norit. In proferendis exemplis utrum natura præferatur, nomen ne rei, an epitheton, non magnopere laboro. Res quidem accidentibus prior est, sed oratio quæ expeditè fluere debet, ad hos scrupulos tam molestos deducenda non est. Adhibenda sit diligentia: tamen hic magis offendet nimium, quàm parum. Hoc sit mihi naturale, quod à ratione naturæ aut nihil aut parum discedit. Sit potius incorrupta Latini sermonis integritas & cura. Nunc obiectionibus quorundam occurrendum mihi uidetur. Quid? inquit, è lectionibus cottidianis nihil ne transcribet imitator in rem suam? Non assumet cuiusque pulcherrimæ locutionis elegantiam? Ad quid aliud optimi libri præleguntur? Diximus à poëtis sumendum esse discendi principium. Aliam poëtis, aliam uerò oratoribus eloquendi

quendi speciem, de qua Neoptolemus iste iudicare non potest, esse constat. Nihil hic agi temere uolumus. Quid fieri iubes? An ne totos uersus, aut hemistichia pro oratione soluta haberi? An poeticum & inusitatum dicendi genus in usum trahi? Hoc quidem neque decet, neque salubre est, neque Rhetorum quisquam suasisit genera permiscere, atque dediscenda magno labore conquirere. A poetis igitur uerba propria & translata nonnulla sumat. Loquendi formulas in tempus aliud onuttat: ut infans quum pendet ab ore nutricis, non imitatur orationem primorum ciuitatis & regum, etiam si loquentes sapissime audit. Ita ab ore præceptoris pendeat alumnus, sermonem eius exprimere nitatur, ad sublimitatem poetarum ne teneras manus extendat. Non enim semel poetæ leguntur. Non omnes eorum uirtutes simul capeffuntur. Alijs rebus & suum tempus erit, quum paulatim adoleuerit disciplina. Interea audiat à magistris poëtas interpretantibus quæ cuiusq; uerbi natura sit: multum proprijs utatur, alienis & figuratis parcè & uerecundè. Sentis ne permultos in oratione sonare quiddam poeticum, grandiloquum, & abhorrens à ratione dicendi? Tardius se contulerunt ad oratores: poëtas aliter quàm bonum fuit, imitati sunt. Fabulæ Terentianæ sermoni proximæ, uerborum proprietatem suppeditabunt, & fragmenta locutionum. At si inde transcripseris integras sententias, cis quæ pro tuis uteris, uersum interpones in oratione uitandum, & in suspicionem furti uenies, ac prouectus eruditione audies illud:

O imitatores seruum pecus, ut mihi sæpe

Risum, sæpe iocum uestri mouere tumultus?

Futurus orator mittebatur ad histrionem, longè tamen
aliter

aliter uoce & gestu corporis utebatur, atque histrio. Sic utendum rebus poetarum. Quid ego de poetis ante dixerim, meminini: nihil discordat ab istis. Nunc enim de scribendi rudimentis ago, quæ neque poetica, neque naturæ dissona esse uolo, donec ars & ratio collocationis accesserit. Quid si familiares epistolas unâ cum poematis pueri discant, & illud sponte fusum dicendi genus usurpent? Patiar quidem. Nemo tamen arbitretur eam de qua loquor imbecillitatem uirtutes hominum doctorum intelligere posse, & quod quidem necessarium est bene imitari uolenti, iudicium firmum habere. Sunt qui à pueris uno aut altero mense leuiter institutis plus exigant, quàm ipsi totos annos decem informati præstare possint. Quod habent, effundunt ante maturitatem: ingenia felicia deterrent à studio literarum, nihilo sapientiores ijs matribus, quæ pro lacte uinum liberis infundunt, & eorum molles neras uos adurunt, ac uiscera. Seuocant pueritiam ad firmulas quasdam leges quæ magna cum religione seruandas, quibus nemo unquam factus est doctus. In legendis optimis quibusque scriptoribus uerba paulatim discenda sunt, usus obseruandus, non anxie uerò cõplexus illorum transferendus. Multa exercitationum genera Cicero tradit, multa Quintilianus ex Aphthonio, sed neuter illorum uerbum fecit de locutionum formulis, de officinis, de epithetis, de Calepinis adauctis: neuter enumerauit copiam uerborum, & ea quæ seligeret imitator, quæ sunt propè infinita. Satis erat lectorem monuisse paucis, ut uirtutes eius quæ uellet imitari, cognosceret: ex eo uerborum copiam, sententiarum quæ bonitatem, quantum decorum pateretur, exciperet. Missa igitur faciant ista tyrones: de proprietate uerborum laborent: hanc è bonis autoribus alind agentes, non

tes, non ex enchiridijs petant: alioqui prodigiosam ex dissimilitudine formarum component orationem: resistent ubiq; & formula destituti, quod ad præscriptum loquantur, non habebunt. Ne quis obstrepat hic mihi, de locutionum genere fusiore loquor. Si quis duo tria uel tantum uerba coniecta decerpit ab alio sic occupata, ut tam bona recipere non possit, non reprehendo.

Quæ pars Rhetoricæ prima discenda,
quæ partitio uerborum, quæq; ex illis
aut legenda, aut repudianda. CAP. IX.

IN eo genere quod sponte funditur, uersetur puer (est & senex puer) donec propriè, incorruptè, & integrè, si non omnia, saltem uulgatiora loqui, & condere uersiculos possit. Ne propere festinet ad ornatum is qui per eruditionis ætatem iacere debet in cunis. Suum cuique rei tempus est, à nobis prudenter expectandum. Quum ex emendata Grammaticæ disciplina, & è poëtarum lectione prodierit ad historicos et oratores, tum & cæpta conficiat, & comptiorem meditetur orationem. Elaboret diligentius in elocutione & partibus illius, quàm in rerum inuentione & dispositione: propterea quòd inuenire & collocare sententias, proprium magis est prudētiae & ingenij, quàm artis: deinde quòd inuentam materiam supeditat magister. Elocutio contrà magis est artis, quàm prudentiæ, nec à docente cum rebus ipsis subministratur. Adde quòd hæc in enumerandis literis & syllabis, in dimetiendis pedibus & interuallis, puerile quiddam habet, ætate prima deuorandum: de quo Cicero in Oratore. De uerbis enim componendis, & de syllabis pro-

pemodum

permodum dinumerandis & dimetiendis loquemur : quæ etiam si sunt, sicuti mihi uidentur, necessaria, tamen fiunt magnificentius, quàm docentur. Est id omnino uerum, sed propriè in hoc dicitur. Nam omnis magnarum artium, sicut arborũ, altitudo nos delectat, radices stirpesq; non item. Sed esse illa sine his non potest.

Hæc ille. Facile non est hominem altius elatum ad eiusmodi radices stirpesq; reuocare. Pleriq; cõtemnunt hanc rerum humilitatem. Pleriq; eandem frustra cupiunt; quoniam illis sic induruerunt aures, ut sonorum modorumq; discrimen internoscere non possint. Præterea si in scriptitandis orationibus prauum characterem ipsi sibi proprium fecerint, stylumq; diuturna exercitatione firmarint, nequaquam tandem quæ sit rectè componendi ratio, docebuntur. His ego causis adductus, quæ scripta sunt de elocutione præcepta, etsi naturæ ordine tertia sunt, primùm tamen exponenda pueris existimo. Non est idem ordo scribendi, qui docendi. Quòd naturæ primum est inuenire quæ dicas, alterum inuenta collocare, tertium uerbis exprimere : scriptores artis hunc ordinem secuti sunt. Quoniam autem sine magnarum rerum scientia inuentio ieiuna est, aliudq; tempus desiderat, & præceptor discipulis debet partiri materias, aut assignare locos unde res excipiant, aut eos ad communem sensum remittere: ars eloquendi, sine qua temere locantur omnia, in docendo prima sit. Inuentio unà cum prudentia iudicioq; crescit, audiendo, legendo, conferendo, disputando, diligenter & assiduè scribendo. Si quid in hac re qui docetur, errabit, in uiam facîle reducet. Artificiosa constructio uerborum, uix unquam cuiquam erit in manu, nisi statim nouerit quæ syllabarum sit quantitas,

titas, quæ differentia uerborum, quæ coagmentatio, quæ pedes orationis, qui modus in eorum collocatione, quæ periodi numerosa circumscriptio. Nec ista nouisse satis est: in calamum & usum uocanda sunt. Alioquin erunt quasi thesaurus absconditus. Qui rerum cognitionem antè didicerunt, ad orationem postea reuoluti, scient id esse uerum quod loquimur. Quàm uellent eloqui posse quod mente concipiunt? quàm cuperent suas cogitationes monumento literarum committere? Tempus obstat, præterijt opportunitas, labor infelix territat, aliò mentem trahunt negotia grauiora: quapropter studiorum fructum percipere non possunt. Huc igitur incumbant pueri, huc neruos intendant, hanc molestiã subeant, ut postea liberius gloriosiusq; cætera discere & tractare possint. Hoc Cicero præcipit: Sit is qui dicet aut scribet, institutus liberaliter educatione doctrinaq; puerili. Quum sit autem uerborum ornatus duplex, unus simplicium, alter collocatorum: simplicem primum considerent, & imitentur architectos & artifices, qui partes antè probant, quàm coniungant in unum. Sciant quàm uaria sit natura uerborum. Sunt enim pudica obscœna, nitida sordida, usitata inusitata, Latina barbara, urbana agrestia, sublimia humilia, grauiua leuia, propria assumpta, uetera noua, sonantia exilia, grãdia parua, tarda uolubilia, lenia aspera, integra corrupta. Est & quiddam medium interiectum, ut inter priscum & nouum, inter sonorũ & tenue, inter grande & paruũ, inter tardum & uolubile, inter lene & asperũ. Ex his obscœna relinquuntur poetis epigrammaticis, lyricis, mimorũ & elegorum scriptoribus, satyricis, impudicis, ut Catullis, Horatijs, Ouidijs, Martialibus, Iuuenalibus, Apuleijs, spurcis & scœdis hominibus, qui me-

tuunt

tuunt ne sui libelli castrati esse uideantur. Habeant isti pudenda uirilia atque muliebria, perfricent frontem, abijciant pudorem: stupra, adulteria, probra, libidines Venereas etiam prodigiosas suis uerbis effrant. Nihil uerecundius agant quàm leno, quàm meretrix, quàm cinædus, quàm flagitiosissimus homo & impudentissimus. Inquinent Musas castissimas nefaria turpitudine uerborum, scortatorum quàm scriptorum similiores: dicant hæc more improborum, Verba non putent. Reijciant honestorum consuetudinem, sentiant cum impura colluione stupratorum, & putida uerba tandem cum subolenti flagitio dicant. Quintiliani sententiam de uerbis, reueantur honestiores. Sed ne inornata sunt quidem, inquit, nisi cum sunt infra rei, de qua loquendum est, dignitatem, excepto, si obscæna nudis nominibus enuncientur. Quod uiderint, qui non putant esse uitanda, quia nec sit uox ullæ natura turpis, & si qua est rei deformitas, alia quoque appellatione quacunque ad intellectum eundem nihilominus perueniat. Ego Romani pudoris more contentus, ut iam respondi talibus, uerecundiam silentio uindicabo. Quintilianus hæc sanctissimè. Subobscæna non modò non collocabit in oratione uerecundus & ingenuus puer, sed ne leget quidem scriptores impudicos, quoniam morum sanctitas hac meretricia disciplina præstantior est. Leget ista postea uir factus, doctrinæque seueriore confirmatus: quanquam & illis tum omnino carere potest, in tantæ honestissimorum copia. Quid si turpia aliquando uenient in causam? Utetur ea arte, qua Cicero tertia in Verrem: Itaque primum illum actum istius uitæ turpissimum & flagitiosissimū prætermittam. Nil à me de puritæ suæ flagitijs peccatisque audiet, nihil ex illa impura

adoleſcentia ſua, quæ qualis fuerit, aut meminiftis, aut ex eo quem ſui ſimillimum produxit, recognoſcere poteſtis. Omnia præteribo quæ mihi turpia dictu uidebuntur: neque ſolum quid iſtum audire, uerumetiam quid me deceat dicere, conſiderabo. Vos quæſo date hoc & concedite pudori meo, ut aliquam partem de iſtius impudentia reticere poſſim. Omne illud tempus quod fuit antequam iſte ad magiſtratus Remq; publicam acceſſit, habeat per me ſolutum ac liberũ: ſileatur de nocturnis eius bacchationibus ac uigilijs. Lenonum, aleatorum, perduſtorum nulla mentio fiat. Damna, dedecora, quæ res patris eius, ætas ipſius pertulit, prætereantur. Lucretur indicia ueteris infamiae, patiatſur eius uita reliqua me hanc tantam iacturam criminum facere. Vides'ne quid ſignificet? ſentis quid hoc ſchemate aſſequatur? Decorum ſeruati in perſona ſua, aduerſarium grauius lædit, quàm ſi rem omnem detegeret. Similem quoq; pudorem retinent heroiçi poëtae, Vt Vergilius in octauo,

—Ea uerba locutus,

Optatos dedit amplexus, placidumq; petiuit
Coniugis infuſus gremio per membra ſoporem.

Quinetiam idem uerecundus eſt in Venere beſtiarum, quum dicit hæc tertio *ῥοφῆνῃ*:

Hoc faciunt, nimio ne luxu obtuſior uſus
Sit genitali aruo, & ſulcos obliet inertes,
Sed rapiat ſitiens Venerem, interiuſq; recondat.

Quintiliano ſimilis prudentia non deſuit, ut in iſtis, Iam ſi minor in eligendis cuſtodum & præceptorum moribus fuit cura, pudet dicere in quæ probra nefandi homines iſto cædendi iure abutantur, quam det alijs quoq; nonnunquam occaſionem hic miſerorum metus. Non morabor

rabor in parte hac. nimium est quod intelligitur. Pueri liberaliter educati, & penè infantes puellæ hunc ruboris colorem seruant in loquendo: Quid faciet natu maior disciplinis liberalibus excultus, quem potissimum commendat grauitas & uerecundia? Ad turpia contegenda seruit translatio, quam Græci μεταφοράν uocāt, ut aruum genitale pro uulua: & ἀποσιώπῃς, hoc est reticentia, ut, Nimium est quod intelligitur, & suppressio uerbi, quæ dicitur ὤλεσθαι:

Nouimus & qui te-

& συνεκδοχή, ut,

-Rapiat sitiens uenerem.

& ἀλλήγορία, id est alia oratio, & continua translatio, ut,

-Sulcos oblimet inertes.

& ἀστράχνησις, quod est abusio, ut in hoc Persiano,

Patriciæ immeiat uulua.-

abutitur uerbo immeiat, quia nullum rei de qua agitur, proprium est: satyricam tamen non effugit obscœnitatem.

De uerbis sordidis.

C A P. X.

Sordida sicut obscœna recipiunt ij qui uilem & abiectam materiam tractant, ut Martialis,

Si memini, fuerant tibi quattuor Aelia dentes,

Expuit una duos tuſſis, & una duos.

Ventris onus posito (nec te pudet) excipis auro,

Basse bibis uitro, carius ergo cacas. Persius:

-Hic, inquis, ueto quisquam faxit oletum.

Pinge duos angues. Pueri, sacer est locus, extra

Meijte-

At si unctus cesses, & figas in cute solem,

d 3

Est pro

Est prope te ignotus, cubito qui tangat, & acre
 Despuat in mores, penemq; arcanaq; lumbi
 Runcantem, populo marcentes pandere uulvas.
 Tu quum maxillis balanatum gausape pectas,
 Inguinibus quare detonsus gurgulio extat?
 Quinque palestinae licet haec plantaria uellant,
 Elixasq; nates labefactent forcipe adunca,
 Non tamen ista filix ullo mansuescit aratro.
 Foeda sunt, Expuit, Cacas, Oletu, Meijte, Arcana lumbi,
 Runcantem penem, Vellant plantaria pilorum, Nates:
 Translata sunt quidem, Arcana lumbi, Runcantem pe-
 nem, Vellant plantaria: sed & aliquando metaphora sordet,
 ut, Iuppiter niue conspuat Alpes. Castrata morte Aphri-
 cani Resp. Stercus curiae Glaucia. Persecuisti Reip. uo-
 micas. Emunxi pecunia senes. Inter sordentia numerabo
 (licet enim docenti) latrinas, matelliones, culum, podicē,
 sterquilinum, scaphia, finum, lotium, merdam, ructu, eru-
 ctare, uomere, pedere, aluum, aqualiculum, uesticam, pus,
 pediculum, pulicem, cimicem, putere, cauponari, lutum.
 Quintilianus inter sordida ponit Sarracu, Pusione, Ru-
 scione: quae humilia, non sordida appellabo. Statuendum
 enim discrimen est inter obscena, sordida & humilia, ne-
 qua sit in docendo confusio & ambiguitas. In carmine
 Persiano Marcentes uulvae, uerbum dicatur obscenum:
 Nates, sordidu: Gausape pro barba, humile & abiectum.
 Obscenum, sordidum est: non quicquid sordidum, sem-
 per est obscenum. Ista confunduntur interdum, scio, sed
 docenti finiendum est quo quicque uocabulo proprie si-
 gnificet. Ex ijs quae foeda lutulentaq; sunt, nescio quo-
 modo, alijs alia sunt acceptiora, ut uomere quam cacare,
 urina quam meiere, ructare quam pedere, lutu quam pu-
 tere.

tere. Quātō ad uniuerſum genus propius accedunt, tantō mihi uidentur uſitatiora. Sordidis utuntur medici addu-
cti quadam neceſſitate, Item rei ruſticæ explanatores, ut
quid uelint, proprijs nominibus exponāt, Bucolici poëtæ
rarō, Lyrici nonnunquam, Satyrici & epigrammatici
plus ſatis. Heroici & oratores non eō deiſciunt maieſta-
tem ac dignitatē orationis, ut opus honeſtum & nitidum
inquinent ſœditate malè olentium uerborum. Quam mihi
ſeruabit honeſtatem, qui bene componendi gloria ductus,
uerecunda & nitida leget. Nihil eſt omnino quod magis
orationē abijciat, quàm ſordes & obſcœnitas. hinc illud
Quintiliani, Nec ſordidis unquam in oratione eruditi
locus. Cœleſte quiddam ac diuinum eſt oratio bene con-
ſtituta, quam ſpurcitia & uerborum proluuione conta-
minare neſarium duco. Indulgeant ſibi qui praua licen-
tia geſtiunt, & impuris hominū moribus deſtinant ſuos
labores. In oratione iuuenili, ſicut in ætate, uerecundiam,
pudorem, honeſtatem, & illud idē ad naturam & ad
mores & ad omnem uitæ conſuetudinem accommoda-
tum, ſeruari oportere iudico. In habendo uerborum de-
lectu, ſicut militum, non eſt omnis ætas, aut lingua, aut
conditio, aut natura conſcribenda. Nec enim mules ætate
fractus, nec obſcœnus, nec barbarus, nec lutulentus inter
honeſtos ciues bene audit.

De uerbis inuſitatis. CAP. XI.

PRæterea inuſitata uerba & insolentia eſſe fugienda
monſtrauit ignominia Siſennæ. C. Ruſcius accuſabat
Chirtilium, Siſenna deſendens dixit quædā eius ſputati-
lica crimina. Tū C. Ruſcius, Circūuenior, inquit, ludices,
d 4 niſi

nisi subuenitis. Sisenna, quid dicas, nescio: metuo insidias. sputa tilica, quid est hoc? sputa quid sit scio, tilica nescio. Maximus risus. sed ille tamē rectē loqui putabat esse inusitatē loqui. Hæc Cicero in Bruto, qui non semel præcipit, ut uerbis usitatis illustremus orationem, propterea quòd inusitata sunt obscura, obscuritas autē est (ut ait) in oratione ciuili uitium uel maximum. Quid enim attinet dicere, si nolis intelligi? Ad quid est oratio? Ad obijciendas tenebras, an ad explicanda sensa mentis? Vt autem animi conceptus explanabit id quod ipsum lumine interpretationis eget? Si summa uirtus orationis est claritas, ut est, summum profectò uitium erit *obscuritas*. Et si oratoris officium est docere & explicare controuersiam, huic rei cōtraria sunt uerba inusitata & inaudita: & si deniq; quanto quis eloquentior, tanto dilucidior est: certē quanto quis indoctior, tanto obscurior. Præferamus igitur lucem tenebris, diem nocti, serenitatem nubilo cælo, & ut priscorū glandes repertis frugibus, sic & eorum uerba, melioribus inuentis, missa faciamus. Cæsari credāmus ingenij acerrimi uiro, uerbum insolens & antiquatum tanquam scopulum esse fugiendū. Imitemur cloquij parentem M. Tullium, cuius oratio uerbis usitatissimis expressa; quī Romanē loqui debeamus, ostendit. Egregiam uerò & eximiam laudem refert, qui oblitterata multisq; seculis obsita refert in usum, & cum præsentibus quasi cum matre Euādri loquitur, fortē quòd pauci imperitiores dictitant illud Tanto melior, ne ego quidē intellexi. Aliter uisum est Cicer. in hac re iudici uel optimo, qui in oratione pro Cluentio Cepāsum ridet, quòd ex tam multis auditoribus nemo quid ille sibi uellet, intelligeret. Hoc uitium solet ijs accidere, qui uerba in medio posita respuūt, trita

& usitata

Et usitata aspernantur, communia et omnibus aperta pro-
 uitiosis habent, uenantur abstrusa, laudant insueta, opti-
 ma censent quæ paucis aut nemini sunt cognita. Relictis
 omnibus orationis insignibus, duo summa flagitia com-
 mittunt, in quibus eloquentiæ fructum ignari rerum esse
 putant: uerba prisca locant, temerè permiscunt omnem lo-
 quendi consuetudinem. Hoc autem prodigiosum dicendi
 genus adsciscunt in umbra ac in ocio, quum ad ingenio-
 rum ostentationem ignotissima quæq; proferunt in me-
 dium, ut plura legisse, plura didicisse uideantur. Vulgi se-
 quuntur opinionem, cui ignota et incomprehensa admi-
 rationi, nota et conclusa contemptui sunt. Lestitant En-
 nij uersiculos apud Ciceronem, apud Aulum Gellium, et
 Nonium Marcellum. Passim colligunt quæ uenosus Ac-
 cius, et uerrucosus Pacuuius antiquè dixit. Plautina et
 Lucretiana referunt in enchiridium, ut cum sit usus, ex-
 promant. Perlegunt scriptores ineptissimos, qui Chaldaea
 Hebræa, Persica Macedonica, Græca Latina, barbara pe-
 regrina, nota ignota, pura et impura confundunt, tametsi
 nullius omnino linguæ docti periti que sunt. Ex illis eli-
 ciunt asperam (cum Persio dicam) loquendi sartaginem.
 Plurimi enim ridiculè docti extiterunt hoc seculo proxi-
 mo, quorum laus omnis orto lumine bonarum literarum
 adumbrata est. Horum periculo sapiant intacti, et dum
 exercentur apud magistros, nunquam inusitatè loquan-
 tur. Non omnibus omnia licent. Pueros usitatis assuescere,
 prisca notare uolo. Quum aberit ignorantiae suspicio,
 concedam ut prisca et inusitata liberius usurpent, quibus
 loco positis grandior atque antiquior uidetur oratio.
 De quo sic Tullius de Oratore libro tertio: Inusitata sunt
 prisca serè ac uetusta, et ab usu cottidiani sermonis iam-

diu intermissa, quæ sunt poëtarum licetiæ liberiora, quàm nostra, sed tamen rarò habet etiam in oratione poëticum aliquod uerbum dignitatem. Neque enim illud fugerim dicere ut Cælius, Qua tempestate Pœnus in Italiam uenit. Nec prolem, aut sobolem, aut effari, aut nuncupari, aut, ut tu soles Catule, non rebar, aut opinabar, & alia multa, quibus loco positus, grandior atque antiquior oratio sæpe uideri solet. Ad quod alludens Quintilianus hæc, Verba à uetustate repetita, non solum magnos assertores habent, sed etiam afferunt orationi maiestatem aliquam, non sine delectatione. Nam & auctoritatem antiquitatis habent, et quia intermissa sunt, gratiam nouitati similem parant. Sed opus est modo, ut neque crebra sint hæc, neque manifesta: quia nihil est odiosius affectatione: nec utique ab ultimis & iam oblitteratis repetita temporibus, qualia sunt toper & antigerio, & exantlare, & profapia. Pauca aspersit operi Vergilius,

Cælicolæ magni, quianam sententia uobis
Versa retro—

Ignæus est olli uigor, & cœlestis origo.

Tros Rutulus ue suat—

Vnam ex uirginibus socijs sacrâ que caterua
Compellabat—

Hæc effatus, equum in medios moriturus & ipse
Concitat—

Vt rebare, Venus (nec te sententia fallit)

Troianas sustentat opes—

—Pulchra faciat te prole parentem.

Prisca sunt, quianam, olli, suat, cōpellabat, effatus, rebare, prole: quibus & similibus antiquius fit & grandius heroicum poëma. Talia quædam uir impense doctus in re
grau

gravi, seuerâ, tristi, non indecorè (si modò rarò) ponet. Nec enim omnes, nec in omnibus locis, nec semper, nec omnia decet: & hoc nostrum seculum fastidit omnia quæ Ciceronis auctoritate defendi nequeunt, quem antiquitatis huius admodum parcum fuisse constat. Iam quis feret hæc? Opuliscere pro ditescere? Pauperavit pro pauperem fecit? Paucies pro raro? Latibulet pro lateat? Ignauit pro ignauū fecit? Occepso pro cæpero? Obstrigilare pro obstare? Porcet pro eo quod est prohibet? Redostit pro redijt? Ruspari pro scrutari? Redurare pro aperire? Grandibo pro extendam? Conscribellauit pro cōscripsi? Ebriulare pro ebrium facere? & sexcenta alia quæ posteriores non receperunt, propterea quòd essent aut agrestia, aut aspera, aut urbaniorum consuetudine destituta. Vt breui finiam, usitatis tutius utemur.

De uerbis barbaris. CAP. XII.

Barbara quoque locum non habent in oratione pura ac Latina, nisi forte ut homines externi, sic illa donata sint Romana ciuitate. Recepta sunt à multis gentibus nonnulla, ut à Gallis carrus, rheda, petoritum, carruca, alauda, gesum, gallicæ pro soleis, à Britannis couinus, à Germanis essedum, ab Hispanis lancea, à Sardis mastruga (scribitur & mastruca) à Pœnis mappa, à Persis gaza, à Macedonibus phalanx, ab accolis Fadi ploxygenum, à cæteris Italiæ populis multa, quæ nunc pro Latinis ac domesticis habentur: à Græcis plurima, quòd inter barbaros sola Græcia non esset. Ex his alia integra manserunt, ut lego, fero, propino, lampas, eclipsis, peristroma. Alia sunt inflexa, ut domus, ager, poëma, fama, bos, musa, anima. His & eiusmodi multis licet puer utatur. Quinetiam
Græca

Græca quædam Latinis immiscere, & suis literis notare interdum licet, si quid occultare uolumus, aut si nostris uenustiora sunt Hellenica, aut sicuius hominis Græci uerba memoramus, aut si nostra desunt, quod frequenter accidit in nominandis arboribus, piscibus, auib, herbis, radicibus, instrumentis, medicamentis, partibus corporis humani, suppellectile, gēmis, lapillis. Discant utranque linguā necesse est ij qui Latina à Græcis, Græca à Latinis segregare uolēt. Quod quum fecerint, est enim cum primis necessarium, Latine quàm Græcè loqui pulchrius & decentius, credo, existimabunt. Turpe quidem est, & inutile, morem ciuium suorum, usus cottidianos, proprium sermonem, linguam patriæ deserere, desciscere ad alienos, & externa malle tractare, quàm domestica atque familiaria. Nam si propter Latina Græcis operam damus, quid ita Græca Latinis anteponimus? Quid peregrina frustra sequimur, nostra damnamus? cur sumus hospites in patria? Quin audimus M. Tullium dicentem, nolle se magis uti Græcis in oratione Latina, quàm Græci Latinis utantur in Græca? Ridiculus est qui Græcè nugatur, nesciens Latine, quique in medio posita non attingit, longinqua et fugitantia frustra persequitur. Prima sit cura puero, ut Latine loquatur, Græca sine causa ualida ne admisceat: barbaram uocem ut contagionē uitet. Omnis autem uox barbara censetur, quam indecorè fuderunt imperiti, non admiserunt docti, ut leuca, passagium, treuga, aucha, manutentia, capellania, locumtenens, capellanus, bannum, guerra, pitantia, birectū. Quid moror? Sunt alia propè infinita, quæ uulgus imperitorum facit imitatione sermonis eius quem didicit à nutricibus, præter illa quorum ui, natura, genere, declinatione abutitur, ut tenetur pro debet, furat

uit pro

uit pro furatusest, domauit pro domuit. Quæ nisi exhorreat rudior ætas perinde atq; serpentem, nisi timidè et religiosè obseruet usu doctorum probata, nunquam purè, syncerè, tersè loquetur. Sermonis, ut morum, uerecundia mihi placet, displicet licentia: quam indulgent ij qui uerètur ne puer, si eius conatus infelices reprimas, parum sit copiosus. Probat agricola luxuriantem segetem, quæ depascenda sit in herba: spinas & carduos nunquam probat. Hic etiam corrigendus est error illorum, qui quicquid in receptæ dignitatis scriptoribus reperiunt, uerum, probum, idoneū arbitrantur. Quot sunt apud Catonem, Plautum, Terentium, Lucretium, Varronē, quibus iam ut obliteratis non utimur? Quot apud recentiores nominis amplissimi subolent barbarum quiddam, & offendunt aures eruditæ? Probati sunt autores, sed temporis & præsentis usus habenda est ratio. Ergo in eligendo opus est prudentia, & illorū imitatione, qui tempore Ciceroniano, et paulò post literis & doctrina floruerunt. Tum multo elegantissima fuit Romana lingua, & longo interuallo superauit antiquorum uastitatem. Ex uerbis priscis multa antiquauit, multa neglexit, multa reseruauit aut ad necessitatem, aut ad seueritatem. Itaque ualeat in his quod aiunt, Nec passim, nec ab omnibus. Nullus est enim delectus, si omnibus utimur promiscuè.

De uerbis agrestibus. CAP. XIII.

EST præter hæc uerborum quoddam genus uastum, insuauiter, rusticaniū, agreste, inamabile, absonum, & absurdum, quod uix unquā apud principes linguæ Latine reperiatur. Rationem quæris? Nō uideo, nisi quòd inuenustum ingratumq; est auribus eruditæ: ut hominū quidam
natura

natura sunt inepti, deformes, illiberales, inhumani, duri et asperi, qui quidem inter aptos & habiles nullum unquam dignitatis inueniunt locum. Hanc uerborum acerbitatem & offensionem sæpenumero parit inflexio, ut cœlicolæ, amandæ, insanix. archipiratæ nō displicent : at cœlicolarum, amandarum, insaniarum, archipiratarū, nescio quomodo iniucundus est sonus, & ingrata quædam magnitudinis moles, qua grauitèr offensi excultiores uiri οὐκ ἔτι, quæ talia minus odiosa faceret, inuenerunt. Decurrunt aliqua uenustè, & cœlicolū pro cœlicolarum dixerunt. at multa ne hoc quidem modo quasi dolare poterunt. Fœdus est insaniū quàm insaniarum, & archipiratū quàm archipiratarum. Nec auris expurgatæ uir lubenter audire poterit hos casus, contemplandorum, duorum uirorum, triū uirorum, sestertiorum, nūmorum, quadringentorum annorum, facum à face, nucum à nuce, picum à pice, nostratiū, uēstratium, sobolum, amarorum ab amarore, cornuum, genuum, luctuum, specierum, progenierum. Nec multo libentius exaudiet aliū in patrio casu, peculij, Vergilij, Laurētij, Didonis, Calistonis, poëmatis, manui, gustui, speciei, progeniei, speciebus, & infinita generis eiusdem. Quæ (malum) ista est superstitio : nescio. In omnibus rebus pulchri uoluptas in precio est, uilis autem deformitas. Erasmus in Ciceroniano ridet hanc religionem. Ego uerò non rideo, si modum seruat. Visum est optimo cuique sic loqui, nō modò Latinè, sed etiā Græcè, Gallicè, Germanicè, Britannicè. Agit in eos qui unum mirantur Ciceronem suum, qui uigilanter obseruant quos ille probarit casus, eosq; quasi reliquos omnes improbatu, referunt in ingētem librum. Hos ex parte ridiculos, ex parte tolerabiles esse puto. Quòd in lectiōe uerborū laborent,

laborent, uehementer probo. Quòd numerum conficiunt eorum quæ elegantia, quæq; uasta sunt & inamœna, non interrogantes aurium sensum, probare non possum. Non est hoc neq; numeri, neq; autoritatis, sed ingenij, magniq; iudicij. Sēt it ingeniosus & exercitatus quid urbanè, quid rusticè sonet, & illiberaliter: numerum certum nō habet. In eo ipso peccant & quidam grammatici, qui innumera uocabulorum turbam referūt in heteroclita, quòd illis numerus aut singulariter, aut pluraliter, aut casus unus plures ue desint: quasi numero comprehendi possint omnia declinationum coniugationumq; membra quibus ornatiores uiri non utuntur. Quis liberaliter eruditus, præter Mancinellos, dicat, dementiam, concordiam, uigilantiam, alborem, dulcedinem, carere numero plurali? Tamen in dementijs, insanijs, concordijs, dulcedinibus, alboribus, nullus est gratiæ decor. Non omnino desunt eis alterius numeri casus, sed pauci uenusti iucundiq; suppetūt, in quibus numerandis operam perdere quid est necesse? At durum & inuenustum habeo pro nullo. Ego quoque habeo in re molli & decora, non eodem modo in dura et insuauī. Rarus est usus istorum, non tamen omnino nullus. Quid hic agam? Muta figuram. Res eadem pluribus modis efferri potest. Eadem est ratio in coniugatione uerbi, quæ in declinatione nominis. Amabitis, amaueratis, amaremini, amaminor, amaremur, formidabar, uerecundabar, cuperemur, legiminor, audirere, audiremini, & alia rationis eiusdē, quæ pares aut plures habēt syllabas, adeò uasta sunt, & auditu tristia, ut perrarò intromittantur in orationem elegantem & exultantem. Nec illud est modò in casibus partium orationis. Vt horridulum sonum fugerent ueteres quanuis graues & seueri, dixerūt pro duello bellum,

bellum, pro dvis bis, pro duellio bellum, pro axilla alam,
 pro uexillo uelum, pro taxillo talum, pro paxillo palum,
 pro si audes sodes, pro si uis sis, pro aisne ain', pro non
 quire nequire, pro magis uelle malle, pro non uelle nolle,
 pro non scire nescire, pro postmeridiano pomeridianum,
 pro medidie meridiem, aufugit nō abfugit, aufer non ab=
 fer, amouit non abmouit, abstulit non abtulit. Plura nu=
 merat M. Tullius in Oratore, quibus refutantur horridi
 & uastè hiantes homines barbari, qui de uerbis laboran=
 dum esse negāt. Cur dicimus amasti amastis, amassem amas=
 semus amassetis amasse, steti non stui, dedi nō daui, perij,
 præterieram, audierunt, uenierunt? Cur uera & integra
 mutamus? Cur hæc magno consensu doctissimorum homi=
 num citra omnem carminis necessitatem recepta sunt?
 Proh deūm hominumq; fidem, præfectus fabrūm, duum=
 uirūm, triumuirūm, liberūm pro filiis & filiabus, sester=
 tiūm, nummūm, septingentūm, metu pro metui, ut hic,
 Parce metu Cytheræ. — Dic pro dici,

Libra die noctisq; pares ubi fecerit horas.

Cur inducta syncope, apocope, synæresis, πέντε τῶν ὀνομα=
 τῶν καὶ ἑνὸς ὀνόματος? Cur uincla sæpe Liuius, secla Cicero di=
 xit? caldam & soldum tota Latinorū ciuitas? hoc ne poë=
 ticum? nequaquam. Quale igitur? ingenuum & urbanum
 loquendi genus: quod qui despicit, matris suæ linguā bal=
 butiat infantissimus. Ne communem tot gētium linguam
 qua ciuitates, populi, nationes, regna, imperia habent in=
 ter se commercium, qua poëmata, annales, historiæ, leges,
 iura, sacra, profana, artes & scientiæ omnes explicantur,
 ne tam celebrem linguam turpiter & sædè polluant atq;
 corrumpant. Ex hoc numero uerborum absonorum alia
 per intercisionem aptiora sunt, ut præterierā, sestertiūm.

Alia

Alia per apocopen, & extremæ syllabæ decurtationem, ut exin, dein, ain', nostin', metu, tribunal, nam integrum fuit tribunale. Alia per synæresin, qua duæ syllabæ in unâ constantur, ut peculij scribimus, ac si esset quatuor syllabarum, duas tamen postremas literas in unam collidimus. Alia per mutationem, ut aufero, sustuli. alia per additionem, ut redeo, ambio. Plura manserūt rudia & impolita, quibus nemo nisi malus architectus ædificat orationem. Quum reieceris & obscœna & sordida, & inusitata, & barbara, & rusticana, cæteris utare licet, non temere quidem & promiscuè, sed ut natura rerum & decorum postulat. Quod quale sit, suo loco dicemus.

De uerbis humilibus. CAP. XIII.

Humilia nullam penitus habent dignitatis auctoritatem. Sunt enim quasi humi deiecta, & ad extremam honestorum conditionem redacta. Quapropter sicut in oratione gracili & humili collocantur, ita in ornata, amplâ, graui, sublimi, locum nō habent. Exempla suppeditat haud pauca Vergilius in Bucolicis, cuiusmodi sunt capella, uiburna, cascus, arbuta, casa, tugurium, hibiscus, mulcetra, mulget, lycisca, uitula, myrica, corylus, salianca, paliurus, & quatuor hæc loco fistulae, cicutæ, auena, arundo, calamus: ruminat, sinum lactis, uacca, bucula, opilio, bubulcus, fiscella. Suppeditant etiam multa Satyriaci, in quibus sunt salia, occare, runcare, artocrea, synciput, syngultire, trama, omentum, offa, olla, cornicari, sclopus, cuminum, pappare, lallare, canthus, agaso, farrago, uappa, sambuca, gluto, saperda, stuppæ, obba, festuca, pannucius, pannosus, seriola, tucetum, pituita, puppa, caballus, sume, corbis, porcus, uerruca, scopæ, sartago.

Finis non erit si cuncta persequi uelim quæ posuerunt satyrici, medici, philosophi naturales, epigrammatici, mythici, quique de re rustica libros confecerunt. Coguntur enim uilia quædam usurpare uerba, nota atque trita uulgò, dignitatibus aut ignota, aut certè nisi quando se demittunt, indecora. Non enim deceat reges et principes et grauius agentes abiectissima nominare artium instrumenta, aut animalia ignobilia, aut morborum medicamentorumque minutæ species. Si quis tamen aut apud M. Tullium, aut Vergilium in Aenea, aut Liuium, talia quædam reperiat, ne clamitet indignum facinus. Eloquentissimi uiri in eodem opere non semper utuntur eodè genere dicendi, subinde mutant stylum, pro uarietate rerum de quibus agunt, nunc graues et ornati, nunc suauēs et temperati, nunc subtiles atque demissi. hinc πένδαυρα apud Homerum, Pero apud Vergilium, Pussio apud Tullium. Communia quàm propria minus uilescunt, ut bos quàm uacca, sus quàm porcus, bestia quàm mus, pastor quàm bubulcus, opifex quàm coriarius, instrumentum quàm pala, nux quàm castanea, obsonium quàm lucanica, uestis quàm bardocucullus, uas quàm trulleum, pomum quàm sorbum, piscis quàm gobio, uerriculum quàm scope: quæ sunt usitatiora, quoniam in omnium ore uersantur, ut homines plebei qui in media luce Reipub. uiuunt. sic illa ab humilitate ueniunt in aliquam dignitatem. Erit quod hic mireris: Omnes sententiæ in quibus humilia sunt uerba, non habende sunt humiles, ut hæc, In sordido panno sepe latet alta sapientia. Nec etiam contrà: ut,

Fronde super uiridi sunt nobis mitia poma,

Castaneæ molles, et pressi copia lactis.

Quid: quòd heroici poëtæ ducunt similitudines ab apibus et formicis

& formicis, quæ res humilimæ uidentur? Est in illis soler-
 tia, atq; labor honestus, qui suum meruit honorẽ. Gemmæ
 & uniones res parvæ quidem, sed precio ingentes, inter
 humilia non debent haberi. Turbo ille quo pueri ludunt,
 res est admodũ uilis, sed tamen usu notus est. Nec abiecta
 uerba semper metiemur uilitate rerũ quas significāt, sed
 aliquando hominũ existimatione. Quid est noctua uilius?
 sed illam celebrarũt auguria, celebravit prodigiosa natu-
 ra. Qui nouit humilium uerborũ differẽtias, deiectissima,
 si uolet, collocabit in iocosa scriptione, ut si quando ludat
 βατραχίουμαχίαν, culicẽ, caluitium, pulicem, testamẽtum
 porcelli, leues apologos, fabulas aniles, discordiam partiũ
 corporis humani, ridiculas epistolas, morias, colloquia
 hominũ postremorũ, nũmos, satyras, lasciuas odas, syluas,
 epigrammata minutiora, asinos aureos, iocos amoris, co-
 mœdias Attellanas & tabernarias, & siqua sunt similia.
 At in laudatione, in panegyrico, in genere epidiẽtico, in
 historia, in epistola graui, in suasionẽ, in causa forense ad
 declamandum posita, ne constituat humillima, nisi fortẽ
 quum hominẽ aut rem maximẽ deprimere & attenuare
 uolet. Aliud est tenue dicẽdi genus & acutũ, aliud humile
 & abiectũ, in quo ioculariter quod uolumus effundimus.
 Si quid habebit iudiciĩ studiosus artis, monitus uidebit
 quatenus progredi liceat, & Ciceronẽ optimũ ducem le-
 ctitabit, illumq; imitari iam occipiet. Nõne uides ut pueri
 liberaliter educati, siquãdo gallicẽ loquantur apud hone-
 stos uiros, humilitatẽ fugiant, quam iocantes apud equa-
 les cupidẽ sectantur? Eadem est ratio Latine loquẽtis, &
 temporibus ac personis accommodantis orationem. Dis-
 scenda sunt omnia, non temere & fortuito iacienda. De
 quo non pigebit audisse Quintiliani sententiã: Obscœ-

na, inquit, uitabimus, & sordida & humilia. Sunt autem humilia infra dignitatem rerum aut ordinis. In quo uitio cauendo non mediocriter quidā errare solent, qui omnia quæ sunt in usu, etiam si causæ necessitas postulet, reformidant: ut ille qui in actione Ibericas herbas, se solo nequicquam intelligente, dicebat, nisi irridens hanc uanitatem Cassius Seuerus, spartum eum dicere uelle indicasset. Nec uideo quare clarus orator duratos muria pisces nitidius esse crediderit, quàm ipsum id quod uitabat. Hæc ille. Vergilius humilem putat esse panem. dicit igitur,

—Cereremq; canistris Expediunt.—

—Onerantq; canistris Dona laboratæ Cereris.—

Et Cereale solum pomis agrestibus augent.

Consumptis hic fortè alijs, ut uertere morsus

Exiguam in Cererem, penuria adegit edendi,

Et uiolare manu malisq; audacibus orbem

Fatalis crusti, patulis nec parcere quadris,

Heus etiam mensas consumimus, inquit Iulus.

Per cererem, per cereale solum, per exiguam cererem, per quadras, per fatale crustum, per mensas quid accipimus? quoties proprium mutat alieno, ut copia & dignitate crescat res tenuis? Littore athena locant alij. — Propriū uasis nomē (collam æream intelligo) parum nitidum existimabat. Idem, Frangere saxo, pro mola aut mortario.

Dant manibus famuli lymphas.—

pro eo quod est, dant aquas.

Et Tyrrhena pedum circumdat uincula plantis.
pro calceis.

—Famulasq; ad lumina longo

Exercet penso.—

pro eo quod est, nere iubet.

Multa alioquin humilia splendide dixit. Grammatici tamen

men

mē notant apud eum ταπεινωσις, id est humilitatis uitium,
In gurgite uasto. præsensit, & magnitudinis epitheton
adiexit. Semper humilitas in eo retinet decorem, ut in his,
Cui tolerare colo uitam, tenuiq; Minerva.

Excussi manibus radij. —

Colus & radius non amplē sunt dignitatis, at honore circūuestita non dedecet. In tenui genere uersanti sumenda sunt de medio uerba, & in oratione liberius quā in heroico opere, uerecundius quā in abiecto collocanda.

De uerbis sublimibus.

CAP. XV.

DE uerbis sublimibus pauca, si bonum uidetur, adiungamus. Nam de pudicis, de nitidis, de usitatis, de Latinis, de urbanē sonantibus nihil hic esse dicendum existimo, propterea quod expositis contrarijs hæc omnia clārē satis elucent. Etenim quicquid in hac lingua obscenū, sordidum, inusitatum, barbarum, agreste non est: castum, purum, uulgatum, Latinum sit necesse est. hæc oppositio uerborum nihil habet intermedium, de quo in habendo delectu querendum esse uideatur. Castis castiora, puris puriora, uenustis uenustiora inuenire possis, itemq; obsceniora obscenis, sordidiora sordidis: sed erit hoc comparantis, non opponentis ex aduerso contraria. Non ita res est in humilibus & sublimibus. Non enim quicquid humile non est, sublime dici debet: nec quicquid sublimitatem non habet humile putandum. Est aliquid interiectum quod neutrius est particeps. Sublimia & ardua sunt, quæ dignitate & amplitudine splendescunt: ut nomina deorum & sacrorum cum propria, tum communia: ut deus, conditor, pater, moderator, regnator, genitor, numen, rex omnipotens. & apud ueteres, Iuno, Minerva

ua, Diana, Apollo, Mercurius, Hercules, Neptunus, Thea-
 tis, Amphitrite, Penates, Pluto, Proserpina, & id genus
 multa, sine quibus aiūt etiamnū Christiani sua poemata
 iacere, ideoq; ad carminum maiestatem suis libris inse-
 runt Cere pro pane, Bacchum pro uino, Pomonam pro
 pomis, Neptunum pro mari, Iunonem pro ambitione,
 Mineruam pro arte, Martem pro bello, Enyo pro belli-
 co furore, Mercurium & Suadam pro eloquentia, Tel-
 lurem pro terra, Palem pro pascuis, Dianam pro ue-
 natione, Hymenæum pro nuptijs, Parcas pro fato, Plu-
 tonem pro diuitijs, & cacodamoniorum principe. An
 autem magniloquentia, an ne consuetudo obtinuit, ut
 hæc amplissima uiderentur ornamenta, non iudico: certè,
 nescio quomodo, posita loco, grandius & antiquius ef-
 ficiunt poema. Adde nomina uirorum illustrium, gentiū,
 populorum, regnorum, montium, fluminum, urbium, de
 insignibus loquor, cuius generis hæc sunt, Menelaus,
 Achilles, Vlysses, Ajax, Diomedes, Priamus, Aeneas,
 Hector, Paris, Cadmus, Amphiaræus, Lycurgus, Solon,
 Darius, Philippus, Alexāder, Curius, Fabritius, Sylla, Pō-
 peius, Iulius Cæsar, Persæ, Babylonij, Thraces, Lacedæ-
 mones, Attici, Thebani, Pœni, Romani, Ausones, Galli,
 Britāni, Europa, Asia, Africa, Hesperia, India, Aegy-
 ptus, Germania, Peliū, Olympus, Ismarus, Caucasus, Apē-
 ninus, Alpes, Pyrenæi, Atlas, Abila, Calpe, Gāges, Nilus,
 Hister, Eridanus, Rhodanus, Iberus, Tagus, Rhenus, A-
 thenæ, Thebæ, Sparta, Rhodus, Carthago, Roma, Tolo-
 sa, Lugdunum, Lutetia. Sunt alia innumerabilia, quæ cer-
 tatim colligunt heroici poëta, & quasi stellas affigunt
 operi suo. Adijce nomina uirtutum, & effectuum qui se-
 quuntur eas, ut prudentia, iustitia, religio, uictoria, trium-
 phus,

phus, gloria: Scientiarum, cuiusmodi sunt ars magica, iuris prudentia, ratio grammatica, dicendi facultas, architectura, doctrina, disciplina, sapientia, contemplatio: Partium hominis insignium, animus, corpus, cor, cerebrum, caput, pectus, lacerti: Splendidi uestitus, palliū, toga, prætexta, trabea, paludamentum, torquis, armillæ: Colorum, ut purpura, murex, coccum, fūluum, rubrum: Armorum, lorica, galea, thorax, hasta, lancea, ensis: Nauium, biremis, triremis: Aedificiorum, domus, templum, ædes, curia, capitolum, theatrum: Magistratuum, dictator, consul, imperator, rex, tribunus, potestas: Animalium nobiliū, tygris, leo, ursa, elephātus, equus, aquila, philomela, cete, delphinus. Vt breuiter finiam, rerum maximarum uel quantitate, uel precio, cœlum, Sol, Luna, astra, lumen, ignis, aër, mare, terra, uētus, fulmen, pluuia, tempestas, aurū, argentum, æs, crater, patera, gemmæ, marmora, simulachra, statuæ. Non immorabor ultra. Ex his enim cætera animo concipere minime operosum arduūq; est: nec difficile puto de uerbo propriè dicto iudicare atque deprehendere quæ uis eius splendeat, quæ ue sit obscura. Regere, moderari, gubernare, orare, iudicare, contemplari, sacrificare, pugnare, uincere, sapere, florere, cohortari, docere, & alia infinita quæ significant facere aut pati id quod aut natura, aut hominum iudicio præclarum est, sublimia & excelsa meo iudicio debent haberi. Dicit aliquis: Sint ne sublimia quæ refers, tu quidem uidēris: Sat scio à pastoribus, rusticis, mulierculis, pueris, infantibus hæc frequenter usurpari solere. Quidni? quāto sublimiora, tanto magis cōspicua sunt, & in omni sermone frequentiora. Res arduas ferè uulgus admiratur, et ab infantia nomunare discit. subinde loquitur deos, sacrificia, ritus, mores, nationes,

urbes, præfecturas, bella, prælia, fœdera, pacē, iura, leges, uasa, uestes, animalia, loca, tempora, & omnia ferè quæ rerum natura ingentia procreauit. Ergo uulgus est grā diloquum? Male colligis. Non æstimamus leonem ab unguibus. Non unum uerbū sublime & amplū magnificam orationem efficit. Quid igitur? Humiliū fuga, sublimium frequētia, sententiāū grauitas, & apta compositio. Vulgus indoctum si se attollere conatur, nec humilia effugit, nec sublimia frequentat, nec in sententiāū grauitate persistit, nec aptè res & uerba cōponit. Est & aliquid lautum in parsimonia rusticorū, & plebeia mulier aurū fert atq; margaritas: nec tamen hic conuiuū magnificum, aut insignem sœminæ mundum dixeris. At propemodū quæ numeras, propria rerum uocabula sunt, ab omnibus necessariò dicenda. Sublimes igitur quadam necessitate sumus. Quemadmodum materia in syluis alta sponte creuit, sic ex hominum instituto uerba magnifica nata sunt: sed nō est cuiusque deligere. Præterea nec arbor una præclara splendidam regiam, nec unius aut alterius uerbi splendor excelsam efficit extructionem. Aliena tamen atq; modificata sæpe magnificentiora uidentur, quàm propria, credo, quòd rariora sunt, & paucioribus usitata. Assumūtur aut translatione, ut scopulus pro periculo, naufragium pro exitio à Cicerone dictū est in oratione pro Rabirio perduellionis reo. aut synecdoche, ut tectum pro domo, ferrum pro gladio. aut metonymia. ut Roma pro Romanis, cœlum pro dijs. aut antonomasia, ut Pœnus pro Annibale. aut periphrasi figura amica poëtis, ut diuū patet, atq; hominum rex. orandi facultas, scientia differendi. aut catachresi, ut equum diuina Palladis arte ædificāt. equificant, ut ædificāt, dicere Latine non possumus. aut hyperbole,

hyperbole, ut tonabat pro uehemēter orabat. quibus an-
 numerāda sunt antiqua, ut rebamur, clarigatio. Proprijs
 (ut Quintilianus ait) dignitatem dat antiquitas. Quo di-
 cto probari potest in quibusdam proprijs esse dignitatē.
 At Quintilianus in octauo de proprijs loquēs hęc dicit:
 In hac autem proprietatis specie, quæ nominibus ipsis cu-
 iusque rei utitur, nulla uirtus est. Si propria nullam per se
 uirtutem habēt, quī possunt sublimia censeri? Quintilia-
 nus uirtutem posuit pro ui ac gratia quam præstant figu-
 ræ: quæ quidem cōrepertæ sunt, ut efficiant orationē aut
 grauiorem, aut elegantiolem. Nequaquam autem seclu-
 sit à proprijs omnem uirtutem. Nam continuò subiicit:
 Contrarium est uitium id quod apud nos impropriū, *ἐκρυπτόν*
 apud Græcos uocatur. Si impropriū, uitium est, cur pro-
 prium non est uirtus? Idem ibidem mentionem de humi-
 libus facit, quorum multa propria sunt. Si propria quæ-
 dam, quia res significāt humiles, humilia agnoscimus: cur
 ea propria quæ designāt res preciosas & altas, sublimia
 nō putamus? Idem ex synonymis alia esse sublimiora pu-
 tat, quod proprijs accidere necesse est. Omne uerbum (in-
 quit idem) nisi in oratione positum, uirtute caret. Nam
 & sublime in humili re tumescit. Fateor esse quamplu-
 rima quæ ab oratione uim capiant, & uerbis sublimibus
 nos abuti posse: sed id non efficit, ut simplicia uerba qua-
 lia sint natura, cōsiderare non possimus. Lapis natiuus ci-
 tra compositionem discrimen habet, magnus paruus, du-
 rus mollis, longus breuis, usitatus inusitatus, nitidus impu-
 rus, magnificus humilis, integer fractus dicitur. Non eadē
 quoque ratio uerborum est? Verba (inquit Cicero de am-
 plificatione) ponenda sunt quæ uim habeant illustrandi,
 nec ab usu sint abhorrentia, grauiā, plena, sonātia, iūcta,

facta, cognominata, nō uulgata, superlata, in primisq; trās-
lata. Quorsum hæc? Si de uerbis simplicibus nullum est
certum iudicium, cur simplicia, id est incontexta, à collo-
catis iunctisq; dirimat? Si uerbum sublime tumescit in or-
atione tenui, id sit propter inæqualitatem. Inæqualitas
aliud quidem respicit, non semper coniunctionem desi-
derat. Mens enim res separatas atque disiunctas cōficere
potest. Sunt intermedia quædam, nec humilia natura, nec
sublimia, quibus utimur in omni genere dicēdi, ut in no-
minibus homo, sœmina, cura, res, nemo, nullus. In prono-
minibus, hic, meus, noster. In uerbis, est, stat, mouetur. In
aduerbijs, heri, cras, forte. Ex cōiunctionibus & præposi-
tionibus nullam excipio. Nihil ipsæ per se eminent: in col-
locatis & in cōcinnitate & in schemate eminere possunt.

De grauibus uerbis, & leuibus.

CAP. XVI.

VERBA grauia à rerum graui pondere, & ab intelle-
ctu significantiore dicuntur: leuia contrà. Grauitas
atque leuitas in oratiōe maximè cognoscitur, sed & ex-
tra contextū examinari potest. Incessū, flagitium, scelus,
peculatus, sacrilegiū, perduellio, proditio, parricidium, a-
mentia, furor, insania, prædo, pirata, carnifex, necare, sa-
tagere, deperire, formidare, exhorrescere, per se grauia
sunt. In synonymis differentia grauium & leuiū apertius
deprehenditur. Grauior est charitas quàm amor, unda
quàm aqua, procella quàm uetus, saxum quàm lapis, an-
gustus quàm breuis, rapidus quàm celer, grandæuus quàm
senex, cultum quàm aruum, dapēs quàm cibaria, religio
quàm obseruatio, promeritus quàm meritus, moles quàm
magnitudo, ruina quàm casus, ingēs quàm magnus, inac-
cessus

cessus quàm inuius, direptus quàm captus, superbus quàm
 magnificus, rapina quàm furtum, latro quàm fur, fraus
 quàm dolus, satur quàm plenus, formido quàm metus, in=
 ber quàm pluuia, luxus quàm apparatus, insomnis quàm
 uigil, stridor quàm sonitus, ruunt quàm eunt, obstupuit
 quàm miratus est, torqueo quàm iacio, efflagito quàm pe=
 to, quatio quàm moueo. Ex hac cōparatione corrigendi
 materia sumitur, & à leuiore ad grauius amplificanti sit
 gradus. Vereor ne in hac enumeratione exemplorū nuda
 sim molestus. uix enim capit ornatū atque uoluptatem res
 tot partibus cōcisa, & interrupta. Sed professus sum me
 omnia apertè traditurū, quæ ad delectū uerborum & eorū
 collocatiōnē pertinet. Quare permittāt mihi studio=
 si compositionis, rem omnem illustrare exemplorū frequē=
 tia, & cogitent aliud esse docentem in gracili rerum te=
 nuitate uersari, aliud in ampla materia atque ardua spa=
 ciari eloquentem. Virtus est in docente sermo breuis ac
 dilucidus. Si qua ab illo dicendi uoluptas adiungitur, eò
 tendit, ut præceptorum duritia molliatur. Illa tamen non
 est tum expetenda, quum res ipsa per se utilitate capit
 legentium mentes. In gradibus apertum discrimen est.
 In his enim quæ gradatim crescunt, cōparatio & super=
 latio primum gradum quātitate & grauitate uincit, acer=
 bior acerbissimus, acrior acerrimus, grauior grauissimus,
 crudelior crudelissimus, sceleratior sceleratissimus: & id
 genus infinita. Quin epitheta quædam sine ulla compa=
 ratione pondus habent & incrementum, ut quum dici=
 mus, mirum artificium, grande crimen, uastum gurgitem,
 lectum adolescentem, hominem teterrimum, nefariam li=
 bidinem, nequitiam singularem, summam uim, innume=
 rabilem multitudinem, insignem uirum, immania pocula,
 graues

graues iniurias. Nam quum graue quiddam quærimus, et illud in rerum uocabulis inuenire non possumus, tum ut animi conceptus expleatur, ad epitheta cōfugimus. Quòd si propria aut per se, aut epithetis adiuta, grauitati rerum non satisfaciunt, subsidio sunt figura, translatio, hypallage, synecdoche, ^{ἀντωνυμία} allegoria, periphrasis, antonomasia. Hic de tropis, nō de reliquis luminibus sententiarū atque uerborum loquor, propterea quòd illa non sunt in singulis uerbis de quibus agitur in præsentia, sed in oratione contexta prominēt. Grauiora sunt interdū translata quàm propria, ut ardor pro cupiditate, ignis ~~et~~ uulnus pro amore, nudus pro inopi, germanus pro simili, cæcus pro ignaro, coruscat pro uerbo uibrat, extunderet artes pro inueniret, ardere pro amare, inuestigauit pro quæsiit, cōtendo pro eo, euolare pro abire, acerbitas pro malo, acre pro uehemēti, inflammatus pro commoto, sobrius pro cōsulto, proripere pro eo quod est producere, teterimus pro crudeliſſimo. Hypallage est metonymia quæ pro inuentore inuentum, pro continente contentum, pro efficiente effectum, pro possessore possessorem, aut contrā capimus. In hac conſormatione dicimus, Martem fatigāt, Suis Mineruam, Raptus Helenæ Græciam Asiamq; commouit, Africam exciuit tumultus, Perijt Marſus, Lacerat Musas, Nutu Iunonis eunt res, Cicero ab exilio reportatus humeris Italiae. Leuius dixeris, bellum poſcunt, ſuis artificem docet, Raptus Helenæ Græcos atq; Troianos commouit, Afros exciuit tumultus, Perijt Marſi liber Amazonis, Abutitur disciplinis, Voluntate Iunonis eunt res, Cicero ab exilio reportatus eſt ab Italis. Synecdoche dicitur quū à parte totū, uel à toto pars, uel numerus à numero intelligitur. Hac forma grauius uſus eſt Cicero cū alibi, tū in ſexta

sexta actione in Verrē: Nego in Sicilia tota, tam locu-
lete, tam uetere prouincia, tot oppidis, tot familijs tam
opiosis ullum argenteum uas, ullum Corinthiū aut De-
iacum fuisse, nego ullam gemmam aut margaritam fuis-
se, aut quicquam ex auro aut ebore factum, signum ullum
aeneum, marmoreum, eburneum, nego ullam picturam ne-
que in tabulis, neque textile fuisse, quin quæsierit, inspe-
xerit, quod placitū sit abstulerit. Partē istorū quæsierat
et abstulerat Verres, at totū genus amplificādi gratia ac-
cusator inculcauit, dissimulat tamen. Quū dico, inqt, nihil
istū eiusmodi rerū in tota prouincia reliquisse, Latine me
citote, nō accusatoriē loqui. Idē orbem terrarū pro im-
perio Romano, omnē ciuitatem pro paucis ciuibus usur-
pat. Terentius numero mutato grauius dicit, Istarum me-
tricum contumelias. Et Cicero, Curios, Fabritios,
Quintos Maximos. Et Vergilius:

Talia coniugia, & tales celebrent hymenæos.

Egregium Veneris genus, & rex ipse Latinus.

Allegoria est uox illa Catilinæ, Incendium meum ruina
extinguam, pro eo quod est, inimicos meos interimam.
Et illud Vergilianum:

Sed nos immensum spacijs confecimus æquor.

Ut trunque autem auctius est quàm proprium. Et illud de
Tyberio, Lutum sanguine maceratū, Validius est quàm
Rhodius magister dixisset, & sordidus es, & crudelis.
Periphrasis interim grauis est, non modò sublinis, ut orā-
di facultas pro Rhetorica, memoria rerum gestarum pro
historia, diuū pater atque hominum rex pro Ioue. Cœ-
li qui sidera torquet, pro eodem. Vera Iouis proles, pro
Hercule. Romanæ conditor arcis, pro Romulo. Philoso-
phorum princeps pro Platone. Medicorū deus pro Hip-
pocrate.

pocrate. Imperator populi Romani pro Rupilio dicitur in tertia accusatione Verris, quum augetur illius auctoritas. Hæc & similia pondus asserre subiectis rebus uidentur. Argumēto sit, quòd quum rem uehementèr exprimere conamur, pro uno uerbo hæc libetèr amplectimur uerborum pluralitatē. Finitima est antonomasia, quæ pro nomine nomen usurpat. Vergilius: —Thalamo quæ fixa reliquit Impius—. Leue fuisset, Aeneas. Vigilas ne deum gens? maioris est momenti, quàm, Vigilas ne Aenea? Cicero pro Cluentio: Nubit genero socrus. accusat filium mater. leuius istuc, Nubit Melino Saffia, eadem Cluentium accusat. Stetit soleatus prætor muliercula nixus in littore. minus erat graue & accusatorium, Stetit soleatus Verres muliercula nixus in littore. Parcè uictitat senex, significantius est quàm hoc, parcè uictitat Chremes. Nec eadem libra pensitem hæc duo, sæd ifragus Annibal, & sæd ifragus Pœnus. In alieno uis est argumēti, quæ nō est in proprio. Proprium tantū ualet ad docendū: alienū & ad docendum, & ad probandum. Addamus etiam *ἐκφρασις*, id est amplificationem, sed eam quæ in solo uerbo posita est. Perij, nullus sum, occidi, actum est, exanimatus sum pro turbato, cæsus pro læso, latro pro improbo, solitudo pro paucitate, gladiator pro audaci, parricida pro sicario, scelus pro homine malo, fera pro crudeli, pestis portentum monstrum pro nocente, ueterator pro callido, bestia pro stolido, pirata pro fure, perditus pro uitioso, innumerrabilis pro multo, nulle pro multis. Multa sunt genera grauitatis in sententijs & collocatione uerborum. Nunc autem de uerbis simplicibus loquimur, ex quibus graua sunt illa quæ significatione robustiora uehementioraq; sunt. Differt autem grauitas à sublimitate. Grauitas est ponderis

ponderis, sublimitas dignitatis. Graua plus uehemētiusq;
 significant, sublimia magnificentius ac lautius. Idem uer=
 bum tamen & graue & sublime dici potest, ut si eloquē=
 tiam diuinam esse dicemus, illam & significandi pōdere,
 et dignitatis amplitudine adaugebimus. Caelos autē cœ=
 li uertices: astra, diuos: heroas, magnanimos principes, et
 multa dignitatis honore cōspicua, sublimia, nō graua di=
 cimus. Non enim ualidiora sunt in gradibus augēdi, sed di=
 gnitate prāstantiora. Adde quōd sublimia nō turpitudinē,
 sed eximium splendorem habent. At nefarium scelus, sicut
 æquitatem singulārē, inter graua numeramus. Non igno=
 ro hoc uerbum, graue, multos habere sensus, & aliter di=
 ci grauem terram, aliter graues iras, aliter grauem Cato=
 nem, aliter rationes graues. Hic graue (ut idem sæpius re=
 petam) dico acre, urgens, instans, significatione & pon=
 dere cumulatum. Ponitur autem in omni parte orationis.
 Nullum enim uerbum (si Ciceroni credimus) nisi aut ele=
 gans aut graue mittere debet orator: Sed in amplificatio=
 ne ut in propria sede dominatur, propterea quōd sua mo=
 le dilatat id quod augere laboramus. Quæret aliquis, an
 si qui pulsauit, attigisse: qui uulnerauit, læsisse dicatur,
 uerba graua sunt attigisse atq; læsisse? Ego quidem le=
 uia esse puto. Subleuant enim reum, & de culpæ grauita=
 te partem detrahunt. quod non est grauium proprium.
 Contraria sunt hæc, amplificare, & imminuere. Amplifi=
 cantis est graua collocare, minuētis autem leuia atq; in=
 ualida præferre. Ex ijs quæ diximus, difficile non est iudi=
 care quæ uerba leuia sint, quiq; in dicendo sit usus illo=
 rum. Deprehēduntur aut facta correctione: ut, Non tam
 didicit literas, quàm degustauit. Aut cōparatione: ut, Ma=
 rius septem consulatus, unum modò Cicero gessit. Pon=
 prius

peius Asianos imbelles, Cæsar fortes Italos subegit. Vnus cum septem, imbelles cum fortibus comparatur. Aut frigida affirmatione, ut, homo non indoctus, non malus auctor, non omnium postremus. Aut diminutione, ut, ducere choros, non modò scelus, sed ne uitium quidem est. Aut sua sponte: ut facile, iocosum, ridiculum. Aut quantitate, ut exigua domus, parua ciuitas. Aut precio, triboli, tresßis, dupödius. Aut opinione, ut Lygur, Iudeus. Aut attenuatione quæ fit per deriuationē, libellus, opusculum. Aut immutatione, Non orator, sed arator. Aut ironia, ut, O lepidum caput, de homine agresti & inurbano. Sunt quæ sola pronuntiatione uideantur esse leuia:

—Meq; timoris

Argue tu Drance—

Quid moror? Totidem leuium genera sunt, quot grauium uerborum. Sed locum notasse satis est. Dicet quispiam, Iam mihi uideris non de uerbo, sed de oratione loqui, & longè aberrare à proposito. Quæ in oratione constitui, in uerbum recidunt omnia. Et epitheton, ac rei nomen cui adiungitur, tanquam unum simplexq; esse uideri potest. Sunt & media, quæ nec grauiam per se, nec leuiam dicuntur: ut hasta, fons, uester, noster, lego, dico, forte, deorsum, atque, autem, apud, aduersum. Quædã media natura uim capiunt ab oratione, & rem aut grauant, aut subleuant. Homo impudens mentiebatur palàm, deierabat in tēplo, uomebat postridie. Hic palàm, templo, postridie, rem in grauant. Contrà, Licenter agebat Saturnalibus, domi, apud sodales, in cōuiuio: leuiter factū uidetur. At in re sunt ista, nō in uerbis. In re sanè. quū uerba grauiam ac leuiam Cicerō dicit, nō aut literas aut syllabas, aut ex illis iūctas uoces intuetur: respicit eam rem, cuius signa notæq; uerba sunt

sunt. Vis illa rei est tanquam animi instar in corpore, ad quā obscœna, sordida, humilia, grauiā reducimus, quæ ad ipsas uoces per se referre nec possumus, nec debemus.

De proprijs & assumptis, & quæ
aliena dicuntur. CAP. XVII.

Verba, quemadmodum rerum possessiones, aut propria, aut aliena dicuntur. Aliena sunt, quæ à propria significatione in aliam cum uirtute mutantur. Tropos cum Græcis ab intellectus immutatione appellamus. Aristoteles in Rhetoricis, & in libello de Arte poëtica, metaphoras, id est, trāslationes uocat: et hoc nomen extēdit & ad ea quæ per similitudinem transferuntur, ut quū dicimus concionum procellas: & synecdochen, hypallagē, antonomasian, metalepsin, catachresin, hyperbolen, periphrasin, allegorian. Sunt hæ troporum species in quibus priorum loco statuuntur aliena. Cætera omnia rerum uocabula propria nominamus, quæ sunt hominū instituto rebus significandis usurpata primū, non aliunde quasi mutuò facta, cuiusmodi sunt hæc in generibus rerum diuersis, phagus, ulmus, fraxinus, brassica, beta, thymus, uitis, palmes, pampinus, nitrum, sulphur, bitumen, aurum, electrū, ferrum, ceruus, dama, lepus, bos, equus, asinus, congrus, scarus, delphinus, coturnix, alauda, psittacus, homo, animus, corpus, uirtus, uitium, fortitudo, ignauia, scientia, inertia, motus, quies, fundamentum, paries, tectum, supellex, uas, uestis, mensa, cibus, potus, terra, mare, aër, ignis, stella, deus. Rebus est ferè sua cuique appellatio. Nec enim aliter de omnibus propriè loqui possemus. Vnde planum fit propria quadam necessitate reperta esse, aliena uerò propter uim & elegantiam in eorum locum traducta. Proprijs
f abunda

abundare debet is qui multis de rebus agere planè, dilucidè & usitatè contendit. Nec in proprietate tenuis est gloria, ac orationis commendatio, propterea quòd breuiter & apertè res exprimit, non circumducit audientem ambagibus inanum uerborum, non infert obscuritatem, quam plerunque pariunt figuræ. Non traducit omnia sine uirtute, non triuialia & barbara & inusitata inculcat, quæ uitia frequenter accidunt ijs qui pauca admodum uerba nouerunt. Nunc enim turpiter circunloquuntur id quod uno dici uerbo optimè potest: ut hoc modo quidam, Vidi magnam illam auem quæ nunquam uolat, & cuius plumas uiri nobiles ferunt in galea. Quanto breuius ac melius, Vidi Struthiocamelum? Nunc sunt obscuri tenebris audacium figurarum, ut in epistola quidam sua opinione doctus, Non dedignatus es me concrepare laude ne-
tarea, & buccinare me lingua melliflua. Nunc communibus utuntur atque triuialibus, ut quum dicunt hominem totum armatum pro cataphracto, & registrum pro tabulis. Nunc componunt insolita componi, ut si dicendum sit, Milites exposuit è naui, sic loquuntur, Milites de naui emisit in terram. Rogatus sum aliquoties à Philosophiæ studiosis, qui contempta sermonum barbarie in Philosophia plurima, puriores literas expetebant, satis ne esset biennium ad emendatè, propriè, ornatè que dicendum. Quibus dicere solitus sum, non posse me adduci ut crederem totum decennium ad id satis esse, quod sibi falsò pollicerentur. Quando enim, inquam, barbariem putidam dediscemus? Quando uas imbutum malè, non sapiet primum liquorem? Quando uulneris alti ue-
stigia non restabunt? Quando omnem omnium proprietatem non modò memoria tenebimus, sed etiam expedite

ditè tum scripto tum sermone exprimemus? Videte quàm pauci ueteres hanc laudem sint affecuti: non loquor de sublimioribus, quibus est usus uerborum liberior, sed de comicis, historicis, & oratoribus. Ex quibus si Terentium, Casarè, Ciceronem exceperis, qui propriè & usitatè sit locutus, uix ullum inuenies. Nam propriè loqui, diuturni laboris est, et assiduæ exercitationis, sed in primis animi cupientis ueritatem, id est uerum natiuumq; sermo- nem: quem ut abiectum quum multi fugiunt, incidunt in peregrinam quandã & insolentem ac penè prodigiosam linguæ impuritatem. quod si turpe est, uerbum proprium maximè curæ sit, nec unquã mutetur nisi aut significan- tius aut elegantius succedat alienum. Sermo proprius si non semper fortior, uerior est tamen, ac usitator, & quæ prima uirtus est orationis, rem dilucidè magis ac natura- liter exponit. Ad hanc uirtutem consequendam discenda cuiusque rei propria communiaque uocabûla, & ea ma- ximè uerba quibus propriè animi modi declarantur, ut do- ceo, doce, docerem, doceam, docere. Tum si est unius rei una appellatio, nullus est delectus: ideoque nisi schemata uelis, parendum erit necessitati. si plures, deligenda quæ ma- gis propria sunt. Panis, pyri, pruni, frumētatoris, una pro- pria est nominatio: eiusdemq; rei sunt pestis & pestilen- tia, mors & obitus, lapis & petra, amare & diligere. In hoc genere quæ sunt usitatoria, aut quæ melius rē pingūt, habenda potiora. Malim dicere uestem quàm indumen- tum, herbam quàm gramen, auem quàm alitem, proge- niem quàm sobolem, subtegmen quàm tramam, distribuit quàm dispescit, pugnauit quàm conflixit, confirmat quàm roborat. In proprijs est uerbis (inquit Cicero) illa laus o- ratoris, ut abiecta atque obsoleta fugiat, lectis atque illu-

sribus utatur, in quibus plenum quiddam & sonans esse
 uideatur. In collocatis obseruanda maximè proprietas,
 quam miseris modis lacerant indocti. Dictitant enim, Vi-
 gillant in monte, non speculantur è monte. Tentat frange-
 re aciem, non conatur aciem perrumpere. Dimisit suos mi-
 lites, non dimisit copias. Impediuit comeatum, non in-
 terclusit. Victu carebat Caesar, non re frumentaria. Duxit
 uineas, non egit. Primi in consilio, non consilij principes.
 Reportarunt prædas, non egerunt. Milites monuit, nõ co-
 hortatus est. Signum fecit, non dedit. Renouauit prælium,
 non redintegrait aut restituit. Aciem ordinauit, non in-
 struxit. Longius iuit, non prodijt. Redierunt milites, non
 receperunt se. Misi equites sine sarcinis, non equites expe-
 diti. Fecit prælium, non commisit. Dedit se ut seruiret, non
 tradidit se in seruitutem. Dedit illis ducem legatum, non
 præfecit legatum. Misit ad succurrendum, non misit sub-
 sidio. Fecerunt uim, non impetum. Magnis uijs contendit,
 non magnis itineribus contendit. Oppidum egressi sunt
 contra hostem, non eruptionem fecerunt. Ad faciendum
 pontem lignum secabat, non materiam. Reportauit quæ
 acceperat in legatione, nõ renunciauit legationem. Tem-
 pus assignatum, non constitutum. Facere amicitiam, non
 inire gratiam. Perdidit opportunitatem, non amisit occa-
 sionem. Quid moror? Sunt qui non tam Latine loqui mi-
 hi uidentur, quàm barbarica phrasi omnem inuertere la-
 tinitatem. Vnde hoc mali? Proposuerunt sibi & magistros
 & libros infantissimos, putaruntq; satis esse, nihil commut-
 tere contra ea præcepta grāmaticæ quæ sunt de casibus &
 constructione uerborum: quasi non sit grammatici poë-
 tas & historicos interpretari, & inde loquendi rationem
 moremque cognoscere. Quid hoc omnino peccat in ar-
 tem

tem declinandi uel construendi, Turno mandata perfer, ut ueniat in locum meum ad pugnandum? At quid est ineptius? quid ingratius? quid putidum magis? Virgilius aliter, Turno mandata perfer, succedat pugnae. Non defuerunt qui huic mederi morbo cuperent, legerentque ex multis autoribus locutiones omnes, unde grande uolumen conficerent. uellem suo morbo potius et insaniae medelam adhibuissent. Quid est stultius, quam omnia uerba propria impropria, poetica oratoria, usitata inusitata, prisca noua, honesta turpia, bona mala, recta praua, promiscue congregare, et referre in codicem? Quis leget haec? et si quis leget, ut memoria tenebit? et si tenebit, ut à bonis mala separabit? Nemo de lingua optimè iudicare potest, qui non eam didicit. Nemo didicit, nisi loquendi consuetudinem obseruauit. Nullus obseruauit apud istos formularios. Nonne ridiculum est ea te tradere studiosis, quae nunquam noueras quum manum calamo admonuisti? quae oblitus es antequam perscripsisti? quae nescis ipse? quae non teneas? quae iam dubites an scripseris? quae nolis ipse perdisce re? quae si uelis, haud possis? si possis, non expediat? Nam qui sapit, longa autorum bonorum lectione et obseruatione sapit. Multa sumis à Plauto, à Terentio nonnulla quae iam exoleuerunt, multa à Gellio, multa ab Apuleio quae dicta sunt audacius, multa à Suetonio, Plinio, à recentioribus, quae subolent nescio quid peregrinum et insuauae. Quis erit delectus, quae proprietates, quae uenustas, si omnia miscebimus? si contorta, rara, absurda, nouè dicta in delicias ac elegantias referemus? Si quicquid inusitatum est ac tritum, uile esse et humile putabimus: contra quicquid abhorret à loquendi more, preciosum et arduum? At iuuant, inquiunt. Plus obesse quam prodesse,

desse, sit argumento, quòd non modò quæ uerba scriptores boni iunxerint, tenèdum est, sed in quem sensum dixerint, cui personæ, cui tempori, cui rerum conditioni accommodauerint, ut prioribus & posterioribus inseruerint: quorum nihil uident qui excerpta legunt exempla, unam aut alteram particulam ineptè assuunt orationi, & ornare cupientes, deformem & ridiculam suffarcinant orationem. Miseri, qui tantum ex hoc uno cōmentario sapiunt. Multo citius poëmata, historias, orationesq; perlegissent, usum non modò uerborum, sed etiam rerum ab ipso fonte purè & salubriter hausissent, quod tandem facere coguntur ij qui bene scribendi dicendique scientiam quærunt. Ediscenda sunt plurima, permulta scriptitanda. Relegendi sunt optimi scriptores, ut paulatim ueniat in usum proprietas. Formulæ istæ suis autoribus amatoribusque relinquenda. Qui linguæ Gallicanæ student, ut puritate superent uulgus, elegantiores loquendi formulas non referunt in libellum, sed animaduertunt quomodo quisque doctiorum loquatur. quod audierunt, memoriæ affigunt, ac persæpe referunt. ad hæc legunt eorum scripta, qui Gallici sermonis principes extiterunt. Sic & Latina capeffenti faciendum existimo, ne frustra in collectancis infantium consenescat. Sic autem proprietatem amet, ut intelligat non semper utendum proprijs: non dico quando uerbum proprium deest, ut quum dicimus, equitat in arūdine, saxa iaculatur, lapidat glebis: sed quum uitamus humilia, sordida & obscæna, & ad trāslationem confugimus, quumq; figurarum aut elegantiam aut uirtutem querimus. Quintilianus octauo libro multa facit priorum genera: unum, quod iam multis exposuimus: alterum, quum dicitur proprium inter plura quæ sunt eiusdem

dem nominis, id unde cætera ducta sunt, ut uertex aquarum, à quo summa pars capitis, & quod est in montibus eminentissimum, uertices dicuntur. Aliud, quum res communis pluribus, in uno aliquo habet nomen eximium: ut quum urbis nomine Romam accipimus. Quartum, quum ponitur illud, quo nihil significantius inueniri possit, ut Cæsar ad euertendā Remp. sobrius accessit. Hoc translatum, non proprium dixero. Quintū ex apposis, quæ epitheta dicuntur: ut dulce mustum, cum dentibus albis. Sextum, cum uerbum bene translātū est. Quod ego non probo, propterea quod à proprijs distinguenda sunt translata. Septimum, quum quæ sunt in quoq; præcipua, proprij locum accipiunt: ut Fabius cunctator. Sunt in his, quatuor genera maximè propria, secundum, tertium, quintum, & septimum. Primum fusius & latius patet, ac cætera comprehendit. Hoc ualet ad dilucidè aperteq; dicendum, illa etiam ad ornandum. In alienis prima sunt translata, quibus utimur aut necessariò, ut quum dicimus gemmam in uitibus: aut ornandi gratia, ut lumen orationis: aut ad incrementam, ut ferreum cor, pectus adamantinum: aut ad uitandam turpitudinem, ut mulier Venere lutulenta. Si nihil horum præstent, proprietate standum est. aptius enim dicetur, suauis concordia, quàm symphonia melliflua, atque nectarea. Assumitur & Synecdoche: ut, Pro capite dimicandum. Romanus prælio uictor, pro eo quod est, Romani prælio uictores. Diximus pro dixi. Item Metonymia: ut, uario Marte pugnatum est. & Antonomasia, ut euersor Carthaginis pro Scipione. & Metalepsis: ut speculuncis abdidit atris, id est profundis. et Catachresis: ut, minutus animus, pro paruo. & Periphrasis, ut diuū pater atque hominum rex. & Allegoria, ut, Oleum incendio ne

adiicias, id est, ne iratum excites. & Hyperbole: ut, uolabat Camilla. Pauca de alienis hic esse dicenda iudicauimus, quoniam figurae per quas in locum priorum transferuntur, & antè dictae fuerunt, & à grammaticis ac rhetoribus peti possunt. Cicero in Oratore inter aliena ponit translatum, & factum aliunde ut mutuò, & factum ab ipso, & nouum, & priscum, & inusitatum: in Partitionibus ea quae transferuntur, quae immutantur, ea quibus tanquam abutimur, quae obscuramus, quae incredibiliter tollimus, quaeque mirabilius quam sermonis consuetudo patitur, ornauimus. Noua, prisca, inusitata, propria sunt, nisi quod sunt rara, & usu paucorum recepta: quae Ciceroni causa fuit cur illa referret in aliena. Translatum, siue quod transfertur, est μεταφορικόν. factum aliunde ut mutuò, & id quo tanquam abutimur, ἰστὰ ἑστὶκόν, immutatur hypallage: obscurantur aenigmatica, & allegorica. Incredibiliter tollimus hyperbolica. Præter sermonis consuetudinem ornauimus periphrastica. In his omnibus tropis est quod in proprii locum sufficitur alienum.

De uerbis ueteribus, & nouis.

CAP. XVIII.

Verba prisca de quibus diximus, saepe uetera appellantur. Hic autem docendi gratia inter uetera ac prisca differentiam atque discrimen esse statuendum iudico. Vt enim omnia prisca sunt uetera, non tamen contrà omnia uetera sunt prisca: & ut priscis, & antiquatis, & insolentibus perarrò utimur: ita ferè semper nouis reiectis, ueterum uerbis loquimur. Nam quemadmodum noua aliquando consenescent, & uetera dicentur: sic & ea quibus utebatur seculum illud Ciceronianum, cæteris

teris in loquendo *ſælicius* conſenuerunt quodammodo: quæ tametſi nunc quaſi uiridi ſenectute florêt, omniumq; multo optima putantur, tamen uetera & antiqua nobis poſſunt uideri. Ab urbe condita ad tempora L. Craſſi & M. Antonij nihil erat in lingua Romana expoliturum & excultum. Subolebant priſcum quiddam *Liuius Andronicus*, *Cæcilius*, *Actius*, *Pacuius*, *Ennius*, *Plautus*, & in hiſtoria *Cato*, *Pictor*, *Piſo*, & in oratione permulti quos *Cicero* connumerat in *Bruto*. Iſti igitur erant *Ciceroni* ueteres, nobis autem debent eſſe priſci, & propè antiquati. A temporibus *Syllæ* dictatoris ad imperium *Domitiani* ſermo *Latinus* in integritate manſit, niſi quòd poſteriores iam propiores erāt uitio, quàm ſanitati. Qui tum ſcriptores floruerunt, eos & ueteres & imitandos eſſe cenſemus. Iuniores omnes habemus inter nouos, & impurius eſſe locutos arbitramur. Vt igitur tempore *Ciceronis* qui probari uolebant, maiorū ſquallorem aſperitatemq; fugiebāt, ex omnibus eorum uerbis nitidiora ſuauioraq; ſeligerāt: ſic & nos cōtrā iuniorū effrenatam audaciā licentiamq; fugitare, ex ijs pauca neceſſaria aſſumere. Cæterum ueterū modulationem & puritatem in loquendo ſequi debemus. Quæ *Terentius*, *Cæſar*, *Cicero*, *Salluſtius*, *Liuius*, *Vergilius*, *Horatius*, *Ouidius*, *Cornelius Cæſus*, *Perſius*, *Quintilianus*, *Iuuenalis*, *Martialis* admiſerūt, omnia, præter pauca iam oblitterata, & quaſi uetustate collapſa, qualia ſunt ſuat, ſiet, iudicaſit, proſapia, ſine ulla dubitatiōe recipiuntur in ſermonem. Antiquioribus & iunioribus temerè ne confidas. Non ſum tamē in ea opinione, in qua recentiorū quidam ridiculè ſuperſtitioſi & ſunt & fuerunt: Nullum omnino uerbum uſurpandum eſſe putant, niſi quod apud *Ciceronē* inuenitur. Quos & ipſe *Cicero*, cui tantum de-

ferunt honorem, duabus sententijs damnat. Noua enim uerba aut similitudine, aut imitatione, aut inflexione, aut adiunctione uerborum fieri posse indicat: & is permulta fecit. In Academicis censet rebus nouis noua nomina imponenda. Horum neutrum isti sinunt. Adde quod de omnibus rebus & disciplinis non est locutus, nec habuit cur diceret quæ Varro in Agricultura, Cornelius Celsus in Arte medendi, quæ Vitruuius in Architectura, quæ Plinius in Historia naturali. Quid? quod eius opera multa desiderantur? & plura scripturus erat, nisi mors immatura præuenisset? In Crasso, in Antonio, in Hortensio nullum uerbū ut insolens et putidum notat, quos certum est suis usos esse uerbis. Pauca reprehendit in M. Antonio, & ea quidē magis accusatoriē quā uerē: qui si posteriorū quos antē nominauit, scripta legisset, credo nō reprehendisset. Ne igitur nostra culpa languescamus inopia, ueterū quos doctissimi quique magno consensu probauerunt, autoritate nitimur. Eorum uerba, quū licebit, præstamus nouis. Si non crunt idonea, tum recētiora animo & aurium iudicio ponderemus, & audeamus aliquid doctis uiris autoribus. Noua traxerunt in usum Christiani, cuius generis sunt hæc, Christus, fides, baptismus, sacramentum, eucharistia, spiritus sanctus, ecclesia catholica, euangeliū, apostolus, euangelista, euangelizare, baptista, baptizare, paradysus, purgatorium, excommunicatio. Sunt alia usu omnium iam recepta, quibus me iudice utare licet, & maxime si magis idonea reperire non possis. Non dico tamen deitatem pro diuinitate, pietatem pro misericordia, humilitatem pro modestia, exaltationem pro superbia, confortauit pro firmauit, & alia sexcenta, quæ barbaries & ignorantia sine ulla necessitate inuexit in linguam Latinam. Quæ qui

peruica

peruicaciter tuentur, summa iniuria arguunt Hebræos & Græcos omnes qui philosophiam sanctissimam hac lingue fœditate conspurcare noluerunt, nisi fortè Deus optimus maximus Latinos à uero sermone deuiare, reliquos omnes emendatè rectèque loqui uelit. Quod qui suspicatur, sibi somnium fingit. Religio, credo, in barbare posita non est. In hac nouitate uerborum, quæ tolerari possint, optimè iudicabit is, qui necessitati & decori parandum esse norit. Dicamus ecclesiam, quia necesse est: nullum enim aliud est eius rei uerbum: nec magis inter Latina indecorum est ecclesiæ quàm philosophiæ uocabulum. Quando simulis ratio suberit, in noua cum alijs audeamus. Intulerūt etiam noua Dialectici, ut subiectum, prædicatum, prædicatur, prædicabile, prædicamentum, categoricum, hypotheticum, æquiuocum, uniuocum, substantiam, passionem, terminum: quorum pleraque ut necessaria uideantur, non decent tamen, & assensum doctorum uix sibi conciliare possunt. Ausim dicere terminum ut ὅρον Græci, subiectum, substantiam, categoricum, hypotheticum, indiuiduum, ut ἄτομον. Ceterum dico pro prædicato enunciatum, pro maiore & minore primam & secundam partem assumptionis, pro prædicabilibus quinque uoces, pro prædicamentis categorias, aut elementa decem, aut genera uerborum, pro æquiuoco homonymum, pro uniuoco synonymum. Nam quid Græcis uti uetat, quibus usi sunt Grammatici? Pro uerbo prædicatur, dicitur aut pronuntiatur: pro affirmatiua & negatiua propositione, pronunciatum affirmans aut negans, aicens aut inficiens: pro differentibus in eo quod quid est, aut quale quid est, differentia specie, aut numero: in explicanda substantia, aut substantiæ qualitate designanda, pro

da, pro risibili, risus potētem: pro generalissimo, summum genus: pro specie specialissima, speciem infimam: pro ente, id quod est, aut subsistēs: pro insecabili & indiuisibili, indiuiduum, ut sit epithetum: pro alterato, dispar aut dissimile: pro principaliter, maxime: pro à se inuicē, inter se: pro incōplexis simplicia Cicero, pro complexis collocata dicit. Reclamet qui uolet, malo improprie loqui, quàm barbarè. Alia sunt in dialectica multa, quibus nō omnino mala uerba accommodari possunt: sed non est hoc præsentis instituti. Nam et incidimus in molestum hominum genus, qui nefariū scelus existimant, spinosam balbutiem et prodigiosum sermonem relinquere: quam opinionem si deponerent, continuo Latine dialectica loqueretur. sed hærent obstinati et pertinaces. Quàm multa dixere phisici, ethici, mathematici, grammatici, Iuris prudentes, quæ inducere non audeas in emendatam orationem, quàm multa fecerunt inhumana & aspera, quibus utēris inuitus? Voces istæ substantiua, adiectiua, relatiua, indicatiua, imperatiua, frequentatiua, fœminina, adeo uastè dureq; sonant, ut teretes aureis grauissimè lædant. Item sensibile, uisibile, possibile, rotunditas, triangulare, quadrangulare, bicubitum, tricubitum, repressalia. Næ frustra laborarem, si innumerabili recentiorum noua uerba numerare contenderem: nulli unquam fuere audaciores, nulli effrænatiores, nulli minus studiosi sermonis emendati. Istos ne sequi placet, qui gloriantur perinde atque magnum sit barbaro & inculto genere sermonis nescio quid de magnis artibus oblatrare? Sequamur eos potius, qui necessitate ducti, uerba noua feliciter crearunt, qui que citra necessitatem uerbis aptè nouatis locupletarūt orationem. Primum uetera capeffamus, deinde ubi cum arte iudicium accreuerit, de nouis ea quæ uetusta

uetusta sunt eligamus, & maxime necessaria, ut hæc, Cardinalis, Episcopus, Archidiaconus, Abbas, Monachus, Comes, Bombarda, Caligæ. Ex hoc genere si quid erit horridius ac durius, præfatione molliendum erit, hoc modo, Monachorum pastor est, qui uocatur abbas. Pontifex, aut (ut uulgò loquimur) episcopus. Fulminat tormentum belli, cui bombardæ nomen est. Non erant Romanis tegumenta crurum & femorum, quæ caligæ appellantur. Quædam periphrasi describimus, ut, est machina belli, cui à colubro nomen est, & alia cui à serpente fecere nomen. Erecta machina, à grue nomen habet, ingentia attollit saxa. Ut breuiter absoluam, nouis uetera præstant: nouorum optima sunt maximè uetera, & ea quibus aut necessitas aut gratia locum inuenit. si quid deest, explent illud uerborum figuræ. Noua etiam dicuntur quæ quisque hodie sibi excogitat, ut quidam monachum tenebricolam, & molinariam bestiam, & caesarium dixit.

De uerbis sonantibus,
& exilibus.

CAP. XIX.

HAtenus uerborum naturas quæ à subiectis rebus oriuntur, explicauimus. Alter est locus de uocum differentijs, quæ uerba sint sonantia exilia, grandia parua, uolubilia tarda, lenia aspera: unde oratio dicitur iucunda tristis, plena tenuis, grandis minuta, lenta uolubilis, suauis horrida. Sonantiora sunt uerba, aut literarum uocalium, aut consonantium pleniore sono, aut certè spatio & tempore syllabarum. Ex quinque elementis quæ purè sonant, primum & quartum, a, o, magna ac uasta sunt: tertium & quintum, i, u, tenuia & exilia: secundum, e, intermedium. Hanc sonorum uarietatemprehendes in ijs qui uen.

qui uenalia magnis in ciuitatibus proclamitant : aut certè referes ad aures, quæ de sonis omnibus sua sponte uel optimè iudicant. A, litera quoniam spiritu longiore profertur ab arteria, reliquas omneis immanitate soni præstat: ideoq; frequentant eam qui grande aliquid & plenum resonant. Tragici Græci libenter mutant *α*, in *a*, ut sit hiantior pronunciatio. *φῆμα*, *φάμα*. Diffundit ea quæ una modò syllaba cōstant, ut *ars*, *aut*, *ad*, *cras*, *dat*, *fraus*, *glans*, *haud*, *iam*, *lanx*, *mars*, *pars*, *stat*, *qua*, *quam*, *thrax*, *uah*, *uas*, *mas*, *at*, *ast*. Hæc & paria (quanquam monosyllaba sæpe sunt causa tenuitatis) non attenuant orationem. Argumento sit uel cornix, de qua Vergilius:

Tum cornix plena pluuiam uocat improba uoce.

Pleniora sunt uerba duarum syllabarum, quas implet hæc litera, ut *arca*, *arcas*, *altam*, *chara*, *grata*, *amant*, *sanāt*, *para*, *quadrans*, *frangat*, *mala*, *atra*, *flāma*, *uastat*, *saltat*, *aura*. Hanc quoq; recipiunt trisyllaba, atque grauitè insonant, ut *amabam*, *sanabāt*, *arcana*, *affata*, *lāpada*, *pallāda*, *barbara*, *tartara*, *amara*, *parabant*, *captarat*. Reperitur & in quatuor syllabis continuis, ut, *acclamabat*, *adamabat*, *amandabant*, *apparabant*. Rarò peruenit ad quinq; ut in hoc fictitio nomine *taratantara*. Nihil horū non uehementer sonat, & implet aurium sensum: tamē in auctiore numero syllabarum, auctior est ac plenior sonus. Robustius autem ferit quum recipit duas aut treis literas consonantes, aut etiam diphthongum, quod est omnium commune: ut *trabs*, *stragula*, *brachium*, *fragor*, *statura*, *augeo*, *claudio*, *musæ*, si modò rectè pronunciaueris, ut quum dicitur Gallice *pax*, & *sed*, & *factum*. Quin uegeta sunt quæ uocibus alijs quidem constant, sed & hanc interserūt aut principio, aut medio, aut extremo loco, ut *fragmentū*,
sonare

sonare, ceperamus, subtilitatem, interea, formosam. His uetiora, quæ si non in omnibus locis, eam tamen in multis collocant, ut asparagus, amaracus, calcitrare, resonabant, Aeneas, sagitta, iactauit, arena, calcatur. Huius itaque soni magnitudine sonora fit oratio, ut hæc; Iste quod argenti placuit, inuasit: quæ mancipia uoluit, abduxit: uina, ceteraq; quæ in Asia facillimè comparantur, quæ ille reliquerat, asportauit: reliqua uendidit: pecuniam exegit.

—At nunc horrentia Martis

Arma, uirumq; cano—

At regina graui iamdudum saucia cura.

—Omniaq; arma

Aduocat, & ramis uastisq; molaribus instat.

Proprium est omnium uocum clarius audiri aspiratio=ne, accentu, productione, diphthongo. Clarior est in hamo quàm in amento, in dato, quàm in circumdato, in palma, quàm in palude, in fraude, quàm in fraxino. At discrimen hoc uix audiet qui aspiratione non utitur, & breues perinde atq; longas moratur, aut has & illas pari interuallo præcipitat. Fama quoniam priorem producit, effertur ac si geminet uocem, hoc modo, fama. sic enim ueteres scribebant, & ad longitudinum breuitatumq; dimensiones (sine quibus uocum differentias intelligere nō possumus) plurimum ualet. o, profertur ore diducto & rotundo, litera ampla quidem, sed quàm prima uox & angustior & obscurior. Hoc nimirum Vergilius sensit, qui quum plannè sciret in sancendis fœderibus nō porcā, sed porcū mactari solitum, dixit,

—Et cæsa iungebant fœdera porca,

Obscurius & ingratius erat,

—Cæso iungebant fœdera porco.

Malaixit

Maluit igitur sono quàm ueritati consulere, sicut Horatius,
— Luctata canis.

Sunt qui putarunt in fœminino sexu plus esse cuiusdam gratiæ: ego ad sonitum, non ad rem inclinasse poëtâ existimo. In monosyllabis productis ò, si excipitur ea littera quæ prima est in sanitate, & natura, & rosa, non est uacua & inanis, ut in his, uos, nos, hos, ros, mos, flos, cos, bos, tros, quos, non, cor. Vocalior est si duo elementa consona subsequantur, ut nox, mors, fors, fors, frons, sons, mons, pons, fons. In fine surdus auditur, eo, sto, flo, pro, pronomen hoc, seclusa aspiratione, quia littera muta clauditur, & ob, & os breue, nihil omnino superat. In his quæ sunt plurium syllabarum, ualida est, nisi quum o, in uerbis sedet extrema. Senties in his uocibus, flores, mores, hordeum, horreo, nostra, nobis, monstrum, formosus, dolosus, colores, honorem, odor, sapor, orator, corpora, doctoribus, conformationes. Nec omnino iacet in fine, quod uersus ostendit,

Arma uirumq; cano—

Irim de cœlo misit Saturnia Iuno.

— Saxo occultabat opaco.

— In gurgite uasto.

Sonantius uidetur alijs in sedibus:

Tantæ molis erat Romanam condere gentem.

Luctantes uentos, tempestatesq; sonoras.

In uerbo horreo inflatur hæc uox aspiratione, & littera canina, & accentu, & quantitate, propterea uehemens est, & canorum. In monstris autem positione multarum consonantium, & tono personat. Operæ precium est ista contemplari, si causam fortè cognoscere uelis, cur idem alijs & alijs locis uocalius esse uideatur. Anceps est o, apud

est o, apud nos. à Græcis nomine & figura distinguitur. longum dicitur ω μίχα, breue o μισθός, utrunq; apud eos frequentissimum, sed alterum altero, beneficio quantitatis largius est, ideoq; præ se fert geminam alterius figuram. Ideo documento nobis esse debet, eandem literam nunc clariorem productione, nunc obscuriorem esse breuitate. In diphthongis o, producitur, scælix, pœna, amœnus, obscœnus, mœnia, mœreo, pœnitet. Nunc uitio pronunciationis auditur e, solum. Quod si efferramus œ, quemadmodum Gallice regem dicimus, nihil minuetur illius, amplitudo. Habes sonum duarum literarum, quæ si quando frequenter concurrunt, plenam efficiunt orationem: ut,

Improbe amor, quid non mortalia pectora cogis?

Anna uides toto properari littore circum.

Sola uiri molles aditus, & tempora noras.

I, soror, atq; hostem supplex affare superbum.

Neminem uestrum ignorare arbitror, Iudices, hunc per hosce dies sermonem uulgi, atque hanc opinionem populi Romani fuisse, Caium Verrem altera actione responsurum non esse, neque ad iudicium affuturum. E, quod profertur ore parcius diducto, minor est utraque, contra duabus reliquis I, & V, maior. Iacet in sylaba sola, præsertim breui. Exilia sunt enim, es, & sed, ter, det, stet, uel, per, & similia. Paulo uocaliora sunt longa, rex, lex, des, stes, res, sex, ex, flens. Argutiores diphthongi, æs, præ, fæx, hæc. In coniunctis breuib; effluit, leget, reget, tepet, releget, tereret, petere, tegere. quod non sentiunt qui breuem male producunt, ac si scriberetur leeget, reeget. Ac celera, ut in hoc uersu, Pacatumq; reget patrijs uirtutibus orbem.

Confirmatur productione, ut fecerunt, excedo, telum, credo, iactetur, luctantes, Teucer, Orpheus. Item adiectis cōsonantibus, tempestates, ardentes, ingens, defessi, infestus, euersa, exemplum, explicuisse, dextra, descendere. Hanc uocem dilatant imperiti, et non tempus pronunciant, sed tempus: non exemplum, sed exemplum: et latentiam prolatente dicunt. Hoc uitium Galliæ nostræ, Lusitaniæ contrarium. e, frequēs in oratione summissior fertur: ut, Cuncti ad me publicè sæpe uenerunt, ut suarum fortunarum omnium causam defensionemq; susciperem: me sæpe esse pollicitum, sæpe ostendisse dicebant, si quod tempus accidisset, quo tempore aliquid à me requirerent, commodis eorum me non defuturum. Hæc si modulatè pronuntiabis, audies earum de quibus agimus literarum differentiam: et hæc uerba, Ad me publicè sæpe uenerunt, Me sæpe esse pollicitum, defensionemq; susciperem, summissiora dices: illa uerò elatiora, Suarum fortunarum omnium causam. Quod si a, et o, et e, in oratione dominantur, iucunda uarietate cōsonant, neq; sunt uastè agrestia, neq; exiliter effœminata, neq; pronuntiatione difficilia. Sit hoc exemplum Ciceronianum, Tam autem cras excors, ut tota in oratione tecum ipse pugnares: ut non inodò non coherentia inter se diceres, sed maximè disiuncta atque contraria: ut non tanta mecum, quanta tecum tibi esset contentio. Breuius hoc,

—Mecumq; fouebit

Romanos rerum dominos, gentemq; togatam.

I, litera quæ molliter ore diducto ad dentes penè cōiunctes enunciatur, per se exilis est, ac tenuis, ut in his uerbis, bis, cis, is, id, lis, nix, in, pix, quis, sis, it, uis, uir, cinis, digni, finis, gignit, hinnit, linit, mitis, nisi, pili, hirci, quiuis, risti,

risi, sibi, tibi, uiri, uirilis, uitijs, imbibit, illinit, immittit, mirifici, inimici. Ex his alia syllabis singulis cōstant, alia binis, alia ternis, alia quaternis: alia sunt breuia, alia longa: alia aspirationē habēt, alia nou habēt. In alijs ea quæ dicitur uocalis, excipitur uocali, in alijs una aut altera consonante. Hæc quanquā (ut antè dixi) uariant sonos, omnia tamē si ad a, & o, & e, spectes, sunt tenui & gracili uoce. Miscetur alijs hæc littera, & earū uocē imminuit, aut plus si multa est, aut minus si rara. Quapropter antiqui poëtæ dixerunt olī pro eo quod est illi. Casus hic dominos, plenioris est toni, quā dominus, & domino quā dominis: & bibat ac bibet, quā bibit, uitia quā uitijs, licia quā licijs. Tenuitatē huiusce uocis demonstrat hoc exēplum: Sæpe enim uenit ad aures, te idē istud nimis crebrò dicere, satis te tibi uixisse. credo. sed tum id audirē, si tibi soli uiueres, aut si tibi etiam soli natus esses.

Credimus? au qui amant, ipsi sibi somnia fingunt?

Frigidus, ò pueri, fugite hinc, latet anguis in herba:

Dic quibus in terris inscripti nomina regum?

In his quæ plena modulatione sonare debent, huius elementi frequentia uitanda est. Nec opimius ὀπιδεύς, quod y Græcum dicimus. Nomen ipsum tenuitatis ostendit, & ut nunc pronunciatio est, sonat idem quod iota, ut hybla, hyperion, Phryges, syllaba. Coeunt in diphthongō, i & u, ut harpyia. quæ eò dicitur impropria, quòd una modò littera auditur. Iungitur alijs uocibus, uimq; consonantis habet, ut ianua, iecur, iocus, Iuno. Nihil horum ex ore mittitur exiliter, sed I, causa non est. Insidit & sibiipsi, ut quū dicimus conijcio, reijcio. Interim duarū cōsonantium uim obtinet, ut maior, peior, Maia, maieestas. Quocunq; modo se habebit, acutum & minutum auditur.

Ex quinq; puris literis V, ordine postrema est. Labris ex=
porrectis paulumq; diductis enunciatur. Sonus eius exi=
guus est, & effluens. ostendit illud Vergilianum per sepe
laudatum, -Exiguus mus

Sub terris posuitq; domos, atque horrea fecit.

quod laudabiliter imitatus est Horatius,

Parturient montes, nascetur ridiculus mus.

Quid habent argutum & canorum, mus, sus, plus, thus,
fumus, mulus, mutus, ludus, dumus, tuus, suus, bubulcus,
subulcus, cucullus, cumulus, tumulus, lutulentus, summis=
sus, exiguus? Pleriq; populi pro litera u, quarta uoce, id est
o, ante literas quæ primæ sunt in motu & in nato, abu=
tuntur. dicunt enim sont, pro sunt, tondo pro tundo, mon=
dum pro mundo, onguentū pro unguento, sommissus pro
summisso, rompo pro rumpo. Melius Hispani. sic enim di=
cunt unguentum, ut nos unum Gallice, per eas treis lite=
ras quæ primæ sunt in unguento. Quod si facies, tum ma=
nifestam differentiam cognoscas inter o, & u, uocales, &
pressius hanc quàm illam proferes, nec errabis in sono=
rum iudicio. Profer una, deinde supprime literam nouis=
simam, & retine un, scies hoc modo aliter un, aliter on
proferri oportere. Sunt qui nō Gallico more dicūt cumu=
lum, sed coumouloum, ut Hispani, Itali, qui in syllaba bre=
ui diphthongum facere uidentur. quod ego nulla ratio=
ne probare possum. Manauit hoc uitium, credo, ab ijs qui
quum uiderent *μῦσα* Latinè dici musam, putarunt u, &
z, eodem modo proferendum. In hac re laudo Gallorum
pronunciationem: quanquam ab ea desciscunt aliquot ci=
ues eorum, patriæ contemptores, ut peregrinū quiddam
sapere uideantur. A Gallis non *fatw*, sed *fatuus*, non *fo*=
tourous, sed *futurus* dicitur. Sic quoq; ueteres Romanos
dixisse,

dixisse, non ita literarū sonos confudisse puto. Quid erat opus *αἶψα* in musam uertere, si manebat idem in utroque sonus? Cur Vergilius pro opilione upilionem dixit in Bucolicis? Si quum tundo & fugio dicendum est principio tenui, dicemus tondo & fugio: tum u, plenæ non exilis esse uocis falsò putabitur. Aliquando falluntur aures alieno sono, ut quum R, aut duæ tres uel mutæ aut semiuocales uocem per se tenuem gracilemque roborant. Hæc enim firma sunt & sonora, rus, rubrum, ruscus, truncat, murmurat, multum, subter, buxum, structura, custodia. Extrema uocalis igitur suapte natura tenuis est, ut illud *ὀϊστός* apud Græcos, cuius officium interdum gerit, ut *ὄϊς* sus est dictus. sed aliunde nonnunquam dilatatur illius exilitas, ut hic, —Arma, uirumque cano.

Idem iudicium est quum uocalibus adiungitur, ut uanus, Venus, uinum, uolo, uultus. in his enim aliunde firmatur, quoniam ex literis duabus una componitur uox, quæ ad principem maiore ex parte referri debet. Interim adeò patitur attenuationem, ut omnino reticere uideatur, ut aqua, lingua, suavis. Nusquam sonatior est quam in fine uerbi, ut cornu, manu, metu, tumultu, ueru, tonitru. In hac sede multo plenior est, quam quæ finis est his uerbis, sibi, tibi, uirili. Pauca de quinque literarum principibus diximus: de ijs quæ symphona Græci uocant, addamus & pauca.

Ex mutis surdumque spirantibus elementis, B, D, G, uehementius aurem feriunt, propterea quòd sunt mediæ inter tenues & crassas: B, inter P, & ph: D, inter T, & th, G, inter C, & ch. figuras notasque proprias quæ respōdeant his φ, θ, χ, non habemus. F, nostrum à φ, græco non multū disidet, illique sæpe successit, ut φῆμι fama, μορφή forma, Phryges Fruges ab Ennio dicti. B, fortior quam P: D,

quàm T:G, quàm C:abdo quàm apto, addere quàm atte-
 re, ager quàm acer. De K, & Q, idē quod de C, iudicare
 debemus. Nam pro tribus una est apud Græcos *κατα*
 nomine. quamobrē superuacuas duas nonnulli putarunt.
 Ex mutis igitur quinque sunt exiliores, tres expressiores,
 una penē crassa. Cōparet aliquis has uoces, ab, ac, ad, at,
 af, in affine, ag, in aggressu, & in ἀγρῆ, ap, in Appio, aq,
 ut ac singulatim. non enim exemplum reperiēs in quo q,
 syllabā componat cum uoce præposita. in aqua duæ syl-
 labæ sunt, a, qua. posterioris est q, non prioris. Deinde cō-
 ferat ba, in baculo: ca, in caco: da, per se: fā, in Fabio: ga,
 in gabinio: ka, in kalendis: pa, in patre: qua per se, ta, in
 tabula: cōparet inquā uoces, non magno negotio cogno-
 scet literarum sonum. Ex nouem tres recipiunt aspiratio-
 nem, & crassius proferuntur, ut Charites, Phalaris, Tha-
 lamus, quæ uulgus ac si non habcāt aspirationē, tenuiter
 exprimit, ideoq; uim sonandi sentire nō potest. Turba ua-
 lent consonantes, sicuti cantores debili uoce. Interfistunt
 enim & quasi colluctantur aggregatæ, & si non dulcio-
 rem sonitum, maiorem tamen cient. Experiri licet in his
 uerbis, abbrevio, abluo, abduco, abrado, absisto, abstraho,
 Accius, accresco, aduersus, adduco, admoueo, affatur, ap-
 paret, attritus: in quibus frequenter peccant ij qui ado
 non addo, aluo non alluo, abas non abbas efferunt. Ele-
 menta *seminocalia*, id est *ἐμινκάλια*, L, M, N, R, S, X, Z, ut
 sunt mutis sonantiora, ita paulò clarius in aurem cadunt.
 collocātur autē nunc in fine uerborū, ut animal, amabam,
 titan, dispar, facilitas, rapax. Nunc in principio, ut mane,
 nauis, ratus, satur, Xanthus, Zancle. Sæpe geminātur, ut
 fallo, flamma, sanna, farratus. Sæpe cum socijs iungūtur,
 ut calx, lanx, puls, hyems, Tiburs. Ex illis R, quamuis
 asperum.

asperum, tamen ualidum & acre. M, firmū, ut quod labris
occlusis exprimitur. L, molle. N, siccū & tinnies. S, humi=
dum. X, stridulū. Z, suaue. Semi uocalia omnia præter M,
male frequentantur. Si referes hæc ad aurium iudicium,
Mauult loquaculus male loqui quàm silere, senties quod
respuat sensus. & hæc, Nostra nauis plena tandem inanis
enatauit. & hæc, Rara arbor raros fert fructus. & hæc,
Xerxes Xanthum traijcit. Istud in alijs quoq; fœdum est
& iniucundum, sed in uocalioribus grauius offendit. Hæ=
cenus de literis, quarū differentiā cognoscere necesse est,
si de uocū omnium uarietate sanè iudicare, & ad aurium
uoluptatem accommodare dictionem uelimus. omnes au=
tem uelle debemus, ne sua spe fraudatus auditor, nostræ
fructum detrahat orationi. In synonymis natura præstat
id quod est sonantius. Nam quum uerba sint notæ rerum
quibus ad audientem nostras cogitationes perferimus, &
pleniora iucundius uehementiusq; moueant sensum, illa
si non semper usu, natura tamen iure dicuntur esse melio=
ra. Cicero in oratore, Simplex probatur in proprijs usi=
tatisq; uerbis, quod aut optimè sonat, aut rem maximè
explanat. Plenius est donat quàm dat, memora quàm dic,
obruo quàm tego, habitare quàm colere, informare quàm
instituire, uociferantur quàm clāmant, inflammatus quàm
incensus, tempestas quàm tempus, gubernator quàm re=
ctor, formosus quàm pulcher, regnator Olympi quàm
rex cœli, terra quàm humus. Sunt innumerabilia uerba
generis huius, tum maximè deligenda, quū orationi quæ=
ritur amplitudo. Est exilibus & suus locus in re tenui, &
gracili genere sermonis. Quid? Omnia quidem loco sunt
utilia ac laudabilia, sonantiora tamen natura sunt præ=
stantiora ac iucundiora.

De uerbis grandibus

& paruis.

CAP. XX.

GRandia à sonātibus discrepant. illa enim sunt quantitatis, hæc uero qualitatis. illa auribus solis accidunt, hæc & auribus & oculis. illa sono literarum, hæc intervallo numeroq; constant. Horatius quum dicit, Projicit ampullas, & sesquipedia uerba, quantitatem magnitudinemq; uerborum grandium respicit. Est enim sesquipedale dimensionis & mēsuræ, quæ si non propriè ac mathematicè, tamen ex translatione sermonis in uerba cadit. Quantitas alia cōtinua, alia discreta atq; numerata. In uerbis cōtinua quātitas est intervallo spaciumq; temporis, ac mora qua breuis longaue syllaba profertur: discreta uerò numerus & multitudo syllabarum. Tempus autem quanquam aliquando numeratur, res est continua. Itaq; grandia sunt uerba aut temporum lōgitudine, aut partiū multitudine: ac ut in corporibus, sic & in uerbis magnū paruūq; refertur ad aliquid. Nam quod magnum uidetur paruo comparatum, idem paruum uidebitur maximo collatum. Quapropter magnorum paruorumq; differentia sic accipi debet, ut intelligamus, ex duobus uerbis illud esse maius, aut quod alterum temporum intervallo, non syllabarum numero superat, aut quod plures habet numero syllabas. Mater igitur uerbum grādus est temporibus quàm pater. priorē enim producit, triumq; temporum est. Quamobrem pater pronunciatur expeditè, mater lentè, non secus ac si maater scriberetur. quod quidem omnibus natura longis accidit. Eadem ratione maius est nāre quàm märe, fātum quàm fātum, prātum quàm stātum, nōras quàm sōras, lōra quàm mōra, uītis quàm sitis, sēdes quàm pēdes, mūrus quàm nūrus,

rus, nātura quāmsātura, legērunt quāms regērunt à gero, delenīte quāms desinīte, rūpturus quāms fūturus. In alijs comparandis eadem analogia seruanda est. Quod si diphthongi longiores sunt quāms simpliciter lōgæ, sine ulla dubitatione debent haberi grādiore: quod etiam de producta uocali quāms sequuntur duæ plures uē consonæ, dicendum est. Tum enim longis longiores sunt atque productiores. Maius est igitur fraus quāms fās, claudes quāms clades, pœnam quāms ponam, Anchisæ quāms Anchise, ars quāms as, ast quāms at, astra quāms ara. Ex ijs quæ diximus, colligere facile est idem ē sonorum ē grāde esse posse, ut, iactatus Albanus, morosa fortuna. Nec semper est magnū temporibus, quod argutum est, ac uoce plenum. Clārē sonant ab, ad, at, ē paria: nec ea iure magna dixeris, utpote quæ singula singulis temporibus consent. Cōtrā, quædam sunt exilia, sed numero syllabarum grandia, ut inimicitia, uitilignes. Est in uerbis quibusdā proceritas, ac multa literarum comprehensio, quæ tametsi interdum magnitudo, propriē tamen multitudo uocatur. Nam magnitudo quantitas est continua, multitudo separata. Multa sunt hæc atq; procera, celebritas, formatur, archipirata, balneatores, confirmauerunt, colloquebantur, innumera-bilis, irremeabilis, amplificationes, cōduplicationes, deliberationibus, interrogationibus. Hæc uerborum longitudo sæpius orationi tarditatem atq; languorem, aut uasitatem ē inurbanum sonum, quāms dignitatē autoritatēq; grauitatis affert. Grandia interuallo firmāt orationem. Grandia proceritate aliquando firmant, aliquādo grauiasunt, sæpe reliquis imparia ē inæqualia. Quamobrem uidendum quo loco utare, quibus immisceas uerbis, quibusque personis attribuas. Si temporum spacio longa erūt, quo-

dammodo torpescant, ut infirmabant, truncabatur, dictatores, confirmauerunt. Eiusmodi uerborum continuatio fugienda. Si breuia, rapietur & euanescent, ut relegere, potuerimus, uoluerimus, cinericius, patefaciet, repetierimus, recubuerimus. Si partim longa, partim breuia, multo minore periculo admittetur. Sunt enim gradium & paruarum tres species, alia grandia spatio temporum tantum, alia numero syllabarum, alia utroque. Parua quoque breuitate, ut legitur, fragilis: aut paucitate, ut res, est: aut breuitate & paucitate, uir, sit, deus, grauis. Parua ferè extenuant orationem, ut hanc, Sed quid tu es tristis? Ego ne? Nescis quo in metu, & quanto in periculo sim. Quid istuc est? Scies. In me omnis spes est mihi. Satin sic est? Non. quid si sic? propemodum. quid si sic? sat est. hem, istuc serua. Hæc ex Phormione Terentiano. In uerbis, ut in alijs rebus, seruandus est modus, ne multa continuentur aut grandiora, aut minutiora. Cæterum parua in sermone tenui, grandia in oratione grandi frequentius collocanda.

De uerbis uolubilibus,
& tardis.

CAP. XII.

Tarditas in uerbis treis habet causas. aut enim productione, aut proceritate, aut hianti compositione generatur. Productio est longi temporis, proceritas polysyllaborum, compositio iuncturæ partium. Spōdecum tardum uocamus, qui est ex longis duabus, ut moles, aræ, tauri, dura, sælix. Item molossus, qui est ex tribus longis, ut primates, confirmant, maturant. Item dispondeum, qui spondeis duobus constat, ut Regnatores, contabescunt. Pyrrichium, trocheum, proceleumaticum, citos accelleres esse dicimus. Tardam quoque dicimus orationem, quæ

quæ longis omnibus aut certè permultis firmatur: ut illam
Craſſi, Cur clandestinis conſilijs nos oppugnant? & illam
Vergilij,

—Hos tota armenta ſequuntur

A tergo, & longum per ualles paſcitur agmen.

Durate, & uoſmet rebus ſeruate ſecundis.

Triginta magnos uoluendis menſibus orbes.

Imperio explebit— Ex contrario uolubiliter fluit

oratio, quæ breuitate partium leuiſ eſt.

Conſtitit hic, arcumq; manu, celeresq; ſagittas

Corripuit, fidus quæ tela gerebat Achates.

Panditur interea domus omnipotentis olympi.

Currit oratio celeritate pedum, lentè & ſenſim mouetur

eorundem tarditate. unde planum fit, eſſe in tempore ſyl-

labarum aut uolubilitatem, aut tarditatem. Tarda quidem

ſunt uerba procera ac polyſyllaba, niſi quum tota aut pe-

nè tota corripiuntur: ſed tum (quod antè dixi) rapi uiden-

tur & euaneſcere. Sed & in correptis quædã tarditas eſt,

ut colubro fugiente longitudo corporis. Quòd uno ſpi-

ritu proſtruntur, unoq; conatu, celeriter admodum ſerun-

tur, citiusq; multo quàm diuiſa currunt. Expeditius pro-

nunciaueris hoc uerbi uoluerimus, quàm opera mea, pro-

pterea quòd hic ſunt duo conatus, & totidem accentus,

ſed in ſimplici atq; integro plus elaborat anima, & ſpi-

ritus in longum protractus tametſi minus ſubſtitit, plus ta-

men ſubſtitiffe audiēti putatur: ut labor diuiſus minor eſt,

integer autem maior. Hinc fit ut eiſmodi uoces aptius in

clauſula ponantur, quàm totidem pares ſyllabæ in pluri-

bus. Minus enim ſubſultāt, ut qui iunctis manibus firmāt

gradum. Aptior eſt hæc oratio, Qualis quiſque futurus

ſit, patefaciet initiū. quàm hæc ex totidem breuihus, Qui

ſit

fert omnia patienter, leue gerit onus humeris. Hoc quid sit?
 Quicta minus est secūda. Tardiora sunt polysyllaba pro=
 ducta: & quantum accedit ad tempus syllabarum, tantum
 accrescit tarditati. His duplex innectitur mora: una à pro=
 ductione, altera à proceritate quæ spiritum continuat in=
 fractum, de quo proponamus exempla:

Cornua uelatarum obuertimus antemnarum.

Immūtebantur illi continuo Cybiratici canes, qui inuesti=
 gabant & perscrutabātur omnia. Quid? inquires: inter ea
 quæ separata sunt, aliquid est mediij temporis, quod in sim=
 plicibus non est: ut quum dicimus, Seruari debēt, uno pro=
 nunciato paululum interspiramus, antequam proferamus
 alterum. Illud igitur inuestigabant, quā, seruari debe=
 rent, paulo celerius est & uolubilius. Sic quidem res est
 in temporū mora, sed quia in uno uerbo accentusest unus,
 in pluribus plures, mobilia minusq; tranquilla uidentur
 esse plura, unica contra pigriora, utpote quæ longè tra=
 huntur sine modulandi uarietate. Ad hæc grandia sunt, et
 mole sua laborant: quāobrem in uersibus hæc, quum res
 graues ponderantur, aut languor exprimitur, lubenter
 usurpant poëtæ,

Chara deum soboles, magnum Iouis incrementum.

Constitit, atque oculis Phrygia agmina circumspexit.

Versus est hic Horatianus,

Diuisit medium fortissima Tyndaridarum.

immuta paulum, ut sit,

Diuisit medium fortissima Tyndaris aurum.

sensit'ne utrum istorum sit uastius ac immobilius? hanc
 certè reperiēs causam cur tantam uerborum proceritatem
 fugiant poëtæ. Tertium genus est ex hiulca & aspera co=
 agmentatione, non ea quæ in duobus est uerbis, sed quæ
 inter

inter syllabas unius inuenitur, quum uocalium concursio est, aut certè consonantium asperitas & multitudo. Tum enim spiritus interfistit in conatu, ac ueluti quibusdam salebris interclusus cluctando immoratur impetum, & antè nonnullum tempus absomit, quàm de syllaba in syllabam feratur. propterea frequenter accidit ut uocales locò priores necessariò producantur: ut in his, Machaon, Aoni-
 nius, Amphiarauus, Menelaus, Laomedon, Melibœus, diei: diphthongus, cōstantia, direxti, arctauit, abstrusus, inextricabilis. Confer aras & arctas, noras, et nostras, uerū et uestrum, attulit & abstulit, motum & monstrum, bacillum & paxillum, elusit et exclusit: Confer inquam atque perpende, ut iudices alterum altero quanto uolubilius & expeditius, cō quòd pronuncianti nullo sunt impedimento multæ consonantes. Ergo spaciū & interuallum temporis, & syllabarum moles, & earum aspera concursio, retardat pronunciationem. Contrà correptæ uocales, & uerba temperatæ dimensionis, & pressa coagmentatio, uolubile genus & quodammodo rotundum faciunt. Aliud alijs locis est utile, ut postea dicetur. Quæ sunt unius aut alterius syllabæ, si continuantur, subsiliunt, nec satis uolubiliter more fluminis alueo prono decurrentis feruntur. In illis igitur potius est leuitatis inconstantia, quàm uolubilitas æquabilis. Non ignoro tardum & uolubile eorum esse quæ referuntur ad aliud. hoc modo & comparatè dici, syllaba producta quàm correpta tardior est: uerbum proceri corporis lentius est quàm breuis: uox cui hiant iuncturæ partium, pigrior est ea quæ molliter & facîle coheret. sed nihil uetat quo minus hic utamur apertiori genere dicendi, & rhetorum more de re disputemus.

De uerbis lenibus,

& asperis. CAP. XXII.

EX uerbis alia sunt lenia, & quasi suauiā, alia dura et aspera. Hæc tristia sunt, illa uerò iucūda. Ex illis suaue dicendi genus, ex his horridum ac seuerum conficitur. Vocales omnes suapte natura molles sunt & suauēs. Nō enim horridè sonant, nisi quum iunguntur asperis consonantibus, aut facta concursione exasperantur. Id quoniam ad aurium iudicium refertur, interroga tuas aures, sint ne suauiā quæ proponemūs, massa, sæpes, isis, homo, sumus. Si in his uniuersis uocalis est omnis, nec ulla non dulcis, facile est credo iudicare, si quæ est aspera uocis, non è uocali, sed aliunde concitari. Aliter hoc scire potes experiundo quid unaquæque sola pura quæ sonet in his uerbis, amor, emit, idem, onus, urens. Horum primæ syllabæ constant literis singulis nihil insuaue & iniucundum sonantibus: quæ res ostendit quid de uocalium sono pronunciare debeamus. Nec in omni concursione uocales sunt asperæ et hiulcæ, etiam si alijs & alijs partibus oris exprimuntur. Signum est, quòd prætericram docti, quàm præteriueram dicere maluerunt. Sæpe molliter amice quæ concurrunt, ut meus, mei, meo, mea. Durius & agrestius est meæ, quod Vergilius utitur in uersu Bucolico,

Mille meæ Siculus errant in montibus agnæ.

suus suo suæ sua, prona sunt. manui metui luctui, nonnihil offendunt aurem, ut supra demonstrauimus. Item pius pia pio piæ, non sunt absona, at pij subrusticanum est, nisi fiat quasi synæresis. propterea dij & ij *μνοσυμάβως* proferimus, et isdem Ennius pro iisdem probauit. E, & I, sibi male insidunt, cæterum E, & I, & V, uocalibus antepositæ non admodū asperè dissonant. Dura sunt aa, æa, ai, ao. Ar-

gumento

gumento sunt κρίαα, κρίαε, κρίαί, κρίαΘ, quæ Græci propter absurdum hiatum contrahere et aptare synæresi solent, hoc modo, κρία, et iota subscripto, κρία, κρίας. Iniucunda quoque sunt οα, οε, οί, οοί, όύ. quãobrem Attici βεώ, pro βοάω, χρυσούτην pro χρυσοίτην, χρυσοίμι pro χρυσοίμι, χρυσούμι pro χρυσοομι, λητούς, λητοί, λητώ, pro casibus λητόΘ λητοί, λητόα contrahunt, et διημοδίνας et διημοδίνας in διημοδίνας, et έφι, in έφι, έφης et έφιας in έφας. Aaron igitur, Phaëthon, aulā trisyllabū, Machaon, Oaxes, Amphiarāus, Pholoë, Oileus, Laocoō, coūs, Neera, et similia rictū diducūt, et inurbanum quiddam subolent. Dicit aliquis, at Græci cōtrahunt ū, et εο, et εα, quæ mollia dicis esse. Quid tum? Omnis concursio uocaliū efficit hiatum, sed non eodē modo. Parum dura habeo pro mollibus. Senserunt hanc asperitatem ueteres Latini, et in multis cōtractione sunt usi, cuiusmodi sunt hæc, huic, cui, dij, dijs, dein, proin, deest, semianimis, prehendere, peculi. Ex quibus priora septem monosyllaba, tetrasyllabum octauum, trisyllabum nonum, ac decimum. Quòd autem nec concisa omnia decerent, nec hæc ubiq; seruare religionem possent, admisere quædam more Græcorū, maximè poëtarum. quibus amica difficultas, et sonora magnitudo. Et hic certè negligētia quædam diligens nō erit ingrata. Habet, inquit Cicero, ille tanquā hiatuē concursu uocaliū molle quiddam, et qđ indicet non ingratam negligentiam de re hominis magis quàm de uerbis laborātis. Quod de compositione dictum quidem, sed et huc accōmodari potest. Vastè sonare iam diximus dici, speciei, materiei, et quæ tot uocalium diuiso concursu laborant, ut cieo, uico, coëo, hinc redeo factum, ne reco diceretur. fio fiebam, doceo, doceam, uideam, ui= deantur, et alia quædam iam mollita sunt usu. Omnino in hac

hac re Latini quàm Græci, et si Græcis dedit ore rotundo
 Musa loqui, multo minus frequentes et intemperati. Du-
 plicatio consonantium in finitimis syllabis ferè subaspera
 est, atq; insuavis, ut barbara, bibebat, cucullus, Cacus, Do-
 dona, dediderat, fursur, fefellit, Gargara, gurgēs, ieiuniū,
 lallare, ululat, Nanetes, Niniuitæ, papilla, quinquaginta,
 rara, turtur, intertexta, Xerxes. M, et S, ut minus duras
 exciperelicet, māmā, memor, memoria, mimus, Mamurius,
 sesamum, susurro, Sisyphus, zizania. S, litera sibilū odere
 Græci, nec eam repetiuerunt in præteritis, et isqui pro
 isqui dixerunt. Quæ litera prima est in rapaci, omnes ci-
 tra controuersiam asperitate et tristitia uincit, ut, Frugi-
 fera et ferta arua Asias tenet. De quo uersiculo Cicero,
 Proximus inquinatus insuauissima litera infinitus. In prin-
 cipio uerbi et in fine sonat acerbius, in medio paulo dul-
 cius, ut rapax, amor, urit. Geminata uerocaninū stridet, ut
 horreo, færa, Pyrrhus: quod molliunt aspiratione Græci
 πύρρῳ, θάρρῳ. Iratis, et ex stomacho ringētibus, aut bel-
 licum canētibus, mirum in modum cōgrua est. Et in suauī
 genere non displicet modicè et tēperatè collocata, ut, Ex
 eius ore melle dulcior fluebat oratio. In uersu ideo sæpe
 statuenda, quòd modulationi carminis addit robur, ut,

—Facilis descensus Auerni,

Sed reuocare gradum superasq; euadere ad oras,

Hoc opus, hic labor est.—

Iungitur cum multis in eadem syllaba, ut brachium, cra-
 stinus, dromo, fragor, graius, Praxiteles, tragula. Præmit-
 titur eisdē in diuersa, arbor, arcus, ardor, perfectus, arguo,
 arpinas, artus. Præponitur et semiuocalibus, ut perlustro,
 arma, carnis, torret, arsurus, ars, Ariobarzanes. In his oī-
 bus asperior est quàm cum solis uocalibus. Nam quātum

consonan

consonantes augentur, tantum crescit asperitas: quod de ceteris quoq; dictum puta, ut carbasus, stratum, Thrax, mors, fors, stirps, ultrix, dextrorsum, sinistrorsū. X quoq; durum, & auribus ingratum esse demonstrāt hęc audita uerba, pax, fax, rex, lex, mox, faxit, luxit, fluxus, anxius, coxēdices, fraxinus, appēdix. Reliquę per se in principio & in medio non offēdunt audientem, ut uidens, cœlam, dies, fama, gubernat, Iupiter, lima, minus, nolo, Paulus, quatuor, sanus, talus, uinū, zea. Suauissimę sunt L, M, P, S, Z, & V consonans. Indicant hęc uoces, fuit, lauo, mutuū, patiens, sino, Zacyanthus, ualidus. Iam quę cū quibus asperē audiātur, ostendit ratio iungendi. Veteres enim dixere comburo, committo, compono, imbuo: non conburo, conmitto, conpono, inbuo: propterea quod N, ante literas quę labris exprimuntur, absōna esset, M, cōtrā perquā suauis: ut ambulo, ambio, compositus, complicatus, commercium, imber. Colligo pro conlego, colluceo pro conluceo, corrado pro conrado, cooperio pro conoperio dixerunt, quod alioqui soni discordes esse uiderentur. Dixerunt item aufer non abfer, accedo non adcedo, asfer non adfer, alluo non adluo, annuo non adnuo, appono non adpono, acquiro non adquiro, asigno non adsigno, ascribo nō adscribo, attulit nō adtulit, & propē infiniti generis eiusdē. Sunt tamē Panes Arcadici, & Mide subauriti, qui tam uariē literam unam mutare nolunt. adfero dicūt, & adpono, & adsigno, et adscribo: & temere duritiā affectant, propterea quod tale quiddam reperiunt apud ueterrimos. In lino uisum est agreste, dictumq; illino, & eodem modo illepidus, ignotus, ignauus, irriguus, irritus: amouit non abmouit, abegit non absegit, abstulit non abtulit, erigit non exrigit, abscēssit non abcessit, eluo

h non

non exluo, tranat non transnat, traducit non transducit, transfert non trafert, dirumpit non disrumpit. Item disfero non disfero, disiungo non dijungo, dispono non dispono, diduco non disduco, diripio non disripio. Contemplator hanc mutationum uarietatem, ut quæ quibus consentanea aut dissentanea sint, ex antiquorum iudicio uerè pronunciare possis. N, ante C, D, Q, S, T, non insuauiter auditur, ut ancilla concilium, tundo condo, anquiro, nunquis, mons insons, sunt amāt. In fine tinnit, ut nomē, titā, delphin, solō. Et Latīni multa per o, definiūt quæ Græci per ω, ut Plato, leo, draco. Nec molliter sibi adijcitur, cāna, sanna. C, P, T, quia tenues sunt, & quodammodo siccæ, interdum recipiunt aspirationem, ut pulcher, simulachrum, triumphus, trophæum, thus, Cethegus: quod qui non intelligunt, triumphum dicunt, & tropæū. C ante L, clāssicum sonat, ut clangor, claudio, clades. Nec magnā habet affinitatē cū siccis litteris, ut N, & R, ideoq; Gneū pro Cneo, amurgā pro amurca, & ad eam similitudinem Gaiū pro Caio dicimus. Nam sicca nō aliter aures quā dentes obstupefaciunt. Aures autem de lenibus & asperis iudicant, nec asperitatibus corradi, nec suauissima mollietie delenitæ quasi languere & dormire uolunt. Illis de sono uerborum iudicium relinquamus.

De uerbis integris, & corruptis.

CAP. XXIII.

Moderantur aures & integris, & concisis. Integra dico quibus nihil est neq; detractum, neq; additū, neq; mutatum. Nam perinde loqui possumus de uerbis, atq; de corporibus humanis, quæ si quid detrahas, ut unū de quinque digitis: aut addas, ut gibbū dorso: aut mutes, ut pe

ut pedem in transuorsum: int egra manere non uidentur. Integris semper utendū, nisi aliud suadent aures, & usus. Erit enim barbarismus, nisi sensus excuset, & doctorum consuetudo. Barbarismum fieri quatuor modis uel grammatici docent, additione, detractiōe, immutatione, transmutatione. Duas posteriores formas mutandi nomine cōprehendo, quoniam aut est mutatio loci, aut certē literæ uel syllabæ. In hoc genere liberius agunt poëtæ. Addunt, ut, Induperator, alituum. Detrahunt, ut, Cum genere extinxem, Acceſtis scopulos, Repostum, direxti, peculi. Mutant, ut olli, upilio. Transmutant, ut quum Tarsumenum dicunt pro Trasumeno. Tempus adiſciunt, ut,

Mortem contemnunt laudato uulnere Getæ.

Tempus auferunt, ut,

Totumq; instructo Marte uideres Feruere Leucaten.

Admittunt synæresim, ut,

Orphæ Calliopea, Lino formosus Apollo.

Seu lento fuerint aluearia uimine texta.

Iam cōtrariam recipiunt diæresin, ut quum dixit Horatius syluæ per tres syllabas. Oratoribus usus istorū multo parciore est, propterea quod numeris solutioribus utuntur, & ad communem loquendi morem propius accedunt. Non ubiq; tamen integra & incorrupta probant. Dicunt enim nosse, iudicasse, audisset, ligurierat, et similia. Hosce, huiusce, suapte, & pluraliter decum, liberum, fabrum, procum, numum, sestertium, talentum, quingentum, duumuirum, triumuirum, scripsere, dixere, nequeo, uinclæ, seclæ, soldū, caldū, sis pro si uis, & apagesis, pro apage si uis, & id genus pauca. Hic præceptum non habeo, autoritate nitor. Cur enim potius liberum dicunt quum filios filiasq; significant, quàm quum libertate præditos? cur fa-

h 2 brum

brûm non librûm? cur talentûm non uestimētûm? caldam non ualdam? ualdè non caldè? uinclâ non tabernaclâ? soldum non stoldum? sæclâ non siclâ pro siculis? Hæc ad usum credo, non ad rationem præceptumq; referuntur. Ergo receptis utere, noua & inusitata ne temerè usurpa: ubi licebit utrunq; integrum & corruptum, refer ad aurium iudicium, & aptius tum numero tum sono delige. Hactenus de uerborum simplicium uarietate, Transeamus ad collocata. Sed est qui me reuocet, Heus tu, nihil ægis de uerbis elegantibus & inelegantibus, de uenustis & inuenustis, de pulchris & fœdis, de iucundis & tristibus, de bonis & malis, de poëticiis & oratorijs, de lectis & inelectis, de triuialibus & absurdis, de natiuis & factis, de indiuiduis & iunctis, de dilucidis & obscuris? Bene mones. Hæc penè præterieram. Elegancia, uenusta, pulchra, iucunda, bona, lecta, nomine magis quàm re differunt. Ea sunt quæ uel significatione, uel sono demulcent animum, uti grauia, sublimia, dulcia, sonantia, commode assumpta, & quæ maximè propriè dicuntur. In barbaris, aut inusitatis, aut rusticanis triuialia & absurda numerantur. Natiuum, factum, indiuiduum, iunctum, dilucidum, obscurum, commune est omnium uerborum. Nullum enim genus est in quo non sint alia nata penè cum rebus ipsis, alia postea facta: alia simplicia, alia composita: alia dilucida, alia obscura. Poëtica eadem sunt quæ & oratoria, nisi quòd factis, & translatis, & tropis liberius utuntur poëtæ. Assumunt & ea quæ patronymica uocantur, oratoribus inimica, & uagis epithetis carmen explent, quæ (nisi quis liberè uagatur) orator ut in epidiastico genere non admittit.

LIBER SECVN- DVS.

PRAEFATIO.



POSTEA quàm uerborum quibus omnis extruitur oratio, naturas atq; differentias explicauimus, superest ut quae arte in oratione collocari debeant, & quae quibus dicēdi generibus sint aptiora, breuiter exponamus. In exedificatione autem plus est artis & exercitationis, quàm in apparatu quasi materiae, atq; partium delectu: quemadmodū maioris est ingenij ac longioris usus aptè construere domum, quàm rudia saxa, & arborum molem indigestam comportare in unum: & minus operosum particulas auri & quasi ramenta colligere, quàm aurum lectum solidare, & expolire solidatū. Sed ut antè diximus, difficultati non erit impar gloria, si nō apud istos linguae Latinae carnifices, qui tametsi neq; res neq; uerba tenēt, non de uerbis tamē, sed de rebus laborare se gloriantur, saltem apud aequos bonosq; rerum aestimatores, qui malunt utrunq; studium & intelligendi & eloquēdi, quàm uel alterum, uel neutrum. Sētire praeclare, laudabile est: eloqui compositè, pulchrum: utrunq; coniungere, longè pulcherrimum. Sed (ut antè diximus) ab hac gloria praestantia sum mouemur aut ingenij sterilitate, aut inerti desidia, aut inopia magistrorum, aut opinionum prauitate. Nemo nisi foelici natura praeditus, cōsentanea inter se cōponet, & rebus aptabit genera dicēdi. Est enim uenae ditioris, uerborū copiam ferre: & iudicij naturalis unā cū arte iudicare quae quibus optimè coha-

reant. Nec est quòd mirari debeamus si plerique studio si componendi, frustra laborarunt, quippe qui animi celeris motu, & naturæ muneribus essent destituti. Non defuit ingenium multis, sed quod natura contulerat, inertia atque torpore demerserunt. Viderunt stylum diligentem esse magni laboris, quem perferre nequit ignavia. His igitur odium literarum, illis falsa de se fuit opinio. Nec uis illa natiua, atque literarum studiū profuit, ut multis iam diximus initio libri superioris. Non erat qui agrum fertilem, & cultus appetentem excoleret, præceptionumque seminibus ornare sciret: aut certè si quis erat, artem animi colendi nesciebat. Hos ego nihil accuso, nisi seros, quibus non uoluntas, sed fortuna defuit. Accusandi sunt nimium remissi, qui quæ naturæ bonæ prauis opinionibus corrumpunt. Ex quibus honoris & quæstus auidi, ad earum artium fastigia prouolant, quarum quæstiosa est negotiatio: scribendi artem & ceteras omnes elato supercilio fastidiunt: quasi uerò cacumina sine radicibus stirpibusque stare possint. Quid opus est, inquit, elegantia uerborum? ad quid ille sermo tam cultus? cur uerba seligimus? cur in coagmentatione syllabarum, & in dimetendis breuibus & longis consensescimus? Quid mendicamus in re tenui? Verba negligamus, & quadratā orationem: scientiam rerum magnarum comparemus. Demus operam Reipub. necessarios adiutemus, & amicos. Hæc & alia stultè, & arrogatè. Quoniā ex barbarie tuæ, & impura colluuiōe uerborum, quandam pecuniam conficis, bonas artes paruo cōtentus insolens aspernaris. Nō tenes neque scientiam morum, neque naturæ partes, & earum causas, neque rationem differendi, neque ullam philosophiæ particulam, neque eloquentiam, neque pri-

ma rudimenta literarum, neq; ullam omnino disciplinam. Nosti fortè, nec probè nosti, treis aut quatuor legum titulos, aut quadam principia medicinæ, aut aliquot quæstiones diuinæ scientiæ, & falsa ductus opinione, de cognitione rerum gloriaris. Omnia (quanquam pro nihilo tua sunt omnia) refers ad uanæ gloriæ uentos, & ad fortunæ ludibria. Quumq; discantur artes ad animi cultum, nullum iudicas esse fructum earum, nisi qui ambitiosè & auarè percipitur. Quid si coriarius cerdo te ditior est? quid si Reipublicæ utilior? quid si populo cōfficiuus magis? Fallis, decipis, eludis, circumuolitas, corradis undiq; rem quantum potes, tantum in usus tuos conuertis: totum diem in bias prædæ, & re sæpe, animo semper, inops es, ac mēdicus. Quod facis, mille uiri in singulis ciuitatibus idem facere possunt, aut certè faciunt. Ambis primos honores in conuiuio, in theatro, in sermone, in consilio, in templo, in omni loco: sed quoniam rudis es & ineptus, te docti execrantur, te prudentes in stultis numerant, te primores grauitè ferunt, nisi qui sunt tui persimiles. Te plebecula uellicat absentem, præsentem simulatos exhibet honores. Quid affers boni ciuitati? quid honoris imperio? quid non potius dedecoris? Nonne foedissimum est uidere ingentem multitudinem eorum, qui nomine literarum primi uolunt haberi, quum literatorum modò uestitum, literas habeant nullas? Non omnium turpissimum, uitam dedicasse liberalibus studijs, postea ab illis desciuisse ad auaritiā, & inanes ordinum titulos? artes omnes improbasse? corpori quàm animo bene esse maluisse? Quin deponis habitum? Quin te profiteris inimicum artium optimarum? Quin desinis maledictis insectari literatos, ac eos qui te meliores sunt, & ciuib; suis nec

tam indecores, nec tam perfugæ? Pares cum paribus facile congregantur, mules cum mulite, dux cum duce, senator cum senatore, iudex cum iudice: tu cum imparibus, id est, cum indoctissimis esse mauis, & omnibus doctis inferre nefarium bellum. Erro. Pares tibi sunt indoctissimi quique, ineptiarum amantiſſimi, disciplinæ cultioris oſores acerrimu. Sed bene res habet. Rides eruditos, te rident eruditi. Contemnis illorum præclara studia, contemnunt ignorantiam & sermonem tuum barbarum ac putidum. Deprimis eos, habent te infra mortales omneis, & proditorem scientiarum atq; desertorem esse iudicant. Quos despicias, suscipiunt exteræ gentes, quos uituperas, sapiētes laudibus in cœlum ferunt. Quos abolere, contendis, nomine & gloria perpetuum uiuent. Quos abiectos esse uis ut ignobiles atque plebeios, in ore populi uersantur. Tu lates in tenebris, semper inglorius futurus, nisi tua te scelera fecerint insignem. Desine desine tandem lacerare communem multarum gentium linguam, tibiq; nimium placere. Quanti sit oratio cōposita, antea demonstraui-
 mus, ut calumnias improborum amoliremur. Quod esset pulcherrima, & homine libero dignissima, ac Reipu-
 perutilis, in summis ciuitatibus fuit in summo loco supra duo annorum millia: quumq; semper inimicos haberet, & rabulas πρᾶγματάρχας, & cōtētiosos sophistas, et ὁδο-
 οόφους, & homines ingenij mortui, qui sapere se credūt, si quantū uulguſ indoctū, tantum post studia longa sapiūt: quum istos inquam & alios haberet inimicos, nunquam cessit inuidiæ, nunquam conticuit in celebri conuentu, nunquam cessauit obire legationes, interpretari iura gē-
 tium, res gestas mandare memoriæ, res uiuorum mortuo-
 rumq; testificari, refutare improbos, confirmare probos,

optimi

optimi cuiusque rationes & inuenta explicare, alios defendere, alios commendare, alios solari, doctissimorum labores immortalitati dare, artes omnes ad posteriorum monumenta complecti. Dum artes ingenue floreant, oratio flexanima, ac regina præstantissima, longè lateq; regnabit, ac inter uirtutes maximas excellet. Breui sepeliatur eius inimici. Illa semper magno cum honore circumferetur, passim legetur, uulgò instituet animos amatorum suorum, & suo splendore excæcabit oculos barbaræ dictiōis. Si cui paupertatis uidetur esse comes, is nihil sapit. Non metuit pauperiem, qui ex arte dicendi nomen amplissimū sibi comparauit. Cui fama bona est, nūhī sanè diues est. Cui tantū fortunæ diuitiæ, pauper. Qui dicit eleganter & compositè, ratione & sermone fruitur ut summus uir. Qui inemendatè fœdèq; balbutit, semper est infans, tantumq; ab humanitate distat, quantū à puro sermone (qui proprius est hominis) recedit. Quæ quum ita sint, operā demus orationi, sine qua neque studia nostra proficere, neque cogitationes mandare scriptis possumus.

Oratio alia soluta, alia uincta.

CAP. I.

OMnis oratio uel est soluta, uel colligata. Solutam dicimus, quæ numerorum uinculis & compositione uerborum caret. Qui fundit eam, non elaborat ut omnia uerba inter se consonent, atq; sine hiante iunctura copulantur: non obseruat quos ordine statuatur pedes, & quomodo clausulam finemq; deponat. Curam adhibet ut Latina sit, & emendata. Quantum uerò modulatione delectet aures, quantum mulceat animos, aut quia nescit hanc artem, aut quia non semper adhibendā putat, nō animaduertit.

uertit. Hoc genere sermonis utuntur omnes qui componendi leges, & eloquendi præcepta nesciunt, ut plerique musici, arithmetici, geometræ, astrologi, quiq; nihil aliud sunt quàm grammatici, qui morales, qui physicas artes atque dialecticas aut scriptitant, aut interpretantur. Quibus adde multos magnarum artium professores, quibus est una cura rem suam cognoscere, terminis (ut aiunt) suis uti, conceptus animi sermone inornato & incondito comprehendere. Ornamenta dicendi, & flores orationis (ut dictitant) aspernantur: ut ueritas habet, ignorant. Adhiberent, si possent, ij qui subinde ponunt unum aut alterum nescio quod ornamentum, si quod fortè audiendo legendò ue ceperunt: ut pauper ille qui quum uellet haberi lautus, argenteum uas, nec ipsum satis elegans, apponebat ad omnes usus, & erat pro lauto ridiculus. Quòd nesciant ornate dicere, ego quidem istuc uenia dignum censeo. Non omnia possumus omnes, inquit poëta. Et maximas artes uersantibus, concedendum uidetur, ut suo quodam genere loquendi potius utantur, quàm ut rerum cura deposita, uerborum sectentur ornatum, neutrum tandem perficiant. Quòd eloquentiam maledictis persequantur, inhumanum & flagitiosum & intolerandum esse iudico. Diuinā sapientiam tollunt, quæ nonnunquam in hominis ore lucebit. Non agā tam grauiter. Plato philosophorum omniū princeps, in omnibus suis libris usus est eloquētiæ uiribus: usus est Aristoteles, quem uti deum uenerantur isti contēptores eloquētiæ. Ab ea Theophrastus nomen inuenit. Nam quū Tyrtaeus antè nominaretur, Aristoteles præceptor eius à diuinitate dictiōis Theophrastum autore Diogene Laertio cognominauit. Ab eadem

dē Chrysostomus nomē accepit, cuius est sūma uis in expli-
cādo & exhortādo. Lactātius theologus ab ornatu dictus
est Cicero Christianus. Galenus copiose, & cōpositē tra-
ctauit artē medēdi, Iulius Firmicus astrologiā, Columella
rē rusticā. Iurisconsulti Pādectas nomine eloquētiā lau-
dāt, quā uerē, non dicā hoc loco. In illis sermo proprius
est ac Latinus, nec omnino solutus. Magnā uim hominū
disertorū in omni disciplina numerare possū, quos habēt
magistros isti uituperatores orationis, quos uehementer
admīrātur, quos pares cōlestibus animis existimāt. Quē
ratio flexit eorū mētes, ut exturbare cōētur quod summi
quiq; uiri nō modō probarint, sed magna uolūtate sint am-
plexi? ut uitio dēt illud quo optimi scriptores etiā nū ma-
ximē laudantur? ut barbarū q̄ Latinū, ut horridū quā
cultū, ut dissipatū quā cōpositū, ut fœdū quā honestū
genus orationis sequi malint? Ambitio & dominādi cu-
piditas alios ducit in errorē, alios intestinæ simultates, al-
ios auaritia, alios inanes tituli doctriinæ, omnes ueritatis
ignorātia. Nulla est ars nullaq; disciplina tā spinosa, tam
horrida & inculca, cui nō possit adhiberi decor, cuiq; non
aliquando sit additus nitor & cultus orationis. Hac tem-
pestate reperias in singulis artibus eruditos, qui non mo-
dō purē & Latinē, sed etiam ornatē & cōpositē dicāt.
At hæc rara uis est. Maior pars eorū quos antē nume-
raui, solutē loquitur & dissipatē, nisi siquādo fortuitō im-
prudētibus aliquid numerosē cadit. Idem omnibus fre-
quenter accidere uidemus. Nec multis uerbis agendum
est de scriptoribus qui barbarissimis scatent atque solœci-
smis. Non enim inter eruditos, sed inter Cōuētas habētur.
Qui incorruptē tantummodo & emendatē loquuntur,
& imagine quadam elocutionis oratoriæ fallunt imperi-
tos, di-

tos, dicimus eos uti sermone dissipato. Ne compositos esse iudicato, quòd de loco in locum uerba mutant (id faciunt & pueri infantes, & indoctissimi quique) sed quòd neque aptè uerba connectere, neque pedes obseruare, neque modulari comprehensionem sciunt, incompositos esse dicito. Proponamus orationem dialectici cuiusdam, ut sibi uidetur, admodum compositi, atque purè loquentis. Vox est, inquit, ut à nonnullis definitur philosophis, ex ictu aëris elicitā qualitas auribus accidens. A recentioribus autem, & ijs quidem qui superioribus aliquot annis circa hanc artem uersati sunt, magis conuenienter accommodatèq; ad hunc locum hoc pacto definitur, Vox est sonus qui ab ore animalis proficiscitur, certis quibusdam naturæ instrumentis formatus. Dicit aliquis è rudibus, Quid est hic uitij? Quid? In dactylos duos, non aliter atque in Asclepiadeis carminibus, prima cadit oratio. Duæ posteriores spondeis longisq; syllabis in fine torpescunt. Rhythmicis utrumque uitiosum. uerba uerbis non coherent, ut hæc, à nonnullis definitur philosophis. & hæc, circa hanc artem uersati. & hæc, accommodatèq; ad hunc locum. & hæc, quibusdam naturæ instrumentis formatus. Ad hæc nullus est motus uolubilis, nullusq; cursus orationis ex ea pedum collocatione quam desiderant ambitus, atque numerosæ conclusiones. De ceteris eodem modo iudicandum. Immutemus paulum, si placet, & minus affectatè loquamur, ut intelligant imperiti hic non esse querendam uerborum traiectionem, nisi quò suauius atque modulatiùs audiantur. Vox (uti definitur à quibusdam philosophis) qualitas est aëris ictu nata, quam percipiant aures. A recentioribus autem, qui paucis his annis in hac arte uersati sunt, explicatur
alia

alia definitione, quæ uidetur esse loco præsentis magis ac commodata. Vox est sonus qui naturæ formatus instrumentis, ex animalis ore procedit. Quid agis bone uir? uir? tu philosophorum sermonem magnis rebus occupatum, compositionibus ac numeris alligare? Minimè uerò. Ostendo quæ sit oratio soluta, quiq; minimo negotio uinciatur, ut sit & captu facilior, & suauitate iucundior. Verba misces, atq; naturæ uertis ordinem, ut agas oratorum. Quid ita quæso, si philosophi repudiant ornatum? Vtere sermone cottidiano pro libidine tua: quanquam subito dicere purè & ornatè, pulcherrimum est. Libros si non optimè, saltem mediocriter exorna, non modò ut ne repudientur ab optimo quoque, sed etiam ne des infantiſsimis hanc ineptè scribendi licentiam. Si in philosophia scribenda Ciceronem nò dico orantem sed philosophantè imitari nò potes, imitare Cornelium Celsum, aut Senecam, aut Plinium, aut Lactantium, aut Hermolaum, aut aliū qui sit usus oratione emendata, & aliquo quasi uinculo deuincta. Quòd si ne id quidè potes, satius esse puto quiescere, quàm ad ignominiam & æternū dedecus tantopere laborare. Ego certè qui nihil possum, cōquieuissem, nisi tam multos ineptiſsimè scriptitare uidissem. Illorū sit infamia, qui fecerūt ut cū multis aliquid anderem. Sed redeamus ad rem. Soluti sunt omnes qui cōponēdi uias ignorāt. Quòd si serūtur aliquādo præclarè, casu fit illud, et ingenij uiribus. Quid tum acciderit, nesciūt, & ipsi de se iudicare nò possunt. Ab una aut altera numerosa cōprehensione si de toto genere sentētiam feres, errabis, ut ij qui à parte totū colligere conātur. Soluti sunt & ij qui negligūt ultrò cōpositionem, quam si uelint seruare, commodè possint. Horum duo sunt genera. Alij quòd audiant Isocratem in sene



in senectute fuisse minus elegantem, & eandem in se
causam recidere uideant, hoc sibi propter ætatem con=
cedi uolunt. Quod illis quidem facillè concedo, si mo=
dò non omnem compagem resoluant. Alia sunt orna=
menta iuuenilia, alia senilia. Aliter orationem pro Ro=
scio Cicero iuuenis, aliter Philippicas idem senex com=
posuit. Vbertas & elegantia iuuenem, seuera breui=
tas & grauis ornatus senem decet. Nec multo secus est
in corporis ac in orationis ornamento. utriusque deco=
rum uersa mutat ætas. Alij negligenter effundunt ora=
tionem, aut quia tractant eam materiam quæ nullo sit
ornatu uestienda, cuiusmodi sunt epistolæ familiares
leuioris argumenti, & enarrationes interpretantium,
& parua momenta questionum atq; causarum. aut quia
res ipsa per se grauis, ad scientiam non ad aurium uo=
luptatem comparata, sermone inculto uersatur à doctis,
ut theologia, philosophia, medicina, iuris & legum
scientia. Hos, uti superiores, haud probabo, si quum
possint expeditè partem componere uel maximam, o=
mnem tamen elocutionem dissoluerint. Quid est quod
quum melius possis sine ullo tuo uel auditoris incommo=
do, malis tamen facere peius? Si te non decet eleganter
ornata compositio, potes uti mediocri. Si rebus ope=
ram das, & elocutio te moratur, liberius incomptiusq;
dicendi genus adhibere potes, quàm siquid uelles ex=
ornare dicendo. Floruit temporibus nostris uir in At=
tica tenuitate graciliq; filo sermonis alter penè Lysias:
qui quum eloquentia subtili iuuenis excelluisset, & bar=
baricem incultamq; linguam libris ad hoc compositis in=
sectatus esset, tandem senior effectus, & barbares uoces
admittere, & incomptam locutionem effundere bonum
duxit,

duxit, quòd sibi persuasisset, ut scribit in epistola quadam, officere Christianæ religioni purum aptumq; sermonem. An dissimulet callidus, an quod sentit dicat, nescio. Quòd si antea fuisset arduus & sublimis, deinde stylum demississet ad enucleatum genus, & penè cottidianum, certè factum probassent eloquentes. Sed quum character eius admodum tenuis esset, nihil erat quod detraxeretur illi gracilitati, nisi uellet nervos & ossa denuo dare. Id neq; Plato senex, neq; Demosthenes, neq; Iso= crates, neq; Lysias, neq; Crassus, neque Cicero, neq; Quintilianus, neq; Christianus aliquis cui laudabilis eloquentia fuisset, id fecit unquam, ut in senectute uitiū ultro committeret, & de industria funditus abiceret orationē, quam magno studio totam composuisset in iuuentute. Est ex illis, qui curam diligenter ornandi remisit: sed qui penitus abiecerit, & ultro barbarè sit locutus, haud ul= lum reperies. Quin reijcis de templis pulcherrimos hy= mnos, & aptissimè compositos? Quin tollis multas elegantissimas preces, si Christianæ pietati nocet ele= gans oratio? Quin fateris te non antè Christianum fuisse, quàm cœpisti barbarè & incultè loqui? Non ita uisum est sanctissimis uiris, qui quum scirent à sum= mo deo omnem manare doctrinam, quod habuerunt, hoc quisq; pro se sine ulla impietate obtulerunt, alius heroicum poëma, alius hendecasyllaba, alius iambica, alius trochaica, alius rhythmos, alius orationem nume= ris aptam, qualis in sacrandis funeralibus cum pia animo= rum delectatione canitur. Hæc omnia magna cum reli= gione sapientes uiri subinde modulantur in omnibus tē= plis: quod nō facerēt, si (ut ais) officerent pietati Christia= næ. Sed de his plus satis. A' re digredior inuitus ad refe=

lentos

lentos orationis inimicos. Summa propositi fuit, alios esse qui inscitia dissoluant orationem, alios qui non inscitia, sed praua opinione ducti negligent, alios esse qui cōsilio relaxent, uel etate uel materia suadente, quorum dictionem non omnino dissipatam atq; uagam, sed aliquāto liberiolem esse intelligimus. Solutum quiddam sit (inquit Cicero) nec uagum tamen: ut ingredi liberè, non ut licenter uideatur errare. Ad hæc Quintilianus, Est, inquit, ante omnia oratio alia uincta atq; contexta, soluta alia, qualis in sermone & epistolis, nisi quum aliquid supra suam naturam tractant, ut de philosophia, de rep. similibusq;. Quod non eò dico, quia non illud quoque solutum habeat suos quosdam & forsitan difficiliore pedes, (neque enim aut hiare semper uocalibus, aut destitui temporibus uolunt sermo & epistola) sed non fluūt, nec coherent, nec uerba de uerbis trahunt, ut laxiora potius in his uincula, quàm nulla sint. Nonnunquam in causis quoq; minoribus decet eadem simplicitas, quæ non illis, sed alijs utitur numeris, dissimulatq; eos, & tantum communit occultius. Habes quid ille uir de philosophia, de sermonis & epistolæ, minorumq; causarum figura sentiat, quid præterea solutum dicat, præter id quod omni arte componentis est destitutum. Eodem propè modo solutum dicitur quicquid poëtico numero uacat, etiā si arctissimè ligatum est. Nam qui certos in uersu pedes, in oratione liberum cursum, nec sui ubique similem esse uiderunt, solutum dixerunt, id quod non erat carmen, propterea quòd quanuis esset iuncturis & numeris adstrictum, plures tamen ac liberiores haberet pedes.

De ora

De oratione uincta, & ordine uerborum.

CAP. II.

NON est artis huius oratio dissoluta. Quæ tamen illa diceretur, ostendimus, ut ex ordine ad uinctam compositamq; ueniremus. Colligatur oratio (si Ciceroni credimus) coagmentatione, concinnitate, numero. Coagmentatio est eorum structura uerborum, quæ molliter in iunctura coherent: ut horum, Quæ res in ciuitate duæ plurimum possunt, hæc cōtra nos ambæ faciunt in hoc tempore, summa gratia, & eloquentia. Ista sic innexa sunt, ut inter extremas antecedentium uerborum syllabas, & sequentium primas, nulla quasi rima pateat. Dicam apertius. Suaues mollesq; sunt hæc uoces, nec os asperè, & oris instrumenta diducūt, Res in, in ci, te du, æ plu, mum pos, & ceteræ deinceps, præter hanc, gratia & uocalium concursu dehiscētem. Hæc & coagmentatio à rerum cōiunctione, ut in numero lapidum, uocatur, & iunctura, & structura, & cōpositio, & cōstructio. Concinnitas est oratio cadens aptè, beneficio figurarum, quæ paria paribus referunt, quæ antitheta componunt, quæ similiter cadūt, aut quæ eodē modo definiunt extrema. Hæc enim quatuor schemata per se perficiunt orbem, atque delectant aurium sensum. Exemplum est in Miloniana: Est enim Iudicēs hæc non scripta, sed nata lex, quam nō didicimus, accepimus, legimus, uerū ex natura ipsa arripuimus, hausimus, expressimus: ad quam non docti, sed facti, non instituti, sed imbuti sumus. Hæc enim talia sunt, inquit autor, ut quia referuntur ad ea ad quæ debent referri, intelligamus non quæsitum esse numerum, sed secutum. Numerus est orationis modus ex apta pedum collocatione. Paucis explicauī quid esset coagmentatio,

tatio, concinnitas, & numerus, ut partium breui descriptione planum fiet, quid esset oratio composita & alligata. Plura de singulis suo loco dicam. Nunc querendum mihi uidetur, cur ordinē Cicero praeterijt, quem statuit Quintilianus in componendi partibus? Sic est huius partitio. In omni porro compositione tria sunt necessaria, ordo, iunctura, numerus. Concinnitatem (ut arbitror) numero comprehendit. De re dicam quod sentio. Dispositio rerum est, compositio uerborum. Quintilianus haec confundit. Nam qui furi sacrilegus, petulanti latro, lateribus totum corpus, foemina uiro, tenebrae luci, bellum paci, mors uitae, occidens orienti, malum bono, uitium uirtuti, ignorantia scientiae postponitur in oratione, hoc est quum maius accedit minori, & quum dignius praefertur indigniori, non ratio uerborum, sed uis naturae rerum inspicitur. Propterea seruata ratione componendi, mutantur interdum: ut si dicam, Non modò non erat sacrilegus, sed ne fur quidem. Nox susculit diem. Noctes diesque apud Ciceronē reperies. Amplificantis est, aut minuentis, aut rerum personarumque dignitatem obscurantis, haec uidere, non eius qui uoces & illarum concordiam discordiamue querit, ut amica iungat, inimica seponat. Quid uetat quo minus dicam, Vxori uir imperat? sacrilegum fur arguit? Luna reuoluitur ab occidente ad orientem? Principio foemina uirque peccarunt? Cauendum est, inquit, ne decrescat oratio, & fortiori subiungatur aliquid infirmius. Imò uerò oratio saepe decrescit, & à fortiore deuenitur ad infirmius. Testatur ipse cap. de amplificatione, hoc modo, Totidem sunt ascendentibus, quot descendentibus gradus. Non is igitur certus est ordo uerborum, quem mutat imminutio, quem negociorum tempora, quem loquendi uarietas.

Iam si rerū collocatio ordine constituit partes argumen-
tationis, illius est & partes amplificationis, quæ firmā est
argumentatio, collocare. Est & eiusdem, momenta rerum,
dignitates quæ personarum, quo maximè deceant loco po-
nere. Præterea compositionem (ut idem fatetur octavi li-
bri principio) nullus nisi arte assequi potest. Hanc autem
rerum collocationem, qua dies nocti, bonum malo, molesto
carnifex præponitur, norunt imperitæ mulieres admoni-
tæ uel tempore, uel rerum dignitate, uel stomacho, qui di-
ctis grauiora querit. Quòd si res est ignotior uulgo, eam
liberalis educatio patefacit. si ne hæc quidē, certè mōstrat
scientia intelligendi: hoc est Philosophia, & artificium di-
sponendi citra compositionis artem. Dicit aliquis. At ista
sunt in uerbo. Quid tum? Compositio uerba digerit in or-
dinem, fateor: sed eius est, non res, & intellectus eorum, at
uoces sonosq; spectare. Nam & ille uerborum significa-
tiones distinxit in octauo libro, præcepta componendi tra-
didit in nono. Vides ne ut poëtæ frequēter uno uerbo per-
ficiāt exordiū? ut, O pater, nemo tamē refert ad elocutio-
nē. Sæpe argumenta uerbo designantur uno, ut, Fallit im-
probis, argumentum est, improbus. Quis istud ad com-
positionem pertinere dicit? At tute ipse de compositione
dicturus, uerborum significationes & differentias expen-
dis, quoniam pro dignitate sua capiunt in oratione lo-
cum. Ego certè materiam orationis inspicio, hoc est, na-
turas rationes quæ uerborum, sed non eis assigno in hoc
edificio certum locum. Aliud est explorare materiam
syluæ, aliud singulas arbores in edificio collocare. Aliud
est ostendere qua quæque genera tectorum materia fiant;
aliud ordinem præscribere, & quid ante eat, & quid sub-
sequatur. At interdum deligimus & arbores & lapi-

des certos, quibus utamur destinato loco. Sic est, sed illud est consilij nostri, non ullius præceptionis. Hic autem nullam relinquit mihi mutandi loci potestatem, etiam si uerbis (ut antè dixi) nulla certa sedes est in oratione, propterea quòd oratio mollis, ut cera in mille species formari potest. Pergit, Quedam, inquit, ordine permutato sunt superuacua, ut, fratres gemini. Nam si præcesserint gemini, fratres addere nō est necesse. Est hic πλεονασμὸς, si superuacuis uerbis oneratur oratio, non est uitium cōpositionis. Expositi sunt in Albula ripa gemini fratres, aptius & robustius dicitur, quàm, Expositi sunt in Albula ripa fratres gemini: quoniam pes molossus stabilior est in fine, quàm uel iambus uel anapæstus, & incitatus itur à uocali ad consonantem, hoc modo, gemini fratres, quàm à consonante in consonantem, hoc modo, fratres gemini. Quæ ratio ualeat in alijs sedibus orationis. Quamobrem si dices fratres geminos, compositio cedit interpretationi, quæ natura subsequitur. Cur ergo refert ad compositionem id quod sæpe perturbat eam? Quoniam compositioni multa cedunt, Lilius dixit geminos fratres initio libri primi, nec est ueritus admittere quod hic iniuria damnat. Forte & Numitori, quum in custodia Remum haberet, audissetq; genuinos esse fratres, comparādo eorum ætatem, & ipsam minime seruilem indolem, tetigerat animum memoria nepotum. Idem, Forte in duobus tum exercitiis erant tergemini fratres, nec ætate nec uiribus dispares. Cicero in oratione pro Archia poëta hoc scriptum reliquit, Saxa atque solitudines uoci respondent, bestię sæpe immanes cantu flectuntur atque consistunt. De quo sic Quintilianus in nono, Magis id insurgebat si uerteretur. Nam etsi plus est saxa quàm bestias commoueri, inest tamen compositio

positioni decor. Hæc ille. Si propter compositionis de-
 corem Cicero postposuit infirmius, quomodo compo-
 sitio exigit ut anteponatur? An eadem ratio idem & an-
 teponi & posthaberi iubet? Laudat idem Fabius Cice-
 ronem hanc orationem in Antonium: Vt tibi necesse esset
 in conspectu populi Romani uomere postridie. quia ad-
 uerbum postridie in clausula positum, assignatur audito-
 ri & infigitur. Quod quid faciat ad rem præsentem, non
 uideo. Creticus in fine pes est laudabilis, ut hic postridie.
 Nullus est in hoc toto contextu præstantior. Quid igitur
 aliud collocasset orator? An ita dixisset, Vt tibi necesse es-
 set postridie in conspectu populi Romani uomere? Pes est
 instabilis uomere. An turpius est uomere postridie, quàm in
 conspectu populi Romani? Nequaquam. Sed, ut dixi, nul-
 lum erat in hac oratione uerbum quod in ea sede positum
 tam pulchrè sederet. Illud est igitur numeri, non eius ordi-
 nis de quo disputatio constituta est. Quare ne mirere si
 Marcus Tullius in componendi partibus non habuit ordi-
 nem istum, qui neque perpetuus est, neq; tam uerba quàm
 res instruit. Hæc a me scripta sunt, non ut arguerè Quin-
 tilianum, uirum perdoctum, & mihi perutilem, sed ut osten-
 derem causam nullam fuisse cur hic aut temporis, aut digni-
 tatis, aut incrementi, aut interpretationis ordinem perse-
 querer, quem esse rerum, non uerborum, Cicero in Parti-
 tionibus, uerbis agens de exornandi collocatione, signifi-
 cat. Sed iam de componendi partibus agamus. Quòd si
 quis ordo uerborum est, illum constituit aut coagmenta-
 tio, aut concinnitas, aut numerus, aut hæc uniuersa. Pro-
 pter hæc enim uoces de loco naturali trañciuntur in aliud,
 quo sedeant aptissimè. Itaque si totius est compositionis
 ordo, aut si omnis hæc compositio nihil aliud est quàm

ordo quidam ratione distributus, fieri non potest ut ordo sit pars compositionis.

De uocalium concursione in coagmentatione.

CAP. III.

IN omni coagmentatione uerborum necesse est aut uocales concurrere, ut Rem anxie adipisci, atque adepti egere, auari animi est. Aut consonantes, ut, Consulum dignitas tumultum ciuitatis repressit. Aut uocalem & consonantem, ut, Ex eius ore melle dulcior effluebat oratio. Sæpius hæc in oratione miscentur: ut, Venio nunc ad istius, quem admodum ipse appellat, studium: ut amici eius, morbum & insaniam: ut Siculi, latrocinium: ego quo nomine appellæ, nescio. Rem uobis proponam, uos eam suo nominis pondere respicite. Pauca de singulis horum, & principio de uocalium concursione dicemus. Vocalium concursum magna ex parte fugiendum censuit Isocrates ille suauitatis numeriq; mollioris inuictor, cuius orationes melle dulciores ostendunt quantopere uitarit illum quem dicimus hiatum literarum. Hunc optimum dicendi magistrum Theopompus imitatus, eas literas adeo fugit, ut eam ob rem inciderit in hominum reprehensionem. Fuerunt in eadē sententia poetæ maxime Latini, qui ne hiare cogerentur, uocum synæpham collisionemq; reppererunt, ut
— Mult' ill' et terris iactatus & alto.

Albaniq; patres, atqu' altæ mœnia Romæ.
Hæc autem collisio facit, ut una litera pro duabus audiat, ut ill' et, atqu' altæ, Erg' agite. Qui scribimus aut profrimus aliter, meo iudicio peccamus. Segregamus enim id quod, ut hiatu fugerent, misceuerunt optimi poetæ. Nec animaduertimus oratores Græcos aliquando misce-

re uoc

re uoces, & in unum confundere, ne quid ab agresti sono
 locetur auris, ut hic Demosthenem, τοῦ βελτίστου λέγει τὴν δι-
 καιοτάτην πάνθ' ἔνεκα ἔγκτασμένην, πάνθ' ἔνεκα dixit quasi unum
 uerbū, nō πάντα ἔνεκα separatē: ut Aristoteles, διὰ καλῶς ἀπε-
 φάνητο τ' ἀγαθὸν ὃ πάντα ἐρίεται. Infinita sunt talia apud eū-
 dem, apud Isocratem, apud optimum intelligendi dicen-
 diq; magistrum Platonem, apud alios omnes summos ui-
 ros: quibus planum fit, uocalium concursum uitari unius
 aut alterius elisione, atque duo uerba ut unum tum scribi,
 tum pronūciari. Sed indoctum quoddam genus hominum
 non modò libros & orthographiam, sed etiam pronuncia-
 tionem omnem corrumpit, adeò ut extra uersum nesciamus
 quas illi ueteres in oratione eliserint uocales, quas inte-
 gras protulerint, propterea quòd abstulerunt ἀποσπορον si-
 gnum uocalis auersæ. Sic enim Terentium scripsisse, &
 ipsum & Comædos ita pronunciaſſe puto:

Vos istæc intr' aufert' abite .

Quod absurdum fortè quibusdam ob desuetudinem uide-
 bitur, sed querentibus ueritatem neque ratio decrit,
 neque autoritas. Hiant interdum poëta, Latini rarò, Græ-
 ci frequenter, ut Homerus. Ex quo etiam licet intellige-
 re, ueteres Latinos suauitatis studiosos fuisse, quanquam
 sentiebāt quāto Latina Græcis essent insuauiora. De quo
 Cicero in Oratore, Quamuis, inquit, suaues grauesq; sen-
 tentiæ, tamen si inconditis uerbis efferuntur, offendunt au-
 res, quarum est iudicium superbiſſimum. Quod quidem
 Latina lingua sic obseruat, nemo ut tam rusticus sit, quin
 uocaleis nolit coniungere. Et paulò pòst: In oratione Pla-
 tonis est crebra ista uocū cōcursio, quam magna ex parte
 ut uitiosam fugit Demosthenes. Sed, ut diximus, hiant
 interdum poëta, Ennius semel autore Ciccone, sæpe

Terentius, sæpe Virgilius, ut hic,

Et succus pecori, et lac subducitur agnis.

Amphion Dircaus in Acteò aracyntho.

Astant Iuniperi, et castaneæ hirsutæ.

Nereidum matri, et Neptunò ægeò.

Hoc idem, inquit Cicero, sæpius nostri non tulissent, quod Græci laudare etiam solent. Cur ita non tulissent? quia uersus est exquisiti soni, et urbanæ suauitatis, cui sit inimica uastitas illa duarum quæ luctantur inter se uocalium: quæ quum accidit, hiat et interstitit, et quasi laborat oratio. Fugiamus igitur hoc uitium, si dictionem compositæ, leniter, et tranquille fluere uolumus. Vocales alias sonantiores esse, alias exiliores, exemplis atque rationibus antè patefecimus. Obscurius est in his uitium, apertius in illis. Primæ cum quarta propter soni magnitudinē fœdè hiat ac inurbanè, ut, Videtur ea esse refutanda, quæ in Senatu sæpe ab inimicis, ab improbis sæpe iactata sunt, et in cōcione etiā paulò antè ab accusatoribus. Atqui si res, si uir, si tempus ullum dignum fuit, certè hæc in illa causâ summa omnia fuerunt, præsertim quum tot essent circa hastam illâ, qui alia omnia auderent. Vastior est longarum sonitus, quoniâ uoce productiori suslinetur, ut, Cum uxore ueheretur in rheda penulatus, uulgi magno impedimēto, ac muliebri et delicato ancillarum puerorumque comitatu, Milonem occisum esse etiam ex ipso Clodio audirent. Hæc ex Cicerone sunt omnia. Plurima apud eundem huiusce rei sunt exempla. Dicit hic aliquis: Hoc si uitium esset, eloquentiæ Latine parens tam sæpe non admitteret. Primum, uocales ne istas colliserit, incertum facit usus præsens: deinde distinguenda sunt genera dicendi, et habenda ratio partium quæ tractantur ab oratore. Narrationes eius rei de qua contro-

uersa

uersa est apud Iudices, & subtiles argumentationes, & causæ tenues ac parue, et epistolæ summissioris argumenti, et definitiones, partitiones, distinctiones, facetiæ, colloquia personarum, relaxant uincula compositionis, & more sermonis paulò securius ac liberius euagantur. In his toleranda sunt alioqui uitia quæ cottidiana lingua tam frequenter usurpat, ut in oratione tenui fallant audientem. Scit orator quid deceat: & ubi rebus magis est affrenda claritas, quam magnificus ornatus, tum cottidiana ueste contentus, non circumdat illis ornamenta pompæ & apparatus feriarum solennium. At in exornatione laudis, in locis communibus, in narratione quæ spaciatur extra causam, in genere suauis, in omni splendido cultu, perrarò committendum est ut hæc parua quidem, sed tamen aliqua deformitas appareat. hoc uitium deprecatur in oratore. Sed Græci uiderint (inquit de uocalibus agens) nobis, ne si cupiamus quidem, distrahere uoces cōceditur. Indicant orationes illæ ipsæ horridulæ Catonis, indicant omnes poëtæ. Si non ubique conceditur, utamur interdum ut necessario. Si uitium est, fugiamus quoad licet. Quum uocalis eadem finis est uerbi prioris, & principium sequentis, quoniam pronuntiatur eodem oris habitu, nec plus una longa auribus percipitur, nullam parit omnino scditatē. Sexcenta Ciceronis exempla reperies, ego paucis ero contentus. Neq; enim posset aut Hala ille Seruilius, aut P. Nasica, aut a a L. Opimius, aut C. Marius, aut me consule senatus non nefarius haberi, & c. Non hominis occidendi causa habuisse telum iudicaretur. Quoties enim est illa causa à nobis acta in senatu? Vt ignorance tua ad hominis miseri salutem abuterer. Propter officiosos labores meos nonnulla apud bonos gratia. Iudicium culpa atq; dedecore etiam Censo-

rium nomen, quod asperius antea populo uideri solebat, id nunc poscitur. Subijciamus exempla de cæteris uocalibus. Negant intueri lucem fas esse ei, qui à se hominē occisum fateatur. Tu hodie egeres, nos liberi essemus. Dolebā p.c. Rempub. uestris quondam meisq; consilijs conseruatam, breui tempore esse perituram. Magnifice enim Scruuius Sulpitius maiorum continentiam diligebat. Fateor enim me, quum ea quæ acciderunt, prouiderem futura, tanta in mœstitia fuisse, quanta cæteri optimi ciues, si idem prouidissent, fuissent. Sed quī istuc tibi uenit in mentem? O dii immortales, quā multi qui quum à te nemini ignosci uellent, impedirent clementiam tuam. Vini exhalandi, non acuendi ingenij causa declamitas. Hæc tu quum per me acta meminisses, nisi illis quos uidemus gladijs cōfideres, maledictis me prouocare ausus esses? Quum te ultro mihi idem illud destrente nunquam sum dehortatus. Obsecro obtestaborq; uos Iudices. Lex esse cum telo hominibus occidendi causa uetat. Magna laus, meoq; iudicio omnium maxima. Tu unus adolescens uniuersum ordinem de salute Reipub. prohibuisti. Erat ei uiuendum latronum ritu, ut tantum haberet, quantum rapere potuisset. Hoc concurrendi genus frequenter usurpari solcre annotauit Aulus Gellius, id quod et aures et exempla doctissimorum probant. Alia Quintiliani sententia uidetur, quam complexus est his uerbis, Pesimè longæ, quæ easdē inter se literas committunt, sonabunt. Si per easdem literas intelligit duas uocales eiusdem nominis, ab illo dissentio. si uult hunc intellectum capi, Pesimè longæ uocales sonabunt, quæ committunt easdem inter se literas, id est, uocales illas de quibus agitur, iungunt, obscurus est sermo, et odiosè prolixus. Breuiter atque dilucidè, nec minus orna-

nus ornatè dici potuit: Pessimè longæ sonabūt. Nam pro=
 ximè dixerat hæc, Tum uocalium concursus, qui quum
 accidit, hiat & intersistit, & quasi laborat oratio. Ex
 quibus supplere quisque posset quæ locutus est ambiguè.
 Sic enim habet res. Vocalium concursus imperitis est no=
 tabilis. E uocalibus pessimè longæ sonabūt. A, et E, quid=
 dam rusticanum sonant, propterea colliduntur à Græcis:
 id quod priore iam libro diximus. has igitur non ita sæpe
 Cicero coniunxit. Et socijs gratissima esset eius integritas
 & fides. Ipse in eadem Africa esse uoluit, in qua erat rex
 potentissimus inimicus huic causæ. De salute populi Ro=
 mani extimescebat, in qua etiam suam inclusam esse uide=
 bat. E, & A, ut minus dissona, ita sæpius finitima sunt: ut,
 Voluntate ad ea arma profectus sum. Eorum ipsorum ad
 crudelitatem te acuet oratio. Nam si uidissem, quouis pro=
 fectus quàm isto modo à te agi maluissem. Qui opem à me
 atq; auxilium petissent. A, et I, hiulem & agrestem effi=
 ciunt uocem, ut in simplicibus, aulai, materiai, syluai, fron=
 dosai, quæ quum ueteres poëtæ frequenter usurpassent,
 posteriores ut nimium uasta repudiarunt. Committit eas
 Cicero nonnunquam, ut pro Ligario, Diligentia inimici
 inuestigatum est quod latebat. Qua in legatione & socijs
 et ciuibus se probauit. In prouincia pacatissima ita se ges=
 sit, ut ei pacè esse expediret. I, & A, sicuti suauius audiun=
 tur, ita multò sæpius conferuntur, ut, Quod nos domi pe=
 timus prostrati ad pedes. Non commemorarem, nisi à te
 cognouissem. An sperandi Ligario causa non sit, quum
 mihi apud te locus sit etiā pro altero deprecādi? O, & E,
 minus in occurſu hiant, sed tamen insuauia sunt, & ingra=
 ta: ut, Hic æquo animo esse potuit. Laudem adolescentis
 propinqui existimo etiam ad meum aliquem fructum re=
 dundare

dundare. Quid uociferabare decem milia talentum Gabi-
nio esse promissa? E, & O, concurrunt urbanus: ut, Quare
omnium rerum una reprehensio est, quod regnum intra-
rit. Itaq; obijcias licet quam uoles scire, palliatum fuisse:
Aderat uis, quæ summas frangit infirmatq; opes. O, & I,
si diphthongum faciunt, nullam in pronunciando faciunt
deformitatem, ut, *οἶκός*. at in iunctura, quum separantur, ab-
sona sunt, & maximè si uocalis O, producitur. Hinc fit ut
O longo, quod *ω μέγα* uocant, cedat iota atq; subscribatur,
ut in quarta declinatione recto casu numeri secundi *ποδῶν*
λεῖα, pro eo quod est *ποδῶν*, & in uerbis *βοῶν* pro *βοῶν*
dicitur. Minus est uitij in eadem litera breui. Fluit enim;
nec in ore cauo tandiu immurmurat. Vtrunq; reperies a-
pud M. Tullium, ut pro Rabirio Posthumo, Rapiuntur
homines in hæc iudicia ex omni nō modò inuidia, sed ser-
mone malcuolorum, nisi cauetis. Nec uerò id honestum
quisquam, sed tempori assignandum putauit. I, & O, con-
trà nihil dissonant, ut, Qui tandem conuenit, aut tam gra-
ui onere tributorum ad tantam pecuniam cogendam, mille
talentum accessionem esse factam? aut in tanta mercede ho-
minis (ut uis) auarissimi, mille talentum decessionem esse con-
cessam? Neq; ego cui omnium ciuium libertas charissima
fuiisset, meam proiecissem. A, & V, iunxerunt Latini, ut
fraus, laus, audio, supplaudo. nō in uno uerbo separauere,
nisi quum peregrina asciuerunt in Latium, cuiusmodi sunt
hæc, Archelaus, Amphiaræus, Oenomaus. Senserunt opinor
hinc effici uocem uastè patentem & inuisam. Quod si est,
& in compositione uitium committunt, ut, sylua uritur,
humida uligo, musa una, scelerata usura, & id genus alia,
quæ quisq; uir auris eruditæ sentit esse patula atque sub-
agrestia. Cōiunxit Tullius, Si uniuersa (ut dixi) prouincia
loqui

loqui posset, hac uoce uteretur. At si cōmutaueris, & v a dixeris, congregientur amucè & urbanè. Cicero in Verrem, Ipse in oppidum accedere noluit, quòd erat difficili ascensu atque arduo. Idem ferè iudicium est de uocalibus quæ primæ sunt in onere & usu. Hiant adiunctæ, quemadmodum & in simplicibus, couis, sardous, eous. Adiungit tamen Cicero, Quousq; abutère Catilina patientia nostra? Similia sunt hæc, In loco ubcri, in labello udo, colligo uuas, amputo ulmos, à tergo urgetur: ex quibus nulla soni concordia delectat aures. Postrema cum quarta non grauius offendit in collocatione, quàm in his singulis, tuo, suo, diluo, ruo, statuo. Cæteræ uoces non admodum torquent os, atq; pronūciantis instrumenta: quamobrem sæpius multo committuntur in ordine uerborū. Dico secundam cum tertia et quinta, tertiam cum quarta, contrà tertiam & quintam cum secunda, quintam cum tertia. Refer ad aurium iudicium quæ proponemus Ciceronis exempla, cognosces. Quamobrem si mihi unus est accusandus, prope modum manere in instituto meo uideor. Quærentur accusatores se idoneos nō habere. Id mihi erat aduersarium maximè. In hac causa Iudices tametsi utrunque esse arbitrator perspicuum, tamē de utroq; dicam. Hoc si tu inimicus eius factum negabis, eodem tempore in eadem prouincia tu ipse fecisti. Neminem mihi esse præponendum actorem putabit. Sentis audiendo quàm molliter confluant hæ soni tenuis et remissi literæ. Fugienda uocalium etiam tenuium multitudo, propter quam speciei, progeniei, mollitici, & eiusmodi casus odiosæ uasilitatis uix apud bonos autores reperiuntur. Breues interim placent, ut apud Ouidium,

Huc coëamus, ait—

Terentius hanc molestiam uitat elisione & contractione.

Cuius

Cuius tu fidem in pecunia perspexeris,

Verère uerba ei credere?

Nam quæ inscitia est,

Aduorsum stimulum calces?

Postridie ad anum rectà pergit.

Illos ducere eadem hæc lex iubet.

O' Phædria, incredibile est, quāto herū ate ego sapiētia.

Abi Phædria, eum require, atque adduce huc.

Verb³ α, duabus syllabis: Insciti³ est, quatuor: Postridi³ ad, totidem: ducer³ eadem, quinque: antêo, tribus: Phædr³ um, duabus exprimitur. Et quum uocalis natura longa fluit atq; corripitur in concursu, ut minus audiatur. Vergilius,

Et longum formose uale, uale, inquit, Iola.

Stipitibus duris agitur, sudibus ue præustis.

Initatus est Homerum, qui persæpe recipit hanc figuram, ut Odysseæ uersiculo primo:

ἀνέστη μοι ἐννιπὶ μοῦσ' ἀπολύτροπον.

Hinc planum sit quod suprà diximus, esse minorem in correptis offensionem, quoniam celerius & expeditius exiguntur: maiorem in longis & aspiratis, & accentu cōcitatis, ut in loco arduo, in hasta ornata, in tribunali edito, in adunco hamo, in uiridi herba. Exposita nostra de principum literarum concursione sententia, ne quis existimet esse uitium grande committere duas generis huius literas, Ciceronis & Quintiliani iudicium totidem uerbis huc transferemus. Habet, inquit Tullius, ille tanquam hiatus ē concursu uoealium molle quiddam, & quod indicet non ingrata negligentiam de re hominis magis quàm de uerbis laborantis. Audiamus alterum, Non tamen id, ut crimen ingens expauescendum est: ac nescio an negligentia in hoc, an sollicitudo sit peior. Inhibeat enim necesse est hic metus

metus impetum dicendi, & à potioribus auertat. Quare ut negligentia est hoc pati, ita humilitatis ubique perhorrescere : nimios quæ non immeritò in hac cura putant omnes Isocratem secutos, præcipue quæ Theopompum. At Demosthenes & Cicero modicè respexerunt in hanc partem. Nam & coeuntēs literæ (quæ συναλοιφὴ dicitur) etiam leniorem faciunt orationem, quàm si omnia uerba suo fine claudantur: & nonnunquam hiulca etiam decent, faciunt quæ ampliora quædam. Hactenus Fabius. Sit hæc libertas alijs ætatibus, alijs exercitationibus : ego puerum optimis assuescere bonum duco, maximè quum stylo dat operam in ocio literarum.

De coagmentatione consonantium literarum.

CAP. IIII.

POSTEA quàm de literarum principibus, quæ in concursione uoces efficiant aut suauēs, aut hiulcas, satis multa diximus, ex ordine de structura consonantium quæ aut molliter, aut asperè inter se coeant, breuiter exponendum uidetur. Ex his optimè coherent, quæ labris coeuntibus efferruntur, ut M & B, M & P, & eadē litera repetita quū finis est extremi uerbi, & principium sequentis : quibus adde M, & V, consonantē, & eam quæ prima est in furente, propterea quòd altera penè labra admouet, altera labrū dente premit. Exempla sunt apud Vergilium:

Errantes hederas passim cum baccare tellus Fundet—

—Manet alta mente repositum

Iudicium Paridis—

Omnes ut tecum meritis pro talibus annos Exigat

Nimborum in patriam loca fœta furentibus austris.

Aeoliam uenit—

Italian

Italiam fato profugus Lauinaq; uenit Littora.

Permulta reperies eiusmodi apud oratorum principem, quod genus sunt hæc: Domo est egressus non modò nulum ad bellum, sed ne ad minimam quidem suspicionem belli. Omnium Marcellorum meum pectus memoria effodit. Ne istius quidem laudis ita sum cupidus, ut alijs eam præceptam uelim. Victoriæ fortuna tuam esse totam et propriam fitetur. Quum uerbum capit initium ab ijs consonantibus quæ sine adiumento labrorum post dentium septum pronuntiatur, cuiusmodi sunt, C, D, G, L, N, Q, R, S, T, X, Z. Non acerbè quidè, sed aliquāto asperius iungitur cū priore uerbo, quod M, postremo cōcluditur. Hoc quale sit, cognosce ex his oratiōibus in quibus literæ post M, ex ordine ponuntur. Nunquam enim ad consilium casus admittitur. Amplificauit eius pristinam dignitatē. Fortuna in istius se societatem gloriæ non offert. Bellicæ tuæ laudes celebrantur omnium gentium literis atque linguis. Vereor ut hoc quod dicam, non perinde intelligi auditu possit, atq; ego ipse cogitans sentio. Quo quidem in bello semper de pace agendum audiendumque esse putauī. Neq; enim ego illa, nec ulla unquā secutus sum arma ciuilia. Nunc uenio ad grauissimam querelam, et atrocissimam suspicionem tuam. Quid ego commemorem Xenophontis illam iucunditatem in affectatam?

Quinq; tenent cælum zone.

In hac omni structura quòd M, elementum suauissimū est, parum quidem offendit asperitas, nonnulla tamen est: quod indicasse uidentur illi cōditores linguæ Latinæ, qui in simplicibus uerbis ut hanc fugerunt literam, ita quoq; N, magis familiarem collocauerunt, ut ancilla, induit, angit, Manlius, canna, unquam, ensis, antrum, anxius. Hinc suffrag

suffragante aurium iudicio cognoscitur N, ab ijs omnibus cōsonātibus in structura minus dissentire. N, ante L, quidē & R, uox insuauior est: quamobrē illino non inlino, irruo non inruo dicitur. Quū repetitur, ut in canna, siccitate quadam radit aures: sed ne sic quidē est magno pere fugienda. Quod ut intelligatur, ex Cicerone profectus remus exempla, & ordinē literarū persequemur. An non cadunt hæc in Antonium? Quid enim in eum non cadit? Reliquū est igitur crimen de ueneno. Et id quidem nemi- ni Græcorū uideo adhuc cōtigisse, ut idem utroq; in genere laboraret. Illæ uerò non loquūtur solum, uerū etiā personant. In negotio quod actum dicitur, nullum uestigium. Quia nō posset negare ab illis pecuniam datā, non quæsiuit procul aliunde. Non caussa, non locus, nō facultas, non cōsciū, non perficiendi, non occultandi maleficii spes, non ratio ulla, nō uestigium maximī facinoris reperiatur. Quāuis bonas leges uitiose per uimq; tulerit, tamē hæc leges non sunt habendæ. Iam in tanta istius impudētia remittēdum aliquid uidetur. X, & Z, quum proximē sequuntur N, sic habēt. X, durior est, Z, mollior. N, ante B, M, P, paulo durior est: propterea dicitur imbuit, non inbuit, impurus non inpurus, inmēsus non inmēsus. Sed & his aliquando præponitur. Nostri sensus ut in pace semper, sic tum etiam in bello congruebant. Spem attulit non modò salutis conseruandæ, uerū etiam dignitatis pristinae recuperandæ. An potest cognatio ulla propior esse, quā patriæ? In summa dicam, M, quinque consonantibus optimē præponitur, reliquis haud peßimē: N, uerò contrā quinque easdem non amat, reliquas omnes non grauitè odit. Quò feruntur hæc, inquires? ut de tua compositione iudicare possis, & ut amica persæpe iungas,

inimica raro. Vtraque (dico M, & N,) sed aptius secunda quàm prima connectitur L, consonanti.

—Sæuæ memorem Iunonis ob iram.

—Et quisquam numen Iunonis adoret Præterea?—

Statuuntur interdum principio uerborum, ut, in mari, & in Neptuno. Quamobrem uidendum est quibus aptius adhærescant. Ut insideant sibi, iam diximus: ut cæteris occurrant, uocibus, testimonijs agemus. Non uihil dissentiant ab his elementis, C, D, T.

Lac mihi non æstate nouum, nec frigore desit.

Nunc naues contra prædones penè inanes Cleomenes ducit. Dictitat se tantum rapuisse, ut id multis satis esse possit. Dictitat nihil esse tam sanctum, quod non uiolari pecunia possit. Videt multos equites Romanos. Pecunias non petunt, relinquunt, & negligunt. Post B, L, R, & S, paulo melius collocantur,

—Troie sub mœnibus altis.

Plaudentem nigra figit sub nube columbam.

Magno in dolore sum, v. c. uel mœrore potius. Nanque canebat Silenus, ut ipse tener mundi concreuerit orbis.

—Et pura per noctem in luce refulsit Alma parens.—

Apud exteras nationes omnium sermone percrebuit, Neque tantum me expectatio accusationis meæ commouet, quantum istius insidiæ nefariæ. Consule tuas aures, nihil horum teneri senties, nisi fortè quod L, & S, emolliunt. Quamobrem artificis est, ubi uult suauis esse, nihil eiusmodi frequens instruere. His enim structuris uti non uetamur, sed adhibere modum iubemur. B, in paucis uerbis extrema pars est, ut in his, ab, ob, sub. Nec est illi sequentium in oratione planè familiaris, nisi uni quæ prima sedet in Ioue, & in Iunone.

Ab Ioue

Ab Ioue principium Musa. —

Linus omnibus tum mutis tum uocalibus antepōnit. Nam ultro durius quiddam, ut grandius atque robustius affectat, & Vergilius interdum,

—Tyrrena ab sede profectum.

Et teneram ab radice ferens Syluam cupressum.

Aliter populo Romano doctisq; scriptoribus uisum est, qui detraxerunt hanc literam, & a, non ab, ante consonantes reliquerūt; ut, Suos necessarios à faucibus macelli corrogat. Postulat à Burrieno prætor Næuius, ut ex edicto bona possidere liceat. A quibus quum est certum auxilium petitum, ita tamē disceditur, ut idibus Septemb. P. Quintium sisti Sex. Alphenus promitteret. A Cn. Do-
labella deniq; postulat, ut sibi Quintius iudicatum solui satisfet. A me, qui neque excogitare, neque pronunciare multa possum, breuitas postulatur. Ostendam primū causam non fuisse cur à Prætorē postulares ut bona Publij Quintij possiderēs. Cur maluerunt ueteres abscedit, au-
fert, amouit, abstulit, quā abcedit, abfert, abmouit, abtuli-
lit, nisi quod B, ante consonātes durum uidebatur; at non ubiq; potuerūt eam pro uoluntate mollire, ut in his, abdit, abducit, abnuat, abruptit, quæ uerba principio dura, nunc emollita sunt usu. A præpositio consonantibus, ab autem uocalibus & I, consonanti bene præponitur. Abs penē reiectum est ad antiquata uerba & inusitata. Cicero in Oratore, Vna præpositio est abs, eaq; nunc tantū in ac-
cepti tabulis manet, nec his quidē omnium: in reliquo ser-
mone mutata est. Idem tamen in Diuinatione dixit abs te. Sunt qui dictum probent, Abs quolibet: at Cicero à quibus, non abs quibus, dicit pro Quintio. Ut autem B, subiecta consonantibus obliuiscatur, sic & eisdem appo-

sita nonnihil resistit, nisi quum succedit ei quæ princeps est in more atq; moroso. Morū bonitas, suavis est oratio. Lac bibitur, uenitur ad Bibulū, exul Brutus, Numē Bacchi, uir bonus, Tyrannus Bussyris, Redintegravit bellum, Thrax bellicosus, Subaspera est hæc & leuiter abrupta compositio, qua tamen usus est Cicero, Nec in misera uita quicquam est prædicabile aut gloriandum, nec in ea quæ nec misera sit, nec beata. Præsidij ad beatè uiuendum, in uirtute satis est. Nonne tantò miserior, quantò sibi uidetur beatior? Semper sapiens beatus est. Hæc etiā in equalem conijciuntur, quò uita non aspirat beata. Vergilius,

— Quid bella Tyro surgentia dicam?

Sunt aures delicatæ nimis, quæ lubenter audiunt set pro sed, optinet pro obtinet, & eiusmodi quædam. Litera secunda in ordine cōsonantium rarò uerbum Latinū claudit, multò rarius Græcū. Græci dicunt *u*, ante consonantem loco præpositionis *is*, nos *ac*, *lac*, *halæc*, *hic*, *hæc*, *hoc*, *istic*, *illuc*, *istuc*, *illuc*, *sic*, *nec*, & eiusmodi pauca, quæ faciliè coherent in his literis quæ primæ sunt in Cicer, & in Quintio. Sumantur in argumentū uerba singula, succedat, accedit, accitur, acquirit, acquiescit, et id genus multa, in quibus est quædam literarum familiaritas, quam in compositis inuenire licet: ut, Video adhuc constare omnia Iudices. Sustinuisset hoc crimen primum ipse ille latronū occultator & receptator locus. Omnes hanc quæstionem te prætore manifestis maleficijs, cottidianoq; sanguine demissius sperant futurā. Eadem litera C, præposita ceteris cōsonantibus, ut tenuis est atq; muta, sic etiā subobscura est: unde fit ut in compositione obscurius quoddam uitium cōmittat. Stridet aliquantulū, quod anseres indicat, & ranæ loquaces: nec in uocibus est primæ suauitatis.

Clodij

Clodij furores hoc ferro & hac dextra à ceruicib. repuli.

Haud secus ac iussi faciunt.

Hanc gloriam sustulit. De cuius laude nec hic locus est ut multa dicantur. Chrysogonus à uobis hoc postulat. Dura mihi mediusfidius fortuna Po. Romani & crudelis uidebatur, quæ tot annos illum in hanc Remp. insultare uideret, & pateretur. Lac præceperit æstus. Video hunc nullius rei mutasse cōsiliū. Quæ tot ac tales uiros impediat. Dum hic uiueret, locū relinquere noluit. In his est aliquid occulti discriminis. Nam mollius excipitur à quibusdam, ut ab S, et T. sed in re tam parua nolumus immorari. Apponitur hæc litera, sequiturq; multo frequētius, propter ea quòd plura uerba ducunt ab ea principium, in eandē finiuntur pauciora. In hoc ordine coire propius & annecti mihi uidetur, id quod auribus & exemplorum frequentia existimari potest. -Nec cura peculi.

Necdum illis labra admoui, sed condita seruo.

Et sol crescentes decedens duplicat umbras.

-Rapidum Crætæ uenimus Oaxem.

Ah Corydon Corydon-

-Pan curat oues.-

Verum hæc tantum alias inter caput extulit urbes.

-Frigus captabis opacum. -Herbas contundit olentes.

Nec te poeniteat calamo triuisse labellum.

Nihil est hic quod aures grauiter offendant, nihil etiam quod magnopere delectet. Itaque C, propior est uirtuti quàm uitio, maxime quum literis occurrit L, N, R, S, & T, quæ in eodem propè habitu oris efferuntur. Idem est iudiciū de Q, litera cognata. Nam C, K, Q, pro K, Græco Latini fecerunt. Ex quibus alterū non est huiusce contemplationis. Q, non claudit, sed inchoat uocem.

-Non ausim quicquam deponere tecum.

Audiat hæc tantum uel qui uenit.

—Antauit nos quoque Daphnis.

Consonantium literarum tertia molitur in C, ut accedit, acquirit. in F, ut affinis. in G, ut aggreditur. in L, ut aluit. in M, ut ammiratum, non admiratum pleriq; dixeret. in N, ut annectit. in P, ut apparet. in R, ut arripit. in S, ut assuit. in T, ut atterit. Hæc, credo, mutatio non esset, si perquam familiariter elementis illis adhæsisset. Eadem repetita nihil offendit. Quid dicam? haud dubiè. ad delubra. Sed & alijs iungitur non sine offensione:

• Huic aliud mercedis erit.

An deus immensi uenias maris. — Quid, qui
Luxuriam segetum tenera depascit in herba?

—Victum Dodona negaret.

—Duplici aptantur dentalia dorso.

Tempore non alio dicunt regionibus illis.

Quæstas ad sacra boues Iunonis.

Illa seges denum uotis respondet auari Agricole.

In quasunque uoces artes, haud tarda sequentur.

Tondent dumeta iuueni.

Vt aliquis metus adiunctus sit ad gratiam, Cicronis est in diuinatione. Si literæ quæ prostrantur eodem penè oris habitu, minus exasperant uocem, certè D, cum L, N, S, T, quæ pronunciantur ad dentes, haud multū dissentiet. Sed hic non solum ratio, uerum etiam consulitur auris: quæ si fuerit exercitata, de sonis optimè indicabit. Ne quid tamè sensus erret, obseruanda sunt quæ eloquentissimi quique uiri frequenter usurparunt. F, in uerbo Romano litera postrema non est, quamobrem in iuncturæ commissione semper apponitur: præcedit M, suauissimè, id quod iam supra diximus.

Nescia mens hominum fâti sortisq; futuræ. S, at huc: ut,
- Noctem flammis funalia vincunt.

Quinquaginta intus famulæ. T, non multo asperius.
Et torere parant flammis, & frangere saxo.

Dant famuli manibus lymphas. Ceteræ minus familiã
riter.

- Sed famam extendere factis,

Hoc uirtutis opus. - Sic fatur lachrymans -

Hi summo in fluctu pendent. -

G, nulli uerbo Latino finis est. Paulo crassius ac robustius
auditur quàm C, cui propinquum est affinitate soni, quæ
propter minus uenustatis habuit in fine. Principiũ multis
est, ut his, gaudiũ, gero, gibbus, gobio, gustus, gratia, glori-
a, glires, gloria, deglubo. Quid alijs iuncta sonet, in his
similibusq; perpẽde. Miles fuit sub Gabinio. Hoc grauitèr
tulit. Metus adiunctus ad gratiam. Consul gaudio plenus.
Pupilli curã gerit tutor. Crimen grãde commisit. Querit-
ur grauitèr C, Caesar. Obscurus genere Octavius sibi ma-
gnam peperit gloriã. Si me roges an sit hac in cõmissurã
uitium, dicã paulo apertius esse, quàm in ea quæ C, iun-
git, à qua solũ fortiore sono differt. sed ne hoc quidẽ ma-
gnopere fugiendum, nisi sic loqui turpe sit. Huius gloriæ
C. Caesar quã es paulò antè adeptus, sociũ habes neminẽ.
Fortuna in istius se societate gloriæ non offert. Omni co-
piarũ genere abundãtes. Quo studio incẽdimur nõ modò
in gestis rebus, sed etiã in fictis. Nunc uenio ad grauissi-
mam querelam, & atrocissimam suspiciõẽ tuã. Inuitus
audiui satis te diu uel naturæ uixisse, uel gloriæ. Satis, si
ita uis, naturæ fortasse: adeò etiã, si placet, gloriæ. Quum
uox initium ducit ab ea litera quæ in Iulio prima est, non
asperat sonum prioris, nisi quum uehemẽtius effertur: &

inter I, & G, nullum discrimen fit in pronunciando.

Iunonem interea compellat Iuppiter ultro.

Ad quem tum Iuno supplex his uocibus usa est.

-Et mi genus ab Ioue summo,

-Rex Iuppiter omnibus idem.*

-Non clausa tegunt iam moenia Teucros.

-Vbi hic Iuno? demissa'ue nubibus Iris?

Talibus orabat Iuno-

-Nunc sera querelis

Haud iustis assurgis.-

-Iam querit sydera opacæ

Noctis iter, iam quæ passus terraq; mariq;.

-Medias illis opponere turmas

Ne castris iungant, certa est sententia Turno.

Horridus in iaculis.-

L, in compositione interdum præcedit, interdum subsequitur, litera per se mollis & tenera, non tamen omnibus eodem modo facilis & obuia. Hoc quale *, intelliges ex his, allusit, illexit, pellexit, collustrauit, elegit. Si dixeris adlusit, inlexit, perlexit, conlustrauit, exlegit, absonum quiddam senties, quæle non est in his, albus, alnus, aluus, sulfus, algor, alpes, celsus, altus. Utamur exēplis: Nihil'ne te nocturnū præsidium palatij? nihil urbis uigiliæ? nihil timor populi? nihil consensus bonorum omnium? &c.

Nil super imperio moueor.-

-Nihil mea carmina curas.

Sol tibi signa dabit.-

Sol qui terrarum flammis opera omnia lustras.

Nil ualidæ iuuere manus.-

Hæc uolubilia. At Consul Romanus, & uigil Xerxes, aspera sunt. Succedit eadem litera.

- Num lumina flexit?
 Num lacrymas uictus dedit? -
 -Lancum libat honorem.
 -Ipse deum manifesto in lumine uidi.
 -Ac totum sub leges mitteret orbem.
 Falcibus & messæ ad lunam quærentur ahenis
 Pubentes herbæ nigri cum lacte ueneni.
 -Nec littora longè
 Fida reor fraterna Erycis.-
 Eminet, ac læua tacitis subremigat undis.
 Postera Phœbea lustrabat lampade terras.
 -Mactant lectas de more bidentes.
 -Hæret lateri letalis arundo.
 Ille dies primus læti, primusq; malorum.
 Causa fuit.-
 Scilicet is superis labor est-
 Te propter Libycæ gentes, Nomadumq; tyranni
 Odere, in fensi Tyrij-

Omnino melius antecedit, postposita minus aliquanto co-
 hæret. Sed ne sic quidem habenda est inter eas quæ per-
 sepe fugiuntur. P quum præmittitur M, suauissimæ uocis
 est. quum præferuntur cæteræ, non grauitè offendit.

Nec pluteum cedit -

Ad populum phaleras. Rapitur ad tribunal prætoris.
 Ius suum obtinere non potuit.

-Labatur pectore uultus.

Nos patriam fugimus. Sat prata biberunt.

R, insuauis est & iniucūda litera. caninam uocat Persius.
 Nunq̃ frequentabit eam qui suauitati consultum uolet. At
 qui rem duram & asperam tractabit oratione, hanc sepe
 collocabit, nō in medijs uocibus modò, sed in coagmenta-

tionē. hinc robur, hinc affectus grauis, hinc ira, hinc grauitas & indignatio, hinc bellicus furor. Sed hic sonū literarum, non usum, de quo postea futurus est sermo, quaerimus, nec omnem sonum, sed quē maximē spectet orator. Minus est horrida ante mutas, & ante I, & V, cōsonantes. Hic acerba tamen & immūtis: ut,

Vir bonus & prudens totum se explorat ad unguem.

—Ter cælo clarus ab alto Intonuit.—

Contemptor diuū Mezentius—

—Insignem palma per gramina currum,

Victoresq; ostentat equos.—

—Sumpsisse merentis Laudabor pœnas—

—Fruiturq; deorum Colloquio—

—Ingratis offer te irrise periclis.

His accensa super, iactatos æquore toto

Troas reliquias Danaūm, atq; immūtis Achillis

Arcebat longè Latio—

Tendit iter uelis.—

Nec multo grauius ante M, N, & S, exhorrescit.

—Pedibus per mutua nexis

Examen subitum ramo frondente pependit.

—Mæsupus equūm domitor, Neptunia proles,

Curuatis fertur spacijs—

Ante L, asperior est,

Proxima Circeæ raduntur littora terræ.

Durè sibi occurrit,

—Maior rerum mihi nascitur ordo.

Apposita sicut apertius auditur (tunc enim est in arsi, nō in thesi) ita quoque uidetur immanior. Ab radice.—

Hæc responsa patris Fauni—

Ergo iter ad regem indicit—

Arma uelit, poscatq; simul, rapiatq; iuuentus.

-Externusq; in regnum quæritur hæres.

In dubijs responsa petunt.

Centum lanigeras mactabat rite bidentes.

S, à fine uerbi quale est optimus, detrahebant ueteres, nisi uocalis insequeretur. Testis est in Oratore Cicero. Quinetiam, inquit, quod iam subrusticanum uidetur, olim autem politius, eorum uerborum quorum eadem erant postremæ duæ literæ, quæ sunt in optimus, postremam litteram detrahebant, nisi uocalis insequeretur. Ita non erat ea offensio in uersibus, quam nunc fugiunt poëtæ noui. ita enim loquebantur, Qui est omnibus princeps, & uita illa dignum, locoq; non dignus. Non comprobatur hanc loquendi consuetudinem, quæ subrusticana iam uidebatur, sed ostendit ueteres illos suauitatis artifices fuisse, & interdum huius offensionem literæ uitasse. Non offendit quum T. subsequitur, cui proximè cohæret: ut, In manibus tabulas habebamus. Cæteris quoque uocibus committitur, ut, Cedo cui Siculo, quum is reus fieret, ciuis Romanus cognitor factus unquam sit? Non immorabor in exemplis, quæ sunt propè infinita. S, nihil habet durum in coagmētatione. Quod si uideor aliter iudicare quum mētionem de cæteris consonantibus facio, ne quis instet molestus. Hoc dico, in se nihil habet, asperum in coagmentatione. Si quid asperitatis est, in hac litera non est. Ne tamen in eadem parte crebra sit, ac nimium multa. Sibilat enim, ac quasi flatus euanesceat. T, quàm D, tenuis magis est, propterea per se ipsa minus offendit. Exemplum subijcerem, si non esset in manibus illorum copia. V, consonans non dissilit in iunctura, nisi asperior illi committitur: ut,

-Volitans sub uerbere turbo.

-Diuosq;

-Diuosq; in uota uocauit.

-Rutulosq; exercent uomere colles.

Per uarios sternit casus.—

Hac uos & Pallanta ducem patria alta reposcit.

Accepit uenientem—

X, asperæ concursus est: ut, Plus uoluptatis ex recordatione illius orationis, quam non modò ex mea, sed ex cuiusquam oratione capere possitis. Vt pia & aeterna pax sit. Audax præcipuè fuisse uidetur in conuocandis hominibus & armandis. Hoc aiunt constitutum esse cum seruis, ut ad balneas Xenias uenirent.

At rex sollicitus monstris oracula Fauni

Fatidici genitoris adit—

-Ex alto uox reddita luco est.

Quinetiam ueterum effigies ex ordine auorum.

Antiqua ex cedro—

Ad nos uix tenuis famæ perlabitur aura.

Ob hanc asperitatem præpositio ex, in e, molliitur: ut,

Ipsa Iouis rapidum iaculata è nubibus ignem.

Z, suauissima mihi uidetur.

-Nec zephyros audis spirare secundos. -Vela secūdi

Intēdūt zephyri— Et zephyro putris se gleba resoluit.

In componendo fugienda literæ eiusdem crebra repetitio. Hoc fit interdum quum plura uerba continua ab eadem litera ducunt initium, ut,

-Cauum conuersa cuspide montem Impulit—

Terras turbine perflant. -Sedeant spectētq; Latini.

-Laxis laterum compagibus omnes

Accipiunt inimicum imbrem—

-Inq; sinus scindit sese unda reductos.

-Illic fas regna resurgere Troiæ.

-Veniet

—Veniet lustris labentibus ætas.

Vidistis hominem sine re, sine fide, sine spe, sine sedc, sine fortunis. Ciceronis est hoc pro Cælio, in quo mora quædam & interspiratio uitiosam minus efficit compositionem. uerba sunt eiusdem; Eo maleficio tamen erant implicati, ut ex nullius legis laqueis emittendi uiderentur. Itaq; hæc causa ad testes tota traducta est. Si manebat tanta illa cōsuetudo Cælij cum Clodia, quid suspitionis esset &c. In qua lustra, libidines, luxuries, omnia denique inaudita uitia atq; flagitia uersentur. Sacrosanctum nihil potest esse, nisi quod per populum plebem ue sancitum est. Virtus digna summo imperatore, spes pro periculis præmiorum. Cuius tres triumphi testes essent, totum orbem terrarum nostro Imperio teneri. Hæc apud summos oratores, qui minimis rebus occupati uideri nolunt, haberi uitia non debent. Nec sunt omnino cuiquam, sed magna ex parte fugienda. Nam docti uiri fugiunt, ut Vergilius,

—Spumas salis ære ruebant.

Aequora tuta silent—

Noluit hoc modo, Spumas maris, Aequora tuta tacent. Non placet aspiratio repetita. Quid enim abest huic homini? Quædam literæ minore cum offensione repetuntur, ut F, M, V, consonans.

—Loca fœta furentibus austris.

Velum aduersa ferit, fluctusq; ad sydera tollit.

Contra populi Ro. religionem & fidem fecisse dicitur. Vtrum enim scientem uultis contra fœdera fecisse, an inscientem?

Hoc metuens, molemq; & montes insuper altos

Imposuit—

—Vasto cum murmure montis.

Ingentiq; manu malum de naue Serefti Erigit—

Incute

Incute uim uentis—

Deformes & literæ quæ non eadem, sed propè sunt eadem.

Eliquat, & tenero supplantat uerba palato.

Vna & eadem litera sæpius inserta, simile uitium cõmittit: ut, Ego quantum ei debeam, alio loco ostendam. Lux deniq; alia est solis, & lychnorum. Ad mulieris libidines & delicias deposcitur.

—Manent innota tuorum

—Fata tibi.—

Quæ te tam lata tulerunt

Sæcula—

Sed quid opus teneras mordaci radere uero Auriculas? Quum uerbum capit initium ab ijs literis quæ prioris erant ultimæ, aut ultimis finitimæ, conficitur ingrata uox, & auribus iniucunda, cuius generis hæc sunt: Nonnulli literati, ac studijs doctrinisq; dediti, quasi quiddam incredibile dicere putabantur. —Da sternere corpus

Loricamq; manu ualida lacerare reuulsam.

—Italiam leti Latiumq; petamus.

Sibila lambebant linguis.—

Humani nihil à me alienum puto.

Quippe ferant rapidi secum, uerrantq; per auras.

Eadem penè deformitas est in ijs syllabis, quæ penè sunt similes, cuiusmodi sunt:

—His unda dehiscens, Terram inter fluctus aperit.—

Nulla mora in Turno, nihil est quòd dicta retractent

Ignauæ Aeneadæ.—

Vos imploro maria, portus, insula, littora.

Est enim huius seculi labes quædam et macula, uirtuti inuidere. Ad populum latum, ut is Publicius si domum reuertisset, & inde Romam redisset, ne minus ciuis esset.

Teterrimam mortem obiret. Fugies hæc uoce mutata, ut,

Impulerat

Impulerat ferro Argolicas scdare latebras.

Vergilius melius scdare quàm lacerare dixit. In hoc genere maximè uitandum καὶ σκοπὸν illud, cuius est obscœnus intellectus. Est apud Vergilium,

—Iuuat ire, & Dorica castra, Desertosq; uidere locos.—

Treis adeo incertos cæca caligine soles

Erramus pelago.—

Corpora fundit humi, & numerum cū nauibus æquat. Syllabas Ca & ca, Cum & na, iungito, efficies alterum uerbum sordidum, alterum obscœnum. illud enim ad alui proluuiem, hoc ad pudenda referetur. Quamobrem ueteres dixere nobiscum. si enim præpositionem anteposuis-
sent, literæ concurrissent obscœnius. Peccant igitur hæc commissiones, In arcu lethifero, me iecur alit, Gallicum nomen, mare Libycum nusquam quietum. Fugiendum cum necesse est. Huiusmodi uitia Cicero uitat interpositione uerbi, ut in his, Cum isto Næuio familiariter uiuit. Ut cum ipsi nihil alteri scientes incōmodarint, nihil ipsis iure incommodi cadere possit. Cum hoc nouæ litis genus intenderet. Cum absentis nomen reciperetur. Cum te nos non opinione dubia, sed tuis uestigijs persequamur. Cum is non solum Capuam uenisset. Sed & Idem magnus orator non semper hoc fugit. Indicat hæc oratio ex decimaquarta Philippica: Itaque cum supplicationes iustissimas ex his literis quæ recitatæ sunt, decernere debeamus, Seruilius quæ decreuerit, augebo omnino numerum dierum, præsertim cum non uni sed tribus ducibus sint decernendæ. Idem admisit tertio de Oratore: Iis qui hæc quæ nos nunc quarimus, tractarent, agerent, docerent, cum nos uine appellarentur uno, quod omnis rerum optimarum cognitio, atque in ijs exercitatio, philosophia nominaretur,

naretur, hoc commune nomen cripuit. His addendum uideatur quod Quintilianus annotauit: Videndum, inquit, ne syllabæ uerbi prioris ultimæ, sint primæ sequentis. Id ne quis præcipi miretur, Cicroni in epistolis excidit, Res mihi inuise uise sunt Brute. & in carmine,

O fortunatam natam me consule Romam.

Hactenus Fabius. Legem equidem probo, sed non possum mihi persuadere uitium tam apertum excidisse Cicroni. Auris eius maximè crudita, uiriq; iudicium, sensus item acutissimus, & exercitatio diuturna, necnon scripta ab eo felicissimè, efficiunt ut hæc ultrò luisse, nō temerè fuisse credam. Aliud est eū ex industria sic loqui, aliud imprudētem effundere. Excidūt ea quæ labuntur imprudenti. Nec assentior illis qui quū hunc audire uersiculū, extēplo inuitis Musis eum fecisse uersus existimāt. Ignorant quā multos feliciter expresserit, ex quibus cōiecturā capere licet, nō illi uenam, sed tempus & uoluntatem defuisse. Inuise & uise, fortunatam & natā, in eisdē propè literis habent antitheton, atq; dissimilitudinē quandam nō ingratam examinātibus pondera uerborum, in qua lusit acutus uir, ut in gracili filo orationis. Idem Quintilianus ad iuncturam monosyllaba refert quasi ad coagmentationē, quæ tam parua quā magna iungit, nō ad uerborum delectū pertineant. Eodē refert longa breuiq; uerba, quæ esse numeri, nō iuncturæ, sciunt omnes Rhythmi. Adiungit similiter cadentia, similiter desinētia, & eodē modo declinata, quæ schemata sunt interdum, & uerborum figura. In his luminibus orationis aliquādo est numerus sponte fluens, & quædam uenustas. Quamobrē si crebriores erunt, non qualitate, sed quantitatē peccabunt: nec erit illud commissuræ uitium, sed quantitatis. Hoc potius annotandum, iuncturas

iuncturas asperas esse quibus innectuntur multæ consonantes, cuiusmodi sunt istæ, *dolēs regina, post meridiem, hyems frigida, pons fractus, ingēs stridor, urbs præclara.* In his efferēdis spiritus elaborat. oblectantur enim ac resistunt, nec expediri se sinunt implicatæ. Ea de causa ueteres dixere po' meridiem, & pomeridianas quadrigas. Si quod uitium admittet cōpositio, minus erit in his quæ interspiratione diducuntur, quàm quæ uno eodemq; conatu proferuntur. Nam mora & interuallum impedimēto est quo minus res alioqui uitiosa audiatur.

De coagmentatione uocalium & consonantium.

CAP. V.

IN compositione iuncturarū sæpe uocalis adiungitur consonanti, aut contrā uocali consonans. Tumq; ferè uerba de uerbis apte cadunt, & in æquabili commissura non admittunt hiatum. Vt enim lapides quadrati facillimè connectuntur, sic & eiusmodi literæ proximè cohærent. Vtq; læue corpus & politum sine offensione transmittit unguis, sic & illa coagmentatio pronunciantis impetum sinit excurrere celeriter, & ad exitum ferri: ut,
—Tuus ò regina quid optes,

Explorare labor, mihi iussa capeffere fas est.

Parce metu Cytherea, manent immota tuorum

Fata tibi.— Pauca mihi uidentur esse de prouinciæ dignitate, uetustate, utilitate dicēda. Populo Romano iucunda suburbanitas est huiusce prouinciæ. Excipitur M, à cōsonantibus, quæ præposita uocali non aliter absumitur in carmine, atq; uocalis obuia uocali. Id fit à poëtis propter hiatum & offensionē quam parit hæc litera, ut hic,
Monstrum horrendum informe—

l

Sic

Sic pronuncietur, Monstr' horrend' informe. Sed & sic quoq; multum laborat oratio. In oratione non eximitur, sed obscuratur, autore Quintiliano. M, litera, inquit, quoties ultima est, uocalem uerbi sequentis ita cōtingit, ut in eam transire possit: etiam si scribitur, tamen parum exprimitur, ut, Multum ille.

&, Quantum erat. adeò ut penè cuiusdam nouæ literæ sonum reddat. Neque enim eximitur, sed obscuratur, & tantum aliqua inter duas uocales uelut nota est, ne ipsæ coëant. Vt nunc est pronuntiatio, & scribitur, & exprimitur, quemadmodum uocales omnes, quas elisisse ueteres antea diximus: & abusus ille frequens effecit, ut uitium minus audiamus. Nec quid hic agas, certum est. Sic enim pronunciare, durum uidetur, & durius ab omnium more desciscere. Veteres elidebant M, in oratione. Nam teste Quintiliano Cato scripsit, die' hanc, & M, in E, molliuit. unde confirmari potest illud dictum nostrum de collisione uocū, sic Latinos ut Græcos usos esse apostropho. An Cicero pronunciarit M, alijs pronuntiandum relinquo: certè frequenter antepōnit eam uocali, & in eadem sententia, ut in hac: Reperiemus, si istum ad aliud iudicium perducere potuerimus, quibus probemus istum in quæstura pecuniam publicam Cn. Carboni Conf. datam auertisse, quibus suadeamus istum alieno nomine à quæstoribus urbanis, quod priore actione didicistis, pecuniam abstulisse. Vastè sonat ante A, literam apertio-rem, maximè quum uocum repetitio est, ut, Gn. Pompeij memoriam amisimus. Quod si dixeris, Gn. Pompeij memori' amisimus, nihil offendet, & hoc modo Ciceronem egisse credibile est. A, profertur ab arteria, O, ab ore cauo: itaque ab extremis labris, quibus M, enunciatur, plurimum distant

distant. Ex eo fit, ut cum duabus I, & V, parum distantibus minus pugnet in occurfu, cum reliquis immanius.

Quæ figuræ coagmentationi
subseruiant.

CAP. VI.

E Figuris, quarum multus est numerus, quædam non aliò uidentur admitti, nisi ut aptius in oratione uerba componantur. Quod genus, quoniam uerbum collocat eo quo maxime decet loco, etiamsi temporum non numeratur quantitas, ad commissuram partium referendum esse puto. Talis est anastrophe, quæ nulla necessitate commutat ordinem. Ea frequentius utuntur poëtæ, ut Vergilius,

Urbs antiqua fuit, Tyrij tenuere coloni,
Carthago, Italiam contra. —

Fac sic, Carthago, contra Italiam: stabit ratio uersus, sed compositionis ille decor exciderit.

Progeniem sedenim Troiano à sanguine duci

Audierat. — — Maria omnia circum.

— Magno cum murmure montis.

Vnius ob noxam. —

Quos inter medius uenit furor. —

Transra per & remos. —

In oratione dicitur, Quocum, quicum, magna ex parte.

Cicero pro Deiotaro, Quocum erat non hospitio solum, uerumetiam familiaritate coniunctus. Fit hoc etiam, ne duo uerba in eandem literam cadentia iungantur, ut

— Magno in populo. —

Muli illam magno è Latio totaq; petebant

Aufonia. —

Eò nonnunquam spectat Apocope, ut,

l 2

Immitis

—Immitis Achilli. —Duri miles Vlyſſi.

Immuta ſic, Immitis Achillis, Duri miles Vlyſſis, peccabit ὁμοίωνων, id eſt multorum caſus idem. Bene igitur dixit Vergilius,

—Tumidumq; ſub axe tonanti

Sternitur æquor aquis.—

Pecius erat, axe tonante. Ad huius uitij fugam nonnunquam utimur diphthongo græca, quæ ſit ex *ε* & *ι*, ut,

Cogunt me Neptune preces deſcendere in omneis.

Sed & hæ literæ minus agreſtes ſunt in quibuſdam: quod A. Gellius teſtatur. Quamobrem Virgilius dixit,

—Treis littore ceruos Proſpicit erranteis. —

Deſpiciens mare ueliuolum, terrasq; iacenteis.

Atque illum taleis iactantem pectore curas.

—Tristeisq; ruinas

Solabar —

Ruſticè dixiſſet, tres ceruos errantes, & terras iacentes: quanquam plerique propter abuſum tendi conſuetudinem hæc quoque dulcia uidètur. Id non ſit in omnibus generis eiufdem, ut,

Aſpice bis ſenos letantes agmine cygnos.

hic conſulendæ ſunt aures, quemadmodum ubi continua multa eodem ſine clauduntur. Nec enim ſemper offendunt audientem, ut hæc,

Aeternis regis imperijs —

Cui mater media ſeſe obtulit obuia ſylua.

Itaque Pharſalico prælio factò à Pompeio diſceſſit. Mutantur aliquando caſus ut aptius ſedeant, ut,

Huc delecta uirum ſortiti corpora furtim

Includunt cæco lateri. —

—Quorum melior ſententia menti.

—Da flamman euadere claſſi.

-Et classe subegit

Amissa, socios ignotæ linquere terræ. Inuenustior
fuiſſet ultimus nominum casus, Cæco latere, mente, classe,
ignota terra. Et genus aliud alio gratius est, ut,

Scinditur incertum studia in contraria uulguſ.
Vulguſ incertus dici quidem potuit, sed odiosius. Nec
semper in eodem numero placet eadem uenustas.

-Securus amorum Germanæ,-

pulchrius est, quàm, securus amoris germanæ. Ad hæc,
quædā affinitas est literarū, & quasi neceſſitudo, quā sen-
tiunt aures, os exprimere uerbis non potest. Celsa sedet
Æolus arce. Cur celsa potius quàm alta? Verrantq; per
auras, noluit hoc, spargant. Bis septem præstanti corpore
nympha: nō usus est hoc epitheto, formoso. Incubere ma-
ri, non salo. Alibi spumas salis, non maris. Submersasq; ob-
rue puppes: obrue naues, deterius fuiſſet. Subducite na-
ues, decentius quàm subducite puppes. hæc & similia si
reſeres ad animi contemplationē, diu suspensus hæſitabis:
si ad aurē, continuo ſenties quæ probare maximè debeas.

De concinnitate numerosa, &
ſimiliter deſinen-
tibus.

CAP. VII.

DE tribus commiſſuræ partibus ea diximus, unde cæ-
tera generis eius haud magno negotio colligi poſ-
ſint. Huic autem diligenter incumbendum est, propterea
quòd optimè iuncta coagmentatione, etiam si nihil aliud
de industria factum est, tamen oratio uidetur eſſe nume-
roſa. Illam si neglexeris, concinnitate & numero nequa-
quam perficies ut ornata uenustaq; ſit oratio. Sed quòd
& hæc expoliunt elocutionem, & ordo rerum fecit ut

eò tandem ueniremus, de concinnitate pauca dicamus.
 Quid sit apta cōcinnitas, antea descripsimus, & de sen-
 tentia Ciceronis partes eius quatuor fecimus, similiter
 desinentia, similiter cadentia, paria paribus relata, & cō-
 traria. Verba quæ literis eisdem conclusa ponuntur in
 clausulis orationum proximarū, à Græcis *δμοιοτέλευτα*, à
 nostris similiter desinentia uel finiētia dicuntur, ut hæc,
 Bellum in Africa maximum confecit, uictorem exerci-
 tum deportauit. Ille deos deorum spolijs ornare noluit,
 hic ornamenta Mineruæ uirginis in meretriciam domū
 transtulit. Ergo & mihi meæ pristinæ uitæ consuetudi-
 nem C. Cæsar interclusam aperuisti, & his omnibus ad
 bene de omni Repub. sperandum quasi signum aliquod
 dedisti. Verum animum uincere, iracundiam cohibere, ui-
 ctoriam temperare, aduersarium nobilitate, ingenio, uir-
 tute præstantem, non modò extollere iacentem, sed etiam
 amplificare eius pristinam dignitatem, hæc qui faciat, nō
 ego eum summis uiris comparo, sed simillimum deo iudi-
 co. Nemo tum nouitati inuidebat. nemo uirtutem non
 honorabat. Is enim profectò mortem attulit, qui caussa
 mortis fuit. Magnificè Seruius Sulpitius maiorum conti-
 nentiam diligebat, huius seculi insolentiam uituperabat.
 Nam & hoc in ordine, integra re, multa de pace dixi, &
 in ipso bello etiam cum capitis mei periculo sensi. Quid
 hic uictor nō audebit, qui nullam adeptus uictoriam, tan-
 ta scelera post Cæsaris interitum fecerit? refertam eius do-
 mum exhauserit? hortos compilarit? ad se omnia ex his
 ornamenta transtulerit? cædis & incendiorum causam
 quæsierit ex funere? duobus aut tribus Senatusconsultis
 è Repub. bene factis, reliquas res ad lucrū prædamq; re-
 uocarit? uendiderit? immunitate ciuitates liberauerit? pro-
 uincias

uincias uniuersas ex imperij populi Romani iure sustu-
 lerit? exules reduxerit? falsas leges C. Cæsaris nomine, &
 falsa decreta in æs incidenda, & in Capitolio figēda cu-
 rauerit? earumq; rerum omnium domesticum mercatum
 instituerit? Populo Romano leges imposuerit? armis &
 præsidij populum Romanū, & magistratus foro exclu-
 serit? Senatū stipaucerit armatis? armatos in cella Cōcor-
 die quū senatum haberet, incluserit? ad legiones Brun-
 dusium concurrerit? ex his optimè sentientes Centurio-
 nes iugulauerit? cum exercitu Romam sit ad interitū no-
 strū, et ad dispersionē urbis uenire conatus? Multa propo-
 suimus exēpla, ut planū inde fieret, in alijs esse breuiora
 mēbra, in alijs productiora, in alijs pauciora, in alijs plu-
 ra, in alijs paria, in alijs imparia, in alijs quæsitam esse ue-
 nustatem, in alijs propè naturalem. Incidunt hæc in cala-
 mum, nobis que nolentibus ita se offerunt, ut maior in su-
 giendo sit cautio, quàm in persequēdo labor. Natura (ut
 mihi uidetur) suadet uoluptates honestas, & quantum po-
 test, uocibus atq; uaria iucunditate respergit orationem.
 Artis est, quod accidit; aut probare, aut improbare, &
 quod deest, adijcere: quod superest, eliminare. Dicet aliquis,
 Quid hoc ad numerum? Hæc cōcinnitas & conformatio
 in paucis est uerbis eodem pacto finientibus, numerus au-
 tē insertus est omnibus partibus orationis. Confitendum
 est hanc concinnitatem, & eum numerum qui est ex tem-
 porum spacijs, plurimum differre. Nec dicimus has figu-
 ras esse numeros, sed esse numerosas, quoniam illas spon-
 te numerus consequitur. Id notius erit exemplo familia-
 ri. Videmus eos qui rhythmos Gallicos scriptitant, fere to-
 tos esse in similiter cadētibus uel desinentibus (quod mi-
 hi iciunū & miserum est, in eadem semper uersari figu-
 ra)

ra) assequi tamen concinnitatum beneficio, ut & oratores & poëta à plerisq; dicantur. Poëtas imitantur certo quodam syllabarum numero, Oratores aliquo quasi rhythmo, ex quo *ῥυθμίσαι* creduntur à uulgo. Quid habent oratorium, nisi hunc forte rhythmum? & quid habent numerosum, nisi eodem modo finitum? Oratores obseruant pedes, non autem, ut illi, certum numerum syllabarum. Itaque si uidentur aptiores una aut altera concinnitate, idem accedat & Latinae orationi necesse est, non quia numerantur in ea pedes, sed quòd illa cum uoluptate quadam concluditur. Aures enim iucundum & suauem quærunt exitum, qui quum optatus aduenit, oblectantur, & in eo conquiescunt. Ad hæc, non omnia quorum similis est exitus, esse numerosa uerū est, sed ea maximè quæ uel pari, uel penè pari longitudine porriguntur. Est in numero cursus & comprehensio quæ pedibus fertur ad finem. hæc eò est in eodem modo finitis, quòd ut optimè respondeant, in eadem propè mensuram concludi solent. Quum primus ambitus ad metam ductus erit, paulumq; substiterit, unà cum eo sensus aurium quiescet: quū secundus eodem penè curriculo circumductus aut aliter pedem fixerit, & currendi æquabilitatem, & finiendi similitudinem comparando, non modò quiescet; sed etiam uoluptate reficietur. Quamobrem illud totum esse numerosum & arte modulatum uidebitur: ut, Accusant ij qui in fortunas huius inuaserūt: causam dicit is, cui præter calamitatem nihil reliquerunt. Hic non est opus, ut sit par numerus syllabarum, sed ut ad æqualem, aut ad propè æqualem magnitudinem extendantur sententiæ. Quòd si ambitus alter altero longior est, siue antecedit, siue subsequitur, numerosum quiddam & hoc pacto conficit,

conficit, ut dimetri uersus annexi trimetris aut hexametris. nec enim displicet opposita uarietas, nec est ingrata finium consonantia. Qui diligebāt hunc, illi fauebāt: qui admirabantur hunc, illū probabant: qui deniq; huius nomen audierant, illum eruditū & perfectum existimabant. Hæc oratio paulo iucundior est, quod tertia pars prioribus est aliquanto productior. Hinc ostendi potest partiū æqualitatem conuenire numerofo, & earum inæqualitatē eidē non ubiq; disſentire. Numerosum dico, nō quicquid numeris constat, sed quod elocutionis aliqua uoluptate gratū, refertur ad modulationem. Porro similiter definiēs modulatur extrema in quibus numerus ille dominatur. Et quoniam media medijs, extremis extrema accommodata iucundius efferuntur, intermedia sic componit, ut sponte numerus confluere uideatur. Hoc itaque schema cursu temperatum, aptè conclusum, nō numerus quidem, numerosum tamen est, & in orandi uoluptatibus & delicijs habēdum. Sed eo tanto parcius utemur, quanto pulchrius est atque iucundius. Nec iucunditati semper est locus, nec suaue quod nimium, nec iucundum quod tædio coniunctum, nec pulchrum quod diligentia fucatum, nec probandum quod nimio labore infinitum affectat ornamentum. Quatenus illud continuare liceat, cum ex historicis, tum ex Cicrone scire possis, cuius est illud exemplū *ἡμοιοτελεσθῆναι* frequens, quod paulo antè conscripsimus. Quum sponte casus iidem in ordine consecutionis occurrant, ut sine uitiosa traiectione aliò reijci nequeant, sex aut octo membra, nōnunquam plura, eodem fine claudere, turpe non est: ut, Rogat oratq; te Chrysogone, si nihil de patris fortunis ampliſſimis in suam rem conuertit, si nulla in re te fraudauit, si tibi optima fide sua omnia

conceſſit

concessit, annumerauit, appendit, si uestitum quo ipse tetus erat, annulumq; dedit, ut sibi per te liceat innocentibus amicorum opibus uitam in egestate degere. Nihil erat cur hæc traiceret, quum sponte fluere, non quaererentur affectatè. Parciora sint quæ studio componendi quaesieris. Naturæ uenustates minus animum satiant.

Vt sit oratio numerosa ex similitert cadentibus.

CAP. VIII.

Similiter cadens schema fit, quum in eadem constructione uerborum duo aut plura sunt uerba, quæ similiter iisdem casibus efferruntur. Sic definit is qui rhetorica ad Herennium scribit, & ea ponit exempla, quibus indicari uidetur, similiter cadens, id est $\delta\muοιόη\omega\tau\omicron\varsigma$, esse in casibus qui similes exitus habent, non in ijs partibus orationis quæ neq; declinantur, neque coniugantur. Nam differentiæ causa, similiter desinētia extēdit ad oīa uerba quorū similes exitus sunt, siue casibus inflectūtur, siue manent inflexa. Sed & hæc aliter differunt. $\delta\muοιό\tau\epsilon\lambda\omicron\upsilon\tau\omicron\varsigma$ est in extrema parte duarū plurium uel sētētiarū: $\delta\muοιό\eta\omega\tau\omicron\varsigma$ aut in principijs, aut in medijs collocatur: sitq; præsertim quādo casus uelut ex aduerso sibi respondent: & reddita suo loco, orationi gratiā præstant. Si quantū in agro locisq; desertis audacia potest, tātū in foro atque in iudicijs impudentia ualeret, nō minus in causa cederet A. Cecinna Sexti Ebutij impudētia, quā tū in ui faciēda cessit audaciæ. Similiter cadūt agro, & foro: locis desertis, et iudicijs: audacia, & impudētia: causa, & ui faciēda. Paulō post: Quasi uerò non eo libētius tum audaciæ cesserimus, quo nunc impudētiæ facilius obsisteremus. $\delta\muοιό\eta\omega\tau\omicron\varsigma$ est audaciæ & impudētiæ, $\delta\muοιό\tau\epsilon\lambda\omicron\upsilon\tau\omicron\varsigma$ cesserimus & obsisteremus.

stremus. Nō minus laborat A. Cecinna ne summo iure egisse, quā ne certū ius nō obtinuisse uideatur. Refer illū casum egisse, ad hunc obtinuisse: schema senties. Quū hæc ita sint, statuite quid uos tēpora Reip. de armatis hominibus, quid illius cōfessio de ui, qd nostra decisio de æquitate, quid ratio interdicti de iure admoneāt ut iudicetis. Confessio, decisio, ratio, cōmodè reddita pariūt cōcinnitatem. Ego huic causæ patronus extiti, nō electus unus qui maximo ingenio, sed relictus ex oībus qui minimo periculo posse dicere. Nā cōmoditati ingeniū, grauitati ætas, libertati tēpora sunt impedimēto. Hic nō ad populi Rom. laudē, sed ad iudiciū crudelitatem uideretur esse seruatus. Nōnunquā similiter cadūt finis et mediū: ut, Maximas tibi omnes gratias agimus C. Cæsar, maiores etiā habemus. Quod hæc figura etiā pertineat ad finem, ex Quintiliani uerbis intelligi potest. Est, inquit, *δμοιότης* tātū casus similis, etiā si dissimilia sunt quæ declinātur: nec tātū in fine deprehenditur, sed respōdēt uel prima inter se, uel medijs, uel extremis, uel etiā permutatis his, ut media primis, & sūma medijs accōmodentur, & quocūque modo accōmodari poterūt. Hæc si uera sunt, nō erit similiter cadens quod non accommodabitur, ut hoc, Quo minus ingenio possum, subsidio mihi diligentia cōparauī. Schema nō est hic casus, ingenio, subsidio. Soleo sæpe ante oculos ponere, idq; libenter crebris usurpare sermonibus, omnes nostrorū imperatorū, omnes exterarū gentium, potentissimorumq; populorum, omnes clarissimorū regum res gestas, cum tuis nec contentionū magnitudine, nec numero præliorū, nec uarietate regionum, nec celeritate conficiendi, nec dissimilitudine bellorū posse conferri. Frequens est hic patrius casus, sed eò non habet concinnitatem similiter

militer cadentis, quòd non respondet ex aduerso. Aequa-
 bilitate membrorum iucundè cadit oratio, sed alia uirtus
 est hæc, de qua postea dicitur. Nunc uideamus cur simi-
 liter cadens numerosum esse dicatur. Quando similem ca-
 sum reddimus, ut cum uoluptate audiamur, propemodum
 metimur orationem, ac præter audientis expectationem,
 modum sequimur eundem, ut seruata quantitate quædam
 requies, reducta eadem qualitate admiratio subsequatur.
 Ex illo fit ut similiter cadentia dicantur esse numerosa.
 Nam dimenso spacio, quod est compræhensionis, & am-
 bitus modo suauiter posito, quod est numeri, uerba cum
 delectatione feruntur ad sensum: ut, Vicit pudorem libi-
 do, timorem audacia, rationem amentia. Hoc πρίκωλον
 est, ac πύεσσιν, & ὁμοιομήτων, id est trimembre, & æ-
 quale, & similiter cadens, & eò numerosum atque iu-
 cundum, quòd omnia relata sunt quò maximè debent re-
 ferri. Eodem modo cadentia iucundiores efficiunt uersus,
 & eorum numerum condiunt, ut,

Affera tum positis mitescent secula bellis.

Bina manu lato crispans hastilia ferro.

Cui mater media sese tulit obuia sylua.

Huiusmodi uoluptate capti recentiores eò prouecti sunt
 ineptiarum, ut totos libros in hoc genere conficerent,
 nullūq; uersum magnificerent qui non haberet illud suum
 ὁμοιομήτων. his iudicibus hoc probare facile est, in hac con-
 cinnitate modulationem esse quandam numerorum consi-
 milem, quæ dulci uoluptate capiat sensum, propter quem
 repertum est quicquid est in oratione numerosum. Quos
 si quis errare putat, hoc animo perpendat, quanta sit in-
 terdum in re leui iucunditas, & inquiret unde sit hic tan-
 tum suauitatis. Inueniet credo aurium sensum casibus op-
 positus

positis haud alit er recreari solitum, quàm oculorum intuitum paribus interuallis, & earum similitudine partium quæ conferuntur ex aduerso. Nec mirabitur in sonorum collocatione quiddam esse aptum atque iucundum, qui uno aut altero pede composito uideat orationem cadere numerose. Hæc autem conformatio, si erunt paria membra, numerosior & aptior esse uidebitur audienti. Si uerò imparia, sed commodè reddita, nō omnis aberit uoluptas. Quapropter haud ab re à comparibus distincta sunt ea quæ similiter aut cadunt aut definiuntur.

De paribus membris, & eorum

numero.

CAP. IX.

Paria paribusrelata, ἰσόκωλα dicuntur à Græcis, hoc est, membra quorum par est aut penè par numerus syllabarum. Nec enim duorum plurium uel membrorum syllabas numero certo subijcimus, sed hanc omnem æqualitatem expendimus aurium sensu, & quæ parum quantitate discrepant, quoniam priorum similia sunt, inter paria numeramus. Eiusmodi partes esse numerosas ostendit heroicum pœma, cuius omnes uersus in eandem propè mensuram cadunt. Carmen est ὁρθόμῳρον, et in oratione fugiendum: sed quod neque certos pedes, neque tempora certa metitur, aliquam tamen numeri similitudinem seruat, inter numerosas orationes habemus. Argumento sunt aliquot indoctè conditi, sed qui tamen uocantur hymni, in quibus neque modum carminis, neque numerorū spaciū reperies. Quòd habent quandam numeri similitudinem, uulgo creduntur esse uersus. Itaque paria quòd eadem ferè dimensione penduntur, non quæsitum sed secutum habere numerum uidentur. Quamobrem &
hac uia

hac varietate conspergitur oratio, maximè quæ composita quidem, sed non sollicitè culta uult haberi. Itaque paribus Cicero frequenter est usus, quòd habent numerum quendam latentem, & inaffectatum. Ex multis pauca docendi gratia sumemus. Bellum extrema hyeme apparauit, ineunte uere suscepit, media æstate confecit. Non auaritia ab instituto cursu ad prædam aliquam reuocauit, non libido ad uoluptatem, non amœnitas ad delectationem, non nobilitas urbis ad cognitionem, non denique labor ipse ad quietem. Vicit pudorem libido, timorem audacia, rationem amentia. Vt eius semper uoluntatibus non modò ciues assenserint, socij obtemperarint, hostes obedierint, sed etiam uenti tempestatesq; obsecundarint. Seruatum esse plurimi cupiunt, seruare soli uos potestis. Hoc uerò quis ferre possit, inertes homines fortissimis insidiari? stultissimos prudentissimis? ebriosos sobrijs? dormientes uigilantibus? qui mihi accubantes in conuiujs, complexi mulieres impudicas, uino languidi, confecti cibo, sertis redimiti, unguentis obliti, debilitati stupris, eructant sermonibus suis eadē bonorum, atque urbis incendia. In his orationibus nō omnia membra sunt paria, sed quæ quibus comparari debeant, iudicare difficile non est. Ex membris alia sunt parua, alia mediocria, alia magna. Item alia paria, alia imparia: in quo genere minora minoribus, maiora maioribus conferuntur. Parua sunt hæc: Gallos accersiuit, seruitia concitauit, Catilinam euocauit, attribuit nos Cethego, cæteros ciues interficiendos Gabinio, urbem inflammendam Cassio, totam Italiam uastandam diripiendamq; Catilinæ. Posteriora longius paulo traxit, non modò quòd subiecta res, sed etiam quòd ratio componendi sic erat.

Illa autem mediocria, Subiectos propè iā ignes circum-
 datosq; restinximus, ijdemq; gladios in Rempub. distri-
 ctos retudimus, mucronesq; eorum à iugulis uestris re-
 iecimus. Reperiuntur & maiora: Mithridatem insolita
 inflammatum uictoria continuit, & Tigranem magnis
 copijs minitantem Asia, retardauit. Miscetur paria diuer-
 si generis, ut hæc: Cuius ea stultitia est, ut eam nemo
 hominem: ea uis, ut nemo fœminam: ea crudelitas, ut
 nemo matrem appellare possit. Habet ἰσόκωλον elegantio-
 rem concinnitatem, quando iungitur aut similiter desi-
 nentibus, aut eodem pacto cadentibus. Tum enim con-
 currūt due uirtutes, & similiter exeuntia paribus æquata
 (sicuti diximus) sunt aliquanto uenustiora. At hæc tria
 per se aliqua ex parte numerosa, tum demum pulcherri-
 ma sunt, quum pedibus aptis, et eorum numero iuuantur.

Quæ sint contraria nu-
 merosa.

CAP. X.

Contraria numerosa non solum Cicero dicit ἰναντία
 sed ἑσπόμενα & ἀντίθετα, hoc est & opposita, &
 contrapposita. Ex illis quædam sunt propriè contraria, ut
 amare & odisse. quædam priuantia, ut dies & nox. quæ-
 dam relata, ut longum breue. quædam contradicentia, ut
 edere non edere. quædam repugnantia, ut lædere & a-
 mare. quædam tantum separata, & quodāmodo ἀντίθετα,
 ut, Non nostri ingenij, uestri auxilij est. Hæc igitur, &
 siqua sunt generis eius alia, adeò numerosa sunt, ut in uer-
 sum plerunque cadant: quod his exēplis docet Cicero. Be-
 ne quam meritā esse autumas, dicis malè mereri. Id quod
 scis, prodest: nihil id quod nescis, obest. & addit, Semper
 hæc quæ Græci ἀντίθετα nominant, quum contrarijs
 opponun

opponuntur contraria, numerum oratorium necessitate ipsa efficiunt, & cum sine industria hoc genere iam ante Isocratem delectabantur, & maxime Gorgias, cuius in oratione plerumque efficit numerum ipsa concinnitas. Nos etiam in hoc genere frequentes, ut illa sunt in quarto accusationis: Conserte hanc pacem cum illo bello, huius praetoris aduentum cum illius imperatoris victoria, huius cohortem impuram cum illius exercitu inuictam, huius libidines cum illius continentia: ab illo qui cepit, conditas: ab hoc qui constitutas accepit, captas dicetis Syracusas. haec Cicero. Unde excipere possis quanam dicantur hic contraria, quomodo numerose confrantur, quaque ratione consiciant orbem. Sed ut aditus ad hoc componendi genus magis aperiat, alia ponemus exempla. Nec enim reperire difficile est apud eum qui est in hoc genere frequens. Neque enim potest is exercitum continere imperator, qui se ipsum non continet: neque seuerus esse in iudicando, qui alios in se seueros esse iudices non uult. Imparia composuit membra. Interdum penè paria componit, ut hic, Ex hac enim parte pudor pugnat, illinc petulantia: hinc pudicitia, illinc stuprum: hinc fides, illinc fraudatio: hinc pietas, illinc scelus: hinc constantia, illinc furor: hinc honestas, illinc turpitudine: hinc continentia, illinc libido. Denique æquitas, temperantia, fortitudo, prudentia, uirtutes omnes certant cum iniquitate, cum luxuria, cum ignauia, cum temeritate, cum uitij omnibus. Postremo copiae cum egestate, bona ratio cum perdita, mens sana cum amentia, bona denique spes cum omnium rerum desperatione confligit. Saepius impares sunt partes. Conserte Verrem, non ut hominem cum homine comparetis, nequa tali uiro mortuo fiat iniuria, sed ut pacem cum bello, leges cum ui-

rum &

rum & iurisdictionem cum ferro & armis, aduentum & comitatum cum exercitu & uictoria confratis. Et si non minus nobis iucundi atq; illustres sunt ij dies quibus conseruamur, quàm illi quibus nascimur, quòd salutis certa letitia est, nascendi incerta conditio, & quòd sine sensu nascimur, cum uoluptate conseruamur. Hic uester hostis uestram Remp. oppugnat, ipse habet nullam. Senatum, id est, orbis terræ consilium delere gestit, ipse consilium publicum nullum habet. Aerarium uestrum exhaustit, suum non habet. Nam concordiam ciuium quì habere potest, nullam qui habet ciuitatem? Pacis uerò quæ potest cum eo esse ratio, in quo est incredibilis crudelitas? fides nulla?

Quædam breuia sunt interualla, sed arguta. Si cōsul Antonius, Brutus hostis, si conseruator reipub. Brutus, hostis Antonius. Nonnunquam singula singulis opponuntur. Antonij igitur promissa cruenta, tetra, scelerata, dijs hominibusq; inuisa, nec diuturna, neque salutaria. Nostra contrà honesta, integra, gloriosa, plena letitiæ, plena pietatis. Necesse non est, ea quæ sic opponuntur, omnia esse uerè contraria, sed conferri sicut aduersa: quod & Quintilianus confirmat exemplis. Quamobrem interim cum alijs miscentur contraria. Qua in re mihi ridiculè es uisus esse inconstans, qui eundem & læderes, & laudares: & uirum optimum, & hominem improbißimum esse dice-res: eundem tu & honoris caussa appellabas, & uirum pri-marium esse dicebas, & socium fraudasse arguebas. de hoc ut existimabas, prædicabas, Chæræ arbitrato caussam age-bas. Hoc figuræ genus iucundum numerosumq; sæpe en-thymema pulcherrimum, semper acre & argutum, adco quidam Romanorum lubenter frequentarunt, ut in Sa-tyricos dentes inciderent. Ostendit illud Persianum,

m

Crimin

—Criminaraſis Librat in antithetis—

—Doctas poſuiſſe figuras Laudatur—

Ex quo (niſi forte ſpeciem pro genere uſurpauit) probare poſſumus, non mediocrem eſſe in hac conformatione laudem, eam'que non ſine cauſſa frequentiaſſe Cicronem. In collatione multarum partium eſt antitheton non inſuaue, ut illud Ciceronis pro Lucio Muræna: Vigilas tu de nocte, ut tuis conſultoribus reſpondeas: ille, ut cò quò intendit, maturè cum exercitu perueniat. Te gallorum, illum buccinarum cantus exuſcitant. Tu actionem inſtituis, ille aciem inſtruit. Tu cauēs ne conſultores tui, ille ne urbes aut caſtra capiantur. Ille tenet & ſcit ut hoſtium copię, tu ut aquę pluuię arceantur. Ille exercitatus in propagandis finibus, tu in regundis. Huc non reſeres omnia uel contraria uel oppoſita, ſed ea tantum quę partes partibus, & membra membris ex aduerſo conſerunt.

Eheu quàm pingui macer eſt mihi taurus in aruo.

Ad numerum nihil faciunt pinguis & macer inter ſe pugnantia, nec ſi dixeris in oratione taurum eſſe macilētum in agro pingui. Nō enim ex duobus uerbis, ſed ex orationum collatis partibus numeroſum efficitur. Haſtenus de concinnitate numeroſa. Tranſeamus ad numeros.

Quid numerus à concinnitate numeroſa & metro differat.

G. A P V T X I.

Numerus à numeroſa concinnitate, & à metro uerſuq; differt. Numerus enim ſpacia & interualla ſyllabarum longa ac breuia metitur, & ex illorum temperata compoſitione demulcet aures. Figurarum concinnitates non ex temporibus, & quantitatum differentia, ſed aut
ex

ex æquabilitate partium, aut simili concentu relatorum creant uoluptatem. Numerus nunc longius progreditur, et ambitu spacioſo, quemadmodum libero campo bellatores equi, fertur ad metam: nunc excuſſione breui contentus, initium ſubinde nouum molitur. Figura ſi circunſcriptio-
ne longa diſtrahentur, quid cui debeat ex aduerſo compa-
rare ſenſus, nec attendet, nec ulla reficietur uoluptate. Ad hæc numerus per ſe iucundus eſt, triſtior eſt figura nume-
ro omni deſtituta. hæc quibuſdam partibus tantum, ille in-
ſertus eſt omni comprehenſioni. hæc aperta, ille occultus,
hæc rarior, ille frequentior. hæc minoris eſt artis, ille ma-
ioris. hæc etiam illorum communis, qui neſciunt artiſi-
cium rhetorum, ille pauciorum, qui non modò præcepta
eloquendi tenent, ſed longa exercitatione formati, aptè
compoſitæ que dicere, & hoc quaſi geſtu orationem mo-
uere poſſunt. Diſſerunt etiam numerus & uerſus, hoc eſt
ῥυθμὸς καὶ μέτρον. In uerſu numerantur pedes aut quatuor,
ut in dimetriſ: aut quinque, ut in pētametriſ: aut ſex, ut in
hexametriſ: aut ſeptē, aut ſeptem cum ſyllaba, ut in ſepte-
narijs & quadratiſ: aut octo, ut in octonarijs. In rhythmo
quot ſint omnino pedes, enumerare nihil eſt neceſſe. Nūc
ſinguli collocātur, ut hic, Diximus, O' ſcelus. Nūc bini, ut,
O' me miſerū, O' me inſallicē. Aliquādo bini cum ſyllaba,
ut, Teſtes dare uolumus. Aliquādo terni, ut, O' ſcelus incre-
dibile. Aliquando quaterni, ut, Valeāt, ualeāt, inquit, ciues
mei. Sæpe ſeni, aut ſepteni, aut duodeni, aut etiam plures.
Non ſunt continuandi numero pares, ne uerſiculorum ſi-
milis eſſe uideatur oratio. In uerſu pedes certi ſunt, atque
definiti, ut dactylus & ſpondeus heroico, iambus iambico,
anapæſtus anapæſtico. In oratione nihil eſt præſcriptum
quo certo debeamus uti. A' pæane ducam initium ſi uer-

ba depromenti fiat obuius: si non occurreret, à cretico: si ne hic quidem, à bacchio, aut eorum uno quibus utuntur oratores. Quòd si idem sæpius offerretur, nonnunquam repudiandus erit, ut absit odium similitudinis, quo nihil est in hac arte peius. Præterea in numero poëtico, uerbis ordine constitutis, non alios & alios metimur pedes, ut heroico non dicimus iambum, aut trochæum, aut anapæstum, sed dactylum modò atque spondeum. In oratione licet in pedem sumere binas syllabas, aut ternas, nunc has, nunc illas, & hoc modo uarios efficere pedes pro metientis arbitrio. Id quale sit, monstremus exemplo. Omittendæ sunt omnes uoluptates, relinquenda studia delectationis, ludus, locus, conuiuium, sermo etiam penè omnium familiarium deferendus. Primus pes erit aut iambus, ex breui & longa, aut bacchius ex breui & duabus longis: secundus, aut spōdeus, aut certè molossus. nihil enim refert. Iam si uerbi quinti, quod est, relinquenda, tertiam syllabā componas cum duabus proximis, dactylus erit: si cum una, choreus. si cum tribus, pæan primus. Omnia sic erunt tibi libera dimetienti, propterea quòd orator non animaduertit quos nominaret pedes, sed breuibus & longis quodammodo temperauit orationem. Carmen ubiq; numerosum est, & in eo frè neque principia medijs, neque extrema primis, sunt compositiora. In prosa numerus etsi in medijs non omni ex parte negligitur, in principijs tamen & clausulis, hoc est, in sententiarum finibus accuratior esse debet. Nam aptius est instruendum, quod initio ferit auditorem, & id quo tandem sensus animus que recreantur. Ad hæc poëta numerum suum non sic relaxare potest, ut multis in locis orator. Si quid audet in licentiam, & iambum pro spondeo, aut trochæum, id est treis breues pro dactylo

dactylo ponit, nouum & insolens & absurdum uidetur.
 Orator interim unam & alteram sententiā non aptat nu-
 meris, aut spontē numerosam de industria dissoluit. Nec
 enim delectare semper, ut poëta, sed sæpe causis ac neces-
 sitati magis subseruire contendit. Nec est turpe hominem
 seueris rebus occupatum, nonnunquam horridius, si modò
 grauius, præferre genus orationis, & aliū in locum referre
 numeros. quod si faciat poëta, suum retinere munus nullo
 modo possit. Liberior est oratio, uersus his quasi uinculis
 astrictior: illa numero similis, hic totus ex numeris: illa
 neque ἀρυστός, neque ὀρυστός: hic ὀρυστός, illa subinde ua-
 riantē materia alios et alios collocat pedes, nūc tardior, iā
 uolubilior, sæpe iucunda, sæpe tristis, aliquando curta, ali-
 quando producta. hic sui similis, nec multos ambitus cir-
 cumscribere, nec sua tempora commutare potest: quod se-
 mel assumpsit, hoc legis est ad extremū perferendū. Quod
 esset inter hæc discrimen, & aperta differentia, quæsitum
 est utrum esset difficilior facere uersum, an aptare nume-
 rum? Quod sic intelligendum mihi uidetur. Proposita una
 eademq; materia, & æquatis cæteris ornandi partibus, du-
 bitatio exoritur, utrum sit operosius illam metro, quàm nu-
 mero, an numero quàm metro complecti? Numero, inquit
 Cicero. Cur ita? Habet ille uersuum conditor, quod certum
 sequatur, & à quo non facile possit deuiare. Itaq; si modò
 nouerit syllabarum quantitatem, carminisq; legem, ut he-
 roici, & usu mediocri fuerit exercitatus, affabrè cudet uer-
 siculum, quod pueris etiam frequenter accidere uidemus.
 Non ita facillè cognoscet quantum excurrere debeat ora-
 tio, quod numeri genus sententiā maxime uelit, quos ex
 tam multis ordine statuatur pedes, ubi firmet gradum, ubi le-
 uius insistat, quo tandem modo clausulam deponat. Nec si

foeliciter unam aut alteram sententiam colligaucrit, quoniam modò cæsim, modò membratim, sæpe comprehensè, sæpe uariè dicendum est, facîle mutabit numerum, & subinde nouum induct eloquendi genus. Quamobrem difficilius est intexere numerum quàm uersum, etiam si rhythmus oratorum soluto similis est, et maiori quadà libertate prouoluitur. In utroque tamen pedes sunt generis eiusdem, ex quorum positione modus oratorum fit, atque poëtarum.

Qui pedes orationis, & quid
à numero differant.

CAPVT XII.

NON alij sunt pedes in oratione quàm in uersu, sed est eorum uaria atq; diuersa collocatio. Qui sint, uel grāmatici norunt. Nunc qui maximè nomenclantur ab oratoribus, operæ precium est explicare, propterea quòd illis aptè compositis numerosa progreditur oratio. Qui duabus syllabis constant, recipiunt omnes, ex quibus Pyrrhichius est è correptis duabus, Spondeus è totidem longis, Iambus è breui & longa, Choreus è longa & breui. Recipiunt & trisyllabos, Molossus ex tribus longis, Trochæus contrarium ex totidem breuibus, Dactylus ex longa duabusq; correptis, Anapæstus oppositum ex duabus breuibus & longa, Bacchius ex breui & reliquis longis, Pælimbachius ex duabus longis & breui. Longa inter breues Amphibrachyn, breuem inter longas Creticum dicunt. Tres celebrant eorum quibus syllabæ sunt quatuor, Dichoreus ex duobus choreis, Pæana primum ex longa ac tribus correptis, Pæana quartum ex breuibus tribus, & longa. Secundum & tertium referunt ad simplices, quemadmodum

admodum reliquos omnes quatuor & quinque syllabarum, præter unum Dochimum, qui conficitur ex Choræo & Cretico, uel ex Cretico & Iambo. Hos ut in eam rem quam modò tractamus, nouisse sat est, ita syllabæ cuiusque quantitatem unde sit pes, habere cognitam certamque, necessarium est. Quæ si esset una causa, certè nobis persuadere posset, oratori non utilem modò, sed etiam necessariam esse poetarum lectionem. Ex ijs pedibus quos antè numerauimus, alij sunt pares, ut Pyrrhichius, Spondeus, Dactylus, Anapæstus, Amphibrachys: dicti pares, quoniam diuiduntur in partes duas æquas. Alij duplices, ut Iambus, Choreus, Tribrachys siue Trochæus, Molossus. In his pars pars altero tantò superat. Alij sesquipli, ut Bacchius, Palimbacchius, Creticus, Pæan. hi si diuidantur in duas partes, altera tantundem & dimidium continebit, ut in Cretico quinque sunt tempora. comparato duo cum tribus, secunda pars erit sesquimaior, hoc est, tantundem & dimidium complectetur. Diuisio est Aristotelis, qua tria esse pedum genera demonstrantur. Ex illis breues celeriter feruntur, ut tribrachys, & pæan: longi tardè trahuntur, ut spondeus, & molossus. temperati retinent mediocritatem, ut dactylus, anapæstus. Celeritati propior iambus & choreus, quàm tarditati: contrà bacchius & palimbacchius: quanquam in dactylo choreus est, & in palimbachio, sicut iambus in anapæsto, & in bacchio. Aliud est omnino hoc aut illo modo syllabas componere. In pæane trochæus est: in hoc nulla dignitas, in illo uel maxima. Qui pedes à longis deponuntur in breues, uolubiliter eunt, atque iucunde. Qui assurgunt à breuibus in longas, aspera percussione feriunt aurem, ac in fine subsistunt. Pyrrhi-

chius tenuis, spondeus tardus, iambus asper, choræus uolubilis, dactylus heroicus, anapæstus exultans, trochæus leuis, molossus grauis, bacchius seuerus, similis palimbacchius, creticus temperatus, amphibrachys obscurus, dichoreus iucundus, pæan amplius, dochimus maiestate conspicuus. Ex illa uarietate nascuntur multæ species orationis, non si pes idem semel aut iterum collocetur, sed si sæpius aut idem aut rationis eiusdem alius misceatur. Nam misceendi sunt & interscendi, non continuandi pedes, ne aut efficiant uersum, aut similitudine tedium pariant, & in affectatione deprehendantur. Quòd si quis unus sæpius iterabitur, alio interiecto melius iterabitur. Pes aliquando numerus à Ciccone dicitur, aut quòd pedibus numerus constat, aut quòd pes habet arsin & thesin, hoc est elationem & positionem, unde modulus excitatur, ut in his uel incisis uel membris, quæ uno tantum pede stant, cuiusmodi sunt hæc, Diximus. O scelus. Scio. Erras. Falleris. Sed ille numerus propriè dictus, multorum concordia pedum constat: quemadmodum symphonicorum cantus non uno aut altero tono, sed concentu plurium uocum perficitur. Quid enim modulationis est in una percussione? aut quomodo quæ singula proferuntur, colligari simulq; ferri possunt? Ut currētibus equis, sic & orationi opus est interuallo & curriculo, ut libero spacio recepta, liberè se mouere possit. Pes igitur à numero differt, ut à toto cursu gradus unus, & una proiectio. Vbi numerus, illic pedes: ubi pedes, non statim numerus. quamobrem proximum est exponere quo pedes ordine numerum conficiant.

Qui sit ordo pedum in extruendo numero.

CAPVT XIII.

In pedibus

IN pedibus collocandis tria sunt genera locorum ob-
 seruanda, in quibus sunt principia, media, postremaq;
 sententiarum. Extremus ambitus diligenter accuratè quæ
 deponendus. Nam quòd periodo circumducta ad extre-
 mum quiescit auris, & à labore exoptata numeri iucun-
 ditate recreatur, haud immeritò si quid in oratione uolu-
 ptatis est, dominatur in fine. Quòd si quid in cursu clau-
 dicatum est, sine composito parum uel nihil offènditur
 sensus. Finem dico non modo comprehensionum, sed
 etiam incisorum atque membrorum, quæ numerosè &
 aptè terminare iucundum est. His tribus cura quædam
 adhibenda, & clausulæ, id est, extremæ sententiæ, uel ma-
 xima. Hic igitur duos aut treis numerare pedes cōcessum
 est, uix unquam alibi datum, ne oratio quæ liberè fluere
 debet, in numerandis constituendisq; pedibus cōsenescat.
 Quamobrem ordo pedum in extrema circumscriptione
 certior est, q̃ uel in principijs, uel in intermedijs: quanquā
 nihil rhythmo tam certum præfixumq; est, quàm in uersu
 pœtarum. Hinc igitur initium ducamus, quicq; numeri ma-
 ximè clausulam finemq; sententiæ deceant, aperiāmus, &
 quod ordinis est, qui melius antecedant, quicq; uenustius
 subsequantur. Dichoreus adeò præclare cadit, ut hoc C.
 Carbo concionem Populi Romani in clamorem excitarit,
 ut Hierocles & Meneclæ Asiaticorum rhetorum prin-
 cipes hoc modo frè clauserint orationem. quod improbat
 Cicero in Oratore, quia in orationis numero nihil tam
 uitiosum, quàm si semper est idem. Dichoreo Creticus
 optimè præponitur, peius autem trocheus. Conserte Ver-
 rem, non ut hominem cum homine comparetis, nequa tali
 uiro mortuo fiat iniuria, sed ut pacē cum bello, leges cum
 ui, forum & iurisdictionem cum ferro & armis, aduen-

tum & conitatum cum exercitu & uictoria conferatis. Quòd autè sit iambus in cretico, pyrrhichius in trocheo, idem de utroq; sit iudicium. Dactylus & spondeus, eadem ratione bacchius cum dichoreo, suauiter audietur. Habeant hæc oblectamenta & solatia seruitutis. Prima docuit maiores nostros quàm præclarum esset exteris gentibus imperare. Det operam ut admittatur in alicuius istorum Tusculanum. Quum dactylus & choreus anteponuntur, finis est carminis Phalæcij: quod si non tam fugiendum est quàm uel iambicum, uel heroicum, uel elegum, genera uulgata, tamen aliqua ex parte fugiendum. Est enim uisiosum carmen in oratione, quia dicentis imperitiam, aut certè componendi affectationem arguit. Vfus est hoc genere Cicero, Ne suum ius, suis moribus, suis legibus obtinere possent. Insidet sibi ipsi admodum suauiter. Per triennium dederunt. Adiungitur & pæani, & anapesti, sed lenius paulò quàm cretico. Itaq; ille M. Cato sapius cellam penariam reip. nostræ, nutricem plebis Romanæ Siciliam nominauit. Partim retinet, Vt arare, ut pascere, ut negotiari libeat, ut deniq; sedes ac domicilium collocare. Gratiam perdit si ad eum abruptè uenitur. Hunc tu igitur diè tuis maximis & innumerabilibus gratulationibus iure antepones. Nullus est pes quo Cicero tam frequenter utatur & in deponenda sententia, & in terminandis partiũ finibus: quanquam monet, ut quo dulcior est, hoc magis satietas formidetur. Claudat ille per sæpe circumscriptionem choreo & molosso, uel cretico & spondeo. Nihil differt utrum istorum dixeris, quum liceat hoc aut illo modo distinguere pedes. Fateor me salutis omnium caussa ad eam partem accessisse subleuandæ, quæ maximè laboraret. Nescio cur hoc mihi detrimento esse debeat, si id mihi obijciatur

ciatur, me potissimum esse delectum. Vltimam syllabam facinus ancipitem, sicut & ij qui conficiunt uersus. In hoc numero grauitatis est plurimum, propterea quod oratio temporum mora firmatur. Præcurrit aptè dichoreus. Plerique minime timendum fuisse senserunt. Interdum tres chorei. Tamen ad hanc causam non sine aliqua spe & cogitatione uenerunt. Nonnunquam dactylus, In balneum te ducere cœperunt. esse uidebatur. Minus habebit auctoritatis cum trochæo, aut pyrrhichius duobus, ut hic, Sed tamen sunt alia maiora. Quidnam noui facinoris afferret. Comitantur alij pedes, creticus, anapæstus, bacchiuss, atq; spondeus. Id haud ita frequenter, quia fugiunt oratores tarditatis languorem. Multus est & creticus in extrema sententia: ut in hac, Classes & commeatus multum iuuant. Duplicatur interdum. Atque ipse cogitans sentio. In communionem tuorum temporum contuli. Triplicatur etiam. Facere enim probus adolescens periculosè, quàm perpeti turpiter maluit. Quando choreum sequitur, aut alium pedem breui syllaba clausum, tum duos continet iambos. Fruere cum fortuna & gloria, tum etiam natura & moribus tuis. Multorumq; innocentium sanguis istius supplicio luendus est. Illud quod alteram senarij partem conficit, sæpius admittere periculosum est: una plures uel longè tutius antecedent. Magnopere quod laudent, non habent. Quum subiicitur iambus, modus est temperatæ suauitatis. Fit enim dochimus ille pes insignis è quinque syllabis, breui, duabus longis, breui, longa: ut, reipublicæ: quem Cicero uetat iterari, quod continuatus numerum apertum & nimis insignem facit. Simplicem frequenter usurpat. Eos Martis uis perculit, non ira uictoriæ. Ad reiiciendos Iudices uenimus. Respondit quod eos in iudicando nimium sui iuris

sui iuris sententiæq; cognosceret. Infinita sunt apud eundem exempla, si postrema brevis, ut in uersibus, habetur ut longa. Plurima sunt & illa, et meo iudicio mollißima, quæ spondeum cum trochæo, hoc est, tribus breuibus statuunt in fine. Diu multumq; Brute dubitavi. Esse uideatur. Non uia quæstio constitueretur. Maximus est fructus iucunditasq; sapienti. Ut finis aliquando iudiciariæ controuersiæ cōstitueretur. De hoc numero Quintilianus in nono: Minus grauis erit spondeus præcedēte Pyrrhichio, ut, Iudiciij Iuniani. & adhuc peius priore pæane, ut, Brute dubitavi. In alia opinione fuisse Cicronem, exemplorū multitudo declarat. Eius auctoritatem in hoc genere componendi qui parui facit, quid melius sequatur, non intelligo. Quid habent uitij spondeus & pæan? Habet spondeus stabilem quendā, & nō expertem dignitatis gradum, inquit Cicero: qui & hæc de pæane: Qui pæana prætereunt, nō uident mollißimū à sese numerum eundemq; amplißimum præteriri? Arist. eū maximè probat: ὁ δ' ἰσχυρὰν ἀπὸ μόνου ποῦ δὲ καὶ μέτρον τῶν ἐνθ' ἑνὶ τῶν φύθμων, ἔστι μάλιστα λαοθάλας. Sumendus est pæan, maximè enim latet, cō quòd ex dictis numeris unus est unde non conficitur uersus. Tardior est spondeus iteratus, sed grauitate plenus choreo priore. In monumentis maiorum suorum sit interfectus. Etenim pælam dictitabat, cōsulatū Miloni cripi nō posse, uitā posse. Atq; etiā subiiciūt se homines imperio alterius et potestati pluribus de causis. Sæpius multo duobus spondeis iambus incumbit. Sed etiā gloriam per tales uiros infringendam. Gloriam libens agnouisset. Me consulem declarauit. Consules adiuuerunt. Sed enarrare C. Cæsar res tuas gestas possit. Reperiuntur in fine tres spondei. Victorijs illustratæ sunt. Tres, & syllaba: Hodierno die te ipsum uicisti. hic

sti. hic fortè quispiam synæresin dixerit. Interdū quatuor. Sed etiam laudatorem uidistis. Hæc tardiora sunt, quàm quæ debeant frequentari. Nec bene aſsidebit daçtylus. Domo est egressus non modo nullum ad bellum, sed ne ad minimam quidem suspicionem belli. Finis est heroici carminis, eius quod temporum tarditate, rerum grauitatem ponderat, quale hoc est,

Chara deūm soboles, magnum Iouis incrementum.

Quòd si spondeus erit unus in fine, & daçtylus ei proxime iungetur, tanto deterior erit huiusmodi clausula, quanto heroicus uersus cuius extrema sequitur, est notior. A Cicerone iungitur. Hæc tanta uirtus ex hac urbe expelletur, exterminabitur, eijcietur? Obscurius est uitium propter moram interiectam. Nam singulatim tria postrema uerba pronunciantur, et interrogatio sustinet orationem. Apertius est istud: Omnes in me meosque redundant ex illo fonte dolores. Quam etsi spero esse falsam, nunquam tamen uerbis extenuabo. Si tertius est à fine iambus, illa minus est uitiosa compositio. Imperatorum penuriam commemorabit. Daçtylus in extrema sede plurimus est præueniente cretico. Nec ad consilium casus admittitur. Belli dissidio distractus à fratribus. Hic magistratus à populo summa ambitione contenditur. Si sustineas hic ultimam syllabam, pro daçtylo creticus erit, pes in clausula frequentissimus, & sine controuersia daçtylo præferendus. Instabilis est daçtylus cum pæane uel anapesto. Nullum pietatis officium defuit. Non minor penè ad omnes, quàm ad illum uentura sit, lætitia peruenerit. Ac primus aditus & postulatio Tiberonis, hæc (ut opinor) fuit, uelle se de Q. Ligarij scelere dicere. Duo daçtyli male neçtuntur ad extremum. desinunt in asclepiadeum, quod & sua sponte subsultat

subsultat. Omnis uoluptas præterita pro nihilo est, quia
 postea nulla futura sit. Post etiam studij sui quærebāt ali-
 quem ducē. Bacchius optimè claudit orationem: quod etiā
 dichoreo, pbari potest, cuius nouissimæ tres syllabæ bac-
 chium efficiunt, si nihil refert breuis an longa sit extrema.
 Certè ad quantitatem nihil refert, ad sonū nonnihil. Na-
 turam & conditionē, ut uinci possent, habebant. Nō enim
 iam caussæ sunt inter se, sed uictoriæ comparandæ. Dissol-
 lutum uideri. Si nectes syllabas quatuor, ditrochæus erit:
 si tres modò, bacchius. Eodem modo comparandi sunt mo-
 lossus et palimbacchius. Noli nostro periculo sapiens esse.
 Pæan ab antiquis statuitur duplex, unus ex longa & tri-
 bus productis, alter ex breuibus tribus & longa, duo reli-
 qui ad alios pedes reducuntur, ut secūdus ad iambum atq;
 pyrrhichium, tertius ad pyrrhichium et choreum. Primus
 & ultimus quamuis dignitatem & amplitudinem habeāt
 in medio cursu, infirmi tamē & instabiles sunt in extrema
 comprehensione. Sed & in ea nonnunquam collocantur.
 Ego te in patria per eosdem retinere non potero? Nulla
 deniq; existimantur esse iudicia. Atq; ille non mediocri cu-
 piditate arripuit imperium. Si quid fortè prætereo, dico
 intra domesticos parietes. Neque molestè ferebant abesse
 à foro magistratum, non ius dici, non iudicia fieri. In hoc
 exemplo duo pæanes sine grauitate cōcurrunt. Quòd tro-
 chæus autem sit in pæane primo, subibit idem iudicium.
 Isto enim nomine illa adhuc caussa caruit. Contra Cæsa-
 rem bellum gerere. Itaque si plures erunt breues in clau-
 sula, oratio uanescet: ut hæc, Dabat se labori atque itine-
 ribus. Nec multum probandus anapæstus. assurgit enim,
 nec bene deponit orationem. Nisi ratio belli, nisi summa
 utilitas moueant. Iam qui pedes optimè cadāt, operæpre-
 cium

cium est in summam referre, ut eos cuique promptum sit excipere. Hi sunt igitur principes,

Creticus & dichoreus	gloriam comparauit.
Choreus & molossus	membra firmanantur,
Dochimus	ira uictoriæ.
Creticus iteratus	urget affinitas.
Creticus & dactylus	consonant omnia.
Trochæus & spondeus	uitia damnant.
Iambus & dispondeus	uirum condemnarunt.
Trochæus & dispondeus	cædit armatos.

Alijs omnibus gratia uarietatis utendum. Sæpius his præstantioribus demulcet aures eloquens, atque grata uicissitudine tedium uitat. Claudunt ambitum pedes omnes qui uel duabus, uel tribus syllabis continentur. Etenim pyrrhichius est in dactylo, iambus in cretico, choreus in dichoreo, dactylus & trochæus in pæane primo, anapestus in secundo, molossus in dispondeo. bacchius si nihil refert breuis an longa sit nouissima, ad dichoreum, pælimbacchius ad molossum pertinebit. Quamobrem pes omnis duabus aut tribus syllabis constans, ambitum definit. In texendis numeris haud satis est continuationis aptasse finem, sed & incisiones & membra curam diligentiamque desiderant. Hic tantisper quiescit orator, dum sententiæ distinguuntur, & ad cætera pronuncianda spiritus à labore recreatur. Membra quæ ὀλίγα dicuntur à Græcis, alia sunt longiora, Vt etiā filium suū lectissimū adolescentē foras ad propinquū suū quendā mitteret ad cœnā. alia breuiora, ut, Hospes hortatur. In omnibus longioribus, quia periodon illam uidentur imitari, seruanda est ea ratio pedū, quam suprà demonstrauius, & eo forte seruanda
magis

magis, quo sunt illa periodo curtiora. Animus hæc tota cōplectitur, & illorum gaudet ornatu. Si uidet esse discincta, abruptam & interpunctam elocutionem aspernatur, & grauius molesteq; fert tantum spacij confectum fuisse sine uoluptate. Sin breuiora ponuntur, ex numeris eligendi tardiores, ut breuitatem grauitate compensent. Hic laudabitur spondeus, bacchius, molossus, & dispondeus: nec erit in uitio creticus, & dichoreus. Cuius rei sit hoc testimonium: Tum ciues Romani qui Lampsaci negotiabantur, concurrunt, orant Lampsacenos, ut grauius apud eos nomen legationis, quàm iniuria legati putaretur. sese intelligere hominem illum esse impurum ac nefarium, sed quoniam nec perfecisset quod conatus esset, nec futurus esset Lampsaci postea, leuius eorum peccatum fore, si homini scelerato pepercissent, quàm si legato non pepercissent. Hæc periodus multis confecta membris. Sunt & breuiora quadam ex iisdem pedibus. Non enim potest dicere, quum seditionem sedare uellem, quum frumentum imperarem, quum stipendium cogere, quum aliquid denique reipublicæ caussa gererem, quòd acrius imperaui, quòd animaduerti, quòd minatus sum. Eadem est frè incisorum compositio. Nam componi debent optimè, ut ornet elegantia paruitatem. Domus tibi deerat? at habebas. Pecunia superabat? at egebas. Hæc incise dicta sunt quatuor, quæ spondeo sustententur. Incisa Cicero dicit, quæ Græci κομματα: cuius uerbi notatio uidetur indicare particulam orationis spiritu pronunciantis interruptam, & sine alijs debilem & mancā, utpote quæ nec plane sensum, nec numerum habeat perfectum. Incisa statuit in singulis uerbis, ut, Diximus. In binis, ut, Ipsi prodeant. In ternis, ut, Missos faciant patronos. Possunt esse

esse plura. Membra re numeroq; sunt perfectiora, quæ tamen à corpore totius orationis auulsa, integram uim non habent: ut, Cur clandestinis consilijs nos oppugnant? Et hæc quatuor, O' callidos homines. O' rem excogitatā. O' ingenia metuēda. Testes dare uolumus. De incisus Quintilianus et membris, Incisum, inquit, erit sensus non expleto numero cōclusus, plerisq; pars membri. Membrum autem est sensus numeris cōclusus, sed à toto corpore abruptus, per se nihil efficiens. Hæc anxie distinguere, ad eam de qua loquimur numerorū scientiam nihil est necesse. Dicamus incisum esse imperfectius, et quo dicto ad reliqua festinet orator: membrum, perfectius, ac liberioris interpirationis. Incisum sæpe membri pars est, ut hic: Si auctoritates patronorū in iudicijs ualerent, ab amplissimis uiris L. Cornelij caussa defensa est. si usus, à peritissimis. si ingenia, ab eloquentissimis. si studia, ab amicissimis, et cum beneficijs cum L. Cornelio, tum maxime familiaritate cōiunctis. Hic circuitus quinque membris cōstat, singula binis incisionibus. Etenim quæ partes orationis omnes aut incisa dicantur, aut mēbra, aut circuitus: et circuitus, hoc est periodi, totam expleant sententiam, membra sensus breuiiores amplectantur: necesse est incisi nomen ad eas maxime partes referre, quæ per imperfectionē iustum membrum cōficere non possunt, quum tamen interuallo et interpiratione distinguantur, ut hæc septem, Cui commisit? quo adiutore usus est? quo socio? quo conscio? cui tantum facinus, cui se, cui salutem suam credidit? In uno uerbo numerū querere non est opus, in duobus quædam cōcordiæ uis esse potest. Membra dicantur hæc nouē, Publicam dilapidabat pecuniam, ærarium exhauriebat, minuebat necessitalia, donabat ciuitates ex commentario, dictaturam

gerebat, leges imponebat, prohibebat dictatorem creari legibus, senatusconsultis ipse repugnabat in senatu, provincias unus omnes concupierat. Si quid est hoc genere perfectius, nec tamè ambitus nomine dignum uocari, maiore de causa membrum debet appellari, etiam si pars circuitus non sit. Est oratio membratim casimque; diuisa, quam dicere circumscriptionem non possumus: unde planum sit et incisiones et membra à periodo separari posse. Sit hoc testimonium, Sed quid ego de dignitate istorum testium loquor? Virtutem eorum diligentiamque cognoscite. In balneis delituerunt. Testes egregios. Deinde temerè profecerunt. Homines grauitati deditos. Arguit Cicero Hellesiam quendam qui serè semper hoc genere sine circuitu utebatur. Idem de compositione membri et incisi sic præcipit, Nihil tam debet esse numerosum, quam hoc quod minimè apparet, et ualet plurimum. et paulopost, Quæ incisi aut membratim efferruntur, ea uel aptissime cadere debent. Non igitur uerendum est in horum casu optimos collocare pedes, eosque maxime, qui suo pondere firman orationem. Sic enim parua corpore, spaciorem stabilitate confirmantur. Principia quæ uacuas ingrediuntur auras, numero uacare non debent. Non enim potest illud placere, quod statim quasi in uestibulo offendit. Creticus principijs aptissimus est. Neminem uestrum ignorare arbitror Iudices. Deinde pæanes duo. At beneficio sum usus tuo. Leuia sunt hæc in hoc reo crimina. His adijce dictorem et bacchium et palimbacchium. Non enim potest ea natura, quæ tantum facinus commiserit, hoc uno scelere esse contenta. Vehabatur in effedo tribunus plebis. At quanta merces rhetori data est? Capiunt eundem locum ceteri. Dactylus, Omnia præteribo quæ mihi turpia dictu uidentur.

Buntur. Anapaestus, Patior Iudices, & non molestè fero. Molossus, Est idem Verres, qui fuit semper. Amphibrachys, Tenes ne memoria prae-textatum te decoxisse? Trochaeus, Vt igitur intelligeretis qualè me esse Consularem profiteretur, obijcit mihi consulatum meum. Dochimus, Catenas habebat hospes tuus. Omnes igitur pedes simplices duodecim numero principem locum capiunt. Pyrrhichius est in Anapaesto & pæane quarto, iambus in Bacchio, Choreus in Dactylo & Cretico, Spondeus in Moloisso & Palimbacchio.

Ex illis optimi sunt initio

- Creticus.
- Pæan primus.
- Pæan quartus.
- Dochimus.
- Dichoreus.
- Molossus.
- Anapaestus.

Sunt ne quoq; boni qui cōtinentur illis? Nihil est necesse. Quum pedi aut accessio aut decessio fit, illius natura mutatur. Nec si pæan habet dignitatē, propterea necesse est aut pyrrhichium aut trochæum eadē autoritate præstare. Refert enim, longa an brevis subsequatur. Itaq; dicimus illos omneis in principijs non quidē probari, sed inueniri. Cauendum ne multis breuib; exiliat, ne ue longiorū continuatione languescat ingressus. Maximè animaduertendum ne cōtinuentur ij pedes ex quibus efficiuntur triti uulgatiq; uersus, cuiusmodi sunt iambi, anapaesti, chorei, dactyli, spondei. Nam uersus initium si ponitur initio cōprehensionis, uituperatur ut ὀρθόμην, ut heroici, Promitto hoc uobis, & Reip. spondeo. Conseruate igitur Reipub. Iudices ciuē bonarū artium. ut iambici, Tu con-

sul es renunciatus. ut anapæstici, Veniunt ad eum socij. ut sapphici, Si quid hic possum, faciā quod optas. Quæ genera carminū sunt ignotiora, quæadmodum minus deprehenduntur, ita minus in oratione reprehenduntur. Est tamen carmē (si Ciceroni credimus) orationis vitium uel maximum. Diximus quæ sit ratio pedum in principio & in exitu sententiarū: superest ut de mediōrū collocatione dicamus. Quoniam media surdus audiuntur quā uel prima, uel extrema, paulo negligētius instrui solent. Traducitur animus impetu dicētis, & dum rerū uerborūq; bonitatem cōsiderat, & eorū uim summamq; completi nititur, non ita uehementer numeris qui medio cursu rapiuntur, intendit. Sed est huic interuallo suum decorū. Quum celeriter spaciū corripit generosus equus, quā aptè singula ponat uestigia, cōspicere non possis. si fortè insigniter aut claudicat, aut offēdat, aut moretur, aut trāsiliat, aut attollatur, aut declinet, continuo dispārem cernis deformitatem. Haud secus quum uolubiliter fertur oratio, pedum singulorū metiri positiones haudquaquam possumus. quā uerò cōsentaneus sit omnis cursus, iudicare facile possumus. Quamobrem media initijs & clausulis aptè respondere debent. Respondent autem, si ad eundem numerū & ad eandem modulationem proximè accedunt. Quod fit, si quo cœpisti tenore, eodem progrediare ad extremū. Medijs in partibus amplissimus est uterq; pæan primus & quartus. Nec solum dignitatē affert & amplitudinem, sed etiam uolubilitatem atq; celeritatē, qua animi cōcitati affluente uoluptate recreantur. Quod ut placidum fiat, ex Cicerone proponemus exempla: Vincat aliquando cupiditas uoluptasq; rationem, dummodo illa in hoc genere præscriptio moderatioq; teneatur. In hac oratione

oratione breui sex pæanas primos accipere possis, ex quibus incitator est cursus, atq; magnificentior amplitudo. De pæane quarto proferamus exemplum: Fieri enim non potest, ut animus libidini deditus, amore, desiderio, cupiditate, sæpe nimia copia, inopia etiã nonnunquã impeditus, hoc, quicquid est, quod nos facimus in dicendo, non modò agendo, uerũ etiã cogitando sustinere possit. Hic octo pæanas ex ternis breuibus & singulis longis dimetiri queas. Non ab re dicimus, dimetiri queas. Nemo rhythmicorum pedes enumerat in cursu, quot qui uer sint, & qui debeant aut diuidi, aut nominari: sed occurrentibus uerbis expedit animo quãta sint interualla spaciãq; syllabarũ, hoc est, quẽnã sit breuium longarũq; tẽperies, ex quibus alij atq; alij fiunt pedes. Si uelit spondeos, moloßos, bacchios, palimbacchios, creticos, tũ pluribus utitur longis. Si malit dactylos, anapæstos, trocheos, pæanas, tum breues syllabas copiosius inducit. Iam si quis obseruare uolet quid exciderit numeros expẽdenti, quoniam aut binas, aut ternas, aut plures syllabas aggregare cõceditur, hos aut illos pro sentẽtia cõstituet pedes. Quæ quum ita sint, nihil tamen uetat quo minus tyrones enumerẽt præcipuos, & ternas singulis, aut etiam plures syllabas quàm binas alligare malint. hoc multò facilius et utilius ad cõponendũ. Et in tribus syllabis duæ sunt, & in quatuor & quinq;, ut in pæane atq; dochimo. Hoc modo obseruantes seligimus pæanas alios uer numeros, qui neque cõtinuari plures, nec certa comprehendere summa uolunt, sed alijs permisceri, et pro subiecta materia aut plures aut pauciores collocari. Dicam apertius. Habes rem uerbis explicandã minimũ uiginti, non est opus ut rationem subducas quot illam pedibus amplectare. Verba co-

gitanti succurrent. Si uolubilitati studebis, excipies de multis celeriora, si modò bona erunt, ac propria. Et quoniam duæ cōsonantes antecedentē uocalem etiā in oratione producunt, eo collocabis ordine, ut quæ sunt natura breues, in eadē mancant quantitate. Quo factō, paucisq; longis interpositis, & dactylos, & trocheos, & anapestos, & pæanas in oratione tua ultro reperies. Quod si scribis in ocio, quid uetat inspicere quæ pedum uelis esse frequentiorē, & eum paucis intericētis sæpius collocare? Id facies rudis. Vbi cōsuetudine scribēdi, et exercitatione dicēdi consecutus eris facultatē, tum cursus metieris, hanc numerandi molestiam relinques. Omnia tibi promptè suppeditabit usus. Vt igitur iuuenes optimis assuescant, cetera persequamur. Dignitatem inesse dactylis ostendit heroica maiestas. Ex ijs numerum quidam iudicant esse grandiore, quàm desideret soluta oratio, ut Aristoteles. Herous (inquit) grauis est, ac magniloquētiæ accommodatus. Cicero in oratore, Iambus, inquit, frequentissimus est in ijs quæ demisso atque humili sermone dicuntur. Pæan autem in amplioribus: in utroq; dactylus. Ita in uaria & perpetua oratione hi sunt inter se miscendi & temperandi. Hoc autore dactylum misceamus, & magnitudinem quæ citra uersum est, ne repudiemus. Miscet illum frequenter. unum & alterum testimonium adducemus. Intellego quàm scopuloso difficultiq; in loco uerser. Nam quum omnis arrogantia odiosa est, tum illa ingenij atque eloquētiæ multo molestissima. Inueterauit enim iam opinio perniciosa reipub. uobisq; periculosa, quæ non modò Romæ, sed & apud exteras nationes omnium sermone percrebuit, his iudicijs quæ nunc sunt, pecuniosum hominem quanuis sit nocens, neminem posse damnari. Creticus

uel nolentibus nobis se multus obtrudit. Id accidit, credo, quòd bona pars uerborũ literas breues & longas habet. quæ ratio ualet & in iambis, & in choreis, qui utriq; creticis quodammodo uidentur includi. Creticis maior est dignitas, etsi neq; duos iambos, neq; duos choreos proxime adiungere possis, quin efficiatur creticus. Creticorum est usus adco frequens, ut una in periodo non longissima undeuiginti reperiantur. Ego, qui, sicut omnes sciunt, in foro, in iudicijsq; ita uerser, ut eiusdẽ atatis aut nemo aut pauci plures caussas defenderint, et qui omne tẽpus, quod mihi ab amicorũ negotijs datur, in his studijs laboribusq; cõsumã, quò paratior ad usum forẽsem, promptiorq; esse possim, tamẽ ita deos mihi uelim propitios, ut quum illius tẽporis mihi uenit in mentẽ, quo die citato reo mihi dicẽdum sit, non solum cõmoueor animo, sed etiã toto corpore perhorresco, Anapæstus in cursu, ut in oratione proxima uidere est, non est infrequens. Nam si longa præcedit, in dactylum referri potest. at si continuaueris anapæstos, resilient quasi refracti, atq; tympanorũ sonũ imitabũtur. Istud senties, si breues breuiter, longas longè pronũcies. Firmior est spondeus, & in grauitate rerum præstantior: quod idem de bacchio & moloßo iudicandum est. Nemo quenquam tam audacem, tam amentẽ, tam impudentẽ fore arbitratur, qui tam nefarijs criminibus, tam multis testibus euctus, ora iudicum aspicere, aut os suum Populo Romano ostẽdere auderet. Est idem Verres, qui fuit semper, ut ad audendũ proiectus, sic paratus ad audiendum. Præsto est, respondet, defenditur. Ne hoc quidẽ sibi reliqui fecit, ut in rebus turpissimis quũ manifestò teneatur, si reticeat & absit, tamẽ impudentiæ suæ pudentem exitum quæsiisse uideatur. Ceteros ordine referre nihil est

necesse. Nullus est omnium, qui non aliquando intermisceatur. Sed optimi sunt pæanes, cretici, dochimi, dactyli, bacchij, spondei, molossi: non dico si continuentur, ut in uersu, sed si liberalius aspergantur. Pyrrhichij uerò & iambi trochæiq; si frequētes erunt, minutis numeris extenuabunt orationē. Sin pauciores, obscurè & surdè audiētur. Miscēdi sunt igitur & tēperandi, non modò propter uarietate, cui plurimum studet omnis eloquentia, sed etiam propter expeditam ac celerem dicendi facultatem. Nihil est cur in numerandis, pedibus homo consenescat. hoc artis, quicquid est, experiatur adolescens: Iudicium præceptis informet. Omnia trahat in usum. Quum plurimum scribendo dicēdoq; profecerit, tum laxare numeros pro sententia, & libcrius spaciari poterit. Pronius est ac facilius orationem quasi laxis habenis effundere, quàm certo numerorū uinculo, & componēdi moderatione frenare. Qui non cohibet sciens, negligentia laborat: qui cohibere non potest, ignorantia. hoc autem multo scēdius est, & turpius. Ne quis igitur audius eloquendi, recuset illam in discendo numero molestiam, quam homines doctissimi & in obseruando & in tradendo subiuerunt.

Quæ uitiosa numeri textura. CAP. XIII.

Qui pedes orationis, & artificiosam illorū collocationē tenet, stylum exerceat, optimū dicendi magistrum. Principio (ut in tyrocinio quodam) se numeris astringat, non minutis illis & quasi mutilatis, quibus in tenuitate rerum graciles utuntur, sed optimis quibusq; & amplissimis, à quibus procliuior erit ad ima descēsus, quàm ab imis ad summa. Vt eò multis pateret accessus, exposuimus qui laudatissimi pedes haberētur, & quo quisq; loco
statuē

statui ab eloquentissimo solitus esset. Dicendū mihi postea de uitijs quæ uulgius imperitorum committit, ut illorum fuga uirtus eluceat. Quod in principijs & in finibus maximè numerus, & illa sonorum temperantia dominatur, in illis fugienda literarum dura concursio, & uocalium grauis hiatus. Corruptit enim quicquid est in apta numerorum copula suauitatis. Illic Cicero uocales elisisse mihi uidetur, & aliter extulisse lingua, quàm abusus iste pronunciationis obseruet. Res erat minimè obscura, pro minimè obscura. Restricti nullo modo esse debemus, sed in deligendis idoneis iudicium & diligenti adhibere, loco illius, diligentiam adhibere. Ist' homo liberalis negat se quenquam retinere eorum qui Petilio uellent adesse. Non ignoro (dixi iam superiore libro) collisiones huiusmodi fieri solitas in oratione tota, sed iterum dico, ne quis arbitretur his locis abruptos esse numeros, ac hiantes, qui debeant maximè componi, utq; in hoc genere sint parciores, quicunq; cupiunt haberi compositi, & elegantes. Multa sunt quæ nō oportet elidi, ut quæ cōcisa intelligēdi uia claudunt, & quæ integra nullā pariunt audiēti sonorum fœditatem. Nec satis scio tempus ne patiatur in usum uocari, quod praua loquētium cōsuetudine exolcuit. Alterū uitij genus est in eiusdē pedis cōtinuatione. Aut enim uersum facit, aut partē uersus, aut tardius remoratur cursum flumenq; dicēdi, aut celer nimia mobilitate corripitur, aut temperatus in generat tediū similitudinis, aut certè inuisam quādā ostētat affectationē. Aliud est, ne strepitū plusquam heroicū, & ueluti sonoram tempestatem & confragosam ciere numerus iste conetur. Vehemēter errāt ij qui componendi fructū constituūt in agresti uastāq; grandiloquentiæ uoce, dextri (si dijs placet) & graues, tum cū

sonorum magnitudine rupere buccas, & horrenda tonitrua concitarunt: ut quidam sic, Obscenitatem uerborum etiam in fulminandis uitijs deuittauit. Quauis sublimis & ardua, hoc tamen immani sonitu pressior atq; moderatior esse debet oratio. Aut certè Demosthenes & Cicero, quid esset altum, uehemens, magniloquum, fulmineum, nescierunt. Vterque certè fugit extumescentem illam quorundam poëtarum uastitatem. Peccatur aliter in traiectione uerborum. Sunt enim qui studio componendi structuram implicant, & confusione permiscent, uerba de loco suo longè summouent, & in alienum traiciunt, quò melius aut cadat aut uoluatur oratio. hoc modo quidam, Platonis in Protagora sententia uidetur esse, eas artes quæ ad uictum pertinent humanum, prouidentiam humanam repperisse. Obliquus ille casus, Platonis, & hoc epitheton, humanum, uitiosè traiectum est. Quid si tenuisset hunc ordinem? Sententia Platonis est in Protagora, eas artes quæ ad humanum uictum pertinent, humana prouidentia repertas esse? Tria uitia fugisset, unum traiectionis, alterum constructionis ambiguae, tertium numeri cadentis in uersum. Teneendum est id quod diximus libro superiore, in ordine uaturæ manendum, quoad patietur ratio componendi. Nihil est ridiculum magis, quàm inopportunas elegantias (si modò ineptiarum sunt elegantiae) affectare. His adde uitium à M. Tullio notatum, quo fracti concisiq; numeri in quoddam genus abiectum incidunt. Id autem fit quum cæsim membratimq; dicitur, nulla interposita comprehensione. Nam circuitu quasi crepidine breuiores particulae uinciuntur, et tædium crebrae percussione quam finis multus elidit, aufertur. Magna res est amicitia. Amicus est alter ipse. Illi conuenit te-

cum.

cum. Pars est animæ tuæ. Gaudenti arridet. Mœrentem solatur. Sua communicat. Tua non expetit. Non spoliatur fortunatum. Comitatur infelicem. Quod odisti, non amat. Quod amas, non odit. Quod cupis, illi cordi est. Quod reijcis, non admittit. Eiusmodi sensiculi crebrò quatiunt aurem: & si continuantur, animum & memoriã fatigant. Sunt illi quidem uersiculorum persimiles, quibus neque dignitas inest, neq; uoluptas. Id genus qui continuare non let, interponet ambitum, nunc breuem, nunc longum, pro cuiusque naturæ sententia. Sunt & qui inania uerba inserciunt, quasi cõplementa numerorum, ut ipse, ipsa, ipsum, ille, quidem, certè, sanè, profecto, hercle, loquitur dicitq; facit & agit, taceret & sileret, prosequitur & sectatur, doctus eruditusq;. Sunt alia generis huius multa, quibus rimas implent ij qui steriles elocutionis, inani uerborũ copia redundant. Reperias qui una propè mensura sententias æquant, eodemque modo terminant, & qui segni numero languescunt, & qui claudicant inæqualitate, et qui capiti grandiori tenue corpus assuunt, qui que perpetua uerborum serie persusi, uix tandem modum inueniant longissimæ catenæ. Sed omnium molestissimi uidentur, qui uerba ambitiose delecta contexunt numero quodã poetico, in quo Mæcenatis illud à Quintiliano reprehenditur, Sole et aurora rubet plurima. Inter sacra mouit aqua fraxinos. Ne exequias quidem unus inter miserrimos uiderem meas. In hoc flagitium decidunt ij qui nescientes rectum genus eloquendi, frustra sese attollere conantur. Ne sit igitur hiatus & aspera cõcursione literarũ interseptus numerus primorum & extremorũ. Ne pes idem frequentius iteretur. Ne turgida magnitudine numerus intumescat. Ne molestiam pariat traiecta constructio. Sed etiam
in quo

in quo peccauit Thrasymachus, & Hegesias, & recetiorum plurimi, numerum cōcisum clumbemq; interiecta periodo uitabimus. Addemus interdum particulas ad explendum numerum, sed utiles: detrahemus aliquādo, sed ociosas. Incisiones metiemur impares, si plures erunt: nec mēbra omnia & circuitus longitudinis eiusdem esse patiemur. Numerum pigrum & languentem incitabimus breuiorum syllabarum interpositione. Claudicantem æquabilitate pedum corrigemus. Pedes æquabiles accipio, qui eodem propè tenore gradiuntur. Ad præscripta capitis lineamenta, partes corporis efformabimus, nec tam longos circuducemus ambitus, ut neq; memoria teneri, neq; auditoris animo cōcipi, neq; cuiusquam spiritu transigi possint. De circuitu postea, nunc imitati eloquentiæ Romanæ principem, moueamus quæstiones, quibus explicatis, numerorum uis omnis aperietur. Et si quæstio primas habet in disciplinis, nō tamen inutile fuit, neque ordine præposterum, ea statuisse principio, quibus dubitationū pars optima solueretur.

Quæ de numero quæri expediat.

CAP. XV.

IN his quæ numerosæ compositionis ignarus addubitet, hoc omnium primum sit: Sit'ne omnino ulla numerosa oratio? Esse in oratione numerum quendam testificatur Aristoteles, Theodectes, atq; Theophrastus, qui scientia philosophiæ præclari de numero scripta reliquerunt. Testis est locuples Dionysius Halicarnasæus, cuius opus extat egregium tum de alijs uirtutibus orandi, tum de numeris oratorum. Testis grauißimus Cicero, qui plura de numero quàm ueterum quisquam literis mandauit. Quid? fatentur

fatentur & orationis inimici esse nescio quid in oratione
 numerosa, quod molle & effeminatū, uti lenocinio quo-
 dam, sic blāda uoluptate capiat aureis nesciorum. Ad hęc
 ratio ostendit, quemadmodum numerus in uersu pedum
 collocatione perficitur, sic & eorum artificiosa constru-
 ctione citra uersum oratorium numerum cōfici posse. Sed
 primus autor est sensus, sensus inductionis ac rerum singu-
 larium magister. Sentiant aures in oratione composita uo-
 luptatem, quam in dissoluta reperire non possunt: quarum
 monitus qui respuunt, initium doctrinæ mihi uidentur
 aspernari. Aures igitur audiant orationes Isocratis, au-
 diant Demosthenis, audiant Ciceronis, & aliorum qui-
 cunq; eloquentia floruerunt: in illis uim esse modulatam,
 & quoddam musicæ genus, unde recreentur ipsæ, cōstan-
 ter affirmabunt. Quod si quis arbitratur eam delectatio-
 nem à bonitate uerborum ac figurarum moueri, dissoluat
 orationem aptè conditam, rem omnem seruet ac uerba, si-
 guras teneat easdem, ordinem paulum commutet, uniuersus
 decor abscefferit. Commutetur hęc oratio, Nulla est
 enim tanta uis, tanta copia, quæ non ferro ac uiribus debi-
 litari frangiq; possit. fac sic, quæ non ferro ac uiribus pos-
 sit debilitari frangi que: uenustas omnis excidit. Quid
 ita? In locum dichorei successit spondeus & palimbac-
 chius. Id sentiunt aures, aut si ne sentiunt quidem, a fini-
 sunt ad lyram, nō hominis. Est igitur in oratione quidam
 numerus ex apta pedum compositione. Quis inuenit illū?
 Thrasy-machus Chalcedonius, Isocrates expoliuit. Nam
 quum Thrasy-machus minuta, & uersiculorū similia quæ-
 dam, nimiumq; depicta prodidisset, et id Isocrati nō pro-
 baretur, primus instituit dilatare uerbis, & mollioribus
 numeris explere sententias. Scribit hęc Cicero in orato-
 re. Re

re. Repugnare sibi uidetur in Bruto. Ante hunc, inquit, uerborum quasi structura, & quadam ad numerum conclusio nulla erat. Non repugnat tamen, quia Thrasyarchi numeri neque perfecti neque conclusi fuerunt. Quæ causa numerum effecit? id est, quo duce inuenit illum Thrasyarchus? Natura, atque sensu. Illa parens ut in agro sine opera nostra, sic & in animo multa sponte fundit. Naturam imitatur ars, & obseruatione præcepta gignit. Itaque quum priores agitante natura aliquid conclusè aptè quæ dixissent, & homines ætatis eius aliquid etiam casu præclarè dicerent, id quæ auras & animum acerrimi uiri pelleret, paulatim genera notauit, & obseruando confecit artem. Eadem ratione, hoc est cognitione aurium, obseruatione prudentiæ, inuentus est ambitus, & usu notatum est, quæ comprehensiones aut immoderatiùs excurrerent, aut citius æquo terminarentur, aut modicè laberentur ad æquam dimensionem. Nec enim mathematica demonstratione, uel necessitate conclusio numerum, cognitus est numerus & circuitus, sed è seminario naturæ profectus, aurem titillauit amica uoluptate, & ille lapsus in animum, quodammodo se iussit obseruari. Mens (quam ueteres numerum dixeret) suauibus affecta modis, quid esset quod tantopere delectaret, propius inspexit. eo quod fortuito exciderat, tanquam regula quadam appposito, rudem materiam in eandem rationem mensuram quæ direxit. Vna, altera, tertiæ quæ sic expolita, quum haud minus oblectaret atque prima, signatus est locus: & hæc fuit origo præcepti. Quærendum deinceps, quid sit numerus, quæ quæ debeat ratione finiri. Numerus est orationis apta modulatio ex interuallorum breuium longiorum quæ uarietate. Interualla dicimus, ut antea, tempora syllaba

syllabarum, & spacia quæ in efferendis uerborum partibus transiguntur. Quæ breuibus & longis oratio temperata, & ad aurium mensuram terminata, iucundè progreditur, & aptè cadit, ea dicitur esse numerosa. Quæ uerò breues & longas, sed intemperatè & incompositè mixtas habet syllabas, quia nullius est aptioris modi, carere numero, & errare uagè fertur. Ex quibus intelligitur id esse numerum in oratione, quod est metrum in uersu: cum quæ constare pedibus non temere abiectis, sed pulchrè & decenter incedentibus, donec aurium imperio iubentur insistere. Non est numerus ea sententia de qua agitur, non ipsa uerba, non concinnitates & figuræ, non ij qui tropè nominantur, non pedes, & eorum tempora, non incisa, aut membra, aut ambitus, sed pedum ordine positorum quidam pulcher incessus, & ueluti quædam orationis expositio, & palestra. Sit tanquam palestra, quoniam decenter mouet orationem. Sit expositio, quia excolit elocutionem. Sit quidam modus, propterea quòd mensura quadam continetur. Sit modulatio & quædam musica, quandoquidem obscuro concentu delectat aures. Sit uinculum uerborum, eò quòd ligat atq; connectit dictionis partes. Sit ornamentum, quo uestita sententia, nò expeditior modò, et accincta magis, sed pulchrior atq; uenustior habeatur. Est ne numerus unus, an plures? Plures quidem certe. Nam si pedes sunt numeri, quo nomine non semel à Cicrone donantur, totidem erunt numeri, quot incedunt pedes in oratione. Omnes autem simplices ingredi supra demonstrauimus. Sin numeri compositi, multisq; dimensionibus aptè quadrati fuerint, plures quoq; erunt, aut quâtitate aut qualitate aut alia ratione distincti. Quantitate, ut breuis lógus, par, impar, magnus paruus, còtinuus

interru

interruptus. Qualitate, ut tristis iucundus, suavis asper, anxius seuerus, elegans inuenustus. Alia ratione, ut celer, tardus. Vbi numeri ponuntur? In omni parte, totaq; continuatione uerborum. Nullus est locus in oratione composita, qui numero omnino uacare debeat. At initia & cōclusiones sicut attentius audiuntur, ita accuratius quàm media componi uolunt. Non dico media semper oportere negligentius aptari, sepe enim quàm optimè collocantur, sed si quis incompositior esse uelit, habere illum media, ubi malit occultare negligentiam. Quando numeris utimur? Semper. Memini me dixisse antea, non uti semper oratores, qui uel alijs rebus occupati, uel bonitate rerum uerborum que contenti, uel sponte dissoluti relaxant hoc uinculum. Illud est non funditus auferre, sed paucis in uerbis connectere securius. Cæterum nemo peritus huiusce connexionis artifex, sic resoluit uniuersum opus, ut sine lege solutum feratur. Ad quid utimur? Ad aurium uoluptatem, quibus orator, ut sine tædio perferatur, aliquid oblectationis administrat. Hoc officium quàm sit utile, multis antè uerbis apertè monstrauius, ne quis uel natura, uel moribus seuerior bellum huic generi uoluptatis inferret. Quemadmodum numerus adhibitus aliquid uoluptatis affert? Eo modo sensum animumq; delectat, quo uersus & cæmen. Natura capitur modis. In numeris autem modus est quidam & concentus obscurus, tum ex cuiusque uocis accentu, tum ex interuallorum breuitate & longitudine. Quid opus uerbis? Non est anxie discutiendum quemadmodum uoluptate afficiat animum nostrum, quum omnibus qui hominis aliquid habent, suauem esse constet atq; iucundum. Quærendum potius, qua ratione componatur, & quibus rebus debeat accommodari. Sed horum alterum

alterum iam diximus, alterum postea dicemus. Interea de ambitu, in quo maximè rhythmus conspicitur, quot habeat partibus, quantumque recipiat longitudinem, paribus an imparibus efficiatur particulis, quando maximè deceat, explicanda nobis sententia est.

De ambitu.

CAP. XVI.

Ambitum Græci περιόδος, Latini aut circuitum, aut comprehensionem, aut continuationem, aut conuersionem, aut circumscriptionem appellant. Nam quòd huiusmodi circuncurrens oratio suum numeris explet orbem, & cōtinuato cursu non antè requiescit, quàm totum circuli spatium confecit, hæc eiusdem rei nomina multa suscepit. Describitur ab Aristotele hoc modo: Circuitus dictio est quæ per se principium & finem & conspiciuam habet magnitudinem. Duobus autem modis intelligitur. Oratio longiuscula, quamuis incōposita membris, ambitus aliquando nominatur, ut, Animaduerti Iudices, omnem accusatoris orationē in duas diuisam esse partes. Stetit soleatus prætor populi Romani, cum pallio purpureo, tunicaque talari, muliercula nixus in littore. Sed hoc genus orationum diuidi potest, ac in plura incisa partiri: quamobrem tutius est affirmare circuitum duabus pluribusue constare particulis, nunc confusioribus, ut, De pressam, cæcam, iacētē domum pluris quàm te, & quàm fortunas tuas aestimasti. Nunc distinctioribus, ut, Antequam de Repub. P. C. dicam ea quæ dicenda hoc tempore arbitror, exponam uobis breuiter consilium & professionis & reuersionis meæ. Est igitur breuissima comprehensio ex duabus partibus. Is enim profectò mortem attulit, qui causa mortis fuit. Sunt interim mēbra paulo
o fusiora

fusiora, ut hæc, Grati simus in eius morte decoranda, cui nullam aliam gratiam referre iam possumus. & hæc, Ac de hac quidem diuina atq; immortalī laude Bruti silebo, quæ gratissima memoria omnium ciuium inclusa, nondū authoritate publica testata est. In hac oratione tria quidē membra sunt, sed ea in duo longiora conſlamus, propter ea quòd duo posteriora quasi fusa sunt in unum. Quod in ſimilibus faciundum cenſeo, ne minimas quasq; totius corporis, ſed maiores ac præcipuas numeremus partes. Componitur etiam periodus ex tribus membris. Etenim quum legatio ipſa mortis cauſa fuiſſet, eius monumentum extare uoluerunt, ut in bellis periculosis obirent homines legationis munus audacius. Miſcētur aliquādo partes, ut in his duabus orationibus: Cæteris autem, ſi errorē ſuum depoſuerint, in Reip. gratiam redierint, ueniā & impunitatem dandam puto. Hanc ego epiſtolam P. C. non quò illum dignum putarē, recitauī, ſed ut conſeſſionibus ipſius omnia patefacta eius parricidia uideretis. Pulchrior eſt ambitus ex partibus quatuor. Author eſt Cicero. Conſtat, inquit ille, ambitus & plena cōprehenſio ē quatuor ſerè partibus, quæ mēbra dicimus, ut & aures impleat, & ne breuior ſit quàm ſatis ſit, neq; longior: quanquam utrūq; nōnunquam, uel potius ſæpe, accidit, ut aut citius inſiſtendum ſit, aut longius procedendum, ne breuitas aureis defraudaffe uideatur, ne uel longitudo obtuſiſſe. Sed habeo mediocritatis rationem. Nec enim loquor de uerſu, & eſt liberior aliquāto oratio. Quatuor igitur quaſi hexamētrorum inſtar uerſuum quod ſit, conſtat ſerè plena cōprehenſio. hæc Cicero. Eiufmodi circuitus hoc ſit exemplum. Si quātum in agris locisq; deſertis audacia poteſt, tantū in foro atq; in iudicijs impudentia ualeret, non mī-

nus in caussa cederet A. Cecinna Sexti Ebutij impudētiae, quàm tum in ui facienda cessit audaciæ. Nō ubiq; seruatur hæc longitudo. Nūc enim curtiora, nunc lōgiora mēbra componuntur. Curtiora sunt hæc: Quasi uerò aut in iudicio possit idem improbitas, quod in ui confidētia: aut non eo libentius tum audaciæ cesserimus, quo nunc impudentiæ facilius obsisteremus. Productiora quæ sequuntur: Quæ fama nō idcirco solum emanarat, quòd iste certè statuerat ac deliberauerat non adesse, uerùm etiā quòd nemo quenquam tam audacem, tam amentem, tam impudentem fore arbitrabatur, qui tam nefarijs criminibus, tam multis testibus euietus, ora iudicum aspicere, aut os suum Populo Romano ostendere auderet. Sæpe comprehensio quinque partibus constat. Videte igitur quàm iniquè accidat, quia res indigna sit, ideo turpem existimationem sequi: quia turpis existimatio sequatur, ideo rem indignā non uindicari. Porrectior est hic ambitus ex totidē membris: Venit mihi in mentem M. Catonis hominis sapientissimi, qui quum se uirtute, non genere, populo Romano commendari putaret, quum ipse sui generis initium ac nominis ab se gigni & propagari uellet, hominum potentissimorum suscepit inimicitias, & maximis in laboribus usque ad summam senectutem summa cum gloria uixit. Procurrit ambitus in sex particulas. Nam quum hic Sex. Roscius esset Ameriæ, Titus alter iste Roscius Romæ, quum hic filius asiduus in prædijs esset, quumq; se uoluntate patris rei familiari uitæq; rusticæ dedisset, iste autem frequens Romæ esset, occiditur ad balneas Palatinas rediens à cœna Sex. Roscius. Progreditur & lōgius, ut hic: Posteaquā uictoria constituta est, ab armisq; recessimus, quum proscriberentur homines, atque ex omni re-

gione caperetur ij, qui aduersarij fuisse putabantur, erat ille Romæ frequens, atq; in foro, & in ore omnium cotidie uersabatur, magis ut exultare uictoria nobilium uideretur, quàm timere ne quid ex ea calamitatis sibi accideret. Aliquando colligatur res in longam catenam, quod sicut historicis est familiare, ita non alienū oratoribus, ut M. Tullio. Quum autem hic de rheda reiecta penula desilisset, seq; acri animo defenderet, illi qui erant cū Clodio, gladijs e ductis, partim recurrere ad rhedā, ut à tergo Milonem adorirentur: partim, quòd hunc iam interfectū putarent, cedere incipiunt eius seruos, qui post erant: ex quibus qui animo fideli in dominum erant, & præsentes fuerunt, partim occisi sunt: partim quum ad rhedam pugnari uideret, domino succurrere prohiberentur, Milonē occisum esse etiam ex ipso Clodio audirent, fecerunt id serui Milonis (dicam enim nō deriuandi criminis causa, sed ut factum est) neq; imperante, neq; sciente, neq; præsente domino, quod suos quisq; seruos in tali re facere uolisset. Est igitur in circūscriptione uarietas, quæ tū partium multitudine, tum dispari longitudine creatur. Eam qui commodè interseret ut rerum natura poscet, & suauiores explebit numeros, & tædiū satietatis effugiet. Interim tam multæ particule, tot uerba dissoluta, hoc est *ὁμοῦ ἄρα*, tot interpositiones ueniunt in unā continuatiōnem, ut neq; facile separari, neq; distinctè numerari queant. Quod quum accidet, illam minutarum rerum uerborumq; congeriem in pauca referre membra expediet, ut ambitus partes modumq; tenere possis. Quicquid est tam fusum, tamq; multiplex, quia uix tandem capit finem, animam fatigat, & implet satietate: quamobrem suauitate numerosa caret, etiamsi pedes neque sunt inconditi, neq; dissipati

dissipati. Vt in alijs rebus, sic & in orationis excursu
 modus est tenendus, ut ne breuior ne'ue longior sit, quàm
 qui aurium seueritate probari possit. Nimia breuitas, &
 rursus redundans effusio, offendit audientem. Hic itaque
 dubitet aliquis, quod necesse sit concurrere pedes ad ex=
 plendam circumscriptionem? Frustra profectò numerum
 querat. Perficiunt interdum decem pedes, quod triginta
 coniuncti non efficiunt. Nec cur ita sit, quispiam ratio=
 nem inuenit. Sensus est iudex, qui mutila ac redundantia
 deprehendit, moderata cognoscit, & ad id quod medio=
 cre est, insito desiderio fertur. Exercendus est igitur in
 concinendis ambitibus oratorum principum, ut longa
 consuetudine ducat habitum, & expedite parem tenere
 cursum possit. Exercendus in scribendo dicendoq; multa,
 quorum mensura sit æquata periodis eloquentium uiro=
 rum. Non omnes acerrimo sunt iudicio. Exercendæ sunt
 igitur aures uti musicorum, quò percipiant emenso spa=
 cio, ubi debeat extrema fieri percussio, & pulmo anhe=
 lans inter inspiratione recreari. Nulla sunt hac de re præ=
 cepta, nullæ conditæ leges. In obseruatione & usu posi=
 tum est hoc negotium. Confirmat Quintilianus his uer=
 bis: Enimuero spacia ipsa, quæ in hac quidē parte pluri=
 mum ualent, quod possunt nisi aurium habere iudicium?
 Cur alia paucioribus uerbis satis plena, uel nimium, alia
 pluribus breuia & abscissa sunt? Cur in circūductionibus
 etiam quum sensus finitus est, aliquid tamen loci uacare
 uideatur? Vtitur ad hoc Ciceronis exemplo: Neminem
 uestrū ignorare arbitror Iudices, hūc per hosce dies ser=
 monem uulgi, atq; hanc opinionē populi Romani fuisse,
 C. Verrem altera actione responsurum non esse, neque
 ad iudicium affuturum. Cur hosce potius quàm hos? Ne=

que enim erat asperum. Rationem fortasse non reddam, sentiam esse melius. Cur non salis sit, sermonem vulgi fuisse? Compositio enim patiebatur. Ignorabam, sed ita, ut audio, hoc animus accepit, plenum sine hac geminatione non esse. Ad sensum igitur referenda sunt. hæc ille. Cicero in Bruto : Nam & aures ipsæ quid plenum, quid inane sit, iudicant, & spiritu quasi necessitate aliqua cōprehensio terminatur: in quo non modò defici, sed etiam laborare turpe est. Omnes ferè longitudes quæ iucundè cadunt in aurem, proditæ sunt à poëtis. Nec pares orationes ducere, peccatum est, si modò compositio poëtica uideatur. Sunt orationes pares dimetris, ut, Minuebat uestigalia. Pares trimetris, ut, O' frustra, inquit, suscepti mei labores. Pares tetrametris, ut, Si extitisset in rege fides, nihil sapientius Posthumus. Pares hendecasyllabis, ut, Calceos & uestimenta mutauit. Sunt ex duodecim syllabis, sicuti asclepiadei, ut, O' cogitationes inanes meæ. Sunt æquales pentametris, ut, Publicam dilapidabat pecuniam. Sunt & æquè longæ atq; heroicus uersus cum elego, ut, Fide sapientiâq; uestra fretus plus oneris sustuli, quàm ferre me posse intelligo. Quid moror? Nullū carmen est, cui nō aliqua oratio soluta possit æquari, uel numero syllabarū, uel temporū quantitate. Heroici poëtæ sententiā unam cōplectūtur aut hemistichio, aut integro uersu, aut uersu cum pede, aut uersu cū hemistichio, aut duobus uersibus, aut duobus uersibus cum pede, aut totidem cum hemistichio, aut tribus, aut pluribus. Quæ res apertè demonstrat non esse certum terminum finemq; comprehensionis, orationem extēdi pro rerum magnitudine, & auris iudicio. Quum senties in orationibus doctissimorum plures circuitus imperfectos esse atque suspensos, adiungito proximas

proximis partes, & continuato uoce quod sequitur: nisi forte tam alienum sit, ut nihil omnino superiorū uim perficere uideatur. Partes ambitus sunt incisiones & membra, de quibus antè mentionem fecimus: quæ ut uariantur in circuitu, paucis quæstionibus agendum est. Quantos circuitus facere decet? Quantos subiecta res patitur, & spiritus indefessus sustinere potest. Nunc enim breuiiores fiunt, nunc longiores: ut exempla quæ paulò antè produximus, ostendunt. Decet ne æqualiter particulas incidere? an facere alias breuiiores, alias longiores? Vtrunq; loco decet. Aequalitas in exacto numero pulchra est, sed & inæqualitas in illo non erit turpis. Cauendum tamen est ne quum priora mēbra proccra fuerint, posteriora attenuentur in angustum. Eiusmodi comprehensio excrescet in caput, ac cœptum nullo modo perficiet. Cōtrā decebit posteriorum lōgītudo porrectior, quæ à capite mediocri iustum corpus extēdet, & speciem modulationis hac ratione faciet auctiorem. Quando breuiiores, & quando longiores trahentur? Quando res id postulabunt. Res breuis explicanda uerbis est: quid opus est illam onerare uerbis ociosis? aut dilatandi studio cōfundere sententias? Si tenue genus est, & paruum, quod facilitatē querit, & usitatum loquendi morem, quid est necesse contexere longas periodos ex membrorū prolixitate? Videndum quid res uelit, & propositum dicendi genus tenendum est. Res est copiosa? Auge uerba quibus exprimatur. Quòd si genus aut suaue est, aut temperatum, aut fustum & historicum, fac illi membra tractiora respondeant. Cur aliquando minora fiunt, aliquando uerò grandiora? Rerum uarietas, generis obseruatio, delectationis aucupium peperit hoc discrimen, Vtris partibus utendum est? an incisis, an

membris? Vtrisque miscenda est oratio. Nihil enim peius quam unam & eandem tenere formam. Cæsim dixeris, constitues membra, post membra conclusionem. Nullum tædiū gignet illa uariandi iucunditas. Pluribus, an singulis partibus utendum? Vtimur singulis quum cæsim membratim uel dicimus, pluribus quum duas plures uel particulas circunducimus in orbem. his & illis promiscuè utuntur oratores. Alia de usu comprehensionis huc adijci possunt, sed opportunius aliquando dicentur. Veniendum est tandem ad figuras formasq; dicendi. Exprimendus est ille character omnium difficilissimus, ut planum fiat quæ cuiq; generi uerba, quæ iunctura, quæ concinnitas, qui numeri conueniant. Alioqui inutilia uidentur ea uerborum genera, quæ libro primo ad hunc usum distinximus: & alia ornamenta quam potissimū uestiant orationem, incertum ac indefinitum relinquitur.

Tria genera eloquendi, qui characteres dicuntur.

CAP. XVII.

Veteres omnes ab Homero tria fecere genera dicendi, ἱχθὺν, id est gracile: μέσον, medium: ἄφθον, plenū & copiosum. Gracili uenustatem, medio suauitatē, uberi uim amplitudinemq; tribuerunt. Primum à Cicerone dicitur aut acutū, aut tenue, aut enucleatū, aut subtile, aut pressum, aut callidum, aut summissum, aut humile, aut gracile. Alterum aut interiectum, aut intermedium, aut suaue, aut temperatum, aut mediocre, aut equabile. Aliud grandiloquum, amplum, graue, uehemens, acre, robustum, ardens, copiosum. Hanc tripartitam formarum diuisionem rerum

rerum ipsarum natura monstrauit. Omnia quæ dicenda subiiciuntur oratori, aut sublimia, aut humilia, aut intermedia sint necesse est. Vt id confirmetur, quod satis per se constat, nulla opus est demonstratione. Quum autem uerba & eloquendi genera rebus aptari debeant, & elocutionem citra rerum decorum contemnat orator, tot styloꝝ species esse, quot rerum dicendarũ genera sunt, oportet. Præterea ratio sonorum quibus omnis accommodatur actio, treis statuendos esse characteres apertè dicentibus ostendit. Nam quũ uoces aliæ sint graues, aliæ acutæ, aliæ temperatæ, non deceat acria & acuta pronunciare summissè, summissa peracutè, media uel abiectè uel elatè. Nec enim sensus patitur uoces à compositione, cõpositionem à materia dissentire. Quãobrem summissioni uocis rerum tenuitatem, clamori magnitudinem, medioꝝ critati temperatiam accommodauit ars eloquendi: & tot orationum, quot erant sonorum, statuit figuras. Deinde uidebantur inter oratores, qui non ita longè uulgus & rerum gracilitate, & uerborum trita consuetudine superarent: & alij contrà, qui dignitate sententiarum, & grauium maiestate uerborum, communem disertorum eloquentiam lōgo interuallo præcederent: & alij multi, qui mediũ quoddam tenerent iter, illis ornatiores, his autem summissiores. Ex quibus omnibus facile deprehensum est quot duce natura florent omnino genera dicendi. Ad hæc, quum extrema duo certũ & definitum cepissent locum, media autem essent incerta & infinita, quumq; genera pauca cõstitui oporteret, ad docendũ nihil fuit neq; melius neque certius, quàm (ut fit in quantitate finita) sic facere duos fines, & mediũ: & quæ proxima finibus essent, ad fines referre: quæ medio uerò, ad medium reduce-

re. Positæ sint ergo nobis tres figuræ formæq; dicendi, humilis, media, sublimis: & ad singulas exprimendas ex ordine sermo conferatur, si prius satisfecerimus ijs qui plures esse elocutionum species arbitrantur. Enumerant scriptionum nulle formas, in quibus sunt epistolæ tam uariæ, quàm quæ tabellis committi solent, panegyrici, laudationes, deliberationes, conciones, causse iudiciariæ, annales, historiæ, fabulæ, apologi, apophthegmata, annotationes, commentarij, interpretationes, artium liberalium & illiberalium descriptiones, comœdiæ, tragœdiæ, mimi, satyræ, bucolica, georgica, epigrammata, epitaphia, nania, elegi, argumenta, sylux, odae, heroica, & alia carmina generis diuersi. Contendunt tot tantasq; res tribus illis figuris haud posse comprehēdi, singulis earum propriam quandam rationem conuenire, qua quidem absente nomen suum retinere non possint. Confirmant esse totidem uel dicendi uel scribendi species, quot fuerunt aut sunt idonei scriptores. Omnes certè quidem probari, nec duos unquā per omnia similes inueniri. Hæc si uera sunt, ut sunt, manifestò colligi plures esse characteres, quàm uulgus imperitorum existimet. Verum quidē loquuntur, uarias esse materias, & carminibus, & orationibus, & neminē unquam scribendo alteri cuiquam similem fuisse: sed hoc non efficit illam rerum multitudinem in tria genera cadere non posse. Innumerabilium rerū pauca genera sunt, ut aquarum fontes. Singulorū, uti scriptorum (partes imas intelligo) nulla conditur ars, quoniā ars est communium, ut generum atq; formarum. Partes singulæ referuntur ad sensum, & norma communium dirigantur, hoc est, notione generis & formæ iudicantur. Singulis scriptoribus aliquid est peculiare, quod nō à disciplina, sed

na, sed ab ingeniorum uarietate proficiscitur. An ideo innumerabilia styloꝝ genera persequemur? Num quod ora hominũ diuersa sunt, infinitas illorum species distinguimus? Num equorum? Num animantium ceterorum? Illa quæ dicuntur *συμβεβηκότα*, species nõ immutāt. Quod si poetarum materiae & ornamenta plurimum differunt, si oratio soluta in rebus & uerbis multas habet facies, sciteamur esse multas species scriptionum, quæ ex trium generum cognitione, quid habeant commune, quid autem proprium, usu & exercitatione patefiunt. Si omnia mandentur arti, nullus erit scribendi discendiq; modus. In artem redigantur illa, unde cetera minimo negotio intelligi iudicariq; possint.

De humili stylo.

CAP. XVIII.

Primum uidendum quod sit gracile & tenue filũ orationis. Et quoniam oratio cõstat rebus & uerbis, & primas habet subiectæ res, sine quibus inanis est et inutilis uerborum compositio, dicendũ principio quæ sententiæ humili ornatu uestiantur ab ijs qui non omnia eodem modo subtiliter, sed grandia elatè, media temperatè, parua tenuiter dicunt. Qui perpetuò terit unam eademq; uiam, & in uno genere gracili uersatur, non est is conatennendus orator, non magis quàm Lysias scriptor subtilis, & alij permulti: sed maior est ille qui se in rerũ formas dicendo transmutare potest, & sententijs imparibus imparcm ornatum circundare. Gracili filo texuntur partitiones, ut hæc, Ostendam primò causam non fuisse cur à prætoribus postulares ut bona P. Quintij possideres, deinde ex edicto te possidere non potuisse, postremò nõ possedisse. Eadem textura definitiones aut descriptiones

ptiones, ut quæ sequuntur : Nonne, si uerbum sequi uolumus, hoc intelligamus necesse est, eum detrudi, cui manus afferantur? Necesse est, inquam, si ad uerbum rem uolumus attingere, neminē statu detrusum, qui non adhibita ui, manu demotus, et actus præceps intelligatur. Deiectus uerò quī potest esse quisquam, nisi in inferiorem locum de superiore motus? Quid est enim tumultus, nisi perturbatio tanta, ut non maior timor oriatur? Descriptionibus adde expositiones earum, qualis est hæc: Maiores nostri tumultum Italicum, quod erat domesticus: tumultum Gallicum, quod erat Italiæ finitimus, præterea nullum tumultum nominabant. Huc refer interpretationes edictorum, testimoniorum, legum, epistolarum, & id genus rerum. Ad eandem tenuitatem referuntur distinctiones, ut ea quam ascripsimus. Aliud est iudicium, aliud est arbitrium. Iudiciū est pecuniæ certæ, arbitrium incertæ. Ad iudicium hoc modo uenimus, ut totam litem aut obtineamus, aut amittamus. Ad arbitrium hoc animo adimus, ut neq; nihil, neque tantum quantum postulauimus, consequamur. Eodem ornatu uestiuntur colloquia, & leuium rerum narrationes. Age uerò, quæ erat aut qualis quæstio? Heus ubi Ruscio? ubi Casca? Clodius insidias fecit Miloni? Fecit: Certa crux. Nul las fecit: Sperata libertas. Quid hac quæstione certius? Illud colloquium, hæc rei leuioris narratio. Milo autem quum in senatu fuisset eo die quoad senatus dimissus est, domum uenit, calceos & uestimenta mutauit. Paulisper dum se uxor (ut fit) comparat, commoratus est. In leuius narrationibus ferè sunt ea, quæ iocantur. Quum autem uer esse cœperat (cuius initium iste non à Fauonio, neque ab aliquo astro notabat, sed quum rosam uiderat,

derat, tunc incipere uer arbitrabatur) dabat se labori, atque itineribus, in quibus usque eò se præbebat patiētem, atq; impigrum, ut cum nemo unquam in equo sedentem uideret. Nā (ut mos fuit Bithyniæ regibus) lectica octofofo ferebatur, in qua puluinus erat perlucidus Melitensi rosa sanctus. Ipse autem coronam habebat unam in capite, alteram in collo, reticulumq; ad nares sibi apponebat tenuissimo lino, minutis maculis, plenum rosæ. Narrationes eius rei in qua maximè causæ uersatur, quæ res nisi apertè demonstrata fuerit, officiet causæ uel plurimum, à Cicerone oratione tenui solent explicari: ut prima narratio pro Sexto Roscio. Quas igitur numerauimus partitiones, definitiones, descriptiones, distinctiones, narrationes, confabulationes personarum, ideo potius gracilitate gaudent, quòd nihil aliud uolunt, quàm purè & dilucidè & usitato sermone mōstrari. In quo genere sunt argumēta subtilia, quæ acutè colligunt, clamores & tragœdias non excitant. Quid stultius esset illo, qui relicto probandi more, longam & subtilem argumentationis continuationem grandi uestiret oratione? Id neque dialectici ueri, neq; eloquentiæ principes committunt, ut acumen dissendi, & rationum abstrusam minutamq; naturam, lenocinio uerborum molliant, & carnem candidam malint quàm neruos & ossa. Pugnant acriter, & ab usitato more disputandi non recedunt, ut hīc Cicero: Patrem occidit Sextus Roscius, qui homo? adolescentulus corruptus, & ab hominibus nequam inductus? annos natus magis quàm draginta? uetus uidelicet sicarius? homo audax, et sæpe in cæde uersatus? At hoc ab accusatore ne dici quidē audistis. &c. Nihil refert confirmationem an refutationem intelligas, si modò teneas alias argumentationes fieri magis ad pro-

ad probandum, alias autem ad mouendum: illas esse tenues, has uerò graues & ardenteis. Ne quis autem putet esse dissentaneum & absurdū, in caussa graui atque sublimi partes inueniri humiles & leues, id efficit earum rerum quæ dicuntur, impar & inæqualis ratio, quæ subinde stylum mutaret, si aut ars, aut artis optimus imitator haberet orationem. Quod si Trapezuntius intellexisset, nunquam pronunciasset, omnes M. Tullij dictiones arduas ac sublimes uideri. Sunt enim caussæ totæ graciles, ut pro Quintio de societate, pro Cecinna de fundo, pro Roscio Comædo de debito. Venerant in quæstionē parue res, & indignæ summis eloquentiæ uiribus. Quum fama & caput saluum est, res familiaris aliqua ex parte uenit in discrimen, multo magis decet callidè & enucleatè dicere, quàm tonitrua Periclis in re leui concitare. In omni oratione quædam figuræ sunt, quæ multo melius tenuiter ac pressè dicuntur, quàm grauitè & elatè, ut extenuatio sui: Verum ita se res habet, ut ego, qui neq; usu satis, & ingenio parum possum, cum patrono discretissimo comparer. Extenuatio alterius ridicula: Non quò ei deesset ingenium, nam neq; parum facetus scurra Sextus Næuius, neque inhumanus præco est unquam existimatus. Dissimulatio sine amarore: Sæpe (ut fit) quum ipse te cõfirmasses, quum statuisses de pecunia mentionem facere, quum paratus meditatusq; uenisses, homo timidus uirginali uerecundia subitò ipse te retinebas, excidebat repente oratio: quum cuperes appellare, non audebas, ne inuitus audiret. Id erat profecto. Ridet Næuium impudètem. Subiectio: Appellandi tempus non erat? at tecū anno plus uixit. In Gallia agi non potuit? at in prouincia ius dicebatur, & Romæ iudicia fiebant. Interrogationes minuta,

nuta, non illæ graues atq; acerbæ. Quid enim nunc agit Sextus Næuius? qua de re controuersia est? quod est hoc iudicium, in quo iam bienniū uersamur? quid negotij gerit, in quo ille tot & tales uiros defatigat? Summissæ altercationes: Pecuniam petit. Nunc deniq;? Verūtamen petit? audiamus. De rationibus & controuersijs societatis uult dijudicari? Serò. uerū aliquando tamen, cōcedamus. Transitus ad docilitatem cōparatus: Docui quod primum pollicitus sum C. Aquili, causam omnino cur postularet, non fuisse, quod neq; pecunia debebatur: & si maximè deberetur, commissum nihil esse quare ad istam rationem perueniretur. Attende nunc ex edicto prætoris bona P. Quintij possidere nullo modo potuisse. Attentionis petitio: Quod abs te C. Aquili, & à uobis qui adestis in cōsilio, quæso ut diligenter attendatis. Iocus: O' hominem fortunatum, qui eiusmodi nuncios, seu potius pegasos habeat. Acutæ ac tenues serè sunt dicacitates & facetiæ. Fictiones leuium personarum, ut fratris Clodiæ: Quid tumultuaris soror? quid insanis? quid clamore exorsa & uerbis paruam rem magnam facis? Vicinum adolescentulum aspexisti, candor huius te, & proceritas, uultus oculiq; perpulerunt. Sæpius uidere uoluisti, fuisti nonnunquam in iisdem hortis uisa nobilis mulier. Illum filium familias patre parco ac tenaci habere tuis copijs deuinctū non potes. E' Cicerone sumito quæ sequuntur. Ingressus ad parandum: Atque ut facilius intelligere possitis Iudices ea quæ facta sūt, indigniora esse, quàm hæc quæ dicimus, ab initio res quemadmodum gesta sit, uobis exponemus. Distributio, Tres sunt res, quātū ego existimare possum, quæ obstant hoc tempore Sexto Roscio, crimen, aduersariorum & potentia, & audacia. Criminis confictionem
accusa

accusator Erucius suscepit, audacie partes Roscij sibi poscerunt: Chrysogonus autem is, qui plurimum potest, potentia pugnat. Blanda reprehensio: Queso Eruci, ut hoc in bonam partem accipias, non enim exprobrandi causa, sed commonendi gratia dicam. Si tibi fortuna non dedit, ut patre certo nascere, ex quo intelligere posses qui animus patrius in liberos esset, at natura certe dedit, ut humanitatis non parum haberes. Significatio leuitatis: Nam illa opinor tu quoque concedis leuia esse atque inepta: Conuiuia cum patre non inibat, quippe qui ne in opidum quidem nisi perrarò ueniret. Domum suam istum non ferè quisquam uocabat. Nec mirum, qui neque in urbe uiueret, neque rure uocaturus esset. Verùm hæc quoque tu intelligis esse nugatoria. Secura cōcessio. Esto, causam proferre non potes: tamen si statim uicisse debeo, tamē de meo iure decedā, & tibi quod in alia causa non concederem, in hac concedam, fretus huius innocentia. Vereor ne in numerandis tam multis figuris sim molestus. Ex his quas diximus, alias generis eiusdem intelligere promptum est. Quidquid humile est ita, ut neque dignitate sententiæ præcellat, neque compositam & ornata[m] elocutionem magnopere desideret, neq; clamores uelit, neq; uehementes impetus, sed sit ferè è sermone populari, et earatione tum sentiendi, tum loquendi, quam uidemus in grauioribus comœdijs: in eam formam de qua nunc agitur, optimo iure includendum puto. si tota causa proposita sit eiusmodi, ut de finibus regundis, de stillicidijs, de seruitute prædiorum, tota subtiliter agenda. si pars à parte dissentiat, aliter & aliter exponenda. Vnā cum re uerba & figura & compositio crescunt.

Summus orator consuetudinem imitatur, & ab indi-
 sertis re plus quàm opinione differt. Illi sermo purus
 est, & emendatus, non ita fœdus & enormis, ut ad barba-
 risinum solæcisumq; deueniat. Est enim flagitiū quod-
 dam barbarè loqui, et indignum uiro liberaliter instituto.
 Quod qui affectant, ut quasi famuliares esse uideantur, ex
 oratorum numero sua se uoluntate eximunt. Ex illis uerbo-
 rum generibus, quæ priore libro in ordines descripsimus,
 ut quū opus esset, in usum uocarētur, assumit Latina, quo-
 niam frustra petuntur ornamenta prodigiosæ linguæ, quæ
 primis ingressibus omnium disciplinarū sit exclusa. Assumit
 humilia multa, nempe quibus ad explicandam rem tenuem
 in hominum cœtu citra deformitatē possit uti. Urbani esse
 debent, & ingenui moris, nō illius rusticanæ uastitatis, quæ
 ab humanitate semota est. Deligit pudica, nitida, usitata,
 propria. Priscis & nouis utitur raro. Illa ad grandiloquen-
 tiam, hæc ad suauitatem potius accommodantur. Sæpius
 exilia quàm sonantia, parua quàm grãdia, uolubilia quàm
 tarda, lenia quàm aspera inducit. Nunc integris, nunc con-
 cisis agit, ut usitata loquendi cōsuetudo persuadet. Id quò
 facilius rudes intelligant, agemus exemplo. Operæ precium
 erat, si animaduertistis Iudices, negligentiam eius in accu-
 sando considerare. Credo quum uidisset qui homines in
 hisce subsellijs sederent, quæsiisse, num ille aut ille de-
 fensurus esset: de me ne suspicatum quidem, quòd antea
 causam publicam nullam dixerim. Postquam inuenit ne-
 munem eorum qui possunt & solent, ita negligens esse cœ-
 pit, ut quum in mentem ueniret ei, resideret, deinde spa-
 ciaretur, nonnunquam etiam puerum uocaret, credo cui

cœnam imperaret, prorsus ut uestro confesso & hoc conuentu pro summa solitudine abuteretur. Aud. hic puram & inassuetam loquendi consuetudinem, sermone populi tersiorem, summa grauitate multo summissicrem, uerba nec impudica, nec sordida, nec inusitata, nec impropria, nec strepentina grauitè, nec incedentia superbè, nec tardè repètia, nec cōcurrentia asperè. Humilia quædam, ut hæc, Nonnunquam etiam puerum uocaret, credo cui cœnam imperaret. Reliqua de medio sumpta, quæ omni dicendi formæ, sed aliter & aliter composita, & figuris, & grauioribus uerbis ornata conueniant. Tenuis orator (inquit Cicero) modò sit elegans, nec in faciendis uerbis erit audax, & in transferendis uerecundus & parcus: & in priscis reliquisq; ornamentis & uerborum & sententiarum demissior, translatione fortasse crebrior, qua frequentissimè sermo omnis utitur, non modò urbanorum, sed etiam rusticorum. Idem paulò pòst: Utatur uerbis quàm usitatissimis, translationibus quàm mollissimis. Habito uerborum delectu, qua ratione iungat illa: dicendum est. Ne tantum laboret in coagmentatione, quantum solent ij, qui molliter uelut per æquabile spacium feruntur. Si fortè compositio lenis occurrit, cur illam recuset oblatam, non uideo. Sin illa (quod frequenter accidit) remoratur abire cupientem, partem componit, partem coagmentare negligit. Duæ plures uel hiant uocales, aliquot etiam consonantes rixantur horridè: ferat, si modò sententia bona sit, & illi propria atque dilucida uerba respondeant. Non eiusmodi compositionis Cicronem puduit: Simul atque ego in Siciliam ueni, mutatus est. Venerat ad eum illo biduo Letilius quidam, homo non alienus à literis. Itaque eo iste tabellario semper usus est. Is epistolas complures attulerat. In his

unam

unam domo, quæ totū immutaret hominem. Repente cœ-
 pit dicere se omnia Verris caussa uelle, sibi cum eo amicitia-
 tiam cognationemq; esse. Vides ut in hoc sermone frequēs
 sit hiatus è concursu uocalium, ut paulò pòst aspera com-
 missura consonantium. Erant qui putarent Letilium lega-
 tum à Verre uenisse, qui gratiam, amicitia, cognationemq;
 cōmemoraret. Sint breues periodi, si non semper, plerunq;
 tamen: mēbra parua, numerus tenuis, ut qui sit ex iābo fre-
 quēte, ex pyrrhichio, choræo, trochæo. Non intelligo hos
 solū cōgredi pedes (omnes enim reperiuntur in tenuitate
 dicendi) sed cæteris grauioribus multo frequētiore esse,
 ut in hac oratione: Si me uillicus tuus solus deiecisset, non
 familia deiecisset, ut opinor, sed aliquis de familia. Rectè
 igitur diceres te restituisse? Quid enim facilius est, quàm
 probare ijs qui Latine sciunt, in uno scrulo familie no-
 men non ualere? Si uerò ne habeas quidem scruum, præ-
 ter cum qui me deiecerit, clames uidelicet: si habeo fa-
 miliam, à familia mea fateor te esse deiectum. In gracili
 figura (quoniam lingue cottidianæ finitima est atq; pro-
 xima subtilitas) non circunducuntur in pompam nume-
 rosæ comprehensiones, nec grandia membrorum corpora
 funduntur, nec frequentantur ampliores numeri qui plena
 modulatione sensum demulceant. tantū compositio su-
 perat attritum Latine loquentiū morē, & paulo ornati-
 us atq; lautius accipit audiētes. Assuescendum igitur optimo
 generi sermonis, & lingua sic utē dum iam sub præcepto-
 ribus, ut Latine, purè, propriè, dilucidè, cōpositè loquaris.
 Quum sermo fuerit incorruptus & proprius, ut illorum
 qui & expeditè & eleganter cōfabulantur, ad exprimen-
 dum characterem humilem, parū admodū laborādum est.

Inueniendæ sunt multæ & acutæ sententiæ, quales edunt prudentes & exercitati, ne leuitate rerum oratio tota eleuetur. De medio uerba sumenda sunt, ac diligentius paulo metienda quàm in familiarium sermone. Quicquid exturgescit, quicquid ampullosum est & affectatum, quod priscum & inusitatum, quod audacter nouatum, quod audaci figura modificatum, quod insolens, quod nimium graue, quod effœminatum & elumbe, quod dissimile sui, quod obscurum & abditum, quod infinitum immensumq; hoc est, nimia tractum circunductione, fugiendum est. Illum dicendi purissimum candorem multis in locis habuit eloquentiæ Latinæ princeps, habuit & Cæsar in hac parte (meo iudicio) Cicconi uel æquandus, uel præferendus. De uiribus eloquentiæ non dico, de linguæ proprietate, & recta quadam uenustate loquor, in qua uel iudice Tullio summus fuit Cæsar. Hoc genere floruit temporibus nostris Desiderius Erasmus, cuius opera multa sunt acutè subtiliterque conscripta, pauca uerò senilia, quæ ex industria deiecit infra dignitatem puræ & candidæ tenuitatis. Apud eum copiosus & enucleatus est sermo, sententiæ crebræ ac minutæ, ioci multi, nec ingrati sales: uerba bona atque usitata: figuræ plurimæ, nec abhorrentes ab usu frequenti. Ambitus ita contracti, ut spiritum maiorem non desiderent. Numerus sæpe nullus, sæpe pressus ac uenustus. Omnia quæ suscepit, docet, & dilucidiora nō ampliora facit. Laudabilia sunt hæc omnia in oratore, cui statutum est, humilem, sed tutam dicendi rationem consecrari. In acutis oratoribus alij fuerunt impolitī, ut Lysias quum scriberet orationes quas haberent pro se rudes & illiterati. Alij (cum Ciccone dicam) in eadem iciuinitate concinniores, id est faceti, florentes etiam & leuiter

Et leuiter ornati, qui in hoc solum genere uersabantur. Alij qui nihil cedebant his elegantia, et quum uellent, aut medium genus, aut supremum facile rapiebant: quorum facultas eloquendi, quia maior est, et rerum uarietati decentior, ingenuis animis potius capeffenda est. Opus est imitatione, quæ quod præceptis deest, implet: et quod habent præcepta, confirmat. Quos tibi proposueris imitandos, ab una aut altera sententia non iudicabis aut enucleatè, aut temperatè, aut grauius egisse: tua te ratio falleret: à toto corpore, uel à tota parte iudicanda est forma dicendi. . An ideo Vergilium tenuiter cecinisse bucolica dices; quòd uersiculus est tenuis,

Fronde super uiridi sunt nobis mitia poma?

Haud quaquam, sed illorum bonam partem humili materia et elocutione confecit. Interiecit aliquando optimos uersus, qui in canenda heroum maiestate non dedeçant. Nolo igitur leonem æstimes ab unguibus. Perpende quantum sit earum rerum de quibus agitur, pòdus, sint ne graues, an leues. uide quàm uerba sint quæ sita: an sumpta de sermone uulgari, an longius altiusue ad ornatum petita. Contemplare qui sit habitus figurarum, sint ne cottidianæ formæ, an raræ et eximie. Considera quæ ratio componendi, an contexta sit firma coagmentatione, et numeris expleta, an uerò dehiscat iunctura, et subinde numerus abruptatur. Hoc modo faciliè cognosces in quo genere collocanda sit omnis oratio. Sed et nos iuuandi gratia referamus ad exilem tenuitatem quæ repunt humi, non oratoria quidem, sed uel soluta, uel poëtica. Sic enim planius fiet quale sit delineamentum macilentæ figuræ. Ad hanc formam pertinent epistolæ familiares, quæ aliquam modò artem limamq; subierunt. Sunt enim tres species episto-

larum. Aliæ de rebus magnis & grauibz agunt ornatè & copiosè, & ab orandi facultate, quas possunt, accipiunt uires, eoq; dignitatis attolluntur, ut ad hunc quasi plebeium ordinem referri non debeant. Aliæ sunt tam uiles & abiectæ, ut nullo ordine censcantur. Aliæ cultæ & elegantes, tenues tamen & expressæ, quæ in elegantium postremo loco sederunt, quippe quæ non alio conduntur artificio, quam leuioribus causis, & controuersis minores. His adde rerum gestarum narrationes, non omnes quidem, sed quæ rectè & nudè quod uolunt persequuntur, quales sunt commentarij Cæsaris. Alij commentarij, cuiusmodi fuerunt M. Varronis, & antiquorum, quibus exponebantur elegantia ac opes linguæ Latinæ, simplices erant & faciles, quod adhuc fragmenta demonstrant: & nouissimo ordine contenti, non aucupabantur pueriles delicias, & uoluptates illas effœminatæ, quibus exarserunt posteri. Relinquebant illam floridam suauitatē Gellijs, Ausonijs, Politianis, Rhodiginis, Beroaldis, Crinitis, & id genus scriptoribus, qui antequam ad rem ueniant, quantum possint in arte dicendi, in pompa ac proludio ostentant, & inani digladiatione morantur indoctos. Malim ueterum compositionem masculam & frugiferam, quamuis aliquando tenuem, quam istorum bellas petitiones, & artificiosas, sed sæpe inutilē palestram. Qui uerecundiore fuerunt ingenio, ut Donatus & Seruius, atque interpretes multi, eas ediderunt annotationes, & ea commentaria, quæ summissè narrarent quam haberent ipsi de uerbis & rebus alienis sententiam. Stylus ille mea sententia decet interpretem, rhetoricantem uenustior æqualitas, & oratio paulo compositior, ut quæ uel medium attingit, uel mediocritati quam extremæ gracilitati propior est. Ex poematis gracilia sunt

lia sunt Bucolica, Comœdiæ, Mimi, Epigrāmata de rebus minutis. Ampliora quædam par est assurgere, odae quæcunque canunt amores, molles risus, blandas uoluptates, conuiuia, iocos, lususque iuuentutis. Quibus est materia grauior, ut deus, ut diui, ut heroës, ut pugiles uictores, ut certamina, si rebus æquari uolunt, tantum debent assurgere, quantum rebus ipsis dignitatis accrescit. Lyricis carminibus iuueniliter lasciuiuentibus addantur elegi, & unâ cum illis in extremis ordinibus sedeant. Item epistolæ amatorie, cuiusmodi scripsit Ouidius Naso, Syluæ depressioris argumenti, Satyræ magna ex parte, quamuis in illis mira sit inæqualitas. Ad hæc batrachomyomachia, culices, mulæ gallicæ, hortuli, & siqua sunt opuscula iocosa quidem, sed non indigna quæ legantur, uix eam de qua loquimur, excedunt gracilitatem, etiamsi uerborum magnitudine nonnunquâ tumescunt. Nec heroici, nec tragici poëtæ semper alta capiūt sublimes. Homerus aliquando repit, ut quum facit induentem membra Telemachum: & Euripides in colloquio uiliū personarum, comico sæpe similis est. Est quum boni poëtæ res humiles, at solertes, ut apes, exornant honore uerborum: quod quū accidit, ad mediam propè dignitatem character assurgit. Sæpenumero audio qui dicant in Virgilianis carminibus nullum se reperire discrimen, omnia grande quiddam sonare, bonis uerbis schematisq; uarijs scatere, in omnibus autorem eodem conatu laborasse. Isti mihi non uidentur habere neq; sensum, neque rationem, qui de rebus ac uocibus tam absurdum ferunt iudicium. In Aeneide sunt descriptiones locorum, temporum, personarum, conuiuiorum, ludorum, præliorum, magnifici apparatus, euentus acerbi, orationes Iouis & numinum, legationes, conciones, querelæ, conso-

lationes. quid quaeso tale tantumq; in agricultura, aut in humilitate pastoralis? Vter est sublimior? an qui rusticorum sermones refert, an qui decorum, heroum, magistratuum, rerumq; maximarum decora alta perspicit et obseruat? In Aeneide uerba splēdida, translata, figuris innouata, longē petita, sublimia, ornata, scitē contexta, sonātia, & (in summa dicam) tantum excultis ingenijs, & totius humanæ uitæ peritis familiaria. In Aeglogis quid est quod opilio non intelligat, præter illa pauca quæ poëtæ sibi indulgent uel ut à doctis legantur, uel ut ueterum morem referant, uel ut seruēt temporum decorum? Constat enim rem pastorem quondam in honore maximo fuisse, & in ea uersatos esse uiros egregios, qui non ignorarent scientiam naturæ: quæ ratione motus Virgilius (ut mihi uidetur) intexit non exposuit multa quæ Physici disputata suis libris reliquerunt. Sunt hæc maiora uulgo rusticorum, quod significat hoc uersiculo Maro,

Sicelides Musæ paulo maiora canamus.

Quamobrem ut rara sunt, non efficiunt artem pecuariam cō maiestatis ascendere, quò heroicæ grauitatis amplitudo peruēnit. Errant igitur qui per ignorantiam sic iudicant. Errant etiam uersificatores illi, qui omnia canunt eodem modo, & quantum possunt, tantum ubique conantur, & idcirco existimant falsò pari uirtute summos niti poëtæ. Quæ sit cuiusq; generis proprietas, hic dicerem si de arte poëtica scribere statuissem: sed aliud est propositum negotium: quapropter ad mediam eloquendi formam uenio.

De mediâ figura.

CAPVT XX.

Quæ temperatæ mediæ quæ elocutioni materia supponatur, quæ uerba, et quæ species cōpositionis debeat

ceat illam materiam, paucis exponemus deinceps, & si fuerit opus, ad eam rem utemur exemplis. In hoc genere sunt aut totæ controuersiæ, aut membra causarū. De partibus primum loquamur, quibus cognitis difficile nō erit de causa tota iudicare. Exordium, quo dicenti cōciliantur auditores, nec concitatum & ardens esse uult, ne bacchari uideatur inter sobrios: nec contrā languidum ac frigidum & iacens, ne statim initio auertat illos, quorum mentes ad mouere causæ debuerat. Amat igitur quietū & temperatum, sed elegans & cōpositum dicendi genus. Quod si nō ostentat suas opes, quoniam illud principio sit odiosum, attamen ut sit aliquid quo moueantur animi, sententias bonas exornat occultius, & uerecunda moderatione sibi quærit auctoritatem. Id esse uerum demonstrant exordia Ciceronis, quæ si non omnia cadunt in eandem formam (nam sunt alia uerecundiora, ut pro Sexto Roscio: alia audentiora, ut in Verrem: alia sollicita magis, ut pro Milone, & pro Cluentio: alia secura, ut pro Cecinna: alia alio modo composita) tamen nullum est in omnibus, si iustam magnitudinem seruat, quod non gracilitate maiorem præ se ferat dignitatem. Nec si confirmat idem totas sibi causas subtiles & tenues fuisse, propterea existimandum est omnia ab illo subtiliter esse dicta, id pro dignitate fieri non potuit, sed multo maiorem partem controuersæ humili ornatu fuisse contentam. Nam principium orationis pro Cecinna multo numerosius est, quàm pro eodē argumentatio: quumq; medium non sit in hac arte punctum, quod pari interuallo distet ab extremis, sed longè pateat oratorum medium: quod diximus principium, medio uero quàm termino demissio propius est. Quamobrem ad illud genus esse referendum uidetur. Non ignoro proæmua

maiorum causarum longis ambitibus expleri solere, & ad grandiore[m] quandam eloquentiam perduc[i]: sed liceat mihi quæ medio proxima sunt, aut non ita certè procul absunt, ad medium referre. In exordijs optimos quosque plurimum niti, argumento sunt illorum præfationes, qui cogitationes suas monumento literarum tradiderunt. Si qua pars operis apud illos culta & expolita suum ostendit artificem, illa uel maximè ostendit. Nemo est ferè qui nesciat malum esse gubernatorem, qui statim impegit in portu. An non impingit ille, qui principio quictas aures procella horridulæ orationis offendit? Id ne quispiam committat, Cicero præcipit in Oratore, ut summus orator uestibula honesta, aditusque ad causam faciat illustres. Ne moueat illud, In principia non uenire pulcherrimos ornatus, qui locis communibus adhibentur. Non efficit ut sint humiles ingressus, sed quodammodo frugi, & uerecundi. Non desunt tamen initia quæ ex abrupto incipiant, & grauissimè commoueant aduersarium: ut Ciceronis illud in Catilinam: Quousque tandem patientia nostra abutèrè Catilina? Pertinent hæc ad subline genus, in quo summas eloquentiæ uires effundit orator. Summissiora in ordine secundo ponuntur, non omnia quidem persimilia, sed interuallo modico segregata. Sunt quidam aditus perangusti, ideoque humiles appellandi: quos si quis inter procœmia constituit, longè extendit procœmij nomen. Sunt autem huiusmodi: Antequam de Republica P. C. dicam ea quæ dicenda hoc tempore arbitror, exponam uobis breuiter cõsiliu[m] & profectio[n]is & reuersio[n]is meæ. Paruis de rebus, sed fortasse necessarijs consulimur P. C. de Appia uia & de moneta cõsul, de Lupercis tribuni plebis referunt. In hoc genere ferè sunt illa parua exordia, quæ in

quæ in medijs causis per sepe reperiuntur. Non enim fiunt ad alliciendos animos, ne abhorreant à causa, sed ad distinguendas partes orationis, & ad colligendos sensus, ut remissa attentione cetera patientius exaudiant. In media suauitate sunt & multæ narrationes, ut quæ plus dignitatis desiderent, quàm doloris. Est enim quum uel personam, ut egregium uirum, uel rem, ut locum, urbem, situm, regionem, præclare facta dicta uel exornare exponendo contendat orator. Non abiicit orationem, ne rerum dignitati multum detrahat humilitas. Non mouet tonitrua & tempestates acerbæ dictionis, quia non ea res ad dicendum proposita est, quæ concitare uelit asperas amplificationes, et tragœdiarum querelas. Ornatum querit & suauitatem, cui mirum in modum quadrat æquabilis & profluens oratio, qualis est hæc: Fuit apud Segestanos ex ære simulachrum Dianæ, tum summa atque antiquissima præditum religione, tum singulari opera artificioq; perfectum. Hoc translatum Carthaginem, locum tantum hominesq; mutarat: religionem quidem pristinam conseruabat. Nam propter eximiam pulchritudinem, etiam hostibus digna quam sanctissime colerent, uidebatur. Aliæ quot seculis post P. Scipio bello Punico tertio Carthaginem cepit: qua in uictoria (uidete hominis uirtutem & diligetiam) ut & domesticis præclarissime uirtutis exemplis gaudeatis, & eo maiore odio dignam istius incredibilem audaciam iudicetis, conuocatis Siculis omnibus; quòd diutissime sepiissimeq; Siciliam uexatam à Carthaginensibus nouerat, iubet omnia conqueri, sibi pollicetur magnæ curæ fore, ut omnia ciuitatibus quæ cuiusquam fuissent, restituerentur. Plurimæ sunt aliæ apud autorem eundem, in quibus uiua medijs generis imago expressa est.

Eas autem facile cognoscet, qui non modo rem de qua agitur, cuius sit dignitatis, sed etiam numerosum & affluens eloquendi genus explorabit. Aliæ sunt expositiones, quæ sine graui motu rem aliquam inculcât iudicibus, quæ si non fuerit intellecta, nec causa bene agi, nec argumentationes institui poterunt. Illa referimus ad tenuem formam, propterea quòd maximè docere uolunt, non animos permouere affectibus, quod est summæ grauitatis: non delenire uoluptate, quod proprium est temperatæ elocutionis. Dissentire Quintilianus uidetur. Sic enim ait quarto libro Institutionum, Ego uerò (neq; enim dissimulabo iudicium meum) quanquam id quod sum dicturus, exemplis magis quàm præceptis ullis continetur, narrationem, ut si ullam partem orationis, omni qua potest gratia & uenere exornandam puto. Non dissentit autem. Est in Cesare gratia & uenustas, est in Terentio multa, etiam in narratione, ut quum facit exponentem Simonem Pamphili uitam. Vterque tamen in ino genere uersatur. Sunt & subtilitati suæ uenustates. Ergo idem in nono sic iudicat: Membratim plerunque narrabimus, aut ipsas periodos maioribus interuallis, & uelut laxioribus nodis resoluemus, exceptis quæ non docendi gratia, sed ornandi narrantur, ut in Verrem Proserpinæ raptus.

Quid est narrare membratim, aut periodos resolvere, nisi suaue & tractum dicendi genus in summissius magisq; familiare deducere? Quòd si quis opinatur eum in alia sententia fuisse, & illi suffragatur, licet quidē per me: aliter tamen dixisse Cicronem comperiet etiam in causis publicis, si quando maximè cuperet docere Iudices quid esset in controuersia. Itaq; narrationes aliæ sunt graciles & pressæ, aliæ graues & atroces, aliæ uberes & affluent
tes. harum

tes. harum discrimina fecere primum materiæ diuersæ, deinde rerum uarietatem induit ornatu uario eloquētiæ decorum. In confirmationem & refutationem, cui sæpius acuta subtilitas adhibetur, etiā cadit res charactere medio signanda, ut quum officia demonstrat orator, quum spaciatur in loco communi, & auditoribus subministrat uoluptatem, quum testem, aut litigatorem, aut amicum magnificè commendat, quum laudat illustres personas, & egregia facta, quum dat autoritatem aduocatis, quum gratulatur alicui, quum extollit uictorum instituta, quum mitigat iram uel iudicium, uel aliorum, quum argumentationes munit sententiarum dignitate, quum asseuerationibus dicta roborat, quum honesta præfatione inducit alioquin acerba & amara dictu, quum describit aliquid non ut historicus, sed ut exornator earum rerum quæ causam faciunt ampliorem, quando similitudines confert ad ornandum magis quàm ad probandum, quum illustrat exempla rerum gestarum, quum depræcatur addito colore, quum pulchritudine uerborum tegit rerum deformitatem: in summa dicam, quotiescunque res utilius est aut decentius, æquabiliter, temperatè, ornatè, copiosè, suauiter dici: in termedio generi materia reperta est. Hæc omnia patefacere exemplis, nisi me molesta prolixitas retardaret. facile est à Ciccone excipere. Refertæ sunt orationes eius omnium rerum uarietate, nec sinunt alumnum suum esurire exemplorum inopia. Quod, inquit, in accusationis septem libris non reperitur genus? quod in Habitu? quod in Cornelij? quod in plurimis nostris defensionibus? Quæ exempla selegissem, nisi uel nota arbitrarer, uel posse eligere qui quæreret. Nulla est enim ullo in genere laus orationis, cuius in nostris orationibus nō sit aliqua si nō perfectio

fectio, at conatus tamen atq; adumbratio. Hac figura totas serè delineauit orationes, ut pro lege Manilia, pro M. Marcello, pro Sulpitio in legatione mortuo, ex quibus quantum uoles exemplorū, tantū licebit excerpere. Habes encomia, laudationes, panegyricos, orationū parteis præter leues iocos ad delectationem comparatas: quæ omnia tametsi nonnihil differunt, ut parciore & abundantiore cultu, tamen in unam propè formam tendunt omnia. Habes sententiæ graues dictas in Senatu, habes perorationes non illas dico lugubres miserabilesq; , non ardentes accusatoris incendio, sed quæ uoce moderata dignitate quadam propositum efficiunt, ut, Non debeo C. Cæsar, quod fieri solet in tantis periculis, tentare quoniam modo dicendo misericordiam tuam commouere possim. Nihil opus est. Occurrere ipsa solet supplicibus & calamitosis, nullius oratione euocata. Propone tibi duos reges, & id animo contemplare, quod oculis non potes: dabis profectò misericordiæ, quod iracundiæ negauisti. Multa sunt clementiæ tuæ monumenta, sed maximè eorum incolumitates, quibus salutem dedisti. Quæ res mediam quærant ubertatem, satis dictum puto. Quibus uerbis & quo genere componendi debeant exprimi, tandem mihi dicendum est. Verba legantur honesta, urbana, usitata, graui, sonantia, grandia, uolubilia, lenia. In illis quædā antiqua, & noua quædam, plura tamē maximè propria, quorum omnium rationes superiore libro copiose diximus. Schemata quædam pulcherrima (nisi quādo uerecundius & summissius agitur, ut in exordijs frequēter) adiscantur. Sint crebræ translationes, quibus nihil est iucundius, nisi quum longius petuntur. Frequentetur hypallage, & allegoria, & (ut cum Cicerone dicam) ex contrarijs sumpta

pta uerbis, crebra crebris, paria paribus respondeant: relataq; ad idem uerbum, & geminata, atque duplicata, uel etiam saepius iterata ponantur, constructioq; uerborum tum coniunctionibus copuletur, tum dissolutionibus relaxetur. Sic iungantur in coagmentatione, ut neque asperos habeant concursus, neque disiunctos atque hiantes. Nam iūctura lenis & æquabilis habet suauē quiddā, quo maxime commendatur hæc forma. Expleantur numeri, & ad aurium uoluptatē circumfrātur ambitus multo crebriores, quā uel in humili, uel in sublimi genere dicendi. Subijciamus exemplum, in quo si quæ diximus, non sunt omnia (quis enim tam breuiter amplectatur omnia?) non pauca tamen generis huius ornamenta licet intueri. Multas quidem C. Cæsaris uirtutes, magnas incredibilesq; cognoui. Sed sunt ceteræ maioribus quasi theatris propositæ, & penè populares, castris locum capere, exercitū instruere, expugnare urbes, aciem hostium profligare, hanc uim frigorū, hyememq;, quā nos uix huius urbis tectis susinemus, excipere, his ipsis diebus hostē persequi, tum quum etiam fræ latibulis se tegant, atque omnia bella iure gentium conquiescant. Sunt ea quidem magna. Quis negat? Sed magnis excitata sunt præmijs ad memoriam hominum sempiternam. Quo minus admirandum est eum facere illa, qui immortalitatem concupiuerit. hæc mira laus est, quæ non poëtarum carminibus, non annalium monumentis celebratur, sed prudentum iudicio expenditur. Equitem Romanum, ueterem amicum suum, studiosum, amantem, obseruantem sui, non libidine, non turpibus impensis cupiditatum, atque iacturis, sed experientia patrimonij amplificandi labeutem excepit, corruere non siuit, fulsit & sustinuit, re, fortuna, fide, hodieq; sustinet

sustinet: nec amicum pudentem corruiere patitur, nec illius animi aciem perstringit splendor sui nominis, nec mentis quasi luminibus officit altitudo fortunæ & gloriæ. Sint sanè illa magna, quæ re uera magna sunt: de iudicio animi mei ut uolet quisq; sentiat: ego enim hanc in tantis opibus, tanta fortuna liberalitatem in suos, memoriam amicitie, reliquis uirtutibus antepono. Quam quidem uos Iudices in nouo genere bonitatem inusitatam claris ac præpotentibus uiris, non modò non aspernari & refutare, sed complecti etiam & augere debetis. Hic si dicentis artem inspicere uoles, contemplator ut in iunctura uerba uerbis cohæreant, non omnia quidem, sed, quod satis est, plurima. Deinde uoce modulator ambitus, ut auribus sentias quàm prona uolubilitate decurrant. Iam animaduertito, ut magna ex parte uerba sint grandia, sonantia, suauiua, plena maiestatis, alia propria, alia translata. Videto etiam figuras. Reperies paria paribus relata, similiter cadentia, similiter desinentia, repetitiones uerborum, & quæ Græcè dicuntur ἀνισθητα, sententias, imagines, similitudines, amplificationes crebras, comparationes maiorum & minorum. Quid? Orationem omnem sic probabis, ut non quæras neque suauiore, neque pulchriorem, nisi fortè cupis effœminatum quoddam genus recentiorum, qui ne quid usitato more dicant, toti exundant diminutionibus uerborum, adiunctionibus nouis & insolentibus (intelligo simplicium & compositorum figuras) derivationibus inauditis, itemq; metaphoris & translationibus tam ridiculis, ut nō tam seuerè loqui, quàm cum pueris infantibus, aut sannionibus blandiusculè molliterq; balbutire uideantur. Nolumus hunc characterem, qui uiro graui sit indignus. Seruent eandem rationem loquendi utentes populi

populi lingua, ab omnibus fatui & dementes habebuntur. In media figura suauitas optima est, si modò retinet masculam dignitatem. Quod dulce qui sine fūco retinere nescit, utatur compositione aspera & uirili potius, quàm æquabili, & curata. Qui dulciores esse uolunt, hoc assequuntur molli coagmentatione, uolubili numero, uerbis lenibus & urbanis. Quibus magis arridet amara oratio, illa quæ dixi, parcius degustant. Inde fit ut hæc forma nonnunquam sit aptior & cultior, nonnunquam horridior, & inculta magis: id quod ex ijs quæ proximè dicemus, intelligetur. In medio sedent encomia, & panegyrici, in quibus est dulce orationis genus, & solutū, & effluens, et uerbis sonorū. In eadē sede statuuntur historiæ eloquentia uestitæ, quæ sæpe asperè bellicū quiddam sonāt, ut Liuianæ. Statuuntur epistolæ, quæ ultra speciē tenuitatis assurgunt: cum his ornati & diligenter exculi sermones rerū maximarū, quales sunt M. Tullij de philosophiæ partibus, & Plinij de historia naturali. Itē quædam commētaria rebus et uerbis illustria, Epigrammata digniora, Ode argutiores, ut quæ diuū & herouū nomina celebrāt, Satyrarū loci graues de moribus, si modò sine cōtentione transiguntur, carmina de natura, ut Lucretij de arte physica, ut Hesiodi & Vergilij de agricultura. Aeneis est ut opus Homeri, in quo si quis opinatur unū modò genus esse sublimē (quod pleriq; sunt arbitrati) à recta uia recedit, & turpiter aberrat. Treis eloquendi species imitatus est Homerus, in Menclao tenue, in Nestore mediū, ut idē postea Cicero in Catone sene, in Vlysse arduū & copiosum. Idem facere conatus est Vergilius apud quē Drances callidè dicit et ueteratoriē more subtilium, Rex Latinus utitur oratione tēperata & senili, Turnus ardet

impetu & atrocitate. Apud eundem Venus & Iuno orationes habent ad Iouē. hæc inflammata cōtendit acriter, illa blandior summissius agit. Eandem ne formæ rationem putabimus? An Aeneas, Sinon, & Dido, eodem modo loquuntur? Sunt in illo poëmate uersus humiles, ut illi,

Et simul his dictis faciem ostentabat, & udo
Turpia membra fimo: risit pater optimus olli.

Alij intermedij & compositi, ut hi,

Hæc finis Priami fatorum, hic exitus illum
Sorte tulit, Troiam incensam, & prolapsa uidentem
Pergamæ, tot quondam populis terrisq; superbum
Regnatorem Asiæ. —

Alij graues atq; peracerbi, ut

— Num linquere castra

Hortati sumus? aut uitam committere uentis?

Num puero summam belli, num credere muros?

Tyrrhenam ue fidem, aut gentes agitare quietas?

Quis deus in fraudem, quæ dura potentia nostra

Egit? ubi hic Iuno? demissa' ue nubibus Iris?

Subinde magnus hic poëta pro rerum uarietate mutat figuram, nec ulla est bona atq; laudabilis, qua suo loco non utatur. Quamobrem tam uaria poëmata in unam aliquam formam reduci non debent. Illam styli mutationē poëtis esse prouinciauit optimus iudex M. Tullius. An ego Homero, inquit, Ennio, reliquis poëtis, & maxime tragicis cōcederē ut ne omnibus locis eadē cōtentione uterentur, crebroq; mutarent, nonnunquā etiam ad cottidianū genus sermonis accederent, ipse nunquam ab illa acerrima contentione discederem? De poëtis hætenus. Nec enim illud est nostræ contemplationis: quamobrem omittamus in præsentia, & ueniamus ad summum dicendi genus.

De sum

De summo genere dicendi. CAP. XXI.

Summu genus orationis aliud est eloquentiæ Romæ
 næ principi, aliud hominibus parum & illiberaliter
 artibus institutis. Hi quicquid sententiarū dignitate con=
 spicuum, uerborū flore iucundum, figuris insignibus pi=
 ctum, iunctura molli & numeris pulchrè fluentibus aptū
 est, grandiloquum ac sublime esse falso crediderunt. Totus
 Cicero, totus Linius, totus Vergilius sublimis est istis. Ac=
 cedat & quicunq; nomine literarū celebrem famam ex=
 tendit in multos. Nesciunt turpe esse paruo pedi circun=
 dare calceum magnum, similes pictoribus ineptis, qui re=
 ges uiridi colore, rusticos auro circumlinunt. Ergo Iso=
 crates rhetor suauissimus grandior Pericle, et Demosthe=
 ne fulminibus orationis Græciam permouente: & Cicero
 quum dictione ardenti perturbat inimicos, laudatoribus
 cedit, & fortis uir ac ferox in armis prolusione gladiato=
 rum minor est. Quæ si quis absurda putat, summo credat
 oratori operosiorem esse pugnam quàm palæstram, seria
 quàm ludos, securitatem quàm anxios tumultus. Arduum
 genus est (ut ille iudicat) grandiloquum, amplum, uche=
 mens, ornatum, uarium, copiosum, graue, acre, ardens,
 ad permouendos & conuertendos animos instructum &
 paratum. Hoc intonat, hoc fulminat, hoc commouet sen=
 sum, hoc animum perfringit, quod uult inserit, quod
 cupit euellit, graui accumulat, humilia et modica asper=
 natur, plurima frequētat, uerbis pugnat acerbis, & figu=
 ris atrocibus. Illi sæpe multus literarum hiatus, dura co=
 agmentatio syllabarū, ambitus pauci & sonantes, incisa
 ac membra longè plura, numerus minus suauis quàm ue=
 hemens, actio tragica, tota dictio atrox & cōcitata. Quid
 opus est pluribus? Tantū discrimen est inter hoc & duo

genera superiora, quantũ inter leues cõslictus, & cruentum periculosumq; prælium. At non omnis habitus grauis est huiusmodi. Nam quum duæ sint affectuum species, una mouëtium indignationẽ, altera misericordiã, quumq; sublimis oratio in utraq; dominetur, dulcior est ad misericordiam, amarior ad indignationem: hæc accusatori, illã defensori magis accommodata. Vtraque forma in exordium cadit. Vt enim accusator, sic quoque defensor debet affectus. Accusatorem cum dico, quicumque crimen obijcit, etiam si defensoris partes sustinet. Defensorem, qui purgat obiectum. De indignatione sit hoc exemplum ex tertia actione in Verrem: De impudentia singulari, quòd adest, quod'que respondet, sunt qui mirentur. Mihi propter eius audaciam, atque amentiam, ne hoc quidem mirandum uidetur. Multa enim & in deos, & in homines impiè nefarie'que commisit, quorum scelerum poenis agitur, & à mente consilioq; deducitur. Agunt eum præcipitem poenæ ciuium Romanorum, quos partim securi percussit, partim in uinculis necauit, partim implorantes iura libertatis & ciuitatis in crucem sustulit. Rapiunt eum ad supplicium dii patrij, quòd iste inuentus est qui è complexu parentum abreptos filios ad necem eijceret, & parentes precium pro sepultura liberũt posceret. Religiones uerò ceremoniarq; omnium sacrorum sanorum'que uiolatæ, simulacrã'que deorum, quæ non modo ex suis templis ablata sunt, sed etiam iacent in tenebris ab isto retrusa atque abdita, consistere eius animum sine furore atq; amentia non sinunt. Alia facies est misericordiæ. tractior enim, & languidior, qualis est hæc, Hoc profectò tempore eam potestatem omnem uos habetis, ut statuatis, utrum nos, qui semper uestræ authoritati dediti

dediti fuimus, semper miseri lugeamus: an diu uexati à
 perditissimis ciuibus, aliquādo per uos, ac uestram fidem,
 uirtutem sapientiamq; recreemur. Quid enim nobis duo=
 bus laboriosius, Iudices? quid magis sollicitum, magis ex=
 ercitū dici aut fingi potest? qui spe amplissimorum præ=
 miorum ad Rempub. adducti, metu crudelissimorum exi=
 tiorum carere non possumus. Est atrox & inuidiosa nar=
 ratio, quæ graui imprimitur caractere, qualis est hæc,
 Ipse inflammatus scelere & furore in forum uenit. Arde=
 bant oculi, toto ex ore crudelitas emanabat. Expectabant
 omnes quò tandem progressurus, aut quidnam acturus
 esset: quum repente hominem proripi, atque in foro me=
 dio nudari ac deligari, & uirgas expediri iubet. Clama=
 bat ille miser se ciuem esse Romanum, municipem Cosa=
 num, meruisse se cum L. Precio splendidissimo equite Ro=
 mano, qui Panormi negociaretur, ex quo hæc Verres scia=
 re posset. Tum iste se comperisse ait, eum speculari cau=
 sa in Siciliam ab ducibus fugitiuorū esse missum: cuius rei
 neq; index, neq; uestigium aliquod, neq; suspicio cuiquā
 esset ulla. Deinde iubet undiq; hominē proripi, uehemen=
 tissimēq; uerberari. Cædebatur uirgis in medio foro Mes=
 sana ciuis Romanus, Iudices, quum interea nullus gemitus,
 nulla uox alia istius miseri inter dolorem crepitumq;
 plagarum audiebatur, nisi hæc, Ciuis Romanus sum. Hac
 se commemoratione ciuitatis, omnia uerba depulsurum,
 cruciatumq; à corpore deiecturum arbitrabatur. Is non
 modò hoc non perfecit, ut uirgarū uim deprecaretur, sed
 quum imploraret sæpius, usurparetq; nomen ciuitatis,
 crux, crux inquam infelici & ærumnoso, qui nunquam
 istam potestatem uiderat, comparabatur. O nomen dulce
 libertatis. O ius eximium nostræ ciuitatis. O lex Porcia,

legesq; Semproniae. O grauer desiderata, & aliquando reddita plebi Romanae tribunitia potestas. Aliquando rei acerbitate comotus orator in media narratione acriter exclamat, Nubit genero socrus, nullis auspicijs, nullis autoribus, funestis omnibus omnium. O mulieris incredibile scelus, & praeter hanc unam in omni uita inauditum. O libidinem effrenatam & indomitam. O audaciam singularem, non timuisse, si minus uim deorum, hominumq; famam, at illam ipsam noctem, facessq; illas nuptiales? non limen cubiculi? non cubile filiae? non parietes deniq; ipsos superiorum testes nuptiarum? Perfrigit ac prostrauit omnia cupiditate ac furore. Vicit pudorem libido, timorem audacia, ratione amentia. In confirmationibus saepe regnat haec uis. Posteaquam rem omnem probauit orator, quaerit agentis affectum, uehementer amplificat, & totus ardescit, ut Cicero quarto libro in Verrem agens de re Sopatri: Etenim si illud est tam flagitiosum (quod mihi omnium rerum turpissimum, maximeq; nefarium uidetur) ob rem iudicandam pecuniam accipere, precio habere addictam fidem & religionem: quanto illud flagitiosius, improbius, indignius, cum a quo pecuniam ob absoluendum acceperis, condemnare? ut ne praedonum quidem Praetor in fide retinenda consuetudinem conseruaret. Scelus est accipere ab reo, quanto magis ab accusatore? quanto etiam sceleratius ab utroque? Fidem quum proposuisses uenalem in prouincia, ualuit apud te plus is qui pecuniam maiorem dedit. Concedo, forsitan aliquis aliquando eiusmodi quippiam fecerit. Quum uero fidem ac religionem tuam alteri addictam pecunia accepta habueris, post eandem aduersarijs tradideris maiore pecunia, utrumq; scilicet? & trades cui uoles?

& ci

Et ei quem sefelleris, ne pecuniam quidem reddes? Quem
 mihi tu Bulbum, quem Stalenum? quod unquam huius=
 modi monstrum aut prodigium audiimus aut uidimus?
 Qui cum reo transigat, post cum accusatore decidat:
 honestos homines qui causam norint, ableget, consi=
 lioq; dimittat: ipse solus reum absolutum, à quo pecu=
 niam acceperit, condemnet, pecuniam que non reddat:
 hic de capite libero iudicabit? huic iudicialis tabella com=
 mittetur, quam iste non modò cœra, uerùm etiam sangui=
 ne, si uisum erit, notabit? In hac oratione si uim pondusq;
 rerum, si crebras amplificationes, si uerba graua & co=
 piofa, si figuras acres, si casim pugnantem numerum
 iterum atque iterum inspicias, uidebis expressam sum=
 mæ eloquentiæ imaginem, & nihil in hoc genere præ=
 stantius desiderabis. Similem grauitatem interim capiunt
 argumenta, ut illa pro Sexto Roscio, Quid si accedit eo=
 dem, ut tenuis antea fueris? quid si ut auarus? quid si ut
 audax? quid si ut illius qui occisus est, inimicissimus? num
 querenda causa quæ te ad tantum facinus adduxerit?
 Adde sis quæ sequuntur. In communibus locis frequens
 est hæc ardens contentio. Amplificatio enim in illis ma=
 ximè excellit, quibus citra personas in uitia moris est per=
 orare, ut illa Ciceronis tantopere laudata de supplicio
 parricidarum. Vis eadem est quibusdam personarum fi=
 ctionibus, ut huic, Mulier, quid tibi cum Cœlio? quid
 cum homine adolescentulo? quid cum alieno? Quid aut
 tam familiaris huic fuisti, ut aurum commodares: aut tam
 inimica, ut uenenum timeres? Non patrem tuum ui=
 deras, non patrum, non auum, proauum, atauum au=
 dieras consules fuisse? non deniq; modò te Q. Metelli
 matrimonium tenuisse sciebas, clarissimi & fortissimi

uiri, patriæq; amantiſſimi? qui ſimul ac pedem limine ex-
tulerat, omneſ propè ciueſ uirtute, gloria, dignitate ſu-
perabat. Reliqua peteſ ex fonte. Eadem ratio eſt ſi muta
quædam loquentia inducat, ſi interpellatorem coërceat,
ſi irascatur, ſi obiurget, ſi excretur, ſi rem atrocem di-
cendo ſubijciat oculiſ, ſi rem ſuprà ferat quàm fieri poſ-
ſit, ſi inſignem uel improbitatem uel calamitatem perſea-
quatur affectu. Ad hæc perorationeſ multæ grauiffimæ
ſunt, quoniam in illiſ conſumuntur affectuſ. Suppeditat
exempla Cicero pro Flacco, pro Sylla, pro Milone, pro
Rabirio Poſthumo. Quid, inquit, de miſerationibuſ lo-
quar? quibuſ eò ſum uſuſ pluribuſ, quòd etiam ſi plureſ
dicebamuſ, perorationē mihi tamen omneſ relinquebant.
Idem de altero genere concitato: Quo genere noſ me-
diocreſ, aut multo etiam minus, ſed magno ſemper uſi
impetu, ſæpe aduerſarioſ de ſtatu omniſ deicimus. Si le-
gaſ actioneſ in Verrem, orationeſ pro Cluentio, & pro
Rabirio perduellionis reo, concioneſ in Seruiliuſ Rul-
luſ, diſtioneſ in Catilinam, in Piſonem, in Clodium,
in Antoniuſ: tantam uim, tantam copiam, tot conten-
tioneſ, tot amplificationeſ, tot ardoreſ eloquendi repe-
riat, ut non modò ad intelligendum, ſed etiam ad imitan-
dum ſatiſ ſupràq; eſſe putes. Sæpenumero atrocitate fa-
cti accendit iram iudicibuſ. Sæpe tanto dolore perſun-
dit, ut in mœrorem lachrymaſq; ſoluātur. Frequenter in-
uidiam excitat uerbiſ, frequenter excitam contraria fa-
cultate reſtinguit. Aliquando trahit eoſ in ſummum ad-
uerſarij contemptuſ. Idem nec rarò contemptū euellit,
in eiſ locuſ exiſtimationē dignitatēq; reſtituit. Nemo
inflammat maioreſ odij faceſ, nemo ardentioſem chari-
tatem parit alitq; animiſ. Spe confirmat abiectioſ. Metu

comprimūt audaces . Quos uult implet satietate . Satiatos iritat cupiditate . Nullo modo (sic ipse de se loquitur) animus audientis aut incitari , aut leniri potest , qui modus non ab ipso si nō perfectus , tamē tentatus sit . Querat aliquis , an in omnibus his affectibus commouendis utendum sit ardua contentione ? deinde an in his duntaxat utendum ? Affectus est lenis , qui Græcè dicitur ἱσος , ad naturam , & ad mores , & ad omnem uitæ consuetudinem accommodatus . Huic exprimendo aptior est illa suauitas æquabilis , quam mediam collocauimus . Eius rei sit hoc testimonium : Hoc onus si uos aliqua ex parte alleviabitis , feram ut potero studio & industria Iudices . sin à uobis (id quod non spero) deserat , tamen animo non deficiam , & id quod suscepi , quoad potero perferam . Quod si perferre non potero , opprimi me officij onere malo , quàm id quod mihi cum fide semel impositum est , aut propter perfidiam abijcere , aut propter infirmitatem animi deponere . Quieta oratione patefacit suos mores . Indignationis & misericordiæ perturbatio , nisi leuissima est , ac citò prætercurrit , uim grauitatis , & amplum dicendi modum quærit . Sunt alia quæ dicuntur & grauiissimè , & copiosissimè , ut sententiæ quædam philosophorum , ut deorum laudes , ac uirorum illustrium , ut consilia de rebus maximis : quæ si quis alta atque sublimia faciet , haud equidem repugnabo : disilicet tamen ab opinione Ciceronis , qui iudicet hæc & similia , etsi omneis flores orationis , & ornamenta insignia recipiunt , quia tamen secura sunt atque tranquilla , & componere animos potius quàm perturbare uolunt , in media ratione formarum collocanda . Nec statuet ille discrimen inter summum pugnae frensus incendium

dium & pompam celebrium ludorum. Deinde non animaduertet in summis oratoribus habitum neminem, qui sic ornate & copiose dixisset, sed qui cœtum totum, quæ confectum perturbasset affectibus, & in admirationem stuporem, quæ duxisset. Genus illud quietum, & omnibus rebus excultum, nisi comparatus fuerit hic fortis & acer orator, summum, & dignitate primum uidebitur. At ubi pedem fecerit, & atrociter pugnaverit, facile obtinebit primus, & quietè certantes cum suis armis aureis relinquet in medio. Non enim est summum, quo sublimius aliud inuenitur. Sublimius in oratione, quod omnibus præripit uictoriam. Fuerunt oratores acerbi, qui omnia traherent in contentionem, & ideo graues ubique uiderentur: sed istud erat potius asperæ naturæ, quam doctæ & artificiosæ facultatis. Hactenus de materia contentionis, in qua amplificatio dominatur. Ad amplificandum (teste Cicerone) maxime definitiones ualent conglobatæ, & consequentium frequentatio, & contrariarum & dissimilium & inter se pugnantium rerum cōflictio, & causæ, & ea quæ sunt de causis orta, maximeq; similitudines & exempla, fictæ etiam personæ, mutæ deniq; loquantur. Omninoq; ea sunt adhibenda, si causæ patitur, quæ magna habentur. Hæc ille. Verba ponenda sunt sublimia, grauius, translata, sonantia, aspera ac uolubilia in commouendo, lenia & tarda in mitigando. Figuræ autem, relata uerba, iterata, duplicata, gradationes, frequentationes sine coniunctione, exclamationes, interrogationes plurimæ, commorationes in eadem sententia, ironiæ acerbæ, descriptiones quæ rem atrocem subijciant oculis, prosopopœiæ, hyperbolæ, & si quæ sunt aliæ conformationes, quæ magnis lateribus accommodantur. Coagmentatio in cōmiseratione
ne minime

ne minimè hiulca sit & aspera. Nam modi flebiles decli-
nant ad suauitatem, ideoq; ferunt membra atque circui-
tus paulò proceriores, quàm indignantium fulmina. Vos,
uos appello fortissimi uiri, qui multum pro Repub. san-
guinè effuditis: uos in uiri et in ciuis inuicti appello pe-
riculo, Centuriones, uosque milites: uobis non modò in-
spectantibus, sed etiam armatis, & huic iudicio præs-
identibus, hæc tanta uirtus ex hac urbe expelletur, exter-
minabitur, eijcietur? Quanto magis dolor accrescit, tan-
to crebrior est respiratio. Quod in me tantum facinus ad-
misi Iudices, quum illa indicia communis exitij indagau-
i, patefeci, protuli, extinxi? quid me reducem esse uoluistis?
an ut inspectante me expellerentur ij per quos essem re-
stitutus? Petit commiseratio numeros amplos, & graues,
ut dactylos, spondæos, creticos, pæanas, bacchios, palim-
bacchios, dochmos, & alios, si qui sunt generis huius pe-
des, qui uoce plena querelas, tarditate spaciorem languo-
rem metiantur. Id quale sit, perspice in hac oratione: Sed
ut omnium uel suspicioni, uel maleuolentiæ, uel crudelitati
satisfiat, occultat pecuniã Posthumus, latent regiæ diuitiæ.
Ecquis est ex tanto populo, qui bona C. Rabirij Posthu-
mi nummo sestertio sibi addici uelit? Sed miserum me,
quanto hæc dixi cum dolore? Hem Posthume, tu'ne es Cu-
rij filius, C. Rabirij & iudicio & uoluntate filius, natura
sororis filius: tu'ne ille in omnes tuos liberalis? cuius mul-
tos bonitas locupletauit: nihil profudisti, nihil ullam in li-
bidinem contulisti. Tua Posthume nummo sestertio à me
addicuntur? O meum miserum accerbumq; præconium. At
hoc etiã optat miser, ut condemnctur à uobis, ita bona ue-
neant, ut solidū suum cuiq; soluatur. Nihil iam aliud nisi
fidem curat, nec uos huic, si iam obliuisci uestre māsuetu-

dinis uolueritis, quicquam præterea potestis eripere. Quum mouetur indignatio, pedes asperi, ut qui à breuibus assurgūt in longas, aptiores sunt: cæsim membratimq; dicitur, rara interiacet comprehensio: concurrunt uocales, copulantur quedam inimicæ consonantes. Indignum hoc uideo uideri omnibus Iudices, & id iam priore actione, quum hæc testes dicerent, intellexi. Retineri enim putatis oportere iura libertatis, non modò hic, ubi tribuni plebis sunt, ubi ceteri magistratus, ubi plenum forum iudiciorum, ubi senatus autoritas, ubi existimatio populi Romani & frequentia, sed ubicunque terrarum ac gentium uiolatum ius ciuium Romanorum sit, statuitis id pertinere ad communem causam libertatis & dignitatis. In externorum hominum, & maleficorum, sceleratorumq; in prædonum hostiumq; custodias tu tantum numerum ciuium Romanorum includere ausus es? Nunquam ne tibi iudicij, nunquam concionis, nunquam huius tantæ frequentiæ, quæ nunc animo te iniquissimo infestissimo quæ intuetur, uenit in mentem? Nunquam tibi populi Romani absentis dignitas, nunquam species ipsa huiusmodi multitudinis in oculis animoq; uersata est? nunquam te in horum conspectum rediturum, nunquam in forum populi Romani uenturum, nunquam sub legum iudiciorum quæ potestatem casurum esse putasti? Multus in transcribendis exemplis fui, ut indoctiores, qui falso putant generi summo quærenda esse uerba nescio quæ noua, insolentia, inaudita, abstrusa, admiranda, obstupescenda, cælo posita, intelligerent de medio uerba legi, & pro rerum natura componi solere. Audiant hæc uerba Ciceronis in persona Crassi: Non sunt alia sermonis, alia contentionis uerba, neque ex alio genere ad usum cottidianum, alio
ad scen

ad scenam pompamq; sumuntur, sed ea nos quum iacentia sustulimus è medio, sicut molliſſimam ceram ad nostrum arbitrium formamus, & fingimus. Itaq; tum graues sumus, tum subtiles, tum medium quiddam tenemus. Prima seueritas est in rebus, altera in figuris, alia in pondere uerborum, proxima in copia, quinta in respiratione crebra, & numero uehementi. Nec omnia quærenda sunt in omnibus, nec in paucis aut rebus aut uerbis statuenda uis uniuerſa eloquẽtiæ primæ. Toti loci peruolutandi inſpectandiq; sunt. Et quoniam multa sunt omnium orationum uerba communia, ab ijs quæ principatum tenet, appellatio ducenda est. In arduam formam conſpirat epistoſe inuectiue, reſcriminatoriæ, lamentatoriæ, et exhortatoriæ quædam. Item permultæ historicorum conciones, ex quibus aliæ grauiter accusant, aliæ uehementer exhortantur, aliæ deplorant calamitates, aliæ mitigant inſenſos. Item bona pars tragœdiarum, à quarum motu, qui cum impetu feruntur affectibus, tragœdias excitare dicuntur. Tandem quicquid est in alijs poëmatis ſimile tragœdiarum, poterit eodem genere comprehendendi. Dico ſimile tragœdiarum, quod re grauiffimum, perſonis conſpicuum, ſimili tractatur apparatu.

Quæ genera locis, temporibus, artibus,
ingenijs, conditionibus mutata ſint.

CAPVT.

XXII.

Quoniam tribus formis omnem eloquendi rationem includi uolumus, ſtatuendum quò reduci debeat genus Aſianum, Rhodium, Laconicum, Atticum, antiquum, nouum, robuſtum, naturale, acerbum, diligens, ſanctum, ſeuerum, come, ſophiſticum, philoſophicum, historicum, aridum,

aridum, candidum, sanum. Hæc & similia dici constat aut à loco, ut Rhodium : aut à tempore, ut antiquum: aut ab artibus, ut dialecticum: aut à conditione uitæ, ut umbratile: aut ab ingenio, ut diligens. Asianum pingue fuit & opimum ac redundans. pingue quidem & adipale illiberali sono uocum, redundans & inflatum ociosa rerum & uerborum repetitione uel copia, cuius uestigia adhuc agnoscas in Galeno celebri medico, cui patria fuit urbs Asiæ Pergamus. Is digressionibus longis, parumq; frugiferis, & eisdem sententijs inculcandis penè obtundit aures, bonus & insignis medicus, malus ac uitiosus orator. Laconicum summa breuitate compendiosum fuit, nec tam oratorium, quàm imperiosum & superbum. Laudanda breuitas quædam, ut Sallustiana, non illa quæ nihil unquam nisi rerum summas leuiter attingit. Eloquentia enim ampla & copiosa & illustris esse uult, quorum nihil est in laconismo. Vtemur interdum quum multa paucis amplecti uolemus, siue temporis angustia id facere cogent, siue perstringemus historiam, siue agemus sententiosè, siue in aliquo uolemus immorari, siue putabimus esse eiusdem artificis, idem dilatare uerbis, & in uerbum contrahere. Atticum omnium primum est atque optimum. Nam quicquid est in oratione sanum, syncerum, uenustum, rotundum atque perfectum, id siue humile, siue sublime, siue medium sit, ab Atheniensium lepore uocatur Atticum. Id quale sit, orationes Demosthenis ostendunt, quo ne Athenas quidem ipsas magis credit fuisse atticas Cicero. Inter Atticum & Asianum fuit Rhodium, illo deterius & inurbanius, hoc uerò melius, et minus ociosum. Nam Rhodi quondam magna ingenia ac magnæ artes floruerunt, sed quæ Atticæ facundie facile darent primas. Antiquum La
tini

tini dicunt illud quo ueteres utebātur, ut Cethegus, Gracchi, Cato, & alij multi adusq; tempora Antonij & Crassij. In eo uerēda quaedam maiestas antiquitatis, quā etiamnum uidemus in fragmentis quibuscūq; ceterum uerba horrida, cōpositiō hiulca, numerus ferē nullus, sententiæ graues & sanctæ, non tamen affluentes et copiosæ. In illo genere fuerunt alij tenues, alij mediocres, alij grauium similes & arduorum: quāquam eloquentia tum Rome suā habebat infantiam, nec satis erat instituta Græciæ præceptis. Excelluerunt postea Crassus, Antonius, Hortensius, Cicero: uisi omnes eloquentia maiore, quæ tum noua, nūc autem antiqua uobis uidetur. Quæ subsequuta est, plus habuit tumoris & insolentiæ, candoris autem & puræ lingue minus. Robustum etiam neruosum dicitur, & forte. Sententias habet ualidas & graues, & quæ uehementer urgent aduersariū, affectus multos, uerba lecta & bona, nec tam compta molliter, quā comminus in aduersarium pugnantiā, compositionem uirilem, & quæ non elumbat sententias. Cōtrarium est molle, imbelles & solutum, quali usus est Isocrates in Encomijs & Panegyricis. quod si est (iudice Tullio) pompæ quā pugnae aptius, gymnasijs & palæstræ dicatum, spretum et pulsum foro: ualet in exornationibus, & locis amœnis: robusto cedat in forensi et senatoria seueritatē. Est aliquando blandē solutēq; dicendum, & rebus ad uoluptatem comparatis suum reddēdum genus. Quamobrem tametsi sæpius, non tamen semper est robusto locus, nisi robustum uocetur quicquid non est fractum & effœminatum. Hoc enim modo robustum forteque est, quod Isocrates optimus rhetor scriptum reliquit. At robur et uires maximē sunt in acuta ac pugnaci argumentatione, & in affectuum perturbationibus: quæ duo
ad affr

ad afficiendos animos uoluptate minimè necessaria sunt. Naturale dicimus quali utebatur Antonius. Præclare quædam et acutè differebat, sed eius oratio non sapiebat scholas et doctrinam. Erat instructa popularibus sententijs. Multa communi sensu perficiebat, et usu dicendi. Quæ hauserat à fontibus scientiarum, sic fundebat dissimulâs, ut à natura profectæ uiderentur. Verba erant usitata, sermo propè cottidianus. Tota dictio aut naturalis, aut quasi naturalis. Est etiam naturale in oratione laudabili, quicquid ab arte non gignitur. Multa autem parit natura citra disciplinam, sicuti terra fecunda citra cultû. Quum accessit ars ut cultus, non cuius promptû est iudicare, quid naturæ, quid arti tribuendum sit, et eò minus, quod scriptores artis omnia redigunt in præcepta. Hinc fit ut plerique nihil non referant in artem, quod Cicero dixerit scripserit uel in orationibus. Sed hoc nihil ad negotium præsens. Illud est instituti nostri, omnem elocutionem artificialem esse, sed illam uideri naturalem, quæ rectam et in affectatam loquendi consuetudinem propius imitatur. Quid est quod Ciceronem dicimus habere naturæ plurimum? Multa gignit ut uena diues, genita uestit habitu quodam expressiore, et sic mittit in lucem, ut captu populari colligi possint. Hoc dictionis genus etsi meræ cuiusdam artis est, dicimus tamen esse naturale, quia à consuetudine (quæ altera natura est) non abhorreret. Dissimile est illi quod res in medio positâs odit, et longè abditas obscurasque petit sententias, quodque uerbis insolentibus et ordine præpositero gaudet, usitatum loquendi morem, ordinemque rectum tanquam infantilem et ineptum fugit. Acerbum et amarum ex translatione dicitur aut quod rusticum est atque durum, aut quod maximè pungit et urget aduersantem.

Quod

Quod sit uel quum summo iure agitur, uel minime quæq; res amplificatur in summum scelus, uel dignitati nō paratur, uel dictio & eloquēdi ratio insuauis est, & aspera auditu. Rustico non est utendum, nisi fortè per imitationem. Alioqui acerbo utuntur oratores quando recedunt à suauitate, & horridius quod uolunt insequuntur. Aduersatur huic suauis oratio & dulcis, ex elegancia & iucunditate uerbum sonātium & lenium, & ex eorum coniunctione, quæ neq; asperos habeat cōcursus, neq; disiunctos atq; hiantes. Itemq; ex rerum noua & inaudita copia, uel ea quæ uoluptate animum capere potest. Diligēs oratio, quæ faciunt ad rem, sedulò colligit, accuratè collocat, pulchrè & aptè loquitur, leuia reijcit, confusionem & segniticm uitat. Negligens stylus ex contrario prætermittit etiam optima, neq; in rebus neq; in uerbis quantum potest elaborat. Sanctum non uiolatur ulla colluione popularium opinionum, sed puram sinceramq; ueritatem sine dissimulatione, sine fūco, sine ambagibus detegit, & non tam lingua quàm incontaminata mente sibi querit auctoritatem. Hoc genus penè à caufidicis relegatum est ad philosophos atq; sapientes. In eius locum successit callidum, uafrum, astutum, fallax & dolosum quoddam simulachrū sanctitatis antiquæ, quod simplicitatem præ se fert, occultat insidias. Seuerum & come diuersam habere naturam uidentur. Seuerum nihil facîle condonat, come propensius est ad clementiam. Hoc rerum discrimen uideas in orationibus Cæsaris & Catonis apud Sallustiū. Cæsar ut est ad lenitatem propensior, ita in pœnam coniuratorum mollior est. Vitæ parcit, custodias decernit. Cato natura seuerus, labentes animos restituit in fortitudinem, & rempub. à perditis ciuibz liberandam esse censet.

Vides'ne

Vides ne ut Cicero multis in locis suos mores amabiles conetur ostendere? qui ardeat amore ciuium suorum, qui nihil non suscipiat de repub. qui contemnat impetus malorum, qui tueatur bonos, qui persequatur improbos, hoc est qui hæc & alia generis eiusdem oratione significet? Nihil eiusmodi sibi faciundum existimet Cato. Alios alia decent, & hinc uariatur eloquendi genus. Sophisticum, est genus orationis omnibus ornamentis coloribusq; depictum, quo ueteres utebantur rhetores, ut Gorgias & Isocrates, quos atas illa appellauit sophistas. Hi ab eo qui medio genere utitur in foro, nihil differunt, nisi quod in omnem apparatus magnificentis sunt profusiores. Iudicialis orator parcius & uerecundius adhibet delicias & ornatum. Hoc quale sit, intelliges si contuleris Isocratis orationes cum orationibus Demosthenis. Illum cultum et quietum, hunc expeditum & pugnacem reperies. Illum certantis in pompa simule, hunc autem manum consentantis in prælio. Philosophicum genus, ut Platicum, describit hoc modo Cicero: Mollis est oratio philosophorum, & umbratilis, nec sententijs nec uerbis instructa popularibus, nec iuncta numeris, sed soluta liberius: nihil iratum habet, nihil inuidum, nihil atrox, nihil mirabile, nihil astutum, casta, uerecunda, uirgo incorrupta quodammodo. itaq; sermo potius quam oratio dicitur. De historico supra diximus. Aridum autem ieiunum est & attenuatum inopia tum sententiarum, tum uerborum. Respondet ex aduerso succulentum & exundans tum rerum copia, tum orationis ubertate. Candidum est quod integritatem lingue Latine retinet. Item quod purum ingenuumque sententiarum colorem præ se fert. Non ita dissimile est sanum, quod nulla infirmitate debile est, sed ostendit consentien-

consentientem omnium temperiem, in qua nihil in pern-
 ciem alterius excedit. Possunt aliæ quædam stylorum
 proprietates inueniri, quæ non faciunt, ut plura sint
 eloquendi genera, quàm quæ prima diui-
 sione constituimus. Accidunt illis
 quidem, alium specie cha-
 racterem non effi-
 ciunt.

F I N I S.

